

50168/B

STURM, J.C.

C

Physicae modernae
senioris compendium
Altdorf 1704

J. Chr. Sturm


Physical modernae
Sanctorum's compendium

1704

STURM, J. C.



307965





PRÆFATIO BREVIS
Conventus ad Friburgensis
Patrum Benevolum Ordinis
LECTOREM.

Prædicatorum




Ula ratio me moverit,
huic, quod usui pu-
blico destinatum est,
Compendio, Physicæ
Modernæ, & Sanioris
quidem, cognomentum appropriare,
mox in Preliminarium Quest. IV.
& V. pluribus dicetur: Erotema-
ticum autem illud ideò appellari,
quod per quaestiones & *erotemata* id
Argumenti tractare nobis collubue-
rit, cum in propatulo sit; illud sal-
tem præmonendum hoc loco duxi-
mus.

X
Norimb. 1704.



mus, non eum in finem his quaestio-
nibus & erotematibus uti nos vo-
luisse, ut memoriâ eas complecti
Lectores nostros vellemus, κατηχισμὸν
quendam physicum interrogando &
respondendo, exhibituri; sed ut res
ipsas potius, familiaris hujus me-
thodi ope, judicio facilius compre-
henderent: unde factum, ut inter-
rogata & responsa non ubiq₂, imò
rariùs, succinctâ quadam brevi-
tate conciperemus, (quod omnino
fieri decuisset, si memoria magis di-
scientium, quàm judicio, consulere
fuiſſet animus) sed uberiore didu-
ctione in utrisq₂ plerumque utere-
mur. Nimirum, ut verbo rem di-
camus, non pueris hac scripta vo-
luimus, sed Tironibus, h. e. ma-
turioris jam judicii ingeniis.



PHY-



PHYSICÆ MODERNÆ SANIORIS PRÆLIMINARIA.

Quid Physicæ nomine solet intelligi?

Naturæ (τῆς Φύσεως) sive rerum naturalium contemplatrix Scientia.

I. *Quid Naturæ & rerum naturalium appellationibus indigatur?*

Per Naturam intelligimus tum Universalem istam corporum compagem seu rerum materialium Universitatem, quam Mundum, à pulchritudine appellamus; tum particularem cujusque dictorum corporum intrinsicam constitutionem seu internum operationum, principium. Res naturales appellamus (1.) Ipsa illa corpora, quæ singula naturâ suâ

A

par-

particulari gaudent, & Universalis Naturæ partes sunt, ideò *Naturalia corpora* vulgò dicta, & in *Totalia*, quæ vastum aliquem mundum, separatim exhibent, ut Terra, Luna, Sol &c. ac *partialia*, quæ globum ejusmodi totalem, tanquam partes componunt, velut aqua & terra sicca cum aëre ambiente & igne undique diffuso, tanquam elementa hujus Geocosmi, & quæ in istis continentur adhuc specialiora, tum animata, tum inanimata &c. commodè dividenda. (2.) Principia & causas illorum omnium, tum internas, *Materiam* & *Formam*, tum externas, *Efficientem* & *finem*, & cujusque speciatim, & generatim Universalium. (3.) Affectiones & proprietates, actiones & passionēs, & generales plurium, & speciales singulorum generum & specierum &c.

II. *Quo sensu igitur accipitur vox Scientia in definitione Physicæ superius data?*

Pro vario cognoscendi modo, quo res naturales memoratas apprehendere licet & pernoscere, nunc latius accipiendum est, nunc strictius, Scientiæ vocabulum. Quædam enim illarum rerum, ut ipsa corpora, eorumque varietates, effecta, passionēs & pha-

phænomena, observatione sensuali & experimentalis, sive sponte obviâ, sive cum cura studioque, præsertim instrumentorum noviter inventorum ope, institutâ innotescunt: quædam, ut ipsæ naturæ formæque singulorum particulares à sensibus in plerisque maximam partem absconditæ, rationis, phænomena & observata ista susque deque versantis riteque inter se conferentis, ope supponuntur veriùs & conjiciuntur, quàm infallibiliter demonstrantur: quædam denique, ut causæ proximæ observatorum effectuum, ratio & modus operandi evidenter imaginabilis, ex phænomenis & hypothesebus demonstrativâ methodo sic deducuntur, ut ex ipsa phænomenorum cum hypothesebus, & harum cum istis, consonante ubique correspondentia, per regressum quendam demonstrativum, ea quæ antea verosimiliter erant supposita, in veritatem ac certitudinem ipsam, quanta quidem in hoc rerum genere jure desiderari potest, evadant: Ut universa hæc Notitia sive Cognitio Physica, partim Experientia sensuali, partim Conjecturis verosimillimis, partim demonstrationibus & confirmationibus priorum mutuis evidentioribus, haut raro etiam (quod progressus docebit) evidentissimis ac indubiis, absolvatur, ab his adeò postremis,

tanquam potioribus , Scientiæ nacta vocabulum.

III. *Cur verò cum additamento, Contemplatrix dicitur hæc scientia?*

Quoniam omnis quidem Scientia contemplationem aliquam involvit, aliquæ verò talem quæ per se non expeteretur aut expetimeretur, nisi vel ad praxin humanam perficiendam, uti *Scientiæ* morales, inde *Practicæ* dictæ, vel ad effectiorem alicujus rei utilis aut necessariæ, uti Scientia Analytica ad genuinas demonstrationes conficiendas, aliæq; *scientiæ*, ideò *effectivæ* appellatæ, ad alios effectûs producendos conducerent; aliquæ verò per se humanam mentem solius etiam contemplationis suæ dulcedine capiunt, uti Mathematicæ Disciplinæ, Philosophia prima seu vera genuina Metaphysica; & cum his etiam Philosophia Naturalis, sive Physica, si maximè, nec ad temporalem corporalemque hujus vitæ felicitatem, nec ad humanas actiones, nec ad opus ullum efficiendum utiles essent: Tametsi reverà omnes interim ac singulæ, secundariò saltem & indirectè, usus egregios in utroque genere præstent.

IV. *Sed*

IV. *Sed quid vult sibi illud Physicæ Modernæ additamentum?*

Cùm Naturæ sit adeo vasta & inexhausta profunditas, & rerum naturalium scitu dignissimarum ingens adeò multitudo, ut omnis omnium seu præteritorum seu futurorum seculorum industria spem absolutæ omnibus numeris Scientiæ, absque temeritatis & arrogantiae nota, concipere nec possit nec debeat, sed priorum seculorum inventa & cogitata suis emendationibus & accessionibus augere & expolire posteriora quæque valeant ac teneantur; sanæ rationi utique consentaneum est, ut Scientiæ hujus compendium exhibiturus antiqua quidem, etsi magis manca, non spernat penitus, sed moderna tamen, jam ulterius expolita & explicatiora, auctiora longiusque progressa, præ istis exhibeat, suaque ipsius, si quæ habeat nova, istis superaddat; hoc præsertim ævo & organis ad investigandum idoneis, & methodo analyticâ magis quàm unquam excultâ, & Scrutatorum Naturæ mutuis auxiliis ac fideli communicatione felicissimo; quod unum etiam plus incrementi Physico huic studio, quàm decem aut plura præcedentia, dedit.

V. *Eccur autem non simpliciter
Physicæ modernæ, sed Sanioris, mentio
injicitur?*

Quia selectus etiam in Modernis habendus est. Sicut enim olim, inter cætera Philosophiæ Naturalis principia & decreta haut spernenda, Epicurus fortuitum atomorum suarum concursum, Aristoteles æternitatem Mortis & materiæ, alii alia Summi Numinis honori non parum derogantia statuerunt; ita nec hodie *Cartesii Cosmogonia*, quam soli motui materiæ primæ divinitus equidem universaliter impresso, deinceps verò sibi relicto tribuit, nec aliorum *principia Plastica Hylarchica, Cosmetores, Archæi &c.* citra Conditoris hujus Mundi & Rectoris Unici injuriam admitti posse videntur, nec, ut præteream alia plura, circa finem & Usus Philosophiæ Naturalis, etiam recentiores plerique sobriè satis philosophati.

VI. *Quis ergo verus & genuinus
Physicæ Scientiæ Scopus est & Usus?*

Vulgus hominum, quod ex utilitate corporis & fortunarum incrementis potius, quàm ex animi perfectione scientiarum quoque dignitatem & momenta æstimat, ideoque quæ
fortuna

fortunæ bonis tuendis, aut valetudini curandæ præfunt, iis quæ morbis animi medentur & vera supraque fortunam posita bona procurant longè anteponit, Physicæ quoque utilitatem eatenus agnoscit ac deprædicat, quatenus vel in Theologia exegetica Scripturæ S. loca plurima illustrat, vel in Practica homiliis Sacris egregiè exornandis uberri-
mam passim præbet materiam, vel in Jure dicendo quibusdam saltem casibus est neces-
saria, vel Medico futuro prima minimum & generalia fundamenta substernit, atque adeò consequenter (quia hæc à plerisque lucrandi panis magis quàm animi perficiendi gratia discuntur) corpori curando prodest. Enimverò hic Physicæ Scientiæ Usus, quantuscunque etiam fuerit, accidentarius tantum est ac secundarius, iis Unicè æstimatus, qui ceu dictum, certo studiorum generi, tanquam opificio cuidam, lucrandi panis ergo se addicunt; primarius autem, quem per se directè respicit, etiam tum futurus si nulla unquam aut Theologia revelata, aut Jurisprudentia Civilis, aut Medicina extitisset, & quem ii, qui bonis literis ac Scientiis animi perficiendi gratiâ se dedunt, expectant, hisce tribus comprehendendi formulis commodissimè videtur, quod inde discat industrius ejus cultor, *nôsse*


Seipsum, nôsse Mundum, & nôsse DEVM: quæ quidem quòd sola hominem reddere possint verè-eruditum ac temporaliter felicem, quod ineffabili demulcere mentem ejus voluptate queant, quod sterilem alioquin & exuccam hanc terram fœcundare verbique revelati seminibus (quæ non nisi in terra seu mente bona radican- tur & fructus ferunt) utiliter excipiendis egregiè præparare valeant, in progressu potius commo- do quoque loco demonstrare, quàm hic anticipando nunquam satis luculenter ostendere, consultum erit.

VII. Quo tandem ordine hac rerum naturalium contemplatio commodissimè instituetur, ad usûs prædictos eò certius obtinendos?

Varii variè distinguunt hanc operam, pro suo quisque gustu sensuve, quo abundare quemque meritò sinimus. Nobis hîc ea placet ratio, quæ communiter obtinet, quamque in Physicæ Conciliatricis conaminibus etiam tenuimus; ut nimirum Universam tractationem in tres partes, *Generalem, Specialem* ac *Specialissimam*, & harum quamlibet in suas Sectiones & Sectionum capita, dispescamus, in generali parte nimirum Universaliora & naturalibus corporibus vel omnibus,

bus, vel plerisque, vel pluribus saltem, communia pertractaturi, in speciali Mundum & sublunarem & supralunarem separatim contemplaturi, in specialissima denique sublunaris mundi particularia, tum inanima, tum animata, seorsim spectaturi, & hoc pacto specialioribus per generalia facem quasi prælaturi, & his vicissim per ista, ceu res ipsa cogit, pleniorē reddituri lucem.





PHYSICÆ MODERNÆ SANIORIS PARS GENERALIS.

SECTIO I.

De
Principiis & Causis Cor-
porum Naturalium.

CAP. I.

De
Principiis internis,
ac speciatim

De Communi omnium materia.

I. *Quid intelligimus per Corporum
naturalium principia?*



Eneratim ea omnia, quibus unum-
quodque illorum originem ini-
tiumque debet existentiae natu-
ræque suæ; quemadmodum e. g.
horologium aliquod originem
totamque essentiam suam acceptam refert,
partim

partim ligno aut metallo, ex quo partes ejus ac ipsum totum elaboratum est & efformatum; partim huic ipsi formationi partiumque coordinationi, à qua peculiare propriumque ejus munus præcipuè dependet; partim usui desiderato dimetiendorum temporum, cujus gratiâ elaboratum & excogitatum est, alioqui nunquam futurum; partim denique artifice formanti, formamque usui dicto accommodatam animo concipienti manibusque fabrefacienti.

II. *Quodnam verò notabilius est horum principiorum discrimen?*

Ut in artificialibus, ita in naturalibus etiam, formans seu *efficiens principium à quo* & *usus futurus sive Finalis causa*, (uti Scholæ loquuntur) *propter quam* operatur efficiens, aut quæ formantis operationem, ad talem vel talem formam determinat, extra ipsum corpus formatum sunt, imò sæpe hoc existente non sunt amplius, ideò *Externa principia* communiter dicta: *Forma verò per quam* & *Materia*, ex qua formatum quodque constat, & quibus absentibus non amplius esset futurum, *Interna* dicuntur, ipsam quippe rei factæ essentiam ingredientia.

III. *Ec-*

III. *Ecquanam ergo est naturalium corporum Materia?*

Quemadmodum artificialium corporum non una est eademque materia proxima, sed panem è farina, mensam ex asseribus, calceum ex corio, asseres ex arbore proximè formata esse constat; ita vaporem ex aqua, nubem aut rorem è vapore, segetes & plantas è seminibus & succo pluviali, pullum ex ovo ejusque contentis fieri & componi certum est, adeoque generatim indubium, quodlibet naturalium quoque corporum genus peculiarem quandam agnoscere *materiam* propriam quasi sibi & *proximam*, quam Scholæ *Secundam* etiam appellant, in aliis simpliciore, in aliis compositam mixtamque magis; prorsus iterum ad analogiam artificialium.

IV. *Numquid igitur, uti tot sunt materiae secundae, siue compositae, cuiq; generi propriae, ita simplex etiam aliqua datur, siue prima & communis omnibus materia?*

Sic visum sanè est quovis ævo philosophis & res ipsa flagitare jure censetur. Et enim, tametsi quasdam suas materias secundas & in quoque genere proximas ars ipsa sibi

sibi paret, ut corium, pannos, asseres, tegulas, lateres &c. has ipsas tamen ex aliqua materia secunda naturali tandem prodiisse, corium v. g. è pellibus animalium, pannos ex lanâ, asseres ex arboribus, lateres ex argilla & arena &c. certum est. Cum igitur quævis materia secunda naturalis sit corpus naturale suâ iterum formâ & materia simpliciore constans; aut in infinitum foret progrediendum (quod absurdum plerisque creditur,) aut in prima quadam & planè simplici materia est subsistendum, quæ physicam saltem formam nullam habeat, adeoque ex alia simpliciore vel priore composita non sit.

V. Non desunt tamen è Scholasticorum subtiliter omnia disceptantium turba, qui processum in infinitum adeò absurdum esse negent?

Quicquid sit de hac controversia generalius agitata, quam nostram facere non est animus; illud certè sanæ rationi evidentissimum est principium: Si analysis rei factæ nullum haberet finem, rei faciendæ Synthesin nullum quoq; habituram fuisse initium, & consequenter res fieri naturales nullas unquam, nedum factas esse, potuisse. Quis enim, quæso, concipiat ædes proximè finiendas aut
jam

jam finitas, quarum extruendarum nunquam factum esset initium, nec ullo tempore jacta fundamenta dicerentur? Si quis autem per impossibile fingat ædes tales, quarum suprema contignatio superextructa esset penultimæ, hæc antepenultimæ, illa inferiori alii, & hæc iterum alii in infinitum; nunquam certè talis analysis vel resolutio ad fundamentum esset, ne cogitando quidem, perventura, neq; adeò retrò synthesis aliqua vel compositio contignationum plurium successivè oriundarum vel cogitari posset. Ita similiter, cùm generentur plantæ, nascantur animalia, fiant adeò & facta sint actu ipso quædam corpora naturalia, quomodo, sodes, ad ultimam proximamque materiam & formam pervenire generationis processus potuisset, si initium à prima quadam ad secundam, ab hac ad tertiam & sic tandem ad ultimam, nunquam habuisset?

VI. *Dato nunc & comperto, quòd agnoscenda sit aliqua prima & simplex materia, num illa statim una & communis omnibus corporibus etiam agnoscenda?*

Posset fortasse videri cuipiam, ut in artificialibus e. g. omnia scriniariorum artificia unam communem primamque materiam habere

bent lignum , illa fabrorum ferrariorum ,
ærariorum similiumque , ferrum , illa pani-
ficum farinam , molitorum grana frumentaria
& leguminum &c. Sic in naturalibus aliam
materiam primam simplicemque supponi ge-
nerationibus viventium , rudimenta sc. orga-
nica insensibilia , in quibusdam feminibus
oculo saltem armato manifestè conspicua ,
aliam elemento aquæ omnibusque inde natis
concretionibus vaporum , nebularum , nubium ,
nivis , roris , pruinae , grandinis &c. particu-
las nempe pariter insensibiles , oblongas , te-
retes , politas & flexiles (quales in istius na-
turæ corporibus concipere suo loco docebit
analysis) atque adeò cæteris etiam elementis ,
nec non cuivis metallorum aliorumque fos-
silium generi peculiares suas , similiter figu-
ratas & conditionatas , particellas itidem in-
sensibiles , tanquam analogæ quædam istorum
corporum similarium semina , per analysin
chymicam semetipsa haut obscure prodentia ,
pro prima istorum communique materia ha-
beri posse. Verùm enimverò cum sic aliam
aliamque materiam in certo semper genere
primam istiusque generis individuis omni-
bus communem , admittere liceret , non pos-
set tamen earum ulla pro simpliciter prima
vel communi haberi , sed aliquam his ipsis
omni-

omnibus singulisque communem prioremq; supponere necessum est; quoniam particulæ memoratæ, in hoc aut illo genere primæ, manifestam arguunt sui compositionem ex aliis adhuc minutioribus.

VII. *Qualem igitur conceptum communis illius omnium corporum formatorum materie commodissimè formabimus?*

Physicè quidem consideratam neq; rectius, neque facilius eam concipiemus, quàm si vel (1.) mentis oculo spectandam congeriem omnium illarum minutiarum & seminiorum, sive organicorum sive inorganicorum, è quibus & viventia educari hodiernum, & elementa vulgaria aliaque similia primùm, deinceps autem per horum varias commixtiones reliqua gradatim magis composita corpora nata esse, partim horum analysis, partim evidens in plantarum seminibus autem, docet; Vel, si ultra hascè, utpote ex minutioribus adhuc corpusculis, ceu antè dictum, utique conflatas & compositas, ad majorem adhuc subtilitatem descendere lubeat (quod Physico, ut tali, in explicandis extantibus Naturæ phænomenis vix utile est aut necessarium) (2.) Congeriem corpusculorum incom-

incomprehensibiliter exiguorum, figuræ magnitudinisque variæ, soliditatis autem omnimodæ, quæ ex aliarum adhuc minutorum coalitu non prodierint, ipsæ verò in rudimenta illa viventium organica, & elementorum quasi seminia inorganica, aptis cujusque functioni commissuris, coäluerint; verbo talium atomorum, quales olim Democritus, Leucippus aliique dudum agnoverunt. Metaphysicè verò, sine externa etiam figura omnique termino (tanquam hic etiam formam aliquam constituat & compositionem qualemcunque arguat) abstractè spectata illa *anpa* corpuscula, mutuâ sui exclusionem & compulso moleculas seipsis majores, & his mediantibus partes paulatim grandiores &c. constituentia, substantiam nobis exhibent quasi continuam merè-realiterque extensam, partesque adeò extra partes, sibi invicem impenetrabiles habentem, consequenter in eas divisibilem varieque figurabilem, secundum has variè mobilem ac disponibilem &c. rem adeò essentialiter mereque passivam.

VIII. *Quid hinc pro Scopis Physicis primario superius indicato consequitur?*

(1) Materiæ hanc substantiam merè passivam, atque adeò ad agendum simpliciter

ineptam, multò minus suâ virtute existere si-
bique ipsi dare suum esse potuisse, (hoc enim
esset potentiae summè-activæ) sed agentî cui-
dam, & ipsi & universæ Naturæ corporeæ
(ex ea quippe demum oriundæ) contradistin-
cto, existentiam pariter & essentiam suam
debere.

(2) Hanc verò independenter ab alio
priori subjecto, ipsam quippe primum subje-
ctum, ortam & consequenter propriè loquen-
do *creatam* esse, *Creatorem* adeo infinitè-po-
tentem, ut opus opificem, luculenter arguen-
tem.

(3) Hunc eundem verò Creatorem omni-
potentem, ejusdem materiæ *primum* etiam
esse *unicumq; Motorem*, æquè in propatulo est;
sive ipsam cum continuitate productam in
minutias deinceps diffractam, sive sub exili-
um & actu ipso jam divisarum minutiarum
solidissimarum schematibus infinite - variis
primum prodiisse, sive demum has ipsas unà
cum exortu suo in moleculas quasdam gran-
diores, tanquam elementorum & elementa-
rium corporum seminia, artificiosè distribu-
tas esse supponamus: Horum enim nihil sine
motu fieri, materia verò ejusque partes ejus-
dem cum ea passivæ naturæ, moveri quidem,
movere verò seipsam, aut pars una aliam, haut
potuerunt.

(4) In-

(4) Inter hanc inertem & agere move-
reque prorsus nesciam, illamque ejus creatri-
cem ac motricem summè-activam, tanquam
duas extremè sibi oppositas substantias, prom-
ptè agnosci posse mentem nostram, tanquam
mediam, utpote actionum suarum saltem
immanentium, & volitionum liberrimarum,
sibimet intimè consciam, ideoque ex materiæ
minutiis ad agendum ineptis neutiquam con-
stantem, adeoque incorpoream.

*IX. Numquid autem prima illa
& communis corporum formatorum materia
in ista sua nuditate & simplicitate unquam
exitit?*

Facilè judicabitur, sicut ipsam materiæ
existentiam, ita modum existendi quoque à
sola Creatoris liberrima voluntate unice pe-
pendisse, adeoque sine expressa hujus revela-
tione de hac re certi nihil statui posse. Cre-
dibile nobis interim videtur, materiam nec
in statu nudæ continuæque extensionis, nec
etiam sub atomorum simplicissimis figuris,
unquam aut uspiam exititisse, sed minimum
cum primis illis, & quodammodo jam phy-
sicis, formis elementarium molecularum &
rudimentorum seminalium confusiùs adhuc

permixtarum , productam fuisse , & postmodum , si non simul , in diversas illas massas live sphaeras elementares discretam &c.

Clausula monitoria.

Revocent ergo subinde ad animum suum probi omnes , quibus haecenus dicta capere datum est, detecta sibi hoc capite, praelucente rectae rationis face fulgentissimâ , (1) Materiam omnium corporum tam artificialium quam naturalium originariam , substantiam merè-extensam , ideoque partibilem , moveri patique aptam , agere & movere prorsus nesciam ; (2) Creatorem & Motorem hujus materiae summè-activum ; ac (3) Mentem , utriusque , rationis sanæ subsidio , detectricem , virtutis agendi , saltem immanenter , evidentissimè sibi consciam , adeoque à materiae natura merè-passiva longissimè distantem : quæ quidem (per insequentia capita abundantius confirmanda) occupatis praejudiciorum ab ineunte ætate haustorum ingenti agmine juvenum animis nunquam nimis inculcari possunt.

CAP. II.

De

Corporum Naturalium Formis.

I. *Quanam est genuina vocis Forma
notio, aut quid hoc loco per illud nomen
indigitamus?*

Cum forma sit rei formatæ forma, atque
id per quod res est id quod est, & cujus
ope suo defungitur officio ordinario, juxta
tritum illud, *Forma dat esse rei & operari*;
neque rectius nec universalius ejus vocis con-
ceptum exprimemus, quàm si dicamus id in-
telligi, quo posito res ipsa simul ejusque fa-
cultas operandi ponitur, & quo sublato statim
& hæc tollitur, & res ipsa esse desinit penitus:
quemadmodum e. g. positâ horologii formâ
ipsum ponitur horologium, ejusque potentia
proxima dimetiendi horas & scrupula tempo-
ris; & vicissim illâ formâ sublata aut destru-
ctâ, & potentia hæc ejusque exercitium cessat,
& horologium hoc non amplius existit.

II. *Quid rei verò sub hoc formarum
nomine in rebus naturalibus rectissime
concepitur?*

Quandoquidem materia est id quod for-
matur, formasque varias patiando recipit,

eademque pati nihil aliud suâ naturâ potest, quàm dividi, figurari, disponi, diversimodè quoad partes figuratas necti aut ordinari, moveri denique vario gradu, nulliusque adeò rei recipiendæ capax suâ naturâ est, quàm tallium divisionum, figurarum, positionum, connexionum &c. infinitis modis variantium, prout ex cap. præced. satis constat; res ipsa postulat, non alias esse quærendas rerum materialium formas, quam talem accidentium materiæ complexum, talem particularum ejus magnitudinem aut exilitatem, tales earundem figuras, talem positum ac ordinem, talem agitationem aut quietem &c. quales ad cujusque compositi propriam functionem requiruntur, qualiumque in uno sic junctim reperiundorum conventus, in nullo alio genere vel specie corporum eodem modo nuspiam reperiatur: prout certè in artificialibus, eandem cum naturalibus communem simplicemque materiam agnoscentibus, aliam formarum, ista quoque corpora essentialiter distinguuntium, quam quæ modo dicta est rationem, nemo desiderat.

III. *At enim verò, sic omnis artificialium & naturalium corporum differentia è medio tolli videtur?*

Videtur fanè, cum eadem utrisque materia substrata, & formarum utrarumque eadem generalis ratio statuatur; sed videtur tantùm. Nam (1) omnium v. g. officinæ ferrariæ operum eadem est communis materia, & formarum omnium, e. g. horologii, sclopeti, feræ, tripodis &c. eadem communis ratio; quis autem jure inde & legitimè concludat, inter horologium, sclopetum, feram ac tripodem nullam amplius esse differentiam? Nimirum, tametsi formæ naturalium æquè ac artificialium in ratione generali conveniant, speciali tamen ratione tum utræque inter se, tum hæ ab illis, multis distant modis: (1) Inventore & efficiente causa, quæ in artificialibus est humana ratio, in naturalibus (uti progressus docebit) infinita DEI Sapientia, tantò plus nobilitatis, artificii & excellentiæ in his, quàm in illis, evidenter in antecessum arguens, quantò ipsa priorem istam antecellit: (2) Insignis in eo posita est differentia, quòd artificialia statim justâ magnitudine formari possulent ob crassio rem agentium operandi modum; naturalibus plurimis incomprehensibili

subtilitate contextis, ac deinceps paulatim
 augeſcentibus: (3) Quod iſtorum efformatio
 per *αφαιρεſιν* magis, ab extrinſeco, horum
 elaboratio per *προσθεſιν* potiùs ab intrinſeco
 factam perficiatur: (4) quod organica natu-
 ralia nutritione reſtaurentur & conſerventur,
 uno verbo vivant; quod in artificialibus fru-
 ſtrà expectatur: (5) quod multò minus ſenſu
 præditum corpus ars producere unquam poſ-
 ſit: Minimè omnium verò (6) ſui multipli-
 candi aut generandi ſui ſimile potentiâ in-
 ſtructum: ut vel ex his ultimis conditionibus
 infinita naturalium ab artificialibus diſtantia
 eluceſcat.

*IV. Secundum illum generalem,
 queſt. II. expoſitum, formarum conceptum,
 anima rationalis fortè hominis forma dici non
 poterit ampliùs, contra receptam hæcenus
 ubiq; opinionem?*

Fatendum hoc utique eſt, at agnoſcendum
 inſimul cordato cuique, præcipiti quodam
 præiudicio factum eſſe, ut, quia hominis, quâ
 talis, eſſe principaliter ab anima rationali
 pendet, hæc pro ipſa plena hominis forma
 ſtatim venditaretur; cum tamen animâ ratio-
 nali poſitâ, non ideo ſtatim ponatur homo,
 ſed tum demum, ubi anima rationalis cum
 tali

tali corporis organici fabrica in mutuum actionum & passionum commercium unita fuerit: ut ipsa hæc duarum harum partium unio & correspondentia mutua plenam demum hominis formam absolvat, quâ positâ ponatur homo, & quæ, homine intereunte, simul intereat; cum in illa vulgari & præcipitata opinione formato destructo, formam tamen adhuc superesse, duriter satis, si non absurdè, dicendum sit. Dicatur ergo, Anima sui corporis, humana mens, ad formam autem præter ipsam etiam organicarum partium appropriata homini conformatio, mutuumque utriusque commercium, requiratur: Sic unus idemque manebit omnium formarum conceptus, & lites Scholarum quamplurimæ (de formarum ortu & interitu cumprimis,) vel tolli penitus, vel in arctum contrahi poterunt.

V. *Quomodo ergo & unde fiunt ac oriuntur formæ, & quorsum abeunt, cum intereunt?*

De formis abusivè sic dictis, nempe de hominis, brutorum, & plantarum animabus, quæ substantiæ sunt & absolutæ entitates, adeoque verè fiunt ac producuntur, posteriores etiam intereunt, facilis erit suo loco respon-

sio, ubi natura earum vel materialis vel immaterialis perspecta prius fuerit. De formis autem accuratè & strictè sic dictis, quæ materiales omnes sunt, h. e. à materia in esse, fieri & operari, dependent, in meris materiæ modificationibus, habitudinibus & respectibus positæ, (adeoque entium aliquid potiùs, quàm distincta entia) id dicendum est, quod Aristoteles jam olim Lib. VII. Metaph. c. VIII. evidenter ostendit ὅτι ἔστι τὸ εἶδος, ἢ ὅτι δὴποτε δεῖ καλεῖν τινὲ ἐν τῷ αἰσθητῷ μορφῶν, γίνεται, ἔδ' ἐστὶν αὐτῇ γένεσις, h. e. quòd neq; species, aut quomodocunq; decet appellare illam sensibilibus formam, fiat, nec ejus (propriè loquendo, sed solius compositi,) sit generatio aliqua, adeoque neque vera destructio; siquidem e. g. qui globum facit, rotundum quiddam, non autem rotunditatem ipsam faciat &c. indeque porrò inferendum, de modo fiendi frustrà quæri circa id, quod propriè loquendo *non fit*, sed (ut Honoratus Fabri, Aristotelicus recentior, loqui amat) materiâ ita figuratâ, dispositâ, ad motum aptatâ, prout compositi producendi functio postulat, *ultrò resultat*, & consequenter intereunte composito, h. e. sublatâ dispositione illâ & agitatione vel agilitate saltem essentiali simul ultrò evanescit, neque peculiariter destrui desiderat.

VI. Ec-

VI. *Ecquis autem ex illis oriundi modis, de quibus hactenus inutiliter fere disceptatum est, modernæ isti de formis hypothesis commodissimè applicaretur?*

Quemadmodum *creationem*, *traducem*, & *Inductionem* ad formarum abusivè sic dictarum, h. e. animarum, originem explicandam rectius quadrare suo loco ostendemus; ita formis strictius dictis Scholasticorum *eductio-nem* præ cæteris accommodam esse in hypothesis moderna multò magis, quàm in illorum propria, manifestum est. Cum enim è materiæ potentia formas educi, adeoq; à materia in esse, fieri, ac operari dependere statuant, utrumque sanè clarum est & operari evidens, ubi formæ in materiæ figuratione, dispositione, agitatione, varia (quæ sola subire partique materia potest, quæque ab ipsa tanquam subjecto suo æternùm dependent) reponuntur; apud Scholasticos autem, qui formas pro substantiis habent, utrumque obscurum est & inexplicabile, cum dependentia illa accidentibus propria naturæ substantiarum penitus repugnet, nec uspiam appareat, quo modo ex materiæ divisibilitate, figurabilitate, mobilitate (quæ totam ejus potentiam exhauriunt) nova quædam substantia prodire queat

vel educi, quæ nec intra ipsam prius existerit, nec ipsam intra se existentem habeat.

VII. Cum materia potentia sit merè passiva, formæ saltem ipsi activam quandam superaddent, cujus virtute composita suas functiones obeant?

Ita sanè communiter formas ut activa principia concipimus, quia compositorum effectûs à forma præcipuè pendere agnoscimus, ideoque non ipsis tantum corporibus, sed abstractiùs earum etiam formis, tanquam causis efficientibus & verè-agentibus, illos effectus adscribimus, quoniam ad virtutem talem activè-productricem, à sensibus nostris plerumque remotiorem, paucis penetrare datur. Nec incongruum est ita loqui pergere cum vulgo aliisque penetralium physico-
rum expertibus in communi conversatione: sed in foro proprio altiùs ad rem ipsam potiùs quàm receptum loquendi morem, plerumque incautiùs deproperatum, attendentibus evidenter satis elucescet, uti corpus quodvis, sive naturale, sive artificiale, à materia habet simpliciter, quòd sit mobile, sic à forma sua nihil aliud habere, quàm quòd hoc vel alio modo sit mobile, virtutem motricem autem à forma non minus quàm à materia
sem-

semper esse distinctissimam. In artificialibus certè res est in confesso, quia præjudicia ibi non obstant, & quilibet planè videt, molendini v. g. (& sic aliorum omnium) materiam id ipsi præstare, ut omnes partes sint mobiles, formam verò hoc, ut tali modo, qui usibus ejus quadret, sint mobiles, ipsam verò vim movendi activam aliunde provenire: indeque ad naturalia quoque promptum est concludere, posteaquam formarum in utrisque eandem esse rationem generalem semel evictum est; neque res hoc etiam casu quidquam habet difficultatis, si præjudicia abfuerint, præsertim cum ea vis, quæ materiæ, reali & vere substantiali enti, denegata est, ejus modis & accidentibus, vix entium nomen meritis, competere multò minus possit.

VIII. Enimverò, hominum saltem ac cæterorum animalium plantarumq; formis sive animabus, vis activa omnium consensu tribuitur?

Neque mirum, cum commune hoc judicium gemino nitatur præjudicio; uno hoc, quòd animæ illæ sint, compositorum suorum formæ constitutivæ, id quod supra jam excussum objectionem hanc frustraneam facit ac impertinentem; altero isto, quod animam homi-

hominis immaterialem eorum in corpore motuum, qui ad ejus nutum consequuntur, re nondum satis examinata, veram causam efficientem esse, præproperè credidimus, cæteras autem materiales quidem, at non materiatas aut corporeas, concepimus: dum liberius accuratiusque examen in progressu luculenter evincet, posteriores illas reverà tenuia quædam esse & valdè agitata corpora, quæ agere & operari dici queant, sed acta & mota aliunde, sive patièdo agere, (prout rotæ molendini aliarumque machinarum, aut flatus ex ore in fistulam emissus, agere dicuntur) h. e. propriè loquendo non agere, sed agi; priores autem nonnisi occasionaliter aut conditionaliter ad motus illos externos concurrere, nec aliarum actionum propriè talium, quàm immanentium, verè efficientes causas esse.

*Confectaria ad Scopum Physicum
primarium spectantia.*

Ex hætenus deductis palàm est (1) Quia neque materiæ neque formis virtus activa verè proprieque dicta competit, eandem, secundùm rigorem philosophicum, nec à corporibus inde compositis (quæ nihil aliud sunt quàm materia aliter aliterque formata) expectari

pectari aut posse aut debere; quæ veritas auditu primo paradoxa & ob præconceptas opiniones admissu difficilis, in sequenti capite vel invitis erit extorquenda refractariis præjudiciis. (2) Cum formatam esse variè materiam in aprico sit, eaque formarum varietas in materiæ varia dispositione adeoq; in motu aliquo passivo consistat; materia autem ejusve partes non potuerint seipsas, aut una alteram movere, *vi consect. I. in clausula cap. I.* neque Natura, aut ea, quibus constat corpora, primævâ formatione posteriora, ejus esse causæ efficientes, neque priores ac simpliciores formæ posteriores & magis compositas efficere vere-activè valeant, *per ea, quæ quest. VII. deducta sunt* &c. evidentissimum nunc esse, quòd tam simpliciorum quàm compositorum formæ Agenti cuiuspiam, Materiæ & Naturæ universæ contradistincto debeantur, quod materiam primitus movere, dividere &c. potuerit, atque adeo Factorem aliquem Naturæ seu Universi à nobis hujus analyseos ope inventum esse. (3) Si formatorum corporum innumerabilis multitudo, plurimorum incomprehensibilis magnitudo, non pauciorum inconceptibilis exilitas, in utrisque cæterisque intermediis, generum & specierum inenarrabilis varietas & in tot secula continuata
pre-

propagatio &c. attento animo considerentur; *Factoris & Creatoris* Universi modò inventi & agniti, *immensam* simul elucere ipso Sole clariùs & *Potentiam*, & *Sapientiam*, & *Bonitatem*. (4) Et hæc omnia tantò magis consecutura, si formæ, ad Scholasticorum mentem, reales entitates & veræ substantiæ essent; quantò sc. majus esset, substantiam aliquam è materiæ sinu, in quo nihil ejus præextitisset, de novo elicere, quàm ipsam materiam certo modo figurare ac disponere.

C A P. III.

De

Natura Corporum Naturalium,
tanquam Principium intrinsecum,
spectata.

I. Quid per Naturam hoc loco præcisè intelligendum est?

Naturæ vox ambigua valdè est, ideoque modos loquendi varios æquè ambiguos peperit quàmplurimos. (1) Naturæ nomine venire solet adspectabilis illa Corporum Mundanorum universitas, quæ, quatenus actuosa est perpetuò, unis ejus partibus in alias variè agentibus, ut universale quoddam agens & causa efficiens generalis spectatur,

nec

nec adeò incongruè, si eo sensu id fiat, quem Quæst. IX. Cap. sequ. IV. exponemus; quò spectant formulæ illæ vulgares: Hoc vel illud Naturæ viribus confici posse, aut Naturæ vires excedere; Naturam ubique ob certum finem agere (eo modo puta, quem Quæst. III. Cap. V. definiemus,) & similes; quatenus autem ut acta & mota, imò producta quoque & conservata, consideratur à causa quadam superiore, sub fin. Cap. II. in Consectar. evidentissimè demonstrata, ut effectus potius quàm ut efficiens spectatur, barbaro *Naturæ naturate* vocabulo Scholis venire solet; quò referendus venit receptus loquendi modus alius, quo quid *in Rerum Natura* dari aut reperiri, vel affirmamus, vel negamus. (2) Valde abusive quidem & improprie *Natura* iisdem Scholis, sed cum additamento æquè barbaro *Naturans*, appellatur ipsa illa causa summa DEUS; ad quem sensum unicè proprièque referendæ sunt aliæ usitatæ formulæ, in quibus Naturæ providentia quædam, & cura faciendi ubique quod est optimum, nec frustra quicquam agendi &c. Naturæ naturatæ non nisi improprie & Naturantis intuitu applicabiles. Neuter horum significatum præsentis est loci, sed alius ab his planè diversus ac mox explicatiùs dicendus.

II. *Fortasse media quadam inter Naturam modo dictam naturantem, & alteram istam Naturatam, adhuc restat Natura, posterioris gubernatrix & prioris quasi Ministra & vicaria?*

Ita quidem Gentiles olim, & hodie christianorum quoque Philosophorum non pauci, nondum omni penitus gentilismo exuti, senserunt, nescio quos Mundi spiritus aut animas, (ut de Polytheia crassiore nihil dicam) principia Hylarchica, Archeos &c. commenti; de quibus, (si tanquam verè agentia Mundumque hunc, loco DEI, regentia supponantur) quid sentiendum nobis videatur, è Quæst. IV. & seqq. Cap. hujus III patescere potest Quod si verò quispiam, aut Motum ipsum, è sola voluntate Divina promanantem, ut contradistinctam tum DEO ipsi, tum partibus universi materiatis omnibus, Naturam concipere velit, aut materiam quandam subtilissimam tanquam mediam inter DEVM & globos illos Mundanos, horumque partes elementares crassiores variè movendos, ut Naturam quandam actuosam magis & universaliter operantem supponere velit; id per nos quidem licebit, salvis tamen iis, quæ Quæst. IX. cit. Cap. IV. feriò inculcabitur: At hanc
etiam

etiam Naturam, inter externa potius quàm interna principia numerandam, præsentis loci non esse, vel ipsa Cap. hujus Rubrica monet.

III. *Quid ergo tandem intrinsecæ cuiq; corpori Naturæ nomine impræsentiarum erit intelligendum?*

Scholæ Aristotelicæ cum Magistro suo, ex ejus Lib. II. Phys. cap. I. Naturam hanc definiunt *ἡ ἀρχὴ τῆς αἰτίας ὅτι κινεῖται καὶ ἡρεσεν ἐν ᾧ ἡ ἀρχὴ πρώτης, καὶ αὐτὴ καὶ μὴ καὶ συγγενὴς*, h. e. *principium quoddam & causam cur id moveatur & quiescat, in quo inest primò, per se & non ex accidenti.* Quæ quidem definitio, ab interpretibus variè distorta ac distracta, ideoque à Sperlingio aliisque Aristotelis hostibus miris modis exagitata, si ad mentem ipsius Autoris, cit. l. dilucidè expressam explicetur, Motûsque & quietis vocabula, non ad lationem tantùm localem restringantur, sed ad mutationem aut mutabilitatem omnem, & huic oppositam in eodem statu permanentiam aut perseverandi potentiam saltem, extendantur; nihil equidem video, quod jure culpari in ipsa possit, nisi quòd clarioribus verbis dicere potuisset: Naturam cujusque corporis naturalis intrinsecam, nihil

aliud esse quàm ipsam ejus formam sive fabricam internam sive dispositionem ac texturam particularem & propriam, in tali materia spectatam. Hæc enim fons est omnis mutationis aut mutabilitatis passivæ (ὃ κινεῖσθαι, non ὃ κινεῖν) quæ in corpore formato hoc vel isto speciali modo contingit, insimul autem & permanentiæ vel durabilitatis in eo statu, in quo brevius longiusve perseverat.

IV. *Quandoquidem verò etiam arte facta & internâ quadam fabricâ gaudent, & materiâ quoq; mutationibus variis obnoxia, numquid his etiam natura sua particularis tribuenda erit?*

Equidem Aristoteli non adeò insolens est, artificialibus etiam suam adscribere naturam, dum e. g. cit. superius loco t. 7. κλίνης Φύσις, ait, τὸ ξύλον ἀνδριάντῳ ἢ ὁ χαλκὸς, h. e. *Lectica natura est lignum, statuae verò æs*. Attamen tum hoc loco mox addit, tum sub ipsum cap. initium pluribus monet, hoc artefactis per accidens inesse mutationis principium, non quatenus sunt lectica, aut vestimentum, sed quatenus, lignea, aut lanea, lapidea, aut ferrea &c. verbo, quatenus ex materia naturali constant omnia: Unde, vi definitionis superius datæ, principium hoc materiale,

riale, quia non primò sed secundariò, non per se, sed ex accidenti inest artefactis, Naturæ nomen strictè loquendo non meretur. Formale verò eorundem principium, quia artem & ingenium humanum, non Naturam, sui causam efficientem agnoscit, rectiùs Artificium (τὸ τεχνητὸν Aristoteli) quàm Natura dicitur: Ita ut in utrisque, tam naturalibus, quàm artificialibus, intrinsecum quoddam mobilitatis & mutabilitatis principium, ipsa sc. fabrica & textura cuique propria, sit agnoscendum, sed distinctionis gratiâ ibi *Natura*, hîc *Artificium* dicendum.

V. Annon verò sic caderet Scholarum decantata inter corpus Naturale & artificiale differentia, quòd illud Naturâ tanquam interno principio motûs & quietis gaudeat, hoc ab Arte, tanquam externo principio dependeat?

Cadit utique, & meritò, hoc fundamento quidem nixa differentia; quandoquidem artificialia non minus quàm naturalia corpora interno quodam principio gaudent omnium suarum operationum & passionum, & vicissim Naturalia non minus quàm Artificialia externum quoddam agnoscunt sui efficiens principium generale: Naturalia quidem effi-

ciens propriiſſimè ſic dictum principale, Con-
ditorem DEVM, & Inſtrumentale, quod non
niſi motum & improprie agit, Naturam uni-
verſalem ſive facultatem agentium naturali-
um interventu motûs, materiæ ab initio di-
vinitus impreſſi, omnia ex neceſſitate agen-
tium; Artificialia verò Artem & Ingenium
humanum, h. e. facultatem agentium rationa-
lium, eodem motu interveniente pleraque
omnia, ſed liberè præſtantium. Viciffim ve-
rò artefactum quòdcunque internum habet
artificium ſuum ab Arte & eodem Summo
Conditorè productum; ſicut Naturale quod-
cunque Naturam ſuam particularem intrinſe-
cam habet ab eodem Summo Numine excogi-
tatam & mediante Natura univerſali cuius
inditam ac perpetuò dirigendam.

*VI. Sic ergo Naturalium & artifi-
cialium corporum differentia vel unice vel
principaliter ab efficientibus eorum erit
petenda?*

Congruè quidem inde petitur, ſed non
unicè: Nam artificialia utique dicuntur o-
mnia, quæ ex materia naturali licet, humanæ
mentis arte & ingenio formantur; Naturalia
verò, quæ Naturæ univerſalis partes ſunt nec
humanum ingenium ſui formatorem agno-
ſcunt;

scunt; tametsi præparatoriam quandam hujus operam aliqua Naturæ opera feliciter admittant, ut in Agricultura, Chymia, Pyrobolia &c. videre est. Et quamvis de cætero utraque, tam artificialia quàm naturalia, intrinsicè suarum actionum improprie sic dictarum, & passionum quoque gaudeant principio, illa sc. artificio suo sive structura artificiosâ, hæc naturâ suâ particulari; multiplex tamen inter hæc interna principia discrimen superest, prout vel ex Quæst. III. Cap. II. dispalescit.

VII. Evolutâ sic vocis Naturæ ambiguitate, nulla fortasse restabit amplius difficultas in rectè intelligendis aliis, usitatis passim, loquendi formulis, quibus aut Naturale, aut Non-naturale, secundum, vel præter, vel contra vel supra naturam, &c. quiddam dicitur?

Ita quidem res habet, si specialior paulò dictorum applicatio fiat, qualem hîc in compendio præibimus:

(1) Igitur *Naturale* opponitur *Non-naturali* in sensu physico, ut *non-naturales* res illæ solæ dicantur, quæ arti & ingenio humano debentur, imò ars ipsa quoque; naturales cæteræ, quæ ad Naturam, arti oppositam,

vel ut effectus, vel ut causæ, vel ut affectiones &c. referuntur.

(2) *Naturale* opponitur *Non-naturali* in sensu *Medico* ut *res naturales*, nonnisi hæc septem numerentur, *Elementa*, *Temperamenta*, *Partes*, *Humores*, *Spiritus*, *Facultates*, & *Actiones*, utpote, quæ inter cæteras physicè sic dictas innumeras, futuro *Medico* præcipuè, & speciatim humani corporis intuitu, considerandæ sint & prænoscendæ; *Non-naturales* abusivè appellentur, quæ, sanitatis ac morbi respectu, indifferentes sunt & rectè adhibita isti, pravo sui usu, huic patrocinantur; e. g. hæc sex simpliciter-necessariæ, *Aër*, *Alimenta*, *Somnus* & *Vigilia*, *Motus* & *Quies*, *Excreta* & *Retenta*, *Animi* denique *affectus*, & duæ secundùm quid tales, *Medicamenta* & *operationes Chirurgicæ*: quæ omnia tamen (exceptis fortè his ultimis) rebus *Physicè-naturalibus*, unà cum septem *Medicè-naturalibus*, accensendæ omnino veniunt.

(3) *Naturali* opponitur *præternaturale* sive id quod fit *contra naturam*, in sensu *Physico* pariter & *Medico*; ut ibi generaliter *naturale* dicatur, quicquid cujusque corporis naturæ particulari sive fabricæ, hujusque destinato usui congruenter fit & consentaneè; *præternaturale* quod aliter & præter scopum ordinarium;

rium ; hic speciali quasi subsumptione in humano corpore res *secundum* (hujus sc. particularem) *naturam* tres solum numerentur, *Sanitas*, ejus *Causa efficiens*, ejusque *Accidentia* sive effecta ; *res præter naturam* autem, *Morbus*, *Morbi causæ*, *Morbique accidentia* ; quæ tamen in utroque sensu, particularum naturarum intuitu, opposita, respectu Naturæ universalis hujus mundi corporei æquè-naturalia sunt omnia ; ita ut morbus sit aliquid præter naturam particularem animalium, & sit tamen æquè secundum naturam universalem, ac sanitas & cætera omnia.

Ita (4) supra naturam aquæ particularem est urere, supra naturam oculi audire &c. quæ tamen non sunt supra naturam universam ; siquidem non solum ignis, sed aqua ipsa multo igne permixta, urit, & auris audit &c. Supra omnem naturam autem est videre DEVM aut animam rationalem oculis corporeis, aut ferrum aquæ liberè impositum natare vel sustentari ; quod secundum naturam tamen & naturæ viribus planè fiet, si impositio ista, limitato quodam modo fiat : quemadmodum simpliciter natare, h. e. fluido cuidam liberè & illimitatè penitus impositum, non est supra naturam, nec ferri, nec plumbi, nec aliorum gravium, solo fortè auro excepto.

(5) *Naturale* opponitur etiam *Violento* ; ut e.g. Motus lapidis à manu aut accenso pulvere pyrio sursum projecti, dicatur violentus, descensus verò ejusdem naturalis ; & Mors animalium communiter (etiam ab Aristotele Lib. de Vita & morte cap. 1.) in Naturalem & violentam distinguatur : quæ distinctiones tamen multum æquivocationis involvunt. Nam lapidem aut globum tormentarium vi pulveris pyrii sursum projici extraordinarium quoddam est & infrequens ; non apparet tamen evidens aliqua ratio, cur hic motus infrequentior naturæ lapidis magis, quàm ordinarius & frequentior, repugnet ; maximè si uterque (quod apud modernos ferè receptum est) ab impulsu extrinseco dependeat. Ita profectò Mors ordinaria non minus repugnat naturæ animali eidemque vim infert, quàm inconsueta, vi ferri, aut suffocationis &c. illata ; nec aliud videtur hîc discrimen intervenire, nisi quod hæc violentia palpabilior sit & crassiore modo agat, illa subtiliore & latentius : Ut taceam in sanequam multis (ut e.g. in aëre nostro) statum violentum esse maximè ordinarium ac tantum non perpetuum, ideoque vel maximè naturalem.

VIII. *Annon id quod præter naturam, & id quod contra naturam fit, multum adhuc differunt, quæ tamen in quæst. præced. videntur pro uno eodemq. haberi?*

Sunt equidem, qui parum interesse credant inter has duas loquendi formulas; & sunt tamen alii, qui eas sollicitè distinguant, tametsi diverso modo; ut probè attendere oporteat ad significatum illarum vocum cuique usitatum, si quis inanes λογισματίας prudenter evitare velit. Author Systematis Physici Ernestini Lib. I. Part. Gen. cap. VI. n. XVII. & XVIII. *Præter naturam* evenire dicit ea, quæ quidem aliter fiunt ac eorum natura requirit (ut cum vacui metus aërem deorsum, aquam sursum tendere videmus) non tamen ei simpliciter repugnant, nec cum ullius rei interitu fiunt: *Contra naturam* autem ea evenire, quæ fiunt causis secundis ita inter se luctantibus, ut virtute inferiores fortioribus succumbere cogantur, cum suo vel interitu vel magno saltem incommodo; ut cum aqua ignem extinguit, aut lapis sursum projicitur. Honoratus Fabri Scient. Phys. Tract. VI. Lib. I. Prop. CLXI. Illud *secundum naturam* alterius esse dicit, quod ipsi vel connatum vel acquisitum est ad finem ejus naturalem; v. g. corpori gravi

gravi ferri deorsum, igni lucere; ac *contra naturam* illud, quod aliud removet à fine suo naturali, vel privat aliqua re, ipsi nativa; ut corpori gravi ferri sursum, aliud quoddam corpus plus æquo comprimi, vel tendi &c. (quo sensu simul ambo complectitur, qui priori distinctè tum præter, tum contra naturam dicebantur. *Præter naturam* deniq; enī, quod alteri nec est contrarium nec nativum; ut parieti esse album vel nigrum, corpori gravi, vel hoc, vel alio loco globi terreni poni &c. Prout igitur aliquis vel hanc, vel priorem, vel aliam vocabulorum significationem admiserit, ita aliter aliterque de casibus specialibus judicet oportet. Sic e. g. Mors quæcunque, etiam illa, quæ naturalis dicitur & violentæ opponitur, contra naturam animalis esset dicenda vel maximè, in utroque formulæ hujus ante declarato significatu: Et Medicorum res præternaturales, in priore pariter præter, in posteriore contra naturam essent dicendæ: nec sine causâ fortè quis inferret è significatu priore contra ejus exempla, lapidem sursum projici minus esse contra ipsius naturam, quàm deorsum eundem ferri; siquidem hoc posterius cum lapidis interitu conjungi possit, prius verò non ita facilè.

CAP. IV.

De

Causis rerum Naturalium efficientibus.

I. *Quid intelligitur nomine Causæ efficientis?*

QUandoquidem ex præcedentibus jam constat, materiæ formationem aliter fieri non posse, quàm per certam materiæ divisæ, varieque figuratæ, dispositionem & coordinationem (quæ sine motu ne concipi quidem possunt) augmentationem item sine partium quodam accessu, nec diminutionem sine quarundam discessu fieri, per se clarum sit; Alterationem autem omnem in earundem saltem transpositione quasi superficiaria consistere, in progressu futurum sit evidentissimum, atque adeò quæcunque in natura fiunt, per motum omnia fieri certum; non potest, meo iudicio, Efficientis causæ (præsertim in hoc negotio physico) melior dari sive definitio sive descriptio eâ, quâ Aristoteles ipsum efficientis nomen vel sexcentis locis circumscripsit, ὅθεν ἐστὶν ἡ ἀρχὴ τῆς κινήσεως, *Id unde est principium motus.* Quoniam autem diffiteri non possumus, Aristotelem hanc descriptionem

nem in ea latitudine accepisse, ut etiam causis per accidens, (quales existimat esse Fortunam & Casum) Lib. II. Phys. cap. VI. t. 65. eam adtribuerit, nobis autem de causis per se talibus hoc in loco inquisitio esse debet; res ipsa postulat, ut per id, unde est principium motus, intelligamus talem causam, quæ motum aliquem in materia quæta aut in corpore hætenus immoto producere, & hoc mediante alium quendam effectum præstare queat: Ut hoc pacto quæstio, de causis efficientibus physicis, quænam illæ, & quot, agnosci jure queant? huc tota redeat, ut inquiramus: Quibusnam entibus aut rerum generibus vis aliqua movendi sive facultas in immoto aliquo corpore motum de novo producendi verè & re ipsa competat? id quod clarè satis dijudicari non poterit, nisi naturam Motûs, & quid rei sit, priùs inquisiverimus.

II. *Quid est igitur Motus, & quænam res sub hoc nomine concipienda venit?*

Quod Augustinus de Tempore dixit, ad Motum accommodari omni jure potest; Sz nemo ex me quærat, dicendo, quid motus sit, scio: si quærenti explicare velim, nescio. Nil

hil utique motu nobis familiaris, quem oculis intuemur, tactu percipimus, iudicio merimur, volendo procuramus, obvium habemus ubique, singulis horis, minutis momentis: Et tamen, ubi verbis exponere rem familiarissimam conatur acutum Aristotelis ingenium, fateri Lib. III. cap. I. Phys. geminâ vice uno quasi spiritu cogitur, χαλεπὸν αὐτὸν λαβεῖν ἢ εἶναι, difficile esse sumere quid ipse sit. Sanè de ea definitione, quam variè se torquendo, tandem exsculpsit eo ipso loco, jam dudum Bodinus, eam in Theat. Nat. Lib. I. p. 99. cit. Sperl. multò obscuriorem esse ipso motu, & nuperrimè Stairius, Aristotelem, definiendo motum sibi dedecus, motui autem nullam elucidationem attulisse, cordatè judicarunt. Honoratus Fabri & Franciscus Lana, postquam in omnes partes se verterunt, fateri tandem necesse habent, *Motus actualis causam non esse effectivam aut verè productivam, sed exigentem tantum, neq; motum propriè loquendo produci posse &c.* Quænam verò sint illæ causæ motum exigentes, dum exponendum erat distinctius, immediatam quidem *Impetum* allegant, ipso motu, si verum fateri velint, multò obscuriorem; cùm à vera causa motûs exigitiva (ut cum ipsis loquamur) proximè abessent, eam videre solo præjudi-

judiciorum quorundam glaucomate prohibiti.

III. *Quanam ergo est illa causa, quæ exigendo tantum alicui corpori prius non moto motum valet imprimere?*

Cum motus in eo quod movetur nec essentiam mutet, neque quantitatem ejus aut qualitatem ullam, sed hoc unum præstet, ut res mota successivè in alio alioque ubi existat; evidens est; quod jam pridem *Gilb. Facheus* Peripateticus Lib. III. Instit. Phys. observavit, & pronuper *Hamelius* Phys. Gen. Tract. II. Dissert. II. cap. II. confirmavit, *Motum non esse rem aliquam, sed rei modum, scilicet modum existendi sive statum quendam corporis, quo ex uno loco in alium commigret &c.* Sic inde concludendum indubiè existimo: Quemadmodum, ut materia aliqua existeret, cujus ante nihil præextiterat, opus erat voluntate Summi Numinis potentissimâ, juxta n. 1. & 2. Quæst. VIII. cap. I. multoque adeò magis eandem poscit illius existentiae in tot Secula continuatio, quæ non est alia vel nova res, sed ejusdem existentiae illustris aliquis modus; Ita, alium quoque existendi modum, ut eadem materia hîc, ibi, istic, & in aliis spatii punctis infinitis existat, non minorem

eâ potentiam supponere, quæ, simpliciter ut
existeret, potuit exigere; adeoque efficere,
ut materia aut ejus aliqua pars, antea quie-
ta, incipiat moveri, solius infinitæ voluntatis
divinæ opus esse, cujus *velle* & *posse* unum
idemque sunt: consequenter, neque corpus ul-
lum movere posse alterum, nec horum ullum
aut mentis humanæ aut alius spiritûs finiti
arbitrio moveri, quia illa voluntate planè ca-
rent, hi verò voluntatem quidem habeant, sed
finitam & inertem; cujus velle quantum di-
stet à *posse*, innumera exempla quotidie
testantur. Quo stante, & nunc mordicus te-
nendo, causa simul difficultatis in explicanda
motûs natura in aprico est; quia est quiddam
merè arbitrarium, cujus adeò ratio nulla dari
potest; stat enim pro ratione voluntas infi-
nitæ efficaciz.

IV. *Nonne verò DEVS Materia
 & corporibus, etsi suâ natura movendi
 potentia destitutis, eam communicare
 potuit?*

Non est equidem nostrum definire, quid
DEVS possit aut non possit? Attamen, uti
certissimè novimus lapidem, quamdiu lapidis
naturam habet, potentiæ videndi esse prorsus
incapacem, DEVMque adeo, qui voluit eum
D esse

esse talem, non dicam non posse præstare, sed non velle, eum unà esse videntem, h. e. non lapidem: Ita, cùm per liberrimam DEI voluntatem Materia & materiata suâ naturâ movendi virtute activâ destitui certum sit, evidentissimum etiam est. Eandem unà nunquam velle, ut materia & materiata, id quod sunt mantentia, motus alicujus producendi voluntate imbuantur.

V. *Quin ergo oculis saltem nostris credimus, cum unum corpus ab alio moveri toto die videmus?*

Hic plus videre nos credimus, quàm reverà videmus; id quod attendenti, exemplo evadet clarissimum. Cùm provolutus per planitiem undecunque globus incidit in alium, aut plurium aliorum super eadem planitie quietorum contiguam seriem, hanc equidem illius in hos incidentiam videmus, hos post impactionem illam pariter nunc moveri videmus; utrum verò ille primum provolutus alteros istos activè moveat, h. e. motum in ipsis antea quietis de novo producat, nec ne? id profectò videre non possumus, sed mentis judicio decernendum facilè agnoscimus; quo iudice (præsertim si ad hætenus deducta respexerit) utique decerneretur, non
tam

tam primum illum cæteros , quàm eandem virtutem, quæ primum provolverat , hoc mediante secundum , & per secundum tertium &c. movisse: quod adhuc evidentius erit , si globorum loco totidem substituamus homines eadem serie contiguos , quorum primo undecunque violenter impulso pelluntur & cæteri intermedii septimusque v. g. & ultimus fortè penitus prosternitur ; nullo profectò horum omnium fassuro , se quicquam hîc egisse , ullove conatu motum in proximè adstante produxisse, sed effectûs universi culpam in primum , nescio unde factum , impetum unanimiter rejecturi.

VI. At enim saltem mens nostra ipsa sibi conscia est , se manum , pedes , aliasq; membra corporis sui , quin & hoc totum , quorsum & quando vult movere posse ?

Iterum plus internæ mentis conscientiaë, præcipiti quodam judicio, tribuitur, quàm in rei veritate ipsa deprehendet, si cautiùs paulò rem æstimare monita didicerit. Hoc illa scit indubiè , se cogitâsse v. g. de scribenda ad amicum epistolâ, aut de collegio quodam, imminente jam horâ solitâ , frequentando &c. (quæ veræ quædam actiones sunt menti ne-

quaquam denegandæ , sed immanentes tantum) & cum talia vix cogitasset aut voluisset, secutos esse statim varios motûs , pedum v. g. ad petendam alicunde chartam, manûs ad apprehendendum calamum, totius denique corporis ad locum collegii adeundum &c. Quod verò vi voluntatis suæ, aut consiliorum istorum suorum virtute, motûs hi omnes excitati fuerint, hujus profectò evidenter sibi conscia nequaquam est , neque majore jure ex prædictis sibi arrogat, quàm si quis allucente Sole valvas musei se adaperuisse probè sciens, & hoc facto illius illuminationem immediatè consecutam observans, nullam etiam absque illâ suâ operâ futuram, inde temerè sibi persuaderet, se veram & efficientem causam esse luminis intra Museum recepti. Quin, ubi vim istam voluntatis suæ motricem putativam, ad alia quædam, & levissima quidem, e. g. ad pulvisculum aliquem à vestimento immediatè removendum, aut ad erigendum unicum in proprii corporis capite pilum, converterit, omnimodam suam producendi vel minimi motûs impotentiam non sine pudore deprehendet: ut taceam ejusdem, in accelerandis e. g. vel retardandis cordis pulsibus, impediendis uteri generantis functionibus, chymo è ventriculo, cum satis fermentatus

tatus est, eliminando & per intestina provolvendo &c. (qui motûs in corpore sunt ordinarii) vel in præternaturali motûs defectu, in paralyfi, apoplexiâ &c. supplendo, aut convulsionum excessu cohibendo &c. imbecillitatem, inertiam, imò istorum omnium, unde, quando, & quo modo, fiant, plenam ignorantiam.

VII. *Quod si ergo per motum fiunt omnia, nec ulla vis motrix alibi quàm in sola voluntate DEI infinita residet; quid opus erat corporibus ad effectus naturæ mediantibus istis, aut voluntate mentis humanæ, ad motus humani corporis ciendos? & annon ita DEVM perpetuò, subinde etiam ex hominum sæpe pessimorum nutu negotiosum esse statuimus?*

Quod primum attinet, cordatus quisque facilè pervidebit movendo uni corpori alia DEVM adhibere voluisse, non quod istis indigeat, aut ultimo immediatè virtutis suæ motricis efficaciam difficiliùs, quàm per supposita intermedia, mere passivè interim se habentia, valeat applicare; sed, ut variis istis corporum unorum per alia motionibus, in oculos subinde incurrentibus, occasionem in singula momenta haberemus in earum originem seriò inquirendi, Dominumque quæren-

di & palpando quasi (ceu loquitur Apostolus in Actis c. 17.) inveniendi, & ex rebus conditis perspiciendi τὰ ἀόρατα αὐτοῦ, ejus invisibilia, nimirum τὴν αἰδίων αὐτοῦ δυνάμιν καὶ θεότητα, eternam ejus tum potentiam tum divinitatem; ut idem ad Rom. cap. 1. prorsus philosophicè ratiocinatur: ex mentis verò nostræ nutu suspendere quosdam saltem corporis motûs voluisse, quorum sc. in humana conversatione præcipuus esset & frequentissimus usus, ut obsequii nostri tentamina quædam subinde extarent, & voluntatis ad leges divinitus sibi inscriptas sese liberè componendi studium aut negligentia dispalesceret. Alterum verò quod spectat, non opus quidem est ullo negotio, nedum in occasiones singulas noviter iterando labore, universis istis in mundo moribus jugiter exercendis, sed, si vel semel DEVM, latis quasi duabus legibus universalissimis, voluisse supponamus (prout eum voluisse ex effectibus ipsis manifestum est.) Ut (1) quoties una materiæ portio in aliam, unum corpus in aliud, recepto ab ipso impetu impingeret, hoc etiam inciperet moveri, pro ratione quidem impetus & mole tum contingentis, tum contacti; ita quidem ut impactum tantundem motionis amitteret, quantum acquirit alterum: (2) Volente hominis mente & ex-

& exoptante hunc vel illum effectum ope vel interventu corporis sui expediendum, ii statim evenirent spirituum per organa corporea motûs, qui ad effectum illum producendum, ex priore lege, requiruntur &c. Unica hæc inquam DEI potentissimi volitio, in omnia temporum locorumque puncta & momenta efficacissimè se exporrigit, ut ullâ ejus iteratione unquam aut uspiam opus hautquaquam sit futurum.

VIII. *Quod si omnia naturæ phenomena solâ divinæ voluntatis efficacîâ fiunt, quid prodest alias rerum naturalium causas frustrâ scrutari? quin hanc unam assignâsse quovis casu sufficiet, unumquodq; ita fieri, quia DEVS id sic fieri voluerit.*

Compendiosam utique sic Philosophiam naturalem essemus habituri, neque minus aut veram aut plenam, quàm brevem, siquidem omnia fieri voluisset volitione absolutâ, nec ad certas condiciones, occurrentium sibi mutuò corporum aut volentis hæc & ista mentis humanæ ejusdem numero beneplacito quasi alligatâ. Jam cùm conditionata hæc DEI voluntas in effectibus naturæ regnet, ipsas illas infinities variantes condiciones, ipsa illa media, per quæ tam variè se exerit una ista

eademque potentia , quæ ubique ineffabilem sapientiam quoque detegit , distinctiùs rimari juvat, ad primarium quippe scopum Cognitionis DEI ac nostri per vias innumeras attentum animum manuductura.

IX. Possuntne ergo illa media corporea , per quæ, occasione talis aut talis occurrus , & animæ nostræ quibus volentibus , per nostra quoq; corpora & pro ipsorum conditione operatur DEVS, etiam causæ dici effectuum, ab istis manifestè promanantium?

Quoniam universali quodam consensu homines , ad sensibilia semper magis , quàm ad inconspicua & à sensibus remota conversi, virtutis illius divinæ quasi particulam, quam in hoc aut illo corpore efficacem effectû ipso cognoverunt , ipsis corporibus aut menti occasionem præbenti ut propriam adscribere semper sunt soliti , mirum non est ipsos hoc intuitu pro causis verè - efficientibus , & quidem proximis , tum creaturas merè - corporeas, tum humanas mentes semper habuisse; neque jure nos posceremus universaliter jam receptum loquendi modum penitus immutari. Quin igitur *primæ* isti summæque causæ omnium verè - efficienti, non aliunde motæ vel actæ, subordinari causas istas creatas , tanquam

quam *secundas* (quas vocant) facile patimur; dummodo patiendo agere ipsas, actas agere, motas moveri, non nisi instrumentaliter (ut securis in manu lignatoris) aut occasionaliter (ut aperiens valvas) operari, nec aliâ quàm ipsâ illâ Divinâ virtute agere, vel agi potius agnoscantur, quod hactenus evicimus; dummodo non concursum solùm aliquem Virtuti Divinæ, cum alia creaturarum propriâ virtute (quam figmentum esse demonstravimus) sed totum, quantus quantus est, effectum ipsi soli, immediatè ubique (non suppositi quidem, virtutis tamen immediatione) operanti, tribuendum, vi dictorum, meminerimus.

X. Quis verò neget, in fissione aut dedolatione ligni, securim etiam lignatoris elevanti & principali virtuti, suam etiam, nec unam, (gravitatem e. g. aciem, rigiditatem &c.) adungere, eodemq; modo rem etiam cum causa prima & secunda se habere posse?

Hic fanè fons se aperit unicus aut saltem primarius, erroris illius epidemii, quem ex Tyronum sanioris Philosophiæ pectoribus evellere tanto nisu allaboramus. Est profectò verum, securim similiaque instrumenta manuarum, suâ quoque virtute quadam, ab illâ lignatoris omnino distinctâ, tametsi igno-

biliorē quàm effectui producendo sufficiat, in ipsum influere (uti Scholæ loqui amant) frustra quæ omnem lignatoris virtutem fere, nisi ferrea securis rigiditas, impetum adjuvans gravitas, in aciem cuneiformem acuminata figura, & regimini ejus adaptata manubrii conformatio, symbolam suam conferrent; ita reverà concursu quodam facto utrarumque virtutum, lignatoris & securis, ab invicem per se quidem non dependentium. Dolendum verò est Viros doctissimos, circa naturæ effectus metaphysicè magis quàm physicè philosophari adsueto, eandem habitudinem inter Opificem summum & creaturas, ejus instrumenta, præcipitantiùs concepisse, & sic concursum illum vulgò creditum, sed Divinæ gloriæ inadæquatum, in Scholas introduxisse; non advertentes ingens discrimen, quod hujus posterioris & illius prioris generis exemplis intercedit. Etenim securis ponderositas & rigiditas à lignatore planè non dependet; aciem & manubrii commodam adaptationem ab aliis opificibus ordinariè habet; ideoque junctam hæc sive potentiæ sive qualitates, cum lignatoris virtute præstant operam, neque adeò huic uni totus effectus adscribi potest. Aliter se prorsus res habet cum creatore & creaturis. Ille namque, cum

ex. gr.

ex. gr. per Solem h. e. per agitationem particularum ejus ignearum rapidissimarum (quod alibi docendum) inferiora hæc fover & illuminat, aut mediante spiritu animali musculis inflatis & abbreviatis articulos adducit corpusque animale aut ejus membrum aliquod movet &c. ipsemet illos Solis igniculos in grandem illum globum collegit & collectas servat, eosdem, uti cœpit, sic agitare continuat &c. Spirituum item animalium minutias, nervorum, musculorum, tendinumque fibras & formavit primitus ossiumque articulis adaptavit, & hodiernum adaptatas, eadem illa sua virtute sustentat, quâ spirituosâ ista punctula, alioqui immota futura, continuo agitatur &c. Nihil igitur hîc vel formæ, vel figuræ, vel impetûs vel cujuscunque habitudinis, quod non ab una creatoris virtute in ipso opere immediatè (h. e. nullâ ab hac diversâ virtute interveniente vel accedente) uniceque dependeret, creaturis adeò, & partibus earum, nonnisi patientibus, actis, motis &c. istâ non concurrente, sed solâ agente, solâ operante omnia.

XI. Ergone sola etiam hæc DEI
virtus homicidarum furumq; manûs agitât,
cùm insontem illa necant, hæc aliena rapiunt;
adulteri oculos movet, cùm hi uxorem proximâ
libidinose aspiciunt &c. & sic peccamino-
rum actuum causa efficiens erit?

Hic scrupulus non magis urget nostram,
 quàm communem de concursu, sententiam;
 & quæ hujus propugnatores hætenus rectè
 respondent, ea nostra facere omni jure possu-
 mus; nihil adeò, nisi illustrationem quandam,
 fortassis haut incongruam, superaddituri. In
 homicidio nempe, similibusque actibus, quos
 vocant, imperatis, duo semper involvuntur;
 ipse actus physicus per organa corporea exer-
 citus, & antecedanea mentis actio immanens:
 Ille naturâ suâ indifferens est, nec peccami-
 nosi quicquam habet; & hunc divinæ volun-
 tatis conditionatæ efficaciam unicè adscribimus:
 Hæc propria mentis est & libera actio, quoad
 externa quidem per se inefficax, occasionaliter
 tamen sive conditionaliter, secundum legem
 DEI arbitrariam suprâ expositam, efficaciam
 illam quasi deposcens. Quod si hæc imma-
 nens mentis actio aut volitio, vel conformis
 sit legibus naturæ aliisve specialibus, sive in-
 natis & quasi inscriptis, sive separatim reve-
 latis,

latis, vel faltem non adverſa, totus actus externus peccaminofus haut eſt, ſed vel laudabilis vel indifferens; ſin adverſetur iſta notis legibus, peccaminofus eſt actus, ſed rota ejus vitioſitas in actione immanente, quæ lege Divinâ generali optimâ peſſimè erat abuſa, reſidet. Quemadmodum e. g. Rex Hiſpaniæ Siciliæ Pro-Regem conſtituens, & hoc pacto vel tacitâ vel expreſſâ lege generali Siculis imponens, ut imperata Pro-Regis tanquam ſua ipſius ubique faciant, interim verò ipſi Pro-Regi, quænam velit, quæ nolit, ab eo mandari, ſpeciatiim ſecundum varias futurorum circumſtantias, clarè diſtincteque præſcribens, ſi contingat hunc malitioſè quædam, contra regis notam ſibi, at populo ignotam, voluntatem, imperare ſubditis, & hos, (non ipſius, ſed Regis voluntati generali ſatiſfacturos) in rem vel ſibi vel publico pernicioſam obſecundare &c. non ipſe certè Rex in culpa eſt, neque populo ſibi laudabiliter obſequenti, ſed Pro-Regi ſoli, bonitate ſuâ petulanter abuſo, quicquid ſubeſt vitii imputat, meritasque delicti pœnas ab ipſo ſolo depoſcit.

CAP. V.

De

Causis rerum Naturalium
finalibus.

I. *Cùm in cæteras naturalium rerum causas hædenus inquisiverimus, num idem circa finales etiam tentare licebit?*

UTique nec sine magno nostro fructu. Ipsa namque formarum solers inspectio, & fabricæ in unoquoque genere sollicita contemplatio, quasi manu nos ducit, ad agnoscendum usum & scopum uniuscujusque, aut potius (cùm usus ipse plerumque sensu & experimento constet) ad agnoscendam fabricæ aut formæ cujusque prudentem accommodationem ad istum usum ac finem: quod ipsum ulterius nos vel invitos trahit, ad efficientis alicujus causæ sapientissimæ pariter & potentissimæ, h. e. DEI ter-Optimi Maximi agnitionem.

II. Ut

II. *Ut nemo neget, ex evidenti fabricæ cujusdam (e. g. horologii) usus ordinarii (horarum e. g. indicii &c.) correspondentia, prudentem aliquem opificem, nec exiguam ejus potentiam, jure argui; num eodem jure statim summa sapientia & summa potentia concluditur?*

Equidem è tali artificio, quale est horologium, aut si quid est adhuc artificiosius ab humano ingenio uspiam vel inventum, vel in opus ipsum deductum, frustra quis infinitam quandam summamque sapientiam argueret, quia idem humanum ingenium talium artificia non exhaurire tantum & pernoscere, sed imitari quoque potest, eorum adeò finitatem abunde detegens. Atenimverò si quis (1) vel unicam animalis corporis, aut unius etiam oculi, fabricam, ejusque partes & singularum fines ac usus ad animum sollicitè revocet, eos nec expiscari hætenus omnes ac detegere quenquam, (tametsi paulatim plures ac plures indies detegantur) neque perspectorum utcunque, satis admirari aut æstimare magnitudinem, obtinendorum media horumque subtilitatem & applicandi modum &c. potuisse in propatulo est: Si (2) inenarrabilis illa corporum animalium vel solorum oculorum, inef-

ineffabilis varietas, ad eundem illum finem generalem interim ubique collineans seriâ mentis attentione perpendatur. Si (3) stupendam illam fabricarum illarum per alias sui similes in tot secula propagationem usumque & finium illorum stante naturâ sine fine obtinendorum perpetuationem (quæ omnem humani ingenii captum superat, tantum abest, ut vel imitari ruditer horum quicquam valeat,) circumspectè pensitemus; Si deniq; (4) totum etiam reliquum mundum ejusque partes singulas, sive totales sive partiales, luminis, caloris, motûs &c. evidenti correspondentiâ, in certos usus finesque à tot retrò seculis constantissimè dirigi consideremus, quos ipsæ tamen pleræque omnes ignorant &c. tantum abest, ut aut præstituisent eas sibi met ipsis, aut aliæ alias in illos dirigerent &c. palpabile est aliquem earum hinc argui directorem incomprehensibiliter tum potentem tum sapientem.

III. *Quomodo verò ob certum finem agere dici possunt, quæ finem illum ignorant; cum ob finem agere nihil aliud sit, quàm ideò agere, ut finis ille consequatur?*

Secundùm ea, quæ Cap. præced. sunt deducta, res nimis clara est; siquidem, quæ
voca-

vocamus agentia naturalia pleræque omnia propriè non agunt, sed aguntur, ut sic necessum haut sit, ipsis notos esse fines illos in quos aguntur ac diriguntur, sed ipsum Directorem DEVM eos nòsse (utpote quos ipsemèt ex mero beneplacito constituit) sufficiat: quemadmodum horologium aliquod agit ob certum finem, aut potius in eum agitur ac dirigitur ex artificis sive inventoris proposito & consilio. Solus interim homo est, qui plurimos actionum sui etiam corporis fines ususque perspectos habet, quia mente præditus est intelligente liberèque volendi plurima, atque adeò immanenter saltem agendi facultate præditâ; quamvis interim ipsa directio corporis in istos fines cognitos, non tam ipsi huic menti, quàm eidem illi Directori omnium generali, sit attribuenda.

IV. Nonne verò temeritas est & arrogancia, illa Dei Directoris consilia, finesq; ab ipso liberrimè præstitutos innumerabiles, investigare velle?

Ita sanè Cartesio videbatur Part. I Princip. n. XXVIII. & in Medit. IV. quò nomine malè quoque audit apud plerosque Philosophos Christianos cæteros, tanquam præcipuum quoddam evincendæ Divinitatis argu-

E

men-

mentum è manibus quasi nobis extorturus ; tametsi alio planè sensu ista dicta fuisse, quàm quo à cæteris accipiuntur , & *Cartesius* ipse apertè testetur in Resp. V.tis p. m. 69. & *Petrus Poiret* , in Cogit. Rational. de Deo &c. Lib. III. cap. XV. n. VIII. & IX, prolixè inculcet. Quicquid verò hujus sit, nobis his distinctionibus hæc λογισμαρία videtur evitanda :

(1) Si per fines & causas finales illæ intelligantur, quæ DEI voluntatem ad hæc vel ista ordinanda moverint ac induxerint , alioqui sic non ordinaturum , tales fines nec dari (cùm ejus voluntatem nihil antecedit) neq; adeò investigari sine summa stultitia posse :

(2) Si per fines intelligantur illi scopi naturæ limites omninò transcendentés , quorum mentionem facit cit. l. Poiretus , e. g. cur DEVS permiserit lapsum angelorum vel hominum? quibus de causis naturam sic, & non aliter , disposuerit? &c. summæ temeritatis esse & arrogantia talia perinvestigare velle :

(3) Si per fines intelligantur illi usus , quos præstare res creatæ materiales, interventu fabricarum suarum, evidentissimè percipiuntur ; non solùm licitum, sed pium etiam atque utilissimum est in illos diligentissimè inquirere ; siquidem satis patet attendentibus hic etiam finis & scopus à Naturæ Autore intentus , ut per

per ejusmodi usum specialium inquisitiones ipsum ejusque invisibilia quasi palpando inveniamus, in quo Cartesium & Poiretum ipsos consentientes habemus: Si denique (4) eâ intentione quis in illos naturalium fines inquireret, quasi omnes ac universos vel à se vel ab aliis aliquando detectum & exhaustum iri crederet; hoc etiam ineptæ cujusdam arrogantiae, & pudenda in DEVM foret injuria.

V. *Quinam igitur est generalis rerum Naturalium finis, quem ubiq; respicere debet omnis etiam earum consideratio?*

Est is ipse, quem modò diximus, ut DEVM ex his suis operibus agnoscamus, sive ad ejus infinitam tum sapientiam, tum potentiam, tum bonitatem, undique elucescentem respiciamus, grataq; adeò ac devotâ mente eam deprædicemus: Est, inquam, (ut alii rem eloquuntur) Divini Numinis Gloria.

VI. *Numquid igitur ob gloriam suam, à miseris homuncionibus reportandam, Mundum hunc condidisse dicetur?*

Absit equidem ut eo sensu tale quid dicamus, quasi quadam humani applausûs aut

mortalium deprædicationis excellentiâ ille-
ctus, aut mundum hunc, aut hominem, ejus
incolam & spectatorem, creaverit: Quid e-
nim ex laude non nisi probra merentium ad
summam ejus perfectionem & ἀντίφρασην ac-
cedere posset? Sed cum, pro mero suo bene-
placito, condere mundum hominemque, suæ-
que adeò sufficientiæ ac beatitatis rivulum
quendam extra se effundere, statuisset, haut
incongruè creditur, in eum quoque finem
istum tantuplici fabricarum varietate instru-
ctum, hunc autem intellectu & cognoscendi
facultatibus diversis præditum voluisse, ut
hic istum attente contemplando & scrutando,
millevariam ubique occasionem offenderet
agnoscendi summisque laudibus extollendi
Conditoris; idque sui potius quàm hujus
gratiâ.

VII. *Sic igitur alter etiam finis Na-
turæ conditæ generalis hinc elicietur: Omnia
scilicet (ut habet Scholarum commune
dictærium) condita esse propter
hominem?*

Si (1) in sensu exclusivo sumeretur hy-
perbolicum hoc quodammodo assertum, quasi
vasta hæc Mundi machina, omnesque ejus
singulæque partes, etiam remotissimæ ac tot
retro

retrò seculis absconditæ, in unius humani generis commodum directè fuissent à DEO conditæ, nunquam alioquin eorum quidquam producturo &c. (quo sensu crudo an id quisquam acceperit, nobis equidem haut constat) haut parum id fortè, non vanitatis solùm, sed arrogantix quoque ac temeritatis, in asserentibus argueret, utpote consiliorum divinorum in condenda natura adæquatam cognitionem necessariò, sed inepte, sibi arrogantibus. Sin (2) hic fuerit asserti modestior sensus: Tametsi nobis homunculis hautquamquam constet, quorsum innumerabilis illa immensorum corporum multitudo, mira varietas ac dispositio, complurium singulares affectiones & conditiones &c. collineent (cur e. g. Lunæ globus æquè ac noster terraqueus, non in obversa nobis tantùm, sed in aversa quoque, facie succèssivè illuminetur, tenebrarum adeò lucisque vicibus, montium valli-umque alternâ dispositione &c. &c. gaudeat? quorsum ille Saturni sive annulus, sive qualiscunque appendix, huic uni corpori adjunctus sit? & similia hoc ævo detecta plurima) indubiè tamen plurima Mundi hujus vasti miracula hominis etiam utilitatem & commoda directè respicere; ex omnibus autem unde- & quandocunque cognitis ipsum

sanæ rationis ope fructum aliquem elicere, saltem occasionem agnoscendæ & adorandæ Divinæ benignitatis, procurandæ quadatenus terrenæ felicitatis, imò hac viâ præparatoriâ quodammodo ad altioris quoque media promptius admittenda se disponendi &c. capere posse; nihil utique aut falsi, aut vani, aut hyperbolici eo contineri crediderim,



PARTIS GENERALIS
PHYSICÆ
MODERNÆ SANIORIS
SECTIO II.

De

Corporum Naturalium affectionibus generalibus.

CAP. I.

De

His affectionibus generatim
spectatis.

I. *Quid Affectionum nomine hoc
loco intelligendum venit?*



Uicquid corpora naturalia vel omnia, vel pleraque, vel plura saltem, quomodocunque afficit, sive ut proprium quoddam, secundum omnes quatuor Logico-
rum modos; sive ut merum accidens aut contingens, verbo: Omnia Φαινόμενα, γινόμενα, συμβαίνοντα, πάθη, δυνάμεις tum ποιητικάς,

tum παθητικὰς, ἤ παθῶν ἐνεργείας, Διαθέσεις, ipsas denique σερήσεις & impotentias, utpote quæ omnia causas sui physicas agnoscunt, quas eruere ac demonstrare hujus est Scientiæ; prout egregiè rem deduxit B. noster Piccartus in Disp. de Notis Propp. Necessariorum, Philos. Altorff. p. 132. reperiunda, & Aristoteles ipse non solum ipso facto & in actu, ceu loquuntur, exercito, sed in Signato quoque regulas demonstrativas illustrans, II. Post. Anal. c. 17. Eclipsin v. g. Lunæ actua-lem, foliorum ex arboribus defluxum &c. inter affectiones demonstrabiles recenset.

II. *Annon autem Aristotelica Scho-
læ antehac sola propria in quarto modo, siue
attributa rei alicujus reciproca affectionum
nomine dignabantur?*

Ita sanè faciebant, & quantitatem v. g. *Mobilitatem*, (non motum actua-lem, cum terra non moveatur) *Locabilitatem* (non au-tem esse in loco, cum cœlum in loco non sit) *quiescendi potentiam* (non quietem ipsam) & alia fortè paucissima, inter generales cor-porum naturalium affectiones reponebant; quòd omne corpus naturale sit quantum, mo-bile, locabile &c. & vicissim omne quan-tum, mobile, locabile &c. sit corpus naturale;
exclu-

exclusis interim qualitatibus omnibus , tanquam meris accidentibus. (Vid. nominatim Systema Phys. Ernestinum Lib. I. Part. Gen. cap. IX.) Sed enimverò hoc modo Scientiam physicam generalem intra limites angustissimos coërcebant , pro demonstrationibus potissimis venditantes misellos aliquot Syllogismos simplices , e. g. Omne materiatum est quantum , O. Corpus naturale est materiatum , E. O. Corpus naturale est quantum : O. quantum est circumscriptibile, est consequenter locabile, O. Corpus naturale est quantum, Ergo O. Corpus naturale est locabile &c. In quibus major propositio & conclusio æquè notæ sunt , parumque novæ scientiæ animo sciendi cupido affertur. Quidni ergo tam laxi affectionum sciendarum, h. e. è suis causis in profundo puteo latentibus , tantoque magis desideratis, demonstrandarum limites figuntur, quàm latè se sciendi desiderium exporrigit , quod circa rariora non solum sed vulgatissima quoque accidentia , sed quorum causæ & rationes non ita vulgatæ sunt , vel præcipuè hæret , & informari deposcit ; e. g. cur & quomodo ferrum pendulum ad magnetem, & hic vicissim pendulus ad ferrum determinato intervallo diffitum quasi sponte sua accedat ? Cur Luna in quibusdam tantum

E s

pleni-

pleniluniis, non in omnibus &c. ex improviso quasi obscuretur? Cur flante vento occidentali aër regulariter pluviosus sit aut nivofus in his nostris regionibus? aliaque hujus generis *Φαινόμενα* sive *συμβαινόντα* innumera-bilia?

III. *Quenam igitur sunt generalia illa Phænomena sive accidentia, quorum causa & rationes in hac parte generali merentur exquiri?*

Sunt ea, quæ vel omnibus, vel plerisque, vel pluribus saltem corporum naturalium generibus communia sunt: E. g. (1) *Quantitas*, non ita simpliciter, sed cum certa limitatione & accommodata cujusque scopo proportionem considerata; id quod mox peculiari capite distinctius deducetur. (2) *Qualitas*, iterum non abstractè, quòd omne corpus certa quadam qualitate, vel etiam pluribus ac diversis, præditum sit (id enim demonstratione non indiget, neque scitur, sed sensu plerumque percipitur) sed specificè magis & pressius; ut e. g. cum *Lux* & *Lumen* sit generalis quædam affectio plerorumque corporum mundanorum, ejusque variationes & accidentia, & effecta miranda pariter & jucunda quotidie nobis offerantur, naturam rationemque lucis,

ope-

operandi modum, effectuum rationes & causas declaremus. (3) *Situs* & *Locus* corporum, non quod demonstrare opus sit, quodvis corpus in hoc mundo habere suum locum, aut certè occupare aliquem posse (cujus distinctiunculæ lusibus antehac delectabantur Scholæ) sed ut rationes physicæ inquirantur, cur alia vel terræ nostræ, vel alii corpori mundano propius, alia longius inde posita, & in ipsius terræ visceribus, quædam profundius, alia altius locata deprehendantur, &c. (4) *Duratio* seu *Quies* quædam & permanentia in eodem statu, e.g. sub eadem forma essentiali, sub eadem quantitate aut qualitate, in eodem loco &c. in aliis diuturnior & constantior, in aliis brevior & caduca magis &c. quibus diversitatibus sanè scientifica quædam subest ratio, inquisitu utique digna, nec usu suo destituta. (5) Adeo oppositus illi *Quieti* *Motûs*, aut perseverantiæ *Mutatio* vel *Mutabilitas*; quæ profectò innumera rursus exhibet naturalium corporum communia Phænomena & accidentia, pervestigatu sanè scituq; dignissima, cum omnibus suis demonstrationibus nobis peritura ac inanes nominum cortices absque nucleo, Physicæ generalis loco, relictura, si ex rigore illo Scholastico, Quæst. II. notato affectionum communium numerus esset ineundus.

IV. Non-

IV. *Nonne verò Vacuum etiam seu Inane, Tempus item, Finitum & Infinitum &c. ad affectiones corporum naturalium veniunt referenda?*

Disputantur equidem multa in Aristotele ejusque sequacibus Scholis, de *Vacuo* seu *Inani*, de *Infinito*, de *Tempore* &c. Fatentur tamen ipsæ Scholæ (Vid. *Systema Phys.* Ernestin. Lib. I. Part. Gen. c. XII.) de *Vacuo* ibi non agi, tanquam de affectione quadam corporum naturalium (siquidem ab illo potius abhorrere omnem naturam evincere conantur) neque de *Infinito*; sed quatenus illud *Loco*, hoc *Finito* tanquam affectionibus opponantur, iisque illustrandis inserviant: De *Tempore* similiter (eodem *Systemate* teste cap. XIX.) non nisi ideò, quod in motu attendatur, & per illum etiam definiatur. Quam equidem distinctionem *Cass. Wyssius* etiam probat, *Proœm. Phys. Quæst. II.* indirectè quidem, & ad illustrandas affectiones cæteras isthæc huc referri statuens, directè & per se non item.

CAP. II.

De

Quantitate corporum Naturalium speciatim.

I. *Quanam est illa quantitas, de
qua in præsentì sermo est?*

NON illa Metaphysica & abstracta, terminos omnes excludens, de qua Sect. I. cap. I. Quæst. VII. sub fin. actum est, utpotè quæ materiæ primæ ac informis potius, quàm corporum formatorum, affectio quædam, si non essentia ipsa, est; sed quantitas determinata (uti Systema Ernestinum sub init. cap. X. monet,) h. e. finita; ita ut quantum hîc idem sit quod finitum. Et potest quidem hæc affectio de corporibus naturalibus omnibus & singulis ex eo facilè demonstrari, quòd, cum corpora naturalia plurima, imò innumera, esse constet, nullum eorum universam comprehendat materiam, sed ejus aliquam solùm, ab aliis separatam, & hoc ipso terminatam, portionem; aut, si quis fortè malit, ex eo, quòd, cum Materia ob hoc ipsum interminata dicatur extensio, quia nullâ certâ formâ sic definita, sed infinitis induendis apta, corpus naturale quodcunque verò peculiari suâ formâ

mâ sit definitum ac circumscriptum : An verò hæc veritas , ipsis sensibus ubique obvia omnem hujus affectionis scientiam exhauriat (uti Scholæ hæctenus crediderunt) haut immeritò fortè dubitatur.

II. *Annon ipsæ Scholæ ex hac alias porro affectiones scientificè deduxerunt ?*

Non unas quidem : nimirum *Divisibilitatem* , *Mensurabilitatem* , *Impenetrabilitatem* , & *Locabilitatem* ; quarum secunda & quarta quidem ex quantitate finita sua sponte fluunt, siquidem , ut interminatum & infinitum eo ipso immensum est, ita finitum quodcunque tantò mensurare vel emetiri facilius licet, quantò magis finitum & arctioribus limitibus conclusum est; & quod finitum est , ab aliis corporibus ambiri claudique potest, id quod locari Peripateticis dicitur : Divisibilitas autem extensioni reali cuicunque, etiam infinitæ vel interminatæ, atque adeò ipsi materiæ informi competit , quæ corpus naturale non est ; sicut Impenetrabilitas ipsis materiæ minutiis sive atomis (quæ corpora quidem, naturalia tamen haut sunt) primariò convenit. Quod si nihilominus hæc quoque affectiones ex quantitate finita seu determinata quâ tali

Rue-

fluerent; nondum tamen hæc esset præcipua Quantitatis, hoc loco, consideratio.

III. *Quid ergo notabilius circa corporum naturalium quantitatem observandum venit?*

Illud maximè, quòd ea non determinata tantùm in singulis generibus, sed cujusque scopo, usui, & officio proportionaliter determinata sit. E. g. cùm apum officium, ipsâ naturâ docente, sit, succum melleum & ramenta cerea subtilissima ex flosculorum calicibus & plantarum recens-germinantium gemmulis colligere; tenellum certè illarum corpusculum & proboscis acuta penetrandis angustis illis profunditatibus prorsus accommodata cernitur: dum ex opposito Equi, Tauri, Elephanti, similiumque corpora, gestandis trahendisque oneribus, hominum quidem consilio, at Naturâ ipsâ manifestò destinante, applicata, mole suâ & robore molientis istis egregiè sunt proportionata: utrobique etiam organis vitalibus corpori toti servando destinatis, ejus magnitudini pariter accuratâ proportionem respondentibus. Sic ratio longitudinis pedum & rostrorum in ciconiis, ficedulis & id genus avibus, paludes, rivulos, aliaque aquosa loca frequentantibus, in

in propatulo est. Sic solaris globi immensum ferè incendium, tot globis aliis opacis ingentibus, ut Terræ, Lunæ cæterisque planetis ex immensa distantia fovendis, illustrandis, & calefaciendis planè proportionatum deprehenditur; idemque in specialibus aliis corporibus per universum mundum attendenti passim observare non erit difficile.

IV. *Quid inde commodi curiosus
& attentus talium observator
haurire potest?*

Illud, quod ad Physicæ Scientiæ scopum primarium (quem in Prælimin. Quæst. VI. intimavimus) facit vel maximè. Providentiæ nimirum aliquam generalem evidentissimè palpabilem isthinc infallibiliter concludet, eamque ad scopos innumerabiles ineffabili quantitatis determinatæ varietate summâ tum potentiâ tum sapientiâ se exporrigentem, h. e. verè Divinam. Etenim (ut vilissimo furcarum & fuscinarum exemplo rem illustremus) fuscinulæ mensariæ spithamæ circiter, culinariæ bipedalis ferè aut tripedalis, furnariæ duarum ulnarum & quod excurrit, fœnariæ denique perticæ vel etiam perticâ major, longitudo & huic respondens spissitudo, dum suo cujusque usui manifestissime

simè proportionata cernitur, nemo tam stolidus est, quin alicujus opificis providam aliquam curam & utile consilium exin agnoscat. Quidni ergo, innumerabilibus usibus nobilissimis per omnes angulos hujus vasti mundi, imò vel in sola terraquei hujus globi superficie, passim observandis respondentem ubique & analogam corporum tales usus præstantium quantitatem rectè æstimantes, istam, quam diximus, universaliter-potentem ac sapientem Providentiam oculi mentisque judicio infallibili concludamus?

C A P. III.

De

Corporum Naturalium Qualitatibus, & hîc quidem sensibilibus in genere, tactilibus autem in specie.

I. *Quid intelligimus per Corporum naturalium Qualitates?*

SI de nominis significatione quæstio sit, nihil aliud isto hîc indigitamus, quàm varias eorum habitudines & conditiones, à quibus talia vel talia, e.g. colorata, alba, nigra, lucida, opaca, dura, mollia, calida, frigida &c. denominantur; Sin rem ipsam generatim ex-
F
primi

primi desideret, qualitates corporum physicæ in diverso minutiarum materialium sive corpusculorum positu, nexu, motu, quiete &c. universæ, æquè ac eorum Formæ Sect. I. cap. II. explicatæ, consistunt; hoc uno inter illas &, quas nunc consideramus, accidentarias qualitates observato discrimine, quòd sine his materialium particularum dispositionibus & coordinationibus magis quasi superficiariis, unumquodque corpus officium sibi proprium expedire & functionem ordinariam nihilo minus obire possit; cùm ex adverso istæ, tanquam essentielles qualitates, talem atomorum sive minutiarum, posurum, nexum &c. præsupponant, quo sublato & facultate muneris ordinarii & ipso nomine suo genere proprio statim excidit.

II. *Quanam sunt qualitarum κατ' ἐξῆς dictarum, sive accidentalium summa genera?*

Duo possunt omnino statui; alterum *Sensibilem* h. e. sensus nostros variè moventium & afficientium, in quinque subalterna genera porrò, pro sensuum sc. numero, dividendum, *Tactibilem* nempe, *Gustabilem* sive *Saporum*, *Olfactibilem* sive *odorum*, *Audibilem* sive *Sonorum*, & *Visibilem* denique, h. e. *Lucis*, *Luminis*,

minis , colorum &c. suo loco specialius considerandarum : alterum *Insensibilem* , quæ in sensus ipsæ immediatè haut agunt , effectûs tamen edunt in sensus incurrentes plerosque. De priori genere hoc & seqq. agetur capp. de posteriori deinceps suo loco & ordine.

III. *Quonam igitur modo generalis qualitatû sensibilibum ratio est concipienda ?*

Quemadmodum qualitates, ut generatim rem eloquamur, non sunt peculiaria quædam, absoluta , & materiæ corporibusque realiter contradistincta entia ; (ceû Scholæ quondam credebant, multis interim sese impediētes difficultatibus) sed entium potiùs aliquid, h. e corporearum substantiarum & materiæ variæ tantû modificationes , in particularum diverso positu, aut ordine, aut connexionē, aut figurâ, aut agitatione, aut horum pluribus simul, vel etiam omnibus junctim, sub multiplici tamen varietate, consistentes : ita qualitas sensibilis talem istorum modorum combinationem, nîsus præcipuè vel agitationis aut pressuræ saltem alicujus peculiarem rationem designare videtur, quâ fibrillæ nervæ, per oculi, auris cæterorumque sensoriorum organorum intima diffusæ (id quod in

parte speciali demum distinctiùs percipietur) diversimodè concutiantur, tendantur, premantur &c. idque vel immediatè ferè ut in tactûs sensu, vel mediante subtili quodam corpore inter objectum & sensorium dispanso.

IV. Tactilium ergo qualitatum specialior quodammodo conceptus quomodo est formandus?

Concipiendæ sunt vel in ipsâ superficie tangendi, aut tangentis immediatè nostra corpora, corporis eminentes magis minusve particulæ, acutioris aut obtusioris figuræ, vel similes infinities variantes in aëre aut alio fluore nos cingente circumflæ aut quasi circumvolitantes minutia, in papillas nerveas subcutaneas miliares, per totum corporis habitum undiquè disseminatas, & in filamentorum tenuissimorum collectionem quandam passim desinentes variæ impactæ; quarum adeò impressiones quoque, harumque perceptiones, miris modis variare, indeque diversissimarum istarum nomenclaturis occasionem menti percipienti præbere necessum est: prout certè crassiora instrumenta, ut aciculæ, cultri, terebræ, pectines, ferræ, & similia, eidem corporis parti æquali licet impulsus

sû, vel impressionis gradu impacta, diversissimum tamen sensum inducunt, ob solam figuræ, acuminis, hebetudinis, subtilitatis aut crassitie &c. diversitatem.

V. *Nonne ad certas classes revocare commodè licet magnam tactilium qualitatum multiplicitem?*

Licet utique earum miram varietatem intra 4. præcipuè classium cancellos coarctare; quarum *Prima* ex una parte comprehendat *Firmitatem* sive *Stabilitatem* (Aristoteli peculiari vocis significatu *ἑρρότητα*, siccitatem dictam) h. e. eam corporum conditionem, quâ tactui prensanti sensibilibiter resistunt, dividi se difficulter patiuntur, multò minus ultrò diffluunt aut alienis terminis coërceri postulant, cujus tres insigniores gradus & quasi species sunt (1) *Durities*, in ligno v. g. lapide, metallo &c. tactui nihil aut parum cedens partiumque separationi validiùs renitens; (2) *Mollities*, in cera tepefacta v. g. luto macerato &c. quæ digito pressa cedunt & pressionis vestigia servant, nec sponte iterum coëunt, aut digitum prementem ambiunt &c. (3) *Elasticitas* seu *vis elastica*, in pinnis e. g. & arcubus chalybeis, vesicis inflatis, lanis, plumisve compressis, virgultis inflexis &c. quæ flexa aut pressa

cedunt quidem, sed pressione cessante ultrò quasi in pristinum situm se restitunt; Ex altera parte *Fluxilitatem* (Aristoteli rursum peculiari vocis significatu ὀρεΐσθη, quasi *humiditatem*, synecdoche quadam speciei pro genere, appellatam) h. e. cum corporum statum, quo dividendi v. g. digito aut transitoris aliis corporibus sine magna resistantia cedunt, ab ipsorum tergo autem statim iterum confluent, aliàs quoque sponte suâ diffluxura, nisi aliorum ambitu coercerentur; cuius duos iterum gradûs insigniores notare licet, (1) *Liquiditatem* sive *Fluiditatem*, quæ est corporum per declivia sensibilibiter prolabantium, in plano verò ad libellam partes suas componentium, aquæ v. g. olei, Mercurii &c. (2) *Volatilitatem* seu *Spirabilitatem*, quæ est corporum subtilissimorum, ut aëris, ætheris, ignis, vaporum, fumi &c. quorum minutia inspirari aptæ volitant magis quàm fluunt.

VI. *Fam velim mihi enarratarum ac nominetenus expositarum conditionum siue qualitatum realem quoq; & imaginabilem rationem modumq; declarari.*

Jure quidem hoc poscitur ab iis, qui scientiam physicam profitentur ac ultra vulgus (quod enarrata non ignorat) sapere vult videri.

deri. Dico igitur, quâ fieri brevitatem potest,
 (1) *Firmitatem* ac *Stabilitatem* corporum ejusque gradûs omnes, in particularum ea componentium quiete quadam, alibi majori alibi minori, consistere, per hanc autem non intelligendum esse merum agitationis defectum, (quo supposito nulla foret spontanea quidem diffluentia) sed cum renixu quodam plus minus valido, ab aëris ambientis & comprimentis pondere dependente, conjunctum; ex quo tantò major ac tenacior nascitur particularum cohærentia, quantò planioribus illæ facieculis se invicem contingunt (teste marmorum politorum ac leviter humectatorum experimento notissimo) tantò contrà facilior separatio ac divisio, quantò acutioribus angulis aut faciecularum inæqualitatibus notabilioribus sibi mutuò occurrunt: ita sc. poros constituendo laxiores & copiosiores, qui ejusdem aëris (saltem subtilioris, de quo infra) ingressum minus cohibent, ejusque adeò pressionem intus foràs factam haut exiguam æquè admittunt, alteram forinsecus introrsum factam, aliquantò licet majorem.
 (2) *Fluxilitatem* econtrà in actuali quadam singularum particularum agitatione consistere, cujus causa supponenda venit alia ætherea & utroque aëre subtilior & agilior materia, quæ

particulis aut sphaericis magis aut cylindricis
 lævigatioribus, aut aliàs levioribus interfluens,
 eas, ob figuræ præfertim inhabilitatem, super
 invicem quiescere aut comprimi dicto antè
 modo, non sinat, sed aut contiguas & paulò
 ponderosiores super invicem provolvat, vel
 multò leviores à contactu mutuo notabiliter
 disjunctas, & intra se volitantes magis quàm
 provolutas, server; ad instar plumarum v. g.
 aut palarum ab aëris turbinato quodam flatu
 dispersarum. (3) *Elasticam* denique *virtu-*
tem, ab eadem aëris sive crassioris, sive sub-
 tilioris gravitate & pressura derivandam esse,
 quæ uti corporum partes in certo aliquo con-
 nexionis aut compressionis statu graduque or-
 dinariè detinet, sic easdem partes, sicubi ali-
 quantulum ab invicem separatæ, distentæ aut
 elongatæ violenter ac præter solitum fuerint,
 cessante violentiâ reuniat aut in pristinam laxi-
 tatem restituat.

VII. *Quenam porrò qualitates ad secundam tactilium classsem erunt re- ferendæ?*

(1) *Asperitas* quorundam corporum, quæ
 tactum ipsa stringentem, aut ab ipsis perstri-
 ctum, vellicant, radunt, lædunt, vel etiam
 lacerant, pro vario sc. illius asperitatis gradu;
 qualis

qualis e. g. in pumice, faxis arenosis, arborum quarundam, ut quercuum &c. corticibus, maximè sensibiliter in limis, ferris, & similibus, percipitur. (2) *Lævitas* sive glabrities in iis corporibus quæ perstricta aut tactum perstringentia, ipsum blandè afficiunt, ut specula, marmora polita, cerasa, cutis humana in locis non pilosis &c. Cujus eximia quædam species est 3. *Lubricitas* in corporibus manui prestanti facillimè se subducentibus & contineri se difficulter patientibus, qualia sunt e. g. anguillæ & plerique alii pisces, sapor madidus, stiria glacialis &c.

VIII. *Detur ergo nunc harum etiam qualitatum imaginabilis ratio & realis magis conceptus.*

Ille verò in hoc genere adeò obvius est & manifestus, ut ii quoque, qui aliàs in explicatione qualitatum aliarum nominali plerumque subsistunt, hîc rem ipsam, præeunte Magistro in Categoriis, satis apertè declarent. Scilicet nimis evidens est, in limis & ferris unarum partium supra cæteras eminentia & in aciem aut apicem desinens, rigida quodammodo, extremitas, eademque inæquabilitas in arborum corticibus, mento virili non ita recens-raso, similibusq; , oculis ipsis exposita,

in aliis verò (ut in novaculæ acie) secundum analogiam quandam collectu facilis , aut microscopii saltem auxilio detegenda: dum e contra in glabra & lævium superficie æquabiliter dispositæ partes omnem organi tactorii superficiem undiquaque æqualiter afficiunt , parum admodum , aut omnino nihil , quod sensu distinguì posset , hærentes.

IX. *Tertia verò classi quænam species qualitatum tactilium adtribuendæ veniunt?*

(1) *Crassities* ac *Tenuitas* , quarum hæc in æthere , aëre , igne , spiritibus chymicis &c. quæ in aliorum poros facilius se insinuant sensibusque & cum primis tactui minus obstant , illa in terreis plerisque , liquoribus bituminosis & oleosis &c. difficilius penetrantibus & magis impingentibus , se exerit : (2) *Raritas* ac *Densitas* , sive *Soliditas* , illa in spongia , lana , vapore , nebula , pumice &c. hæc in marmore , metallo , imò in igne quoque aliisque tenuioribus , notabilis : (3) *Continuitas* & *contiguitas* , hæc in acervis frumentorum , cumulis arenæ , faxisque crassiùs arenosis &c. illa in marmore , metallo , lignis , præsertim solidioribus &c. obvia : (4) *Tensorum* & *compressorum status* , i. e. in solito majore vel minore

minore extensione violenta constitutio, qualem prior casus in expansis pellibus, inflatis vesicis, chordis & arcubus violentius adductis &c. posterior in spongia manu compressa, culcitris insidentium vel incubantium pondere coarctatis &c. observandam asserunt.

X. Harum igitur vulgarium satis qualitatū & conditionum conceptus reales reddere, non erit adeo difficile?

Sic est sanè, idque vel ex eo conjectandum, quòd Aristoteles, in aliis explicandis ferè circa nomina hærens, in harum tamen aliquibus rem ipsam satis distinctè & imaginabiliter expressit, eas ἡσιν πᾶσι τῶν μορίων δηλῶν generaliter asserens in Categ. Qual. & speciatim Densum quid esse dicens τῷ πρὸς μέγεθος συνεγγύς εἶναι ἀλλήλοις, Rarum autem τῷ διαστέναι ἀπ' ἀλλήλων; quod utrumque sylvæ & capilli, alibi arctius & numerosius propiusque, alibi laxius & sparsim consitorum, exempla oculis ipsis ingerunt. Ita *Crassities* in particularum aut molecularum vel distinctè visibilium, vel tactus sensu magis prensabilium magnitudine, *Tenuitas* in exilitate & minore tangibilitate rectè reponetur: Et cùm *Continuitas* physica (mathematicam enim & perfectam corpora ex particularum confluxu quodam nata omnia,

respu-

respuunt) arctissimam quandam & insensibilem minutiarum juncturam, *Contiguitas* contra commissuras earum distinctè perceptibiles, *Compressorum status* autem majorem densitatem, ille *Tensorum* autem (ex ea saltem parte, in quam tenduntur) majorem raritatem, manifestè supponunt; horum omnium quoq; conceptus reales imaginationi distinctè ante oculos quasi versantur.

XI. *Enarrentur ergo nunc reliquæ qualitates tactiles, ad quartam earum classem referendæ.*

Illæ sunt cumprimis quatuor illæ, vulgò primæ dictæ, qualitates, tactum vel maximè afficientes, *Calor* nempe, in igne, aëre æstivo, thermis &c. *Frigus* in glacie, nive, aquis fontanis, aëre hiberno &c. *Humiditas* sive *Mador* (hoc enim loco in sensu vulgari siccitatis & humiditatis vocabula accipimus, quo humidum dicitur, quòd madet, was feucht und naß ist/ siccum, quod madore caret, was trocken und ohne Feuchtigkeit ist) in aqua, nive liquefcente, oleo, aliisque viscidis etiam pinguiusque liquoribus; *Siccitas* denique ejusque summus quasi gradus, *Ariditas*, in lateribus recens-coctis, arena æstivo soli exposita, pumice, ossibus, præsertim in sole vel igne calcinatis &c. cumprimis conspicuæ.

XII. *Sed*

XII. *Sed quid de Gravitate & Levitate fiet, quarum hactenus nulla est facta mentio?*

Hæ vel peculiarem, adeoque numero quintam, constituere classem possent, vel ad prævalentem quartam, vel ad Tertiam referri pro cuiusque arbitrio, & hoc loco eatenus considerari, quatenus tactu, uti superiores, percipiuntur, ob notabiliores autem, quæ circa ipsas observantur, circumstantias, & causam efficientem illius nisus, vel sursum in levibus, vel deorsum in gravibus, investigandam, peculiarem merentur considerationem, in parte speciali de Elementis commodius instituentiam.

XIII. *Anne verò hæ, & superiores reliquæ, tanquam secundæ vel tertiæ, à Calore, frigore, humiditate & siccitate, tanquam à primis, omnes oriuntur.*

Ita sensisse certè Aristoteles videtur Lib. II. de Gen. & corrupt cap. II. in cuius fine concludit, *manifestum esse, cæteras differentias omnes* (quibus densa v. g. à raris, crassa à tenuibus &c. distinguantur) *ad illas primas reduci,* & Magistrum postea secutæ scholæ constanter ferè docuerunt: Alibi tamen (nominatim VIII. Phys.

VIII. Phys. t. 55. aliter & sensisse & locutus deprehenditur laudatus Philosophus, & res ipsa multis in casibus reclamat. Quo pacto enim, amabo ferræ vel limæ aut spinæ dorsi ejusque vertebrarum, asperitas magis à siccitate (h. e. firmitate & consistentia quo sensu Aristotelici hanc vocem accipiunt) quàm dentium elephantinorum & humanæ Calvariæ &c. glabrities, dependebit? & non potius utraque à *ῥεσ* quadam partium superficialium, vel magis æquabili vel minus? Et cum Gravitas à partium densitate, levitas à raritate manifestè satis videatur profluere in quibusdam casibus, cur aqua tamen multo densior, imo ignis ipse, porosius valdeque raris lapidibus, leviora sunt? Annon calor ex attritu solidiorum lignorum aut axiculorum ferreorum cum suis matricibus, à densitate & soliditate illorum evidenter dependet? non aliter ac densitas nivis liquefcentis vicissim à calore &c. Ut rectius dici videatur: Qualitatum tactilium nunc has ab illis, nunc illas vicissim ab his quodammodo dependere, nullas adeò præcisè primarum vel ortarum nomen præ cæteris merere; sed potius si quas simpliciter primas dicere necessum esset, eas non in hoc elementarium genere, sed in materiæ simplicitate quæri debere, *Figuram*, sc. *situm*, *Motum* &c.

XIV. *Anne*

XIV. *Anne verò tactatiliū qualitatum contemplatio ad Scopum physicæ primarium conferre quiddam potest?*

Imò, & plus quidem, quam antehac unquam aut alius quisquam, quod sciam, directè animadvertit, aut egomet vel hariolando conjeceram. Nimirum, tactiles hæ qualitates (1) ideo id nominis ferunt, quòd tactûs sensum afficiant immediatè, ipsæ adeò, non corporum substantiæ, propriæ loquendo tangerentur: (2) Ipsa earum natura aut motum aliquem (uti Calor, frigus, fluiditas &c.) aut nisum saltem vel pressuram (uti gravitas, levitas, vis elastica &c.) actu ipso involvit, aut, ut sensibilis tactilisque evadat, motum aliquem præsupponit (nec enim vel limæ asperitatem, vel mucronis acumen, aut cultri aciem, aut densitatis obnixum &c. tactu sentimus, sine aliqua illarum figurarum hoc aut isto modo, laxius arctiusve &c. dispositarum impressione in Organi tactorii fibras factâ;) adeoque in rigore philosophico id quod immediatè sentimus, tangimus, palpamus, impressio est, nisus est, motus est. Atenimverò (3) Motum omnem, nisum, pressionem, aut quemcunque tandem corporum unorum in alia conatum, nihil aliud esse, quam potentissimi

Numi-

Numinis efficaciam, ab initio hujus operæ, cap. nempe III. Sect. I. Quæst. III. evicimus. Quamobrem (4) in omni tactu nihil aliud immèdiatè sentimus, palpamus, prensando percipimus; quam potentissimam illam vim DEI motricem; ut propriè & secundùm literam etiam intelligi possint aurea illa Apostoli verba, quibus Actor. XVII. v. 27. dicit, hominum universum genus per terræ superficiem dispersum esse, ζητεῖν τὸν κύριον, εἰ ἄρα γε ψηλαφήσειας αὐτὸν καὶ εὗροιεν i. e. ut quærerent Dominum, si fortè contrectarent eum manibus & palpando invenirent, hujus rei possibilitatem hac additâ statim ratione stabiliens: καὶ τοι γε ἔμακρὰν ἀπὸ ἐνοὶ ἑκάστος ἡμῶν ὑπάρχοντα, utpote non longè ab unoquoque nostrum existentem &c. Quorum attenta seriatque consideratio, quantum præparare animum ad veram pietatem, Divinæque præsentiaæ sensum quovis casu ingruentis corpori nostro aut doloris etiam acutissimè, aut suavitatis gratissimæ, valeat, facile judicabitur.

XV. Quid igitur rei tandem, sub his Caloris, frigoris &c. enarratarum qualitatum vocabulis, erit concipiendum?

Ut paucis me expediam, (1) Calorem concipio ut motum varium ac celerem particularum

rum quarundam valdè exilium , acutarum & rigidiuscularum : (2) *Frigus*, ut motûs vel agitationis talis defectum vel imminutionem saltem : (3) per *Humiditatem* eam particularum, sive proprie corpus aliquod constituentium , sive adventitiarum , conditionem , quâ aliorum corporum poris, vel prominentiis , præsertim cuti manuum contrectantium , priore relicto , facilè se insinuent aut implicent : (4) per *Siccitatem* oppositam huic minutiarum habitudinem : (5) *Gravitatem* pono in impulsu quodam aut pressione ætheris gyrantis in partes corporum elementarium deorsum facta, eo modo fere , quo in cribratione solidiora frumenti grana motu circulari versus cribri ambitum enixa impuritates, grandiusculas licet ad motum tamen ineptiores , in locum à se derelictum adeoque versus cribri centrum detrudunt : (6) *Levitatem* contrâ in impulsu aut pressione sursum facta & à graviorum descensu nislve versus centrum dependente; verbo in minore gravitate. His enim conceptibus suppositis omnia harum qualitatum phænomena imaginabili quodam modo explicari posse , pars Specialis de elementis uberius edocebit.

XVI. *Unum tamen interim hîc scire velim, quo pacto frigus exurere membra viventium, corpora solidissima disrumpere, vitam ipsam penitus extinguere valeat, si nihil aliud est, quàm motus imminutio & privatio quædam?*

Huic tollendo dubio seqq. notâsse haut inutile fuerit : (1) quemadmodum frigus passivum in corpore frigefacto sine controversia mera est privatio; ita frigus activum quoque corporum frigefacientium in multis casibus evidenter esse privationem, sive caloris defectum, siquidem e. g. frigoris in aëre hyberno, aut in museo diu non calefacto proxima causa utique est Solis diuturna absentia, & foci Inculenti defectus &c. (2) Tametsi *Frigefacientia* ipsa interim in aliis multis casibus soleant esse res mere-positivæ, ut nix, glacies, marmor, flatus ore angusto emissus, flabella, venti &c. ipsam tamen eorum vim frigefactivam in eo maximè consistere, quod organo sensorio immediatè admota nec ipsa caloris quippiam, quem non habet, impertiant & eum, qui ex aëre ambiente aliàs recipiendus erat, nulla quidem sui actione intercipient : (3) denique effectûs violentos commemoratos aliosque similes, à frigore non effective & per

& per se, sed per accidens tantum & occasionaliter pendere; quatenus nempe evacuatis particularum caloricarum discessu corporum poris, aëris ambientis validissima compressio stragibus ejusmodi edendis occasionem nanciscitur: id quod aliàs dictorum applicatione paulò specialiore uberius declarabitur.

CAP. IV.

De

Saporibus & Odoribus.

I. *Quinam formandi sunt reales magis odorum saporumque conceptus?*

Odor est qualitas, dicebant antehac Scholæ, ex primarum commistione resultans, dominante sicco & calido, atq; olfactum movens; Sapor est affectio in humido aqueo & sicco terrestri facta à calore decoquente, gustatum, qui in potentia est, ad actum per alterationem deducens. Verum ut de obscuritate reliqua nihil dicamus, id, quod inprimis explicandum fuerat & imaginabiliter ostendendum, quo modo odores olfactum moveant, & sapes gustatum à potentia ad actum deducant, in his definitionibus ne attingitur quidem. Nos igitur simplicius multò clariusque dicimus:

Odorem esse halitus tenuis ex odoro corpore continuò exhalantis, & per aërem, aliquando visibiliter, plerumque invisibiliter, undique, adeoque ad nares etiam non nimis remotas, diffusi, impressionem quandam & impulsione, in subtiles fibrillas membranulæ narium intimis penetralibus subtenfæ factam, indeque ad cerebrum usque continuatam: Saporem esse similem quodammodo impressionem particularum crassiorum & graviorum, salinarum inprimis fixarum, è corpore sapido, præsertim comminuto & quodammodo subacto immediatè in fibrillas nerveas papillarum per linguæ palatique substantiam dispersarum, salivæ maximè vehiculo injectarum; quæ impressio deinceps similiter per extensas eò fibrillas nerveas, ad cerebrum usque continuatur ibique percipitur, eo modo quo filum aliquod sedentis pedi alligatum & alibi cum tensione aliquali firmatum ibi tangi non potest, quin in pede statim sentiatur illa impressio.

II. *Unde verò est illa multiplex saporum & odorum varietas?*

Ex ipsa particularum, in dicta organa transmissarum & impactarum, varietate multiplici, ratione subtilitatis aut crassitie, rigiditatis

ditatis aut flexilitatis, asperitatis aut lævitatatis, maximè verò figurarum. Quemadmodum enim tactus sensum, aliter aciculæ punctio, aliter ponderis manui impositi nifus, aliter cultri, aliter ferræ sectio, aliter limæ rasura, aliter forcipis quasi morsus, aliter plumulæ cujusdam levis perstrictio &c. afficit, affectionis cujusq; diversitate, ab acuminis vel hebetudinis, crassitie aut tenuitatis, figuræ denique, varietate manifestissimè dependente; ita generaliter impressionum istarum, in fibrillas nerveas linguæ & palati aut membranulæ olfactoriæ factarum, diversa ratio ab iisdem principiis unicè repetenda est.

*III. Sed optârim hanc generalem
hypothesin ad saporum & odorum specialem
varietatem paulò distinctius applicari.*

Tametsi quoad hæc specialia certi quid & infallibiliter determinati polliceri non possumus, ubi visus nos in particularum saporificarum & odoriferarum magnitudine, figura &c. definienda nos deserit; ratio tamen talia conjecturando assequi quodammodo valet procul dubio: id quod nobis, de generali fundamento interim certis, sufficere debet. Nihil igitur obstat, quò minus e. g. cum Doctissimo Willisio in aureolo tractatu de An. Brut.

cap. XII. *Dulcium* particulas glabras, & specialius rotundas seu sphaericas, aut saltem in molles & flexiles aculeos figuratas, supponamus, ita sc. nervorum fibrillas blandè leniterque perstricturas, (maximè postquam in sanguine & lacte talismodi globulos microscopia evidenter detexerunt;) *Acidorum* contra quodammodo tetraëdricas & acuminatas, rigidasque ex omni parte; *Acrium* spiculiformes, velut urticarum aculei; *Amarorum* quasi furcatas; *Salsorum* polyhedricas & laterum aciebus aculeatas; *Austerorum* instar pectinis aut carminis plurimis hamulis contulisque confertas, sed acutioribus; *Acerborum* similibus hamulis præditas, sed obtusioribus &c. *Unctuosorum* & *insipidorum* sphaericas glabras aut teretes, sed unà flexiles &c. eodemque modo in odorum speciebus secundum analogiam.

IV. *Cur aliqui odores & sapes grati accidunt potentie sensitivæ, alii ingrati & molesti, imò unus idemq; suavior unis quàm aliis judicatur?*

Hujus rei ratio generalis est ac cæteris quoque sensibus communis, generatim in fibrillarum nervearum, in quas fit impressio, ad ipsum impressionis impetum magis minusve pro-

proportionata habitudine consistens. Prout scil. impactæ fibrillis dictis odoratorum aut saporum &c. particulæ eas; pro figuræ impetûsque varietate, aut leviùs perstringunt blandiùsve vellicant, aut rigidiùs proscindunt magisve lædunt & lacerant &c. Sic animæ, corpus suum ejusque integritatem amanti, placere prius, posterius displicere, necessum est: Et, sicut subtiliores testudinum chordæ tensionis minus tolerantes sunt, quàm crassiores; ita insignior teneritudo in capillamentis nervis unius corporis ab eadem impressione facile læditur, quæ crassiora alterius vix sensibilibiter commoveret.

V. *At enim verò non sentimus percipimusve particularum figuras, motûs horumque varietates, dum sâpores & odores sentimus?*

Fatemur hoc, & lubentes quidem. Sentimus tamen & percipimus illarum figurarum & motuum effectûs, quorum ideas quasdam confusas format animus, easque sub nomine qualitatum generali & odorum saporumque speciali istis horum causis, atque adeò ipsis corporibus unde prodierunt, tanquam inhærentes attribuit, antequam intellectûs actu reflexo distinctè deprehendit, qualitates istas

sensibiles sive ipsas affectiones sensu perceptas, in organo affecto, causam autem earum in corpore agente, h. e. per effluvia sua organum dictis modis afficiente, existere, res interim omnino diversissimas: Id quod in doloris sensu nimis evidens (nemo enim tam ineptus est, ut dolori, ex aciculæ v. g. punctura sensu percepto, simile quippiam in acicula, & non potius cuspidis acumen hujusq; adacti motum, tanquam doloris causas, agnoscat) ad alios quoscunque similiter transferendum est.

VI. *Quia supra Qu. I. dictum est (quod experientia quotidiana quoq; confirmat) odores etiam ad nares remotas pervenire, ergone datur actio in distans?*

Negavit hoc Aristot. Lib. III. Phys. c. 2. ab init. omnem motum & actionem *σιζα* i. e. tactu fieri ingeminando asserens; Scholastici quidam id affirmârunt. Sed tolli facile hic dissensus posse videtur, si distinguamus & hic & alibi inter agens aut movens immediatum, quod (in sensu vulgari saltem) vere proprieque agit in patiens, & mediatum, quod sæpe nihil penitus agit (ne vulgari quidem loquendi modo) sed merè passivè se habet, uti adorata v g pleraque, ex quibus calor inprimis aut
alia

alia agitatio halitum odoriferum exprimit & in longinquum usque expellit. Hic halitus ad nares usque delatus in illas agit vero & immediato contactu; corpus odoratum autem (cùm & huic effectum illum aliquo modo possimus adtribuere) organum etiam à se longè distans afficit, sed mediante halitu dicto, cui dicta actio vel motio veriùs adscribitur & magis propriè.

VII. *Annon autem ille halitus etiam patitur potiùs quàm agit, movetur potiùs quàm movet?*

Verissimè hoc asseritur & alibi dictis planè consentaneè, si loqui cum Philosophis, aut ut Philosophos decet, velimus; nec alia causa est, cur corpora odorata calido tempore odores suos largiùs spirent quàm frigido, nisi quod caloris impetu effluvia copiosiùs expelluntur. Quod si verò cum vulgò loquendum sit, istud potiùs ut agens quoddam consideramus, à quo sensus organum immediatè patitur, quàm cætera à quibus illa passio remotiùs dependet; quamvis interim, philosophicè loquendo, una æque ac altera simul & semel ab unico verè mereque-agente agantur & moveantur.

CAP. V.

De

SONIS.

I. *Quid est Sonus ?*

Sonus nihil aliud est, inquit Systema Ernestinum, quàm qualitas sensibilis orta ex fractione aëris vel aquæ confertim percussæ & impulsæ; frangi autem aërem ex collisione duorum corporum &c. mox superaddens. Stierius in Tabb. Sonum definit qualitatem, in aëre ex binorum solidorum corporum collisione excitatam, ad auditum usque pervenientem illumque alterantem & de potentia in actum deducentem. Sed hæc definitiones, tametsi falsæ fortè nihil dicant (nisi quòd aëris fractio in priore, & soliditatis in corporibus collisis suppositio in posteriore dubii quiddam habeat) rem ipsam tamen non explicant, nec modum illum fractionis in aëre, aut excitatæ hujus qualitatis à corporibus inter se collisis; neque quo modo hæc excitata ad auditum perveniat, aut perlata alteret & de potentia in actum deducat.

II. *Quid*

II. *Quid ergo Physica moderna sanior circa rem ipsam nos in hoc negotio docet ?*

Hoc docet: Quòd corporum inter se colli-
forum particulæ invisibiles utrinque repulsam
passæ, mox autem elasticâ virtute suâ retrò-
actæ, vibratorium quendam motum subeant,
eumque vicinis contiguisque corporibus ela-
sticis aliis, & his adjuvantibus aëri maximè
communicent, mediantibus porrò his exter-
ni aëris vibrationibus auris expanso tympa-
no, & per hoc innato, quem vocant, auris in-
ternæ aëri, tremulum quendam motum ce-
leremque satis communicet, tandemque in-
tensas & expansas per intimam organi hujus
concamerationem utriusq; nervi auditorii fi-
brillas transfundat, in cerebrum inde secun-
dum harum ductum continuandum, ubi pe-
culiare in spiritibus animalibus agitationem
excitat, in homine verò insuper à mente ibi
præfente observatur.

III. *Annon ad tremulum hunc in aëre motum excitandum collidenda inter se corpora dura esse debent & solida, plana item & polita, tandemq; concava?*

Has conditiones nonnulli citra limitatio-
nem in generando sono requisiverunt, alii in
majo-

majori ac diuturniore saltem sono creando necessarias existimabant : Nos neutrubi has conditiones ad *sonum* procreandum simpliciter requiri, ex cataractarum ventorumque ingenti strepitu, flagellatione aëris, tormentorum, tonitruum, auri fulminantis &c. fragoribus, abunde novimus: Nec diffitemur tamen ad auctiorem quorundam corporum *Resonantiam* istas multum contribuere; quia dura partibus constant rigidioribus elasticis, atque adeo ad tremorem aptioribus: polita & glabra pluribus sui partibus sese contingunt & feriunt: Concava soni radios aliàs sphaericè diffundendos coërcent, multoque adeò plures toties repetitâ reflexione multiplicatos ad quamlibet aurem non nimis remotam transmittunt.

IV. *Unde verò constat in tali aëris motu tremulo & vibratorio sonum consistere?*

Id 1.) Visus ipse in sonoris chelyum testudinumque fidibus, chartulis aliisque rebus leviculis in vicinia campanarum pulsarum manifestè trementibus distinctè cernit: 2.) Intellectus ex aquæ crispatione in calice vitreo, cujus supremo margini quodammodo innixus ac circumductus digitus, paulum ante madefactus

factus, acutum quendam sonum edit, nec non ex heberato per contactum campanarum extrinsecum sono, similibusque phænomenis, indubiè concludit: 3.) Tactus ipse in contractatis ita corporibus resonantioribus palpabiliter deprehendit.

V. Atenim cùm fistularum sonus idem manet, etiamsi forinsecus contractentur; numquid hoc saltem casu tremor ille dubius redditur?

Experimentum utique negari haut potest; nec inde tamen plus concludi aut potest aut debet, quàm in partibus externis à manu contractatis tremorem non esse; id quod facile est credibile, cùm flatus in fistulæ cavum immissus tantas non habet vires, quæ totam solidamque fistulæ substantiam omnesque ejus & partes & particulas concutere possent ac tremefacere: ideoque cum extimæ partes non tremefactæ ad fistulæ sonum nihil conferant, ex interioris superficiei minimis particulis solum pendentem, illarum etiam contactus imminutionem soni causari non potest. Ali-
ter se res habet in campanis aliisque corporibus rigidioris texturæ & impulsu fortiore concussis, ut omnes eorum partes & particulae commoveantur ac tremefiant atque adeò
ad

ad soni augmentum aliquid conferant. Quid mirum igitur si quædam partes contrectatæ non ipsæ tantum, sed cum illis ob connexionem aliæ plurimæ, in tremore suo cohibitæ ad sonum nihil amplius conferant, & consequenter hic imminuatur?

VI. Cur in Antliæ pneumaticæ exhaustis recipientibus sonus aut penitus extinguitur, aut multum saltem imminuitur?

Hoc ipsum experimentum hypothesin hætenus expositam egregiè confirmat, quòd sc. Sonus aërem, & crassiusculum quidem, pro vehiculo vel subiecto agnoscat; siquidem aëre præsentè in recipientibus horologiorum intus conclusorum soni adhuc distinctè percipiuntur; exhausto verò aëre deficient & extinguantur. Quin igitur inversè quoque (cum aliunde etiam constet, aërem esse Soni vehiculum) deficientis in exhausto recipiente Soni causa ab ipso aëris defectu jure petitur?

VII. Nonne verò sub aquis etiam collisa corpora sonum aliquem ad aurem in aëre constitutam transmittunt, & vicissim excitatus in aëre sonus ad aurem sub aquas demersam pertingit?

Sic est sanè, & in promptu sunt experimenta Urinatorum, quæ rem hanc confirmant.

ment. Neque verò id mirum esse cuiquam debet, neque hypothesi, quam tenemus, quicquam derogat: quandoquidem aquæ multum aëris esse permixtum, ejus ebullitio quædam in recipiente exhausto conspicua manifestè docet. Non omittendum hoc, quòd Soni isti in utroque casu valdè debiles sint, præsertim in posteriore, ut Urinatores sub aquas profundius demersi tormentorum in vicinis portubus explosorum, ingentes fragores vix aut ne vix quidem percipiant: cujus rei causa ex dictis facilè hariolanda erit.

VIII. Sed cur Soni celeriter quidem à fonte suo ad aurem, non in momento tamen, sed cum aliqua temporis mora provehantur?

Quòd ita res reverà habeat, testatur inter alia multa ictus lignatoris eminus visus, cujus sonitum non statim eo momento audimus, quo securim impactam esse videmus, sed interjectâ sensibili temporis morulâ, ea-que tantò longiore, quantò longius ab aure locus abest impactæ securis. Cur verò ita se habeat, ex ipsa soni natura hucusque explicata manifestum est. Cùm enim vehiculum soni sit aër pulsus, qui compressibilis est & in se cedens, mox autem resiliens, & sic vibrans; singulæ quidem illæ vibrationes brevissimæ moru-

morulam temporis vix sensibilem insumunt, universæ autem & collectæ tantò notabiliorum conficiunt; quantò plures earum in maiore contingunt intercapedine.

C A P. VI.

De

Qualitatibus visibilibus,
Luce, lumine, colore, perspicuitate,
opacitate.

I. *Quid Scholæ Aristotelis Latine antebac de his qualitatibus docuerunt?*

DEderunt, more suo, definitiones aut descriptiones singularum abstractas, nomen cuiusque potius quàm rem ipsam explicantes; dicendo v. g. *Lucem esse qualitatem corporis*, „*lucidi per se visu perceptibilem, quâ non tan-*“, „*tum in se est lucidum, sed & alia illuminare*“, „*aptum: Lumen esse qualitatem à corpore lu-*“, „*cido in perspicuo productam*: Perspicuum absolute consideratum esse, quod talem habet naturam, quæ est apta introrsum recipere & lumen & tenebras, respectivè autem, quatenus visum afficere aptum est, id esse perspicuum, quod lumen in se continet tanquam formam, nec actu est perspicuum, nisi sit il-
lumi-

luminatum &c. (vid. Zabarella Lib. I. de Visu cap. III. & IV. & Systema Ernesto-Gothanum p. m. 147. quod insuper *radium* à luce & lumine distinguit, quod e. g. conclave quodam Septentrionem respiciens circa meridiem recipiat quidem lumen, nullum verò *radium* :) Colorem esse qualitatem ortam ex “ certa proportionem perspicui lucidi & opaci, “ aptam visum terminare &c. (Idem Systema “ Ernestin. e Senguerdo, Lib. VI. Part. Spec. cap. IV.)

II. Numquid apud ipsum Aristotelem plus fortasse rei, quàm apud hos Latinos ejus interpretes, reperitur?

Alicubi æquè abstractis utitur enarratarum rerum descriptionibus; ut cum Lib. II. de An. cap. VII. *Lucem* vel *lumen* (vix enim hæc ibi distinguit) dicit esse *Actum perspicui*, quatenus *perspicuum*; *Perspicuum* autem id quod est visibile, non per se tamen, sed per alienum colorem: Colorem deniq, id, quod est motivum ejus, quod est actu perspicuum &c. Alicubi verò videtur ad rem ipsam propius intendere digitum; dum alleg. I. dicit, aërem “ & aquam esse perspicua sive pellucida corpora, non quatenus sunt aër & aqua, sed quia “ natura quædam in his utrisque eadem inest, “

H

, & in

„ & in æterno illo supero corpore ; ignis vi-
 „ delictet aut simile quiddam ; ita tamen ut
 „ lumen non sit ipse hîc ignis vel æther, sed
 „ ejus in pellucido præsentiam : dum item
 Colorem, inquit, movere pellucidum, ut aë-
 rem, ab hoc autem, cùm sit continuus, move-
 ri sensorium : dum in Probl. 49. & 58. Lumi-
 ni expresse tribuit motum secundum rectitu-
 dinem, & in pellucidis supponit poros in re-
 ctum sibi correspondentes, pro recto scilicet
 illo luminis motu transmittendo : dum deni-
 que cap. III. Libelli de Coloribus, multis ac
 distinctè satis docet, colorum varietates ex
 eo solo pendere, quòd à Corporis illuminati
 superficie aut conferti radii, nullis ferè, aut
 paucissimis umbellis admixtis, aut rariores,
 admixtis umbris multis, vel adhuc pluribus,
 vel plurimis denique, reflectantur.

III. *Quinam igitur reales magis
 Lucis & Luminis conceptus formandi sunt,
 & quo pacto ab invicem distinguendi?*

Lumen est motus, aut nîsus potius vel
 pressio quædam ætheris rectilinea, quâ parti-
 cularum ætherearum contiguarum series quæ-
 dam, à lucido corpore usque ad oculum ex-
 porrectæ, eâ parte, quâ lucidum contingunt
 impulsæ, alterâ suâ extremitate reticularis
 tuni-

tunicæ fibrillas eodem momento premunt; non aliter ac series quædam pisorum aut aliorum globulorum in rectum ita dispositorum, ut lateraliter evagari non possint, vel etiam solidus & continuus baculus, uno sui extremo pulsus aut pressus, altero sibi contigua corpora alia eodem momento premit, aut (quæ similitudo aliis magis placet) extensus ab uno loco ad alterum funiculus, non potest in principio suo leviter perstringi, quin fine suo simul eodem modo perstringat & commoveat aliquantum, alligatum sibi aliud corpus: Lux autem, ipsi corpori lucido, ut Soli vel igni, inhærens qualitas, est motus verè localis particularum confusè in omnes partes variè agitarum, à quo impulsus ille, sive pressio linearum ætherearum rectilinea dependet.

IV. *Quanam est Colorum genuina natura aut realis conceptus?*

Videtur Color, quatenus per aërem ad oculum transfertur, & hunc variè afficit, à Lumine nonnisi gradu differre, & Lumen quoddam debilitatum esse, pro variis hujus debilitatis gradibus diversas e. g. flavi, viridis, cœrulei &c. appellationes nactum: quatenus autem in objecto debilitatos istos luminis ra-

dios ad oculum transmittente, spectatur, in varia particularum ejus, superficialium præcipue, ut & pororum his interjectorum, dispositione & conformatione consistere videtur, quæ exceptos à lucido quodam luminis radios aut copiosiores fideliter ad oculum reflectit vel transmittit, aut pauciores umbrisque sive radiorum intrò missorum & absorptorum defectibus permixtos, eidem offert; tametsi communiter humana mens, eam ipsam affectionem confusam organi fibris impressam, objecto, tanquam ipsi inhærentem, transcribit, planeque aliud ipsi inesse credit, quàm ipsi revera inest; qui est familiarissimus ille, non tam sensûs quàm judicii error, in speculis præcipuè manifestus.

V. *Quo pacto corporum quorundam perspicuitas & aliorum opacitas rectissimè concipietur?*

Si in perspicuis concipiamus poros rectos aut secundum rectam lineam circiter sibi correspondentes; in opacis autem inflexos magis & anfractuosos; non intelligendo tamen in illis mathematicam quandam rectitudinem, sed qualemcunque, quæ pressionem serierum ætherearum per corpus aliquod & ultra illud continuandam non intercipiat aut plenè cohibeat.

VI. *Non*

VI. *Nonne verò etiam umbra, & motus, & quies, & numerus, & continuitas, & discontinuitas, & magnitudo, &c. inter visibilia veniunt numeranda?*

Numerantur utique hæc omnia inter visibilia, sed gemino discrimine. (1) Quædam sunt objecta visûs propria, ut lux, lumen, color, umbra, perspicuitas & opacitas, quæ visu solo, non ab ullo alio sensu distingui vel percipi possunt; alia communia, quæ ab uno etiam & altero cæterorum sensuum (maximè à tactu) pariter dignoscuntur, ut figura, magnitudo, distantia, unitas aut multitudo & similia, quæ cæcus etiam tangendo & prensando distinguit: (2) Quædam per se videntur & propriè loquendo, ut lux, lumen, color, quia per se ac directè potentiam visivam afficiunt nisiue illo ætheris rectilineo fibrillas organi, urgent & commovent; quædam verò, etiam inter propria visûs objecta, per accidens cernuntur, non quod talem in retinæ fibras pressionem, sed quòd nullam potius, in eas exerçant, ut umbræ & opaca corpora, aut, si quam exercere videntur, non tam reverà exerçant, quàm per se ab alio lucido vel luminoso exerceri patiuntur, ut pellucida.

VII. *Sic igitur sola luminis impressio, sive motus ille seu nifus rectilineus ætheris, illud erit, quod facultatem visivam ejusq; organum immediatè afficit?*

Sic est profectò ; nec in cæteris sensibus aliud quicquam immediatè percipitur, quàm motus aliquis fibrillis organi, & his median-
tibus etiam spiritibus inibi & in cerebro dif-
fusis, impressus ; in auditu nempe tremulus ex
aëre tremefacto ; in odoratu & gustu, inde-
terminationior ac multiplex ab exhalationibus
& effluviis corporeis vel eminus quasi advo-
lantibus, vel cominus subrepentibus ; in tactu
pariter varius, ex igne v. g. aliisque fluidis in-
testinâ suarum particularum agitatione papil-
las nerveas subcutaneas diversimodè afficien-
tibus ; à solidorum autem externa asperitate
multifariâ tum demum in easdem agente,
cùm vel ipsæ illis immotis impinguntur, vel
illa cum motu sui corporis in istas impingunt
eis occurrunt vel obtruduntur : nec enim e. g.
contactus aciculæ aut limæ sensum aliquem
puncturæ vel asperitatis inducit, nisi nifus ali-
quis & impressio contingentis corporis in ha-
bitum corporis, aut hujus in istud, interve-
nerit.

VIII. *At*

VIII. *At enim non atheris pressio-*
nem v. g. sed solem nos videre, non motum
aëris tremulum, sed campanæ clangorem, aut
hominem canentem &c. nos audire; non impres-
sionem à lapidis superficie factam, sed lapi-
dem nos tangere dicimus, & sic
in ceteris?

Sic est sanè, atque ita vulgò loquimur, dum
visionem propriè & philosophicè sic dictam,
quæ in brutis animalibus etiam locum habet,
cum judicio & cogitatione mentis concomi-
tante aut immediatè consequente (quæ in
brutis tamen nulla est) confundimus, aut jun-
ctim saltem accipimus, ex impressione cor-
porea in sensorium & animales spiritus facta,
de præsentia, magnitudine, vicinia aut distan-
tia aliisque conditionibus objecti, tanquam
impressionis illius causæ, mentis reflexione
quadam judicantes, eique aut nonnunquam lo-
co ejus putativo, simile quippiam impressio-
ni in organo receptæ adtribuentes, tanquam
inhærentem qualitatem, à qua sensorium af-
fectum fuerit; sæpe imò sæpissimè non sine
magno errore. Hæc talia verò judicia cum
in brutis mente carèntibus nulla sint, ad visio-
nem etiam aliasque sensiones strictè loquendo
non pertinent; nisi brutis omnem sensum

cum Cartesianis denegare velimus, quod durissimum nobis semper visum est. Hæc igitur, quæ mens hominis potius agit & objecto adjudicat, quàm ab ipso recipit, si à sensatione ut tali abstrahamus, pro mera quadam passionē & affectione organi illa habenda, & habita quoque semper est. Quandoquidem verò neque corpus ullum suâ ipsius substantiâ (quod Scholæ ipsæ dudum agnoverunt) neque inhærentibus sibi accidentibus, sed motu tantum aut nisu quodam, aut pressione aliquâ ab istis variè modificatâ, sensorium immediatè afficitur; hæc sola etiam impressio qualitas illa sensibilis est, quam recipit ac sentit immediatè sensorium.

IX. Annon autem hinc necessario consequitur, cum omnis motus & impressio motiva activè, ut in sensibilibus, considerata nihil aliud sit quàm ipsa Virtus motrix DEO propria (vi eorum, quæ suprâ Cap. III. Sect. I. demonstrata sunt) id quod à sensibus immediatè percipitur ac sentitur, solam esse virtutem DEI motricem?

Non possum profectò negare, hoc indubiè legitimeque consequi, tametsi vulgaribus loquendi formulis id videatur valdè repugnare. At enim cum vulgi lingua veram rerum cogni-

cognitionem ubiq; fere anteverterit & ignorantiam præcipitem quasi parentem agnoscat; receptæ ejus loquendi formulæ detertere philosophum non debent, quò minus, de rebus ipsis rectius edoctus, rectiora quoque saltem inter Philosophos loquatur, atque adeò, quod ex hoc asserto pari necessitate porrò consequitur, in vulgari lingua multò magis *ἡδοξον*, idiomate Philosophico intrepidè asserat: Cùm Virtus DEI motrix ab ipso, propter summam ejus simplicitatem, realiter non differat, non corpora & materialia, nec ullam aliam creatam substantiam, (utpote movere nescia omnia) sed Deum solum in istis & per ista, stricto & philosophico, non crasso & vulgari loquendi modo, esse sensibilem, & actu ipso ubique sentiri; sic nimirum omnipræsentiam suam & omnipotentiam, & Benignitatem, oculis, auribusque ac cæteris sensibus omnibus in singula momenta ingerens: Ut verissimâ & accuratissimâ loquendi ratione, cum Psalmista & Apostolo, alter alterum excitare possimus: *Gustate & videte, imò palpate manibus, quàm suavis sit Dominus!*

CAP. VII.

De

Qualitatibus corporum Naturalium insensibilibus.

I. *Quid intelligimus nomine insensibilium qualitatatum?*

EAs intelligimus, quæ in sensûs ipsos immediate non agunt, sed effectûs tamen edunt in sensus incurrentes; quales e. g. sunt Magnetis virtus attractiva, quam vocamus ac directiva, Rhabarbari vis purgans, Venenorum internecina, Antidotorum contrà alexipharmaca facultas, verbo: Quæ Naturalis amoris vel odii, Sympathiæ vel Antipathiæ, Antiperistaseos, similibusque nominibus specialibus, aut generali occultarum qualitatatum appellatione venire solent, h. e. talium qualitatatum ratio genuina sit inexplicabilis adeoque frustrâ quærat.

II. *Anne igitur dantur ejusmodi qualitates occultæ?*

Si (1) hoc nomine quis intelligat ejusmodi qualitates, quæ prorsus incognitæ sunt, & ne effectû quidem ullo sese cuiquam prodide-

diderunt; neutiquam negari potest, tales corporum intra viscera, non dicam Solis aut Lunæ aut aliorum corporum coelestium, sed in telluris quoque nostræ profundis abditorum plurimas & nunc esse & æternum fortè futuras occultissimas. Si quis (2) cum Sperlingio aliisque pro qualitatibus occultis habendas censeat eas omnes, quæ nominibus propriis, specialibus, & rem ipsam exprimentibus destituuntur, ex ipsæ quoque, quas ipsi pro manifestis habent, ut calor, frigus &c. inter occultas præcipuè numerandæ venirent, & antidota sive alexipharmaca &c. quas illi occultis accensent, aliis multò manifestiores dicendæ. Si (3) qualitas occulta nominetur, cujus ratio & operandi modus nondum distinctè pleneque & imaginabiliter explicatus sit, hautquaquam diffitebimur, tales multas dari, sed inter ipsas illas quoque, quæ vulgò pro manifestis venditantur, & non paucas fortè tales, quodammodo saltem, perpetuò futuras. Si denique (4) per occultas qualitates eas intelligant, quarum rationes desperatæ planè sunt, ut vanus credatur & frustraneus omnis earum explicandarum & ad rationes suas probabiliter interim, ac temporis progressu apertius deducendarum ausus, adeoque in sympathiæ vel antipathiæ, similibusque oculis
ina-

inanibus , vel ipsa generali occultæ qualitatis nomenclatura, acquiescendum putetur , (quæ quidem est præcipua nominis hujus in Schola vulgari significatio;) tunc omnibus modis negamus & pernegamus , occultas qualitates in Physicis esse admittendas, sed omni conatu & industria in species qualitatum talium insensibilium , & phænomenorum circa ipsas occurrentium, causas & rationes inquirendum esse censemus: maximè cum spem haut exiguam felicitum magis magisque progressuum, egregia specimina Cartesii circa rem magneticam & maris æstum, Willisii circa medicamentorum facultates &c. satis apertè faciant.

III. *Ecquid igitur de quorundam corporum odio vel amore naturali speciatim statuendum est?*

Cum non solum gallina pullos, pavo columbas &c. sed & vitis oleam, hedera ulmum &c. amare, ovis lupum, felis canem &c. sed & vitis brassicam, magnetum poli cognomines inter se odisse vulgò dicuntur; hoc ante omnia notandum est & probè inculcandum: Amorem odiumque propriè loquendo nullibi locum invenire, nisi inter ea quæ vera cognitione & liberâ voluntate prædita sunt, ut boni quippiam aut mali siye veri siye apparentis,

in

in re amata vel exosa cognoscere, & ad bonum obtinendum ex proposito inclinari, vel à malo imminente consultò se avertere queant. Deinde verò eadem nomina ad brutales animantium impetus, & magis abusivè ad res inanimatas quoque translata sunt, in quibus judicium & proæresis propriè dicta locum habere non possunt, sed omnia motibus & impulsibus merè corporeis peraguntur, velut in Physica Speciali distinctius edocebitur. Sic e. g. vitis juxta oleam feliciter provenit, in vicinia brassicæ exarescit, non ex amore ibi aut hîc ex odio, sed quod copiosior brassica, bibulæ admodum & aquosæ substantiæ planta, succum terræ nutritium poris suis laxioribus promiscuè & copiosè admittat, paucis adeò reliquiis viti concessis.

IV. *Quid verò Sympathiæ & Antipathiæ vocabula, stricte loquendo sibi volunt?*

Generaliter amoris naturalis exempla Sympathiæ, illa odii naturalis Antipathiæ cuidam attribui solent. Specialius autem & pressius, etymoque suo propius, acceptis vocibus, *Sympathia* propriè esse dicitur inter ea, quorum uno certo modo affecto, alterum eodem modo afficitur, atque adeò idem unà patitur;

titur; ut cum uno oscitante vel mingente, alter etiam oscitat ac micturit, aut unius testudinis chordâ pulsâ & resonante, similis alia in testudine consona & super eadem tabula v.g. jacente, simul in tremulum & sonorum motum concitatur: *Antipathia* contrâ in iis rebus obtinet, quarum unâ certo modo affectâ, altera contrarium patitur; ut cum florentibus rosis & fragrantissimè olentibus, aquæ rosarum annis superioribus destillatæ inodoræ fieri, & vina doliis conclusa turbari dicuntur & effervesce, quo tempore vites efflorescunt &c.

V. His igitur casibus saltem declarandis in Sympathiæ vel Antipathiæ allegatione fuerit acquiescendum?

Nequaquam! Siquidem ipsius sic allegatæ sympathiæ vel antipathiæ ratio de novo meritò quæritur, nec inter desperatas statim vel datu impossibiles ullo jure habetur. Etenim, quemadmodum duarum chordarum homotonarum Sympathia, ex hoc uno satis evidenter deducitur, quòd unâ in tremorem pulsu concitata, mediante magadio & ponticulis, quibus incumbit, totum corpus testudinis, & hoc mediante tum aërem proximum interjectum, tum tabulam subjectam, & per hanc
alte-

alterius testudinis corpus, atque adeò similem & æque tensam, paribusque inde vibrationibus solam aptam, in illo chordam, unà secum in eundem tremoris gradum rapit; sic unius oscitatio, alterius oculis auribusve excepta, impressâ sui in cerebrum & spiritus animales specie, facilè motum in his similem excitare possunt, à quo maxillares muscoli ad similes oris diductiones &c. disponantur: Et spirituosos rosarum vitiumque florentium halitûs per aërem undiquaque diffusos in vinis aquisque destillatis annotinis effervescentiam aliqualem causari posse, unde & coloris & saporis & odoris ratio quodammodo turbetur, adeò incredibile profectò non est.

VI. *De Medicamentorum, Venenorum & Antidotorum facultatibus & operationibus quid sentiendum?*

Ne horum quidem vis & operandi ratio inexplicabilis omnino habenda est, nec aliis principiis niti videtur quàm iisdem illis, è quibus qualitatum sensibilium vis & efficacia superiùs explicata est; prout egregiè demonstravit per singula Medicamentorum genera, Thomas Willisius, Medicus Anglus in aureolo suo Tractatu, quem Pharmaceuticen Rationalem inscripsit. E.g. Vomitoria particularum

rum suarum irregularium puncturis & velli-
cationibus molestis, tunicarum fibras & spi-
ritus in istis diffusos ad contractionem subita-
neam disponunt, sicut ad lentam alimento-
rum minutiae moderatius leniusque impactae;
& quemadmodum haec lenta, ventriculi con-
tenta per dextrum ejus orificium tantum pro-
trudit, utpote cujus continuatio deorsum spe-
ctat; sic impetuosior illa per erectam quoque
sinistri orificii fistulam magnam contentorum
partem eructat. Cumque venena pleraque,
sicut ignis, virtute sua nimiam tantum nocent,
in promptu ratio est; cur lactea & pingua
v. g. venenatarum particularum impetum,
ramosis fibrosisque suis minutiis implicando
sistant &c. prout igniculi fibrosis sanguinis
portionibus impliciti vitalem illum blandum-
que calorem in animali corpore constituunt.
Ut obvia sit ratio optimorum medicamento-
rum, ex malignis maximè venenis, ad tempe-
riem scil. arte chymica reductis parari solito-
rum, & sic aliorum hujus generis effectuum.

VII. *Nonne & Antiperistasis inter
occultas facultates in Scholis Peripateticis nu-
meratur, & quid vult sibi tam speciosum
vocabulum?*

Secundum ἔντροπον suum notat aliquam Cir-
cumresistentiam, quâ concipiunt e. g. Calorem
à cir-

à circumstante sibi contrario frigore, aut vicissim frigus alicujus corporis à circumstante sibi contrario calore, ita cogi & coërceri in seipsum, ut virium suarum augmentum quoddam sensibile inde nanciscatur, indeque locorum subterraneorum & puteorum aër hyberno tempore calidior sit, æstate multò frigidior, quod ibi frigus aëris externi, calorem ex profundis exhalantem, hîc ejusdem aëris externi fervor & æstus, nativum locorum profundiorum frigus, exire circumresistendo prohibeat.

VIII. *Quid verò sentiendum est de his suppositionibus?*

Frustrà confictum est utcunque speciosum hoc *ἀντιπερισσότερον* vocabulum, occultandæ ignorantiae potius velum, quàm occultæ cujusdam qualitatis necessarium tēgumentum. Etenim (1) absolutè loquendo falsum est, aërem puteorum ac cellarum hyberno tempore calidiorem esse quàm æstivo, testibus omni exceptione majoribus thermoscopiis, & haut rarò vulgari quoque concretarum frigore rerum & potulentorum è cellis profundioribus etiam petitorum experientia. (2) Respectivè verò, quòd aër subterraneus hyemali tempore sentiatur calidior, æstivo verò frigidior,

I

quàm

quàm externus aër, nemo sanæ mentis negabit; neque verò necessum est in ejus rei ratione reddenda ad qualitatem aliquam occultam, aut contactam antiperistasin confugere: quandoquidem in aperto causa est, locorum illorum subterraneorum sollicita clausura, quæ aërem externum hyemè valdè frigidum, æstate vehementer æstuantem, accessu arcet; rem istam probè callentibus ex ima plebe quoque homuncionibus, qui utroque casu, cellarum ingressum & spiracula clausa destinato consilio servant, alioqui satis experti, quo liberior externo aëri hyemali accessus per fenestrarum rimas aliaque spiracula in sua hypocausta patet, tantò minus horum calorem à circumresistente illius frigore cohiberi & conservari.

IX. *De Fascino deniq, quid habendum?*

Multa procul dubio hujus generis aut falsa prorsus sunt & fabulosa, velut ea, quæ de corporibus humanis aliisque adversus ictus gladiatorum & scoporum indurandis, de Sigillis & amuletis &c. aut incerta sunt & ex credulitate superstitiosa malorum aut suspectorum hominum adspectui vel alloquio, præsertim blando, planè per accidentis fallaciam adscri-

scripta, quæ alias veras & naturales causas habent, tametsi non statim apertas; ut e. g. Das Beschreyen der kleinen Kinder / Ligatio seu procurata impotentia &c. Vel denique, supernaturaliter ex permissione divina speciali contingunt, atque adeo ad physicam locumque præsentem non pertinent. Quanquam in his talibus etiam non esse nimis credulum non solum laudabilis est prudentia, sed hoc etiam præcavet, ne damnatis spiritibus, quod multi faciunt, tantum non omnipotentiam & omniscientiam aliquam adtribuamus, non sine magno Numinis verè uniceque omnipotentis ac omniscii dehonestamento. Esetque cum primis optandum, ut ex ingenti illa historiolarum farragine, quæ circa hoc rerum genus undiquaque corradi à multis solent, cautior adhiberetur selectus, & verorum à manifestè-falsis, certorum ab incertis, circumspectè-compertorum à traditionibus anilibus & vagis &c. cordata discriminatio!

C A P. VIII.

De

Corporum Naturalium Situ ac Duratione.

I. *Numquid alia adhuc supersunt
corporum naturalium affectiones commu-
nes, præter hætenus expositas?*

REstant utiq; consideratu non minus dignæ,
Situs præsertim ac *Duratio*; non quòd
obiter saltem & abstractè sciendum sit, omne
corpus naturale certum habere inter alia po-
situm & locum, eorundemque essentias &
qualitates magis minusve durare, (quæ levis
est & superficiaria plebejis etiam omnibus,
puerisque ipsis, communis notitia, nihil sci-
entiæ vel considerationis Philosopho dignæ
paritura;) sed quòd determinatiùs & quoad
notabiliores positionis cujusque circumstan-
tias, Solida v. g. pleraque omnia intra com-
mune quoddam fluidum collocata deprehen-
dantur, uti pisces in aquis, animalia, homi-
nes & plantæ in aëre, stellæ ac ipsa terra in
æthere &c. quæ fluida plurium istorum *Locus*
communis, at quâ sui parte unumquodque cor-
pus sigillatim ambiunt capiuntque, *Locus* cu-
jusq; *proprius*, dici solent.

II. *Non-*

II. *Nonne verò etiam Solidum aliquod vicissim alicujus fluidi locus proprius esse potest?*

Utique! Sic enim cantharus cerevisiam, aut cupa aquam, immediatè ambiunt & includunt, eorumque adeò corporum loca propria sunt. Et hoc modo non adeò incongruè Aristoteles locum proprium definivit Extremitatem sive terminum corporis immediatè tangentis immobilem; non quod terminans illud corpus, sed quod ejus terminus contingens, non possit mutari vel variari, sed idem maneat, eosdemque figat limites, si maximè corpus locans circa locatum, velut aër circa turrim, rotetur. Et hic terminus ambientis *Locus externus* quibusdam dicitur.

III. *Annon internus quoq; locus datur, magis congruè immobilis & locato corpori æqualis dicendus?*

Talem fanè deponunt Atomistæ sive Democritici, à nobis quoque facilè ipsis concedendum, scil. spatium aliquod ab externo illo ambientis termino æquè ac ipsum corpus locatum, quod spatium illud occupat, circumscriptum ac definitum, tantò certius immobile, quantò minus reale quiddam est, sed me-

rus materiæ defectus futurum , si à materia quadam non occuparetur , aut , si mavis , capacitas quædam corpus aliquod intra sese recipiendi.

IV. Hoc ergo modo sequetur , duo diversa corpora non posse simul esse in eodem loco , nec idem in duobus ?

Ita fanè non potest non judicare sana ratio , si de loco proprio , sive interno , sive externo , sit quæstio. De communi enim rem aliter se habere , vel ipsa hæc communis appellatio satis docet. At verò corpus aliquod eodem loco proprio , strictè & philosophicè sic dicto , si simul aliud à se diversum corpus concluderet & comprehenderet , quomodo locus ille vel huic vel isti proprius , & non potius utrique communis , esset ? Et vicissim , si corpus aliquod non solum in uno determinato philosophicè proprio loco , sed insimul in alio ab hoc diverso & disjuncto , qui jam ab alio utique esset occupatus , cum vacuus locus , saltem notabilis amplitudinis , nullibi detur ; annon sic duo corpora simul etiam in eodem essent futura , contrà id , quod modò est demonstratum ?

V. Sed

V. Sed rectius fortè ac utiliùs hæc absoluti certisque & strictis limitibus circumscripti loci consideratio cum respectivo positu corporis inter alia aut viciniora aut remotiora commutabitur?

Sic est sanè ! Et multò utiliùs profecto quæretur aut considerabitur e. g. Quis sit Solis positus inter terram, ☽, ☿, ♀, ♂, ♃, ♄, ♅, tanquam illuminans inter illuminanda ? Nempe medius ; Et cur hoc ? Ut hoc pacto tantò commodius illa singula corpora lucem sibi necessariam ex illo communi fonte haurire possent. Cur item in animali corpore, Cor in pectore potius quàm in capite locatum est ? Ut sc. sanguis, tanquam Nutritius succus, à corde contracto ad partes nutriendas superiores & inferiores commodiùs extrudi possit, quàm si in alterutro corporis extremo locatum fuisset ; Dentium in ore disposito ; Humoris CrySTALLINI positus in mediis humoribus, & sexcenta talia in specialibus attendenda, &c. Qualis loci, sive positus, consideratio plana est iterum via attendentibus ad agnoscendam providentissimam quandam Sapientiam, tales hîc alios alibi corporum positûs, ad evidentes ejusmodi usûs & scopos dirigentem.

VI. *Quid porro de Duratione Corporum utiliter in Philosophia naturali docebitur?*

Non hoc sanè , quod Corpus naturale quodlibet , imò & affectiones eorum naturales , certam habeant ac determinatam , alia sc. majorem alia minorem , durationem , (quis enim hoc ignorat ?) sed rationes primum & causæ physicæ , ob quas aliqua corpora perpetuò durant , (uti cœlestia pleraque & ipse hic mundus noster sublunaris) alia longo saltem temporis intervallo existentiam suam continuent , uti solida & dura , pleraque & animantium perfectiora genera ; alia contrà breve admodum tempus subsistunt , ut fumus , nebula , nubes , & inter animalia quædam tantum non ephemera &c. Ex ipsis autem sic inventis rationibus & causis immediatis & physicis ad causam summam & primam Hyperphysicam deinceps iterum manifestè deducimur.

VII. *Quanam igitur est causa physica , ob quam aliqua corpora , præsertim totalia , perpetuò durant , alia verò plus minus caduca sunt , & interitui obnoxia?*

Hæc equidem in Physica Speciali demum ple-

plenius edoceri possunt; hîc autem generaliter indicasse, analysi quadam quasi manucente, suffecerit : Cum circa tellurem hanc nostram quotidie observemus, partes quasdam inde violenter avulsas & aliquousque elongatas subinde impulsu quodam opposito versus commune centrum compelli; hanc ipsam vim repellentem & ad commune centrum omnia compellentem (quæcunque tandem illa fuerit, in Specialioribus distinctius explicanda) generalem illam causam esse, quæ vastos illos globos ita non potest non integros ac indissolubiles conservare; eundemque illum impulsu simul etiam generalem causam esse dissolubilitatis cujusdam in corporibus partialibus, utpote quorum partes pariter continuò impellit; verum non ad centrum quoddam cuique corpori partiali proprium & intrinsecum, sed ad idem illud commune Geocosmi centrum, quod partialibus ejus corporibus extrinsecum est. Similiter autem rem se habere in cæteris globis mundanis, nemo dubitabit, qui hanc de telluris perpetuitate datam rationem &c. rectè perceperit?

VIII. *Quomodo verò hæc circa durationum phyzicas causas speculatio ad Conservatorem supernaturalem & potentissimum nos deducit?*

Primum ex ipso generali Durationis rerum conceptu argumentum sic circiter petendo: Quia durare nihil aliud est, quàm existentiam suam continuare, i. e. innumeris vicibus recipere, & verò existentiam suam res naturales ne prima quidem ac simplici vice aliunde, quàm à Numine quodam potentissimo recipere potuisse, Sect. I. cap. II. Confectaria demonstrarunt; multo minus innumeris vicibus eandem recipere, i. e. conservari aliunde, quàm ab eodem potentissimo Numine possunt. Deinde ex quæstione præcedente: Si conservatio hæc fit mediante motu quodam ad commune centrum tendente, motus autem omnis supponit unicum verè activum & non motum motorem, quod eodem illo cit. antè loco evictum est; sequitur utique, hunc quoque motum, & ab eo pendentem conservationem, Eidem summo primoque Motori unicè acceptam esse ferendam.

IX. *Cum*

IX. *Cum Duratio Tempus ve mensuretur & aestimetur, meritò sane quid rei tempus sit? hoc loco inquiritur.*

Nos verò nihil rei esse tempus, nec à rerum duratione realiter distinctum quippiam confidenter asserimus. Etenim, ut existentia rei à re ipsa non nisi conceptu & abstractione mentis differt, ita nec existentiae continuatio sive duratio à re durante: Et hoc *nonnullum* illud est, quod aliqui *Tempus internum* appellant. Quatenus deinde porrò hæc duratio æquabilibus cœlestium motibus definitur & in partes, horas, puta, menses, annos &c. dividitur, nihil aliud est quàm Numerus aliquis motuum illorum à mente iterum totus dependens & *Tempus externum* nonnullis appellatus.



PARTIS GENERALIS
PHYSICÆ
MODERNÆ SANIORIS

SECTIO III.

De,

Corporum & affectionum
Naturalium variis Mutatio-
nibus.

CAP. I.

De,

His mutationibus generatim
primùm consideratis.

I. *Nullane datur amplius, præter
suprà commemoratas, corporum naturalium
affectio, specialius adhuc considerari
merita?*



Uemadmodum Duratio seu perse-
verantia in eodem statu non ad
corpora solùm ipsa, sed ad eorum
affectiones cæteras quoque ita
pertinet, ut sit communis affe-
ctio-

tionum affectio ; siquidem essentia non solum & existentia corporum, sed eorum quantitates quoque, qualitates positusque diversimodè durent ac perseverent : Ita Durationi huic & perseverantiæ generaliter opponitur & quantitatis & qualitatum & situs & ipsius denique Durationis seu Perseverantiæ Mutabilitas pariter & actualis mutatio ; quæ phænomena Naturæ adeò multa, sine numero ferè, offert, ut Historiæ naturalis utramque paginam facere, peculiaremque adeò considerationem mereri omnino videatur.

II. *Quanam ergo sunt præcipua & summa genera mutationum?*

Est (1) levissima fere (utpote corporibus quoad omnia salvis & integris obtingens) extrinseca tantum ratione Situs & Loci mutatio, Aristoteli *Φορὰ*, *Latitudo* sive *Motus localis* appellata : Est (2) corporum sive localiter motorum sive quiescentium quoad qualitates accidentarias immutatio, salvis interim essentialibus ; quam *Ἀλλοίωσις*, *Alterationem*, vocant : Est (3) Variatio quantitatis, sive in majus, *αὐξήσις*, *Accretio* vel *Augmentatio*, sive in minus, *μείωσις* *Diminutio*, dicta : Est (4) multò intimior & essentialis totius corporis immutatio, ut quod fuit non sit amplius, *Interitus*
inde

inde seu *Φθορά* *Corruptio*, (in viventibus speciatim *Mors*) vocitata; alio interim per eandem mutationem oriundo & à priori diverso corpore, cujus intuitu ipsa *Γένεσις*, *Generatio*, & in vegetabilibus ac animalibus *Vita*, salutari solet.

III. *Anne verò hæc enumerata mutationum genera ita passim obviant, ut inde affectionum communium nomen mereantur?*

Quod loci mutationem, sive motum localem, attinet, ille quidem astris seu globis illis vastis mundanis, præsertim erraticis sive Planetis, Lunæ, ☿, ♀ &c. indubiè competit, & quidem perpetuus omnium consensu; Soli & fixis minimum vertigo circa propria centra conceditur, si revolutionis motus, contra communio rem sententiam ipsis denegetur. Quod si Terræ globus solus nec localiter nec in vertiginem agatur (quæ unius hujus exceptio miramèritò videatur) ejus tamen partibus innumeros indies motus utriusque generis competere notius est, quàm ut exemplis comprobari possit.

IV. *Sed*

IV. *Sed quantitatis saltem mutationes non adeò frequentes occurrent, præsertim in mundo illo superiore?*

Equidem totales illi globi Solis, Lunæ, cæterorumque astrorum ordinariorum, sensibilibiter nec majores nec minores facti unquam deprehensi sunt (observata namque in quibusdam magnitudinis incrementa aut decrementa ex variata distantia potius, quàm ex reali molis immutatione, provenit procul dubio) idemque de Terræ nostræ globo dicendum est: in Cometis autem & Novis Stellis καὶ ἐξοχλῶς sic dictis, præter hæc optica incrementa & decrementa, realia quoque & physica contingere, Hevelianæ observationes apprimè suadent; de maculis autem circa Solem nasci sensimque rursus evanescere solitis res est æquè indubia, ac in partialibus inferioris hujus mundi.

V. *Numquid & qualitatum variationes ita communiter obtinent in superiore æquè ac inferiore mundo?*

Procul omni dubio. De inferiore res notior est, vel ex unius aëris nostri quotidianis mutationibus, ratione caloris, frigoris, humiditatis, siccitatis &c. De superioribus
idem

idem evidenter constat ex Lunæ v. g. cæterorumque planetarum alternationibus ratione luminis ac tenebrarum, dum vultûs suos nunc plena luce fulgentes, nunc prorsus obscuros, nunc ex una parte luminosos, ex altera obtenebratos multâ varietate nobis exhibent; ex luminis Solaris nunc majore nunc minore puritate; ex eclipsium ignaro causæ animo horrendis Spectaculis &c. Neque dubium est, quin circa partes istorum globorum minores observaturi essemus alterationes haut pauciores, ac in partibus telluris minoribus in singula momenta notamus, si ex pari vicinia istos, ex qua hunc, lustrare possemus.

VI. Fortassis autem Corruptio saltem & Generatio, essentielles illæ ac potissimæ mutationes, in superis istis mundi corporibus exulant?

Ita quidem Aristoteli quondam ex gentili præjudicio visum erat, cui coelestia omnia *θεῖα, ἀίωνα, ἀφθάρτα*, h. e. divina, ingenerabilia & incorruptibilia, celebrabantur: Et fatendum sanè est, totales istos globos cœlestes ordinarios ab ipso mundi exordio totalitatem illam suam in hunc diem salvam habere, nec eorum quenquam hætenus aut destructum aut genitum de novo reperimus;

at hoc idem de Terræ nostræ globo fatendum est. Quod si verò, particulas hujus aliquas interire, novasque in ipsorum locum subnasci quotidie, negare non possumus; idem de parvis quibusdam portionibus istorum inficiari nobis non magis licere, solares maculæ abunde docent; Ut taceam nec has adeò parva esse corpora, & Cometarum novarumque fixarum corpora verosimiliter, aut comas illorum caudasve saltem indubiè perire destruique solita ingenerabilitatem istam & incorruptibilitatem cœlestium abunde confutare.

CAP. II.

De

Augmentatione ac Diminutione generatim, ex Alterationibus autem de Liquefactione, Coagulatione & cognatis aliis ipsisque oppositis mutationibus, in specie.

I. *Quanam circa quantitatis mutationes specialiter annotari possunt ac debent?*

Illud maximè, quòd *Augmentatio* pariter ac *Diminutio* generaliter fieri rectè concipiuntur, illa per additionem vel adjectionem sive

K simul-

simultaneam & copiosam, sive lentam & successivam, nec nisi post sensibile temporis intervallum sensibilem, particularum quarundam materialium hæc per talium subtractionem aliquam; quodque utriusque duo possint constitui genera: alterum quod fit per appositionem vel subtractionem extrinsecam, quomodo fluminum e.g. vel exundationes vel exiccationes contingunt; alterum quod fit per appositionem vel subtractionem intrinsecam, quo pacto plantarum & animalium incrementa ordinaria, & phthysicorum vel tabidorum marcescentia, peragitur. De quo utroque modo multa quoque Specialia, sed in Parte Physicæ Speciali considerata veniunt.

II. Inter Alterationes secundum ordinem qualitatum superius enarratarum primum obvia Solidorum Liquefactio & Liquidorum seu fluidorum Firmatio, Concretio, Coagulatio &c. in quo consistunt?

Cum *Fluiditatem* Sect. II. cap. III. Quæst. VI. in partium solutarum aut parum coherentium agitatione quadam, alibi majore, alibi minore, *Firmitatem* seu *Stabilitatem* contra in minutiarum corpus aliquod componentium quiete quadam positiva consistere docueri-

cuerimus; palam est, liquidum seu fluidum ex firmo fieri, cum in hoc partium tenuium cohærentia solvitur & quietis antea sensibilibiter motus aliquis vel agitatio sensibilis communicatur; ex fluido contrà firmum, ubi sublatâ prioris agitationis causâ, quies & consequens inde qualiscunque cohæsiō particularum procuratur.

III. *Potestne generalis hæc & realis idea specialibus quibusdam exemplis illustrari?*

Omnino, & illis quidem evidentissimis. Sic e. g. moderatus aliquis calor, h. e. subtilium quarundam particularum intra nivis substantiam valde laxam & porosam intromissarum mediocris & lenis agitatio particulas aqueas rigescentes, invicemque leviter cohærentes, & disjungit facilè & disjunctas inflectit agitaturque, ut suâ lubricitate super invicem provolvantur, maximè ubi per declivia connato sibi pondere detruduntur. Sic firmiorem corpusculorum in metallo, vitro, siliice, arenulis &c. nexum fortior etiam & confertior igniculorum rapiditas eodem modo superat, & in communem secum motum impetuosè rapit: dum ex opposito, evanescentibus iterum levitate suâ, aut veriùs graviorum

pressione expulsis, & fonte submittendorum novorum igniculorum deficiente, particulæ violenter solutæ, & agitari cessantes, paulatim iterum super invicem quiescunt, sibi mutuò implicantur & ambientis pressione in massam sensibilibiter immobilem compinguntur.

IV. *Calor igitur & ignis erit universalis quasi liquefactionis causa?*

Nequâquam: nam & liquores aliqui solidioribus quibusdam superaffusi ea solvunt & in communem secum fluorem abripiunt, ut aqua communis, sal commune, saccharum, nitrum, alumen, vitriolum &c. ipse aër humidior, salia quædam chymica, per deliquium, ut ajunt, in liquores commutat, aquæ fortes autem & regiæ, solidissima metalla & alia mineralia minutissimè corrosa imbibunt cum illis ita communem aliquem fluorem constituentes; reipsâ sanè non aliter, quàm uti subeuntes igniculi easdem minutias ab invicem dissociant, ac dissociatas deinde secum provehunt & sub fluoris forma exagitant.

V. Non-

V. *Nonne hujus ipsius per ignem procuratæ fluiditatis exemplum quoddam artificiale quodammodo in promptu est, quo naturalia egregiè illustrantur?*

Est utique alabastrum vel gypsi Parisiensis in pulverem tenuissimum contusi probeque cribrati luculentum exemplum. Is enim in vase ferreo vel æneo plani fundi, probè priùs calefacto, aliquot librarum copiâ exceptus, si igne sensim intensiore urgeatur tandem instar liquoris alicujus ebullit, bacillo agitante promptè cedit, vapores etiam aut fumos copiosos & albicantes emittit; si quid tamen ejus in chartam vel aliud corpus effunditur, id non madefacit, sed fluiditate omni deperditâ, incohærentis & immoti pulveris genium illicò reassumit.

VI. *Quid verò discriminis est inter Liquefactionem & Volatilisationem?*

Videntur hæ duæ mutationum species non nisi secundum magis & minus differre; ut nimirum in priore ignis aliusve floris subingressione, partes alicujus corporis consistentis ita solvantur & agitentur, ut in fluore solvente quasi natent & unâ cum ipso profluant; in posteriore major adhuc particularum solu-

tarum distractio contingat , quâ in sublimē per aërem sublatae volitent magis quàm fluant : id quod in omnibus evaporationibus , sublimationibus &c. ignis virtute fieri solet ; tum maximè quando solventis hujus violentiâ particulas corporum solutas comminui , diffringi & attenuari contingit.

VII. Cùm Firmationis , b. e. fluidorum in stabilia , aut volatiliū in fluida vel stabilia mutatorum generalis causa quæst. II. fuerit indicata ; ejus applicatio specialis , in casibus oppositæ mutationis hætenus enarratis , utilis forsan est futura ?

Nullum est dubium : Et in casu quidem ab igne fubeunte liquefactorum , restitutio eorum in pristinum firmitatis statum ex eo jam deducta est sub finem quæstionis III. quòd igniculi submissi , qui sua agitatione nunc leniore ob eorum paucitatem , nunc vehementiore ob copiam , particularum nexum in corporibus dissolverant , solutasque in communem secum fluxum rapuerant , in perpetuo exhalandi conatu consistent , aut rectius ab aëre ipsis graviore corporibus omnibus incumbente exprimantur , & si nova aliorum successio deficiat , partes ante raptas deferant ; ut hæ ab illo raptu liberatae quiescant , & eadem

dem aëris ponderosi incubatione ex omni parte comprimantur.

VIII. *Anne verò in reliquis casibus*
Quæst. IV. & V. eodem modo res habet?

In Casu V. quæstionis utique res est omnino palpabilis. In solutionibus à fluidis aqueis dependentibus, separatio illorum fluidorum utique requiritur, ut partes solutæ iterum coëant & concrecant, sed principium illius separationis non tam est aëris pressio sola, quam calor ei conjunctus, cujus virtute partes aquosæ aliæque expelluntur. Alibi ut in congelatione, frigus equidem occasio est, ut caloris pauculæ partes in aqua aut mixto aquoso, aëris pondere exprimantur, & hoc modo partes aqueæ vel inter se solas vel cum terreis admixtas super invicem quiescant.

IX. *Quo modo verò volatile quoddam corpus in firmum & stabile potest coalescere?*

Duobus modis: Uno immediatè, quando e. g. exhalationes siccæ alicujus corporis, aut humidæ quoque in certo casu, vi caloris, non solutæ solum sed distractæ penitus ac dissipatæ, ubi ad locum frigidiorum delatæ fuerint, ibique, si flexiles prius extiterunt, rigefactæ,

amisso priori impetu incipiunt subsidere, coire rursum & cohærere; id quod in chymicorum *Sublimationibus* & concretionibus pruinosis, nivosis &c. contingit. Altero mediâ, cum halitûs e. g. aquosi seu vaporosi ad moderatè frigidiorum contactum perlâti, citra præcedaneam rigefactionem coeunt, suaeque flexilitate se mutuò complexi primùm in liquorem aqueum iterum confluunt (quod fit etiam in Chymicorum *Distillationibus*) deinde majore superveniente frigore in glaciem aut grandinem convertuntur.

C A P. III.

De

Indurationibus & Emollitionibus.

I. *Quis est abstractus & generalis Indurationis & Emollitionis conceptus?*

Nihil aliud his nominibus intelligimus, quam mutationem corporis antea mollis in durum, & duri in molle, h. e. talem quâ corpus antea prementi v. g. digito cedens ita consolidatur, ut pressioni ampliùs haut cedat, aut vicissim, quod prius cedere recusabat, postmodum cedit ægriùs aut promptiùs.

II. *Qui-*

II. *Quinam verò est conceptus magis realis harum mutationum?*

Videtur *Induratio* firmationis quædam species & superior gradus, *Emollitio* quoddam colliquationis inchoamentum esse: Ut hoc pacto mutationes illæ Cap. præced. expositæ ab his Cap. præsentis secundum magis & minus tantum differre videantur, easdemque adeò causas & eundem operandi modum supponere, nisi quod hic aut intensior sit in Induratione quam in firmatione simpliciter tali, vel remissior in Emollitione quam in liquefactione.

III. *Velim paulò distinctius hos operandi modos mihi exponi.*

Dico ergo ad spirabilium molliumve indurationem generalissimè requiri exclusionem plenioris agitationis cujusdam & ad locum facilè cedendum aptioris materiæ, & consequentem particularum residuarum arctiorem à fluidis ambientibus, præsertim aëre, dependentem compressionem; quâ fit, ut spatiolis interioribus per compressas ita particulas solidiores, corpori plerumque proprias, & in locum exclusæ materiæ agitationis succedentes, maximam partem expletis, exteriores

deinde corporis partes non reperiant amplius locum, quò cedant, urgente tactûs organo.

IV. *Quibusnam exemplis specialibus hæc generalis Indurationis idea declarari potest?*

1.) Exemplis spongiæ, lanæ, similiumq; jam consistentium quidem & firmitatis aliquem gradum habentium, sed mollium tamen adhuc, ideò quòd inter filamina sua multum æris fluidi continent, qui pressis istis cedere locumque dare potest: ubi verò constricta arctius ista filamina illum aërem expresserint & spatia prius ab ipso occupata expleverint, ulterius deinde pressa vix locum, quò concedant, reperiunt, & sic tactui urgenti resistunt: 2.) Exemplo luti, argillæ &c. vi caloris induratorum, qui sc. humorem corporum istorum poris inexistentem terreisque adeò particulis forinsecus pressis locum antea cedere solitum expellit, ærisque adeò incumbentis ponderi occasionem has fortius comprimendi suppeditat: 3.) exemplo aquæ in glaciem & luti ejusdem &c. vi frigoris in faxeam quasi duritiem converti solitorum, dum, non tam expressis aut expulsis à frigore partibus æthereis aut caloris, quæ flexilitatem aquæ & humori aquoso antea conciliaverant, quàm sua quasi sponte

sponte exhalantibus aut eodem aëris pondere extrusis & novarum successione destitutis, aquearum quies arctiorq; compressio consequitur: 4.) Exemplo terræ fungosæ per infixos palos, carnum per intrusa spicula salina fuliginesque quasi intrusas in earum meatûs tanquam paxillos consolidatarum; quo ipso aër humorque excluduntur & partes ibi terreæ, hîc fibræ carnosæ pressius uniuntur, ut urgenti dein tactui difficilius cedant &c.

V. Quid vero in durorum emolitione fieri distinctius concipiendum est?

Pororum interiorum laxatio quædam & particularum antea magis compressarum aliquis emolio per interfusum aliquod subtilius mobiliusque corpus, quod deinde tactui urgenti cedere partibusque exterioribus pressis locum dare, intra laxatos & à se promtè deferendos meatûs, queat.

VI. Quid deniq; in emollitione liquidorum & spirabilium?

Rursum exclusio interfusæ materiæ agitatæ, sed superflue tantum & abundantis, quæ cessionem particularum in ipsa natantium aut volitantium nimis facilem reddiderat.

VII. Qui.

VII. *Quibus exemplis specialibus emollitio durorum illustrari potest?*

1.) Exemplis ceræ, resinæ, luti congelati &c. quæ calore mediocri mediante, hypocauftorum e. g. vel aëris æstivi mollescunt, per subingressos sc. igniculos, qui poros illorum corporum laxant, laxatosque occupant, & congelatum antè in luto humorem resolvunt, ut illis postmodum forinsecus pressis, aut resolutus humor cum admixtis sibi igniculis, aut hi soli in cæteris casibus, locum facile cedant: 2.) Exemplo ferri, vitri, similiumq; in calore vehementiore eodem modo mollescere solitorum: 3.) Exemplis luti macerati, hordei, aliorumque seminum humore aqueo subingresso, porosque laxante & occupante, mollitiem eodem modo acquirentium: 4.) Carnium, olerum, aliorumq; elixorum exemplis, in quibus humor cum calore conjunctus tan tò efficacius operatur &c.

VIII. *Suntne in promptu etiam exempla corporum spirabilium & liquidorum ad statum mollitiæ vel etiam duritiæ reductorum?*

Sunt utique benè multa. Ex. g. 1.) Vires & metalla fusa, cera liquefacta &c. quæ
repor-

teporis aut remittentis caloris ope in statum mollium è statu liquidorum transferuntur, solo caloris excessu, illorum particulas nimis agitante ac distrahente, ad mediocritatem deducto: 2.) Oleum & vapores aquosi, frigoris intensioris interventu in substantiam ibi consistentem & quasi butyraceam, hîc in nivis molles flocculos, disposita; quòd ibi coloris gradus, oleosas particulas in majori agitatione priùs conservans, imminuatur; hîc inter obrigescentes vaporis particulas, ob simile caloris decrementum propiùs iterum junctas multum aëris reliquum maneat, qui pressis introrsum flocculis locum dare possit: 3.) Aqua & alii fluores, quando farinâ, calce, arenâ &c. imprægnantur, fluiditatis loco mollitiem acquirunt.

IX. *Dantur & alii indurationis
ac emollitionis modi, præter hæcenus
enarratos?*

Dantur utique speciales alii, tametsi in modo generali cum cæteris plerique conveniant. Sic e.g. Stannum immediatè in aqua fervente coctum, argilla verò intra lagenam fictilem eidem aquæ ferventi immersa &c. indurantur: lignum quercinum intra aquam diutissimè servatum & duritie & pondere crescit;

fcit; quod idem in quavis petrefactione contingit: Sic econtrà quædam corpora tundendo, tractando & premendo evadunt molliora, ut e.g. caules lini, cannabis &c. pyra, pruna &c. manibus diu tractata &c. quod nimirum in hoc ultimo exemplo poros laxatos & filamina rigiditate exuta fluidum subtilius subintrat; in secundo pulvisculi lapidosi sensim in poros corporum intruduntur; in primo particulæ humoris absconditæ per igniculos è ferventi aqua admissos. (aqueis interrim exclusis) expelluntur.

X. Suntne omnia corpora ad indurandum vel emolliendum equaliter apta?

Nequaquam. Nam lapides e.g. aut planè non mollescunt aut ægerrimè: Sal, glacies, nitrum &c. liquefcunt quidem, sed non mollescunt: Ignis, aër, olea & pingua, illa planè nullam, hæc ægerrimè indurationem, neque nisi in regionum Septentrionalium intensissimo frigore, patiuntur; omnia non tam ex causarum agentium defectu, quàm ex interna cujusque fabrica particularum alterutram dispositionem respuente, quod per discursum distinctius explicabimus.

CAP. IV.

De

Compressionibus , Pressionibus ac
Tensionibus, oppositisq; compressorum
ac tensorum restitutionibus.

I. *Quanam corpora Compressioni solent esse obnoxia?*

SPongia , lana , gossipium , plumæ , cineres,
nix, scobs lignea, carnes aliaque succulenta
& quicquid tandem humoris aliquid vel aëris
intra poros suos complectitur, qui pressus ce-
dere & partibus crassioribus in ipsius locum
successuris locum dare potest.

II. *Quodnam corpus est omnium maximè compressibile?*

Illud est ipse aër, quia adeò cogi se in an-
gustias patitur, ut Honor. Fabri nullo ferè ne-
gotio ad trigesimam pristini spatii partem co-
gi posse asseveret, & Illustris Boylius intra tu-
bum vitreum hermetice sigillatum ad quadra-
gesimam pristinae extensionis partem eundem
coëgerit.

III. *Qua-*

III. *Quanam verò causa est tantæ compressibilitatis?*

Causa est nimia aëris laxitas & magna ætheris inter ejus partes diffusio copia, quâ fit, ut æther hîc, cùm premitur aër vasi cuidam inclusus, per vasis poros extrusus aëreis partibus magna spatia evacuet, in quæ se recipere queant: non aliter sc. ac aër è sponsia pressa protrusus ea spatia, quæ ipsemet prius occupaverat, partibus sponsiæ propriis occupanda relinquit.

IV. *Numquid omnia corpora ejusmodi compressionis sunt capacia?*

Nequaquam. Nam cera premi quidem facile, comprimi verò nequaquam, potest, ut minus spatii quàm prius occuparet; idemq; de metallis similibusque dicendum, quæ pressioni quidem cedunt & quoad illam dimensionem imminuuntur, sed ita, ut ex altera tantundem iterum augeantur. Vitra item aliaque fragilia rigidaque corpora, quæ frangi se prius quàm in arctius spatium cogi patiuntur.

V. *Quodnam corpus videtur esse omnium minimè compressibile?*

Aqua fortasse, quod multis experimentis constat, inter alia hoc, quod ingens sed tenuis
pila

pila ex argento liquato & aquis ope glaciei in-
frigidatis repleta obturabatur cochlea fir-
missimè; tum verò leviter illâ circumquaque
malleo percussâ ad singulas percussiones exsu-
dare cernebatur per omnes metalli poros in-
star argenti vivi: quod idem experimentum
jam olim fecerat Verulamius cum globo
plumbeo, qui malleo fortiter contusus & tan-
dem torculari pressus aliquantum comprimi
aquam edocuit, antequam exudaret, ulterio-
ris compressionis impatiens. Sed hîc duæ
circumstantiæ aliqualis compressibilitatis spe-
ciem mentiebatur, nimirum plumbi extensi-
bilitas & aquæ non summè frigidæ assumptio.

VI. *Quenam verò causa est tantæ incompressibilitatis in aqua?*

Causa videtur esse aquæ densitas, quâ par-
ticulæ aqueæ ab aëris incumbentis pondere
jam validè compressæ immediatè sese contin-
gunt, ut propius jungi non possint, sed super-
invicem solum provolvi ab æthere, qui parti-
culas ejus utcunque agitât: quemadmodum
e. g. cumulus aliquis globulorum parvorum
& solidorum vasi cuidam inclusus & validè
jam compressus arctiorem deinceps compres-
sionem non amplius patitur.

L

VII. *Cum*

VII. *Cum compressioni dilatatio & dilatabilitas opponatur, numquid dilatari saltem aqua potest, si ab incumbentis aëris pressione liberetur?*

Equidem si evaporatio seu aquæ in vaporem mutatio dilatationis nomine venire vellet, ejus dilatabilitas ingens esset asserenda. Sed si de aqua formam suam servante quæstio sit, aliqualis ejus dilatabilitas in tubo, quem vocamus, Torricelliano sic deprehensa est: Tubus replebatur ferè totus, residuum spatium 20. circ. min. ex palmo Romano aquâ superaffusâ occupante. Deinde inverso tubo aqua super mercurium ascendeabat, & mox demerso tubo in argentum vivum more consueto, mercurioque infra solitam altitudinem delapso, aqua supereminens 26. min. in tubo occupabat, plurimis interim aëreis bullulis enatis & ad summitatem ejus sublatis.

VIII. *Quodnam corpus omnium maximè est dilatabile?*

Illud utique, quod maximè est compressibile, nempe aër; prout ipsa ratio suadet & experientia insuper confirmat. Ut enim ta-
ceam e. g. vesicæ flaccidæ, sed circa collum validè constrictæ, quæ delata in editum mon-
tem,

tem, aut intra recipiens antliæ deinceps exhauriendum suspensa, sensim magis magisque inflatur, prout altius ibi in aërem sublata, aut hîc aër externus eam ambiens exhaustus fuerit; aliis quibusdâ experimentis Academicorum Florentinorum, Boylei, Lanæ, aliorumque minus vulgatis, parva aëris bullula in spatium 170gies amplius expansa fuit: quod hoc quidem loco satis doceri non potest, interim id ipsum est, quod violenter compressorum spontaneam restitutionem appellamus.

IX. *Quanam verò causa physica est illius spontaneæ coitionis aut dilatationis?*

Equidem propriè loquendo sponte sua nihil agit, quod non sit cognitione præditum & ex proposito moveri possit; quod equidem neque spongiæ, nec aëri compresso &c. adtribui potest. Itaque cùm spongia v.g. manu compressa aërem intra poros contentum violenter expresserit, hic idem, pressione desinente, in eosdem poros, quia fluidus est & ponderosus, ingreditur eosque dilatat. Eodemque modo cùm aër hic inferior in statu suo ordinario à superiore incumbente valdè compressus sit, æthere (qui aliàs copiosior

interfluere ejus particulis solet) magnam partem excluso; cum ejus portio aliqua vel alius evehitur, ubi minus ponderis ab incumbente externo sentit, vel ab ambients pressione per exhaustionem liberatur, mox ab æthere copiosius iterum affluente magis dilatatur &c.

X. *Quid differt tensio à dilatatione?*

Dilatatio est expansio corporis secundum omnes dimensiones, in longum, latum & profundum; Tensio contrà, cum corporum partes secundum unam solum plagam, e. g. in longitudinem extenduntur, latitudine interim & profunditate decrefcentibus & pressionem quandam patientibus; prout in chordis nervis & chalybeis, funibus & filis, crinibus equinis, in corio, equino præcipuè, videre est, quod vel appenso pondere onusta, vel claviculis alteri immoto, alteri convertibili alligata, quoad longitudinem exporrigantur, latitudine verò ac spissitudine decrefcant.

XI. *Nonne verò etiam arcus chalybeus aliq. similia ex rectitudine in curvitatem deflexa tendi dicuntur?*

Utique, & rectè quidem; quandoquidem & arcus tensus & bacillus violenter incurvatus,

tus, & similia, reverà majorem longitudinem acquirunt, & latitudine, licet non adeò sensibilibiter, decrescunt. Et hæc quidem tensio triplici fere modo contingit; vel (1) proprio pondere deorsum incurvatis virgæ v. g. aulæ longioris ex sui medio libratae extremitatibus: vel (2) his violenter ad se invicem adductis, medio interim immoto manente: vel (3) firmatis extremis, medio verò vel proprio pondere (qui quartus adeò modus esse posset) aut violenter adducto: quemadmodum & chordarum tensio triplici modo fieri potest; scilicet aut immoto extremo uno, & adducto altero; vel utroque extremo immoto, & adducto medio; vel denique adducto simul utroque extremo & immoto sensibilibiter manente medio.

XII. *Quænam verò est ratio, quod ita violenter tensa pleraq, si sibi relinquantur, in pristinum statum sese restituant?*

Eadem est ratio, quæ in compressorum ac dilatatorum restitutione. Etenim cum res in longum exporrecta minorem acquirat latitudinem, ideò singuli ejus pori redduntur quidem longiores, sed insimul minus lati (quod in corio, præsertim foraminibus rotundis de industria pertuso, oculis ipsis videre

est) adeoque aërem vel ætherem in illis poris existentem ex parte saltem violenter exprimunt. Is verò quando vel gravitate suâ vel æquabilitatis repetendæ nisu poros coarctatos undique valdè urget, remittente tendente causa in poros illos cum impetu quodam irruit eosque dilatat, eoque pacto longitudinem iterum vel rectitudinem pristinam restituit.

XIII. *Suntne alia quoq; circumstantiæ circa has tensiones notandæ?*

Sunt plurimæ; ex quibus tamen sequentes tantum annotabimus: quòd (1) chordæ nerveæ in aëre humido laxentur, teste sonocarum remissiore vel obtusiore, aliæ verò ex lino vel cannabi tortæ, ut & serica fila & funium quæque genera, in humido tendantur magis & abbrevientur: quòd (2) hæ posteriores humente aëre facilius rumpantur, nerveis contrà & membranaceis aëre sicco magis rumpi solitis: quòd (3) hæc ruptura in primo tensionis modo contingat ordinariè circa extremitatem immobilem, in secundo circa alterutram, in tertio circa medium, nisi per accidens ex inæquali partium habitudine oppositum contingat: quòd (4) similiter arcus nimium curvatus in medio frangatur, & quidem

dem initio factò in parte convexa, nunquam in concava: quòd (5) idem pondus & breviorẽ & longiorẽ chordam æquẽ faciliẽ abrumpat &c.

XIV. *Quanam autem sunt harum circumstantiarum causæ?*

Quod (1) chordæ nerveæ in humido aëre laxentur, inde est, quod earum fibræ, alioqui laxius dispositæ, per exiccationem præcedentem exsiccatæ & contractæ, imbibito promtius humore mollescant & sic violentæ tensioni facilius cedant; cùm in cæteris filorum & funiculorum generibus, quæ fibris constant lignosioribus & ad emollitionem ineptioribus, insinuans se ipsorum interstitiis humor, eas secundum latitudinem tantum diducat, & consequenter secundum longitudinem abbreviet. Hinc (2) hæc posteriora, ultra priorem tensionem adhuc amplius tensa, faciliẽ rumpuntur, dum priorum fibræ humida tempestate emollitæ, tensioni, quam ægrè prius in sicco sustinebant, facilius cedunt, rupturæ adeò minus obnoxia. Cæterum (3) tensam valdè primo modo chordam in extremitate immobili potius, quàm alibi rumpi (positâ sc. texturæ æqualitate) ideò, quòd illa extremitas & totam clavi resistantiam & ponderis

aut virtutis in adversa trahentis vim sustinet; quod in cæteris punctis non contingit: in secundo modo in parte alterutra, debiliore sc. ob eandem rationem; in tertio circa medium potius, quod hoc utriusque extremi tractionem simul sustineat; ob eandemque causam (4) etiam arcus validè tensus, & quidem in parte convexa, ubi major fit partium distractio. Quod denique (5) idem pondus rumpat chordam sive longam sive brevem, ratio est, quod eadem sit vis trahens, eadem extremitas immobilis, quæ maximè trahitur, idemque adeò necessariò effectus.

CAP. V.

De

Rarefactionibus & Condensationibus.

I. *Quid est condensatio & rarefactio?*

Condensatio revera est compressio quædam, cujus causam tamen manifestè prementem non videmus, & quia interveniente frigore ordinariè contingit, eam frigori tribuimus: similiterque Rarefactio est quædam Dilatatio à calore speciatim dependens. Sic
e. g.

e.g. si quis vesicam suillam aëre , præsertim frigidiorē loci cujusdam subterranei, semiple-
nam ac circa collum sollicitè constrictam , vel
ad hypocausti calentem fornacem suspendat ,
vel Solis æstivi radiis exponat , aër intus con-
clusus ita dilatabitur , ut vesicam totam adim-
pleat, & hoc est rarefieri: quod si verò ea ipsa
sic inflata vesica in locum iterum frigidiorē
deportetur , coibit iterum aër, nec vesicam
nisi dimidiam circiter explebit ; & hoc est
iterum condensari.

II. *Quamnam ideam rarefactionis & condensationis antehac in scholis sibi formârunt ?*

Existimârunt aërem in vesica ita dilatari,
ut majus spatium quàm prius occupet , nec in-
terim tamen quicquam novæ materiæ sibi
adjungat , neque spatia vacua inter suas partes
relinquat : Similiter ejusdem condensationem
ita contingere , ut minus spatium quàm prius
occupet , nec interim tamen in spatia vacua
sefe recipiat , nec materiæ quicquam inter
suas partes antea contentæ extrudat.

III. *Quid de his conceptibus sen- tiendum est ?*

Repugnant illi penitus naturæ materiæ,
& speciatim aëris, cujus partes solutæ sunt &

incohærentes. Hæ igitur, cùm à se invicem discedunt & in amplius spatium dissipantur, utique ampliora inter se relinquunt spatia, quæ vel vacua esse vel alia materia nova, quæ antè non adfuerat, repleri necessum est; quemadmodum e. g. turma militum arctius stantium, ut vir virum contingat, cùm hi ab hoc contactu discedere & in amplius spatium diduci oecœperint, magna inter se spatia relinquunt, quæ utique vacua non sunt, sed ab aëre undique in locum discedentium confluyente replentur. Quòd si vicissim partes aëris distractæ iterum in arctius spatium cogantur, illæ coëuntēs aut in spatia vacua prius interjecta concedunt, aut, si spatia illa fuerunt materia quadam repleta, hanc expellunt, & hoc modo locum sibi parant: quemadmodum scilicet milites ante distracti arctius iterum coire iussi, aërem interjectum ex illis locis protrudunt, quæ ipsimet sunt occupaturi.

IV. *Quo pacto igitur utraq; hæ affectio omnium rectissime concipitur?*

Si concipiamus e. g. caloris minutas & agitas particulas, subtilitate sua per vesicæ poros facile subintrantes, inter partes aëris sese admiscere & has agitatione sua & præsentia ab invicem magis disjungere, has verò ita dis-

disjunctas amplius spatium quærere & sic flexilem vesicæ ambitum expandere ac dilatare, habebimus clarissimam & evidentissimam Rarefactionis Ideam. Quod si deinceps à calente Sole aut fornace remota vesica novum calorem non amplius recipiat, prior autem ex eadem sensim iterum exhalet, cessante sic causa partes aëris dilatante, hæ vel sua sponte rursus coïbunt vel rectius ab incumbente & ambiente aëre ponderoso ipsum unà cum vesica comprimente: Frigore interim, cui alioqui hanc condensationem tanquam efficienti causæ adtribuimus, non tam agente quicquam (quid enim agat id quod est mera privatio?) quàm deficiente, h. e. nullas caloris particulas in locum exhalantium submittente.

*V. Ubi locorum hujusmodi alterna
aëris rarefactio & condensatio frequen-
tissimè est conspicua?*

In thermoscopiis, quæ vocantur, & variis modis parari solent, quorum unum hîc describemus. Est e. g. tubulus recurvus ABCD, supernè ad A globoso instructus capite penitusque clausus, infernè ad D similiter in globulum dilatatus, sed parvulâ fistulâ E apertum. Calefactus ad ignem tubus & subito suo orificio E liquori cuidam spirituofo
im-



immersus, hunc in cavitatem suam celeriter recipit, quippe ab externo aëre intrusum, cum interior calefactus minus resistat. Hoc pacto thermometrum est paratum, ejusque usus in eo consistit, ut aër AB (qui à liquore intro-misso sursum compactus est & aliquo modo compressus) quoties externus ambiens evadit tantillo calidior, eum ipsum calorem unà sentiens statim aliquantum rarefiat & expandatur, liquoremque adeò deorsum infra terminum primum B detrudat & in C assurgere versus D faciat; e contrario frigescens rursus partesq; prioris caloris dimittens, ab externi aëris pondere per E ingresso sursum unà cum sub-jecto liquore iterum attollitur.

VI. *Anne alia quoq; corpora præter aërem rarefactionis & condensationis sunt capacia?*

Nullum ferè corpus est, quod non à calore rarefiat & à frigore (aut veriùs occasione frigoris) condensetur, tametsi non semper id attendamus. Exempla habemus in armilla cylindro æreo exactissime adaptata, quæ igne

igne calefacta ab eodem cylindro non amplius expletur: Globulus plumbeus æneo filo supra laminam planam suspensus, ut hanc quamproximè contingat, qui admotâ filo candelâ ardente laminam statim attingit, admotâ verò glacie mox attollitur: Virga chalybea pedalis longitudinis, quæ candefacta non solum spissitudine crescit, sed etiam longitudine, refrigeratâ verò pristinam longitudinem recuperat: Plumbum liquatum & vitrum fustum, quod in modulis refrigeratum modulum deinde non amplius implet &c.

VII. *Nonne verò & frigus in quibusdam corporibus est rarefactionis causa?*

Id sanè videtur evidenter ostendere (1) manuum, genarum &c. in hyberno frigore intumescencia; (2) glaciei super aquam nantis levitas, indeque illata raritas: quam insuper vasorum ruptura per aquam congelatam facta, & tubercula in media aquæ superficie intra vas aliquod concretæ, & spatiola vacua intra confractam glaciem reperiunda, confirmare videntur. Quamvis illa manuum intumescencia per accidens tantum à frigore dependeat, quod constrictis vasis capillaribus sanguinem circulantem ibi stagnare faciat;

eodemque modo vasa à frigore , vel potius occasione frigoris ab aëre ambiente constricta & compressa, congelantem interea aquam in medio faciant assurgere (unde acicula perfossus ille glaciei medius tuberculus aquæ proflientis jactum aliquem causatur) ubi verò glacies jam spissior cedere porrò recusat, haut rarò ipsa vasa rimas agunt ac rumpuntur, eo modo quo capsula lignea cylindrum solidum arctè cingens, dum exiccatur, finditur. Cæterum glaciei supernatio levitatem quidem, ex partium quarundam insensibili deperditione oriundam, rarefactionem autem nullo modo probat.


VIII. *Ab humiditate verò etiam, aliisq; causis præter calorem, nonnullæ saltem rarefactiones proveniunt?*

Id sanè obvia testantur experimenta, spongiarum e. g. aquis immersarum, panum biscoctorum, spirarumque nostrarum quadragesimalium, & generatim recens-cocti panis cujuscunque, utpote quæ vino, lacti, aliisque humoribus intrita intumescunt; id quod speciali nomine germanico Quellen appellamus: cum primis autem valvæ & januæ ab aëris humore expansæ, pisa item aliorumque leguminum sicca semina intra vasa fictilia & metallica,

lica, post affusam aquam mirum in modum intumescencia, testantur, idque tantâ sæpe vi, ut illæ vix aperiri aut intra alveos suos commoveri possint, hæc autem supernè arctiùs conclusa & cohibita sæpe vasa ipsa solidissima diffringant, aut pondera magna operculis imposita sustollant &c.

IX. Huc igitur referenda fortassis erunt organa illa hodie passim recepta, quæ Hygrometra vel Hygroscopia appellari solent?

Sic est profectò; quandoquidem in omnibus istis fabricis, quorum mira est varietas, corpus aliquod adhibetur, quod humore aëris imbibito aut ponderosiùs redditur, aut magis expanditur ac dilatatur, aut (si contortum arte vel naturâ fuerit, uti funiculi, convolvulorum caules, aristæ avenaceæ &c.) in partem oppositam retorquetur, & sic motum aliquem causatur applicati decenter alicujus indicis aut alterius cujusdam signi, quod humoris gradum nunc majorem nunc minorem in aëre designat; ex opposito verò siccitate succedente levius redditur, vel arctiùs coit & contrahitur, vel denique solito modo contorquetur, & hoc pacto motûs prioribus contrarios producit: quemadmodum e. g. frustillum
chor-



chordæ cujusdam nerveæ AB intra capsulam quandam infernè ad A defixæ, superne CD transversū quandam indicem leviculum sibi agglutinatum nunc dextrorsum, v. g. cū aër est humidior, nunc sinistrorsum convolvit, cū siccior evadit, ita motu suo circulari humiditatis & siccitatis gradus in aëre notabiliter indicantem.

CAP. VI.

De

Calefactione & Frigefactione.

I. *Quisnam est omnium familiarissimus calefaciendi modus?*

IS, quo corpus actu calidum corpori calefaciendo, aut hoc illi, applicatur & admoveatur; ut cum manus frigentes foco luculento, aut fornaci calenti, aut halitui ore ampliato effluenti admovemus, vel aquæ calidæ immergimus, & fenēs frigida membra in Sōle verno vel æstivo refocillant: quia nimirum omnia illa corpora particulas exilissimas celerrimè quaquā-

quaquaversum agitata non solum intra se continent, sed ejusdem impetûs virtute plurimas earum extra se propellunt & in aliorum illorum aut contiguorum aut vicinorum saltem corporum poros intrudunt, in quibus eandem illam agitationem aliquali saltem libertate exercere pergunt.

II. *Quis ex opposito frigefactionis modus familiarissimus?*

Cum corpora actu frigida calidioribus immediatè applicantur; ut cum corpora nostra & viventia omnia ab ambiente aëre hyberno vel aqua frigida rigent; manûs ex nivium frequenti contactu horrescunt; vinum æstate, circumpositâ vasis glacie, aut aquâ frigidâ circumfusâ, infrigidatur &c. Notandum autem frigidorum actualem contactum hîc requiri, nec viciniam, ut in calefactione, sufficere, cum frigus glaciei à manu tantum non tangente nullum percipiatur: quod argumento est vim frigoris aut frigefacientium in reali quodam effluvio, quale calor importat, nequaquam consistere, sed in defectu solum caloris in frigefaciente, & unâ in exclusione caloris aliorum, qui in locum exhalantis ex aliquo corpore & in ipso frigido applicato recepti caloris erat successurus.

III. *Anneverò & alii dantur calefactionis modi?*

Omnino dantur, & illi non uni. Nam primò fluidorum duorum, quorum neutrum ad sensum est calidum, confusio, aut liquidi super solidum affusio, vehementissimum sæpe calorem excitant: Ut cum aqua frigida calci vivæ superfunditur, aut scobs chalybis aquâ frigidâ identidem adspargitur, vel oleo vitrioli rigatur, aut orichalci limatura pauca cum parvâ quantitate aquæ fortis &c. cum item spiritus nitri cum oleo terebinthinæ, aut spiritus urinæ cum spiritu vini &c. confunduntur, vehementem effervescentiam, & in casu antepenultimo æstum adeò magnum excitantes, qui vas amplum intumescendo adimpleat, idque manibus impunè contrectare non permittat. Et huc referendus est procul dubio, tum naturalis ille calor, qui in sanguine nostro ex varia cibariorum aut potulentorum mixtura ordinariè concitatur; tum verò inprimis effervescentia illa præternaturalis in febribus ardentibus similibusque casibus aliis.

IV. *Ecquæ verò talium exæstuationum causa esse videtur?*

Illa verò paulò abstrusior est, hoc tamen modo qualitercunque concipienda: Particulas liquorum elementares ab æthere immediate, à subtilissima materia verò mediante æthere, adeoque tardiusculè moveri, nec sensibilem habere calorem. Ubi verò liquor unus cum altero confunditur, aut solido cuidam affunditur, contingere posse, ut unius particulæ in poros alterius, motu illo tardiusculo sic insinuentur, ut æthereæ, cum ipsis unà satis loci haut invenientes, extrudantur, & hoc pacto particulæ elementares, à subtilissima materia sola abreptæ ac rapidissimè agitatae, calorem illum nunc majorem nunc minorem producant.

V. *Supereſt ne alius adhuc calefaciendi modus hætenus enarratis contra- diſtinctus?*

Supereſt utique, & is quidem in solidorum adfrictu mutuo consistens. Sic in molendinis axes rotarum ferrei intra matrices itidem ferreas continue gyrati sæpiùs in flammæ & incendia erumpunt: Sic ferræ reciprocando vehementer incalescunt, mallei ex

frequenti percussione calent, funes trochleis circumducti valida pressione tantum non ignescunt: Sic ligna solidiora quorundam Americanorum attritu mutuo vehementiore flammulas parvulas, uti silex ad silicem allisus scintillas, elicunt &c. quod sc. affricu illo & violenta pressione latitantes intra corporum texturam, ignique constituendo aptæ particulæ primum solvantur, dein solutæ materiæ subtilissimæ soli ei, quam præced. quæst. commemoravimus, simili aliquo casu exponantur, eoque modo collectæ ac liberiùs agitatae magnum calorem, aliquando flammam ipsam conspicuam, constituent.

VI. *Quid verò de vestimentis, ledis & culcitris aliisque integumentis sentiendum, quæ corpora nostra aliâque calefaciunt?*

Illis virtus calefaciendi non per se, sed per accidens, tribuenda est, quod ipsa in se non habeant calorem, quem recto corpori communicent, sed quod ex hoc exhalantem ac cæteroquin in auras dissipandum circa ipsum corpus cohibeant; quo modo etiam terra nostra hyemali tempore unâ cum aëre nos ambie, e aliquantillum calefit à proprio suo quem continuo emittit calore, cum is à nubilis

bilis superinductis cohibetur, ut circa terram in aëre hoc inferiore hæreat, nec in auras dissipetur : quo casu terram deferens in sensibili magis frigore relinquitur.

VII. *Annon verò eadem tegumenta corporibus frigidis suum frigus conservant adversus calorem æstivum?*

Sic est sanè : Nam lagenæ potulentis frigidis intra cellas frigidiores repletæ, si probè clausæ culcitrarum ac pulvinarium involucris undique sollicitè contra calorem ambientis aëris munitæ fuerint, gelu suum diu servant, tametsi longiùs in ipso Sole deportatæ. Ita glacies intra foveas terræ profundiores super stramineo locata strato desuperque stramineo pariter tegmine obvoluta, tandemque terrâ superingestâ plane obruta, per æstatem ferventissimam adservatur : non quod ejusmodi tegumenta frigiditatem aliquam (uti nec caliditatem) in se contineant, sed quod externum calorem, alioqui subintraturum & corporum frigus temperaturum, arceant.

VIII. *Quinam alii refrigerandi modi in corporibus observantur?*

Ille cum primis, quo calidorum actu talium remotio à corporibus antè calefactis re-

frigerationis causa ipsis æquè depræhenditur, ac eorum admotio est causa incalescentiæ; prout e. g. fervens aqua à foco luculento remota paulatim iterum pristino frigori restituitur, & hibernum frigus in aquis & aëre horumque ambitu conclusis corporibus regnans discessum Solis à vertice nostro, & caloris ipsius ex dierum brevitate defectum, sui causam evidenter agnoscit.

IX. Nonne verò ad sensum haut frigida, imò & calida quædam actu talia, caloris excessum in aliis, præsertim in animalium sanguine, temperant?

Ita res omnino habet, & Beccabungæ v. g. Scorzoneræ & Cornu Cervi decocta, infusio Theæ etiam calentissima, sanguinem ex nimio vini potu vel aliunde ferventem notabiliter temperant ac refrigerant; succus item Sedo expressus, aut pulveres ex cornu cervi præparato vel contusis oculis cancrorum, intra calidum etiam jusculum assumpti, aut spiritus vitrioli parvula dosi haustus, eundem refrigerationis effectum produçunt; non alia putà quam ea ratione, quòd infusæ sanguini cum decoctis & succis herbarum particulæ torpidæ minusque agitatae, aut pulvisculi quorundam corporum fixi & ad agilitatem ineptiores

ptiores intromissi, eo circiter modo nimiam particularum sulphurearum & ignearum rapiditatem obtundunt, quo v. g. puerorum plurimum petulantes cursitationes intra conclave quoddam, à paucorum hominum quadratorum ac torpidorum ignava quadam consistentiâ cohibentur: nisi quis fortè malit illum refrigerandi modum huc etiam applicare, quem quæstio sequ. exponet.

X. *Quis est ille novus refrigerandi modus?*

Est quædam quasi absorptio particularum tumultuantium, quâ forinsecus circumposita vasis sanguineis corpora, ut radices præoniæ orbiculatim sectæ & arteriis carpi eminentioribus applicatæ, massa fermentacea cum adperso sale plantis pedum superimposita, farina triticea linteamine aut charta cærulea membræ erysipelate inflammatis circumligata &c. fervorem sanguinis insigniter temperant, ejus sc. partem haut exiguam intra se recipiendo; id quod exarescentiâ suâ subitanâ satis testatum faciunt.

XI. *An adhuc alius restat friges- ciendi modus?*

Restat agitatio, quæ alioqui secundum
M 4 quæst. V.

quæst. V. calefacit. Etenim flabella aëris æstum temperant vultusquè calentes refrigerant, & venti ordinariè omnes, quò validiores sunt eò frigidiores: Sic flatus oris coarctati frigefacit, non corpora solum nostra, sed calidiores etiam cibos; cum aperto ore emissus, manuque vel alia corporis parte exceptus, manifestè calidus sentiatur. Scilicet hæc est differentia inter agitationem, quæ frigus, & inter alteram, quæ calorem causatur, quod illa sit agitatio totius in certam plagam directæ, hæc verò agitatio partium insensibilium & quidem varia ac perturbata in omnes plagas: unde v. g. clavus malleo adactus, quamdiu totus promovetur non incalescit, verum ubi sistitur (wann er sich setzt) tum per impulsûs iteratos calorem concipit, quod partes ejus insensibiles istâ percussione quaquaversum exagitantur.

C A P. VII.

De

De Exsiccationibus & Humectionibus.

I. *Quinam est modus exsiccandi communissimus?*

IS, qui fit mediante calore Solis, aut ignis, aut quocunque alio; prout e. g. lutum, stramina,

mina, resecta gramina &c. ab æstivo Sole exiccantur, imò fluvii aliquando penitus exhauriuntur, & madentia lintea ad fornacem calentem aut focum luculentum madorem suum amittunt: quia nimirum omnis calor cum agitatione quadam tenuium corpusculorum est conjunctus, illa verò agitatione particulæ aquæ lubricæ facilè tum ab invicem tum à corporibus humefactis separantur & expelluntur.

II. *Nonne verò frigus etiam humentia corpora nonnunquam exsiccant?*

Id utique in madidis linteaminibus & viis lutosis hyemali tempore frequenter observatur, imò glebæ terræ nonnunquam adeò exuccæ redduntur, ut conculcatæ in pulverem excitari possint. Sed hæc tamen non est vera quædam proprieque dicta exiccatio, verum humoris concretio potius & congelatio, ut sensibiliter non ampliùs madefacere possit. Unde talia ad sensum sicca corpora, ubi fornacum aut Solis calori rursus exponuntur, resolutis humoris glacialibus particulis denuò madescunt.

III. *Annon & ventis exsiccandi quædam vis inest?*

Inest omnino, idque quotidianis experimentis est compertissimum. Non solum enim madida linteamina, sed resecta quoque gramina, deficiente Solis splendore à ventis ea perflantibus exiccantur; sed ob hanc ipsam causam navigiorum vela subinde aquis conspergenda sunt, quod alioquin exiccata ventorum flatu perspirabilia evadunt, & sic minorem impetum ab his recipiunt. Nimirum impulsu quodam venti non minus quàm calor humoris particulas lubricas ex corporum poris extrudunt, & hoc pacto siccitatem aliquam, h. e. humoris defectum, inducunt.

IV. *Num adhuc alius superest exsiccandi modus?*

Imò superest, & is quidem peculiaris, cum adpersis pulveribus aut applicatione porosiorum corporum humor alicujus corporis imminuitur: Ut cum spongia carnibus sanguinolentis, gossypium ulceribus, charta bibula scripturis recentibus &c. applicata madorem tollunt, & exudans membrorum juncturis humor in recens-natis infantibus adperso Tutia pulvere leviusculo tollitur. Scilicet

licet omnis exiccatio in humoris ablatione consistit, quæ vel motu & impulsu, vel absorptione vel similibus aliis modis fieri potest.

V. *Quinam verò est communissimus humectandi modus?*

Primò ipsa humoris actualis affusio, aut corporis humefaciendi intra humorem demersio; deinde verò minus sensibilis & occultior vaporum intra corporis poros admissio: qualis in liquidorum quorundam medicamentoform evaporationibus de consilio institutis cernitur, quibus exucca corpora fovèri aut aliàs humorum necessariorum defectus refarciri solet; cujus postremi peculiare exemplum exhibuit F. J. Burrhi humorum ocularium restitutio, de qua plura in discursu. Nimirum aquarum glabræ lubricæ & flexiles particulæ in corporum plurimorum poros sua gravitate facilè se insinuant, aut saltem eminentiis extimæ superficiei facilè adhærent; vapores autem, qui nihil aliud sunt quàm aqueæ particulæ sparsæ, ubi poros subeunt vel extus adhærent copiosius, ob frigidiorum contactum facilè in guttulas confluunt & humorem sensibilem producunt.

VI. *Num.*

VI. Numquid alia supersunt exempla hujus vaporosæ humidationis?

Supersunt quàmplurima in diversis corporibus, quibus eâ occasione tanquam mensuris utimur, ad gradûs humiditatis in aëre obviæ dimetiendos, *Hygrometrorum* inde sive *Hygroskopiorum* nomine insignitis, de quibus jam suprâ Quæst. IX. cap. V. aliquid dictum fuit: Funibus e. g. vulgaribus in aëre humido contrahi & abbreviari solitis, etiam pondus plurium librarum adducendo & allevando: Chordis nerveis contrâ in aëre humido laxatis in sicciore contractis: utroque interim casu, dum suprâ rotulas mobiles extenduntur, indicem quendam in gyrum agentibus, ut humiditatis incrementa ac decrementa certis gradibus designent: Lana, gossipio, similibusque humorem imbibentibus indeque gravioribus redditis corporibus; speciatim spongia, quæ si primùm aquâ simplici probè imbuta, rursumque expressa, deinde alii aquæ vel etiam aceto, in quo sal armoniacus solutus sit, immergatur, iterumque exprimendo evacuetur & in umbra exsiccetur, ad humiditatis & siccitatis alternationes suscipiendas aptissima redditur, & ex uno bilibris brachio suspensa, ex altero pondusculo æquilibri dependente,

tru-

trutinam ab uno ad alterum gradum arcûs decenter applicati, ultrò citroque movet, prout aëris vaporosi humor aut crescit aut decrescit.

VII. Cum lutum frigore concretum in locis calidis humidum evadat, etiam calor humectationis causa erit?

Calor per se humectare non potest, sed potius exsiccat juxta quæst. I. per accidens autem non uno modo humefacit; nimirum humorem frigore concretum resolvendo & ad superficiem extimam quasi evocando: deinde, quatenus ex humidis corporibus expulsum humorem aliorum amandat, aliaque corpora eodem imbuunt, prout e. g. fornacum calentium cacabi ad fenestras aliasque hypocaustorum partes vaporum copiam impulsu caloris emittunt & hoc modo eas sensibiliter madefaciunt, confluentibus ob fenestrarum frigus in guttulas vaporibus.

VIII. Hoc verò pacto etiam frigus humectare dicendum esset?

Sic est omnino, sed & hoc per accidens potius fit quam per se, quatenus nempe vapores calidos, alioquin absque madore sensibi-

li longius progressuros circa obvia corpora frigidiuscula in guttulas iterum coïre facit: prout e. g. sudores in corporum animalium extima cute ad aëris frigidioris confinia ex halitibus calidioribus concresecunt, ollarum vapores circa opercula confluunt, in omnibus denique Chymicorum destillationibus halitus ignis vi expulsi, circa alembicorum parietes comparatè frigidiusculos in humorem insensibilem iterum concresecunt.

IX. *Num omnia corpora aequè facile humectantur?*

Nequaquam: Spongiosa enim & aridiora avidissimè humorem imbibunt, ut chartæ bibulæ, ligna leviora & rariora, terra siticulosa, panni & linteamina &c. quòd in eorum poros patulos humor pondere suo, & aëris incumbentis pressione, promptè intruditur; solidiora contrà, glabrà & pingua vix in superficie eum admittunt, quod in brassicæ alnique foliis, aliisque unctuosis, speciatim animalium obesiorum pellibus, in metallis exactè politis, videre est, quæ aqueum humorem ægrè, oleosum contrà libenter admittunt: quemadmodum ex opposito, quæ aqueo humore turgent, oleoso difficiliùs imbuuntur; quia glabris & politis aquæ particulis cum ramosis oleo-

oleorum parum convenit, & quorundam corporum pori tam angusti sint & superficies adeò glabra, ut glabræ pariter aquæ particulæ eam facilè præterlabantur, oleosæ verò & pingues suis ramulis ipsi adhæreant.

*X. Procul dubio etiam exsiccatio
in quibusdam corporibus facilior est
quàm in aliis?*

Major utique alibi, alibi minor est difficultas, pro humorum præsertim difficultate. Ita v. g. spirituosus quidam humores, ut spiritus vini, aqua sambuci &c. vix illinuntur manibus aliisve partibus humani corporis, cum subito quasi evanescunt, aridamque cutem relinquunt. Sic aquæ è chartis & lintheaminibus leni calore, vel etiam ventilatione quadam, abigitur, dum oleosi humores & pinguedines vehementiore quoque Solis aut fornacis calore, nedum flatu venti etiam impetuosissimi, nunquam planè expelluntur; quòd aliquorum corporum particulæ subtilitate suâ in aliorum poros facillimè recipiantur, aquæ crassiores licet ob lubricitatem suam promptissimè separentur, oleosæ verò & pingues ramositatibus suis multò firmitus hæreant &c.

CAP. VIII.

De

Exasperationibus & Lævigationibus, Attenuationibus, Inspissationibus & Coagulationibus.

I. *Utrum in naturalibus æquè ac in artificialibus exasperationum & expolitionum exempla reperiuntur?*

Nullum est dubium : nam ut ars limando, terendo &c. asperiora polire solet & polita exasperare, iisdem organis adhibitis; quorum si major est asperitas quàm rerum, quibus applicantur, iis asperitatem & sulcos inducunt, si minor, earum prominentias crassiores obtundunt & explanant : Sic Natura quoque fluida premendo polire, agitando exasperare, solida verò subtilioribus quibusdam & insensibilibus quasi spiculis & apicibus polita corpora rodit, sulcat, exedit & exasperat.

II. *Velim hæc exemplis quibusdam amplius declares.*

In artificialibus exempli loco esse potest vitrorum præprimis expolitio, quæ fit arenâ primùm crassiore, deinde gradatim tenuioribus, tandemque smergite ac tripolis pulvere

vere seu farina , denique calcinato stanno, quæ omnia solâ sua asperitate gradatim minore , vitri adhuc majorem asperitatem sibi adæquant: In naturalibus agitatio fluidorum politas superficies exasperat, quies complanat, quatenus harum solutæ particulæ , ubi quiescunt , ab aëris pondere æquabiliter depri-muntur & in specularem planitiem coordi-nantur , aut contrâ per agitationem vento-rum unæ super alias facilè attolluntur & cri-spantur , cujus crispationis elegans exemplum nobis exhibet superficies aquæ polita intra ca-licem vitreum contentæ , dum digitus pau-lum madefactus suprâ calicis marginem pau-lò pressius circumducitur. Solidorum autem occultiores exasperationes Natura offert , in ærugine cupri, orichalci , & rubigine ferri, ab aëris erosione dependentibus , in vitris, quæ sale nimio abundant , aut sale frequen-tius expurgantur , utroque casu à particulis salinis intus admixtis vel exterius adhærenti-bus arrosa: In æneis laminis artis chalcogra-phicæ , quâ opè aquæ fortis lineamenta æri vernice obducto, aut recentius nunc vitro ipsi, inscripta , exeduntur &c.

III. *Quod si corporum politura ab asperitate polientium dependet, nullum forte corpus exactissimè politum esse poterit?*

Sic est sanè , & sic testatur experientia : nam politissima etiam corpora , ut specula vitrea & metallica , novacularum acies , acicularum mucrones , &c. per microscopia inspecta , fulcis ubique plena spectantur , quos pulverum polientium minutissima granula , aut limarum denticuli subtilissimi , eis induxerunt : in chartis autem complanatissimis colliculi quasi & valles , in texturis sericeis , (Tasset oder Atlas) funiculorum quasi reticulatim sibi intextorum colligationes distinctè , nec sine jucunditate , spectantur.

IV. *Quo pacto porrò tenuiorum ac liquidiorum inspissatio contingit?*

Non uno modo ista peragitur ; & communissimè quidem manifestâ crassiorum admixtione ; prout e. g. lac tenue vel albumen ovi , inspersâ farinâ sensim in pulvem crassiorem convertitur , aut aqua insperso sale incrasatur : quò non incongruè referetur illa aëris sublimioris inspissatio , quam ope spongiarum aceto plenarum naribusq; admotarum , procurârunt Hispani , Acostâ teste , ad aërem in summis Andium jugis respirabilem efficiendum.

V. *Quis*

V. *Quis alius porro est inspissationis vulgatioꝝ modus?*

Is qui Caloris auxilio obtinetur, in sirupis & electuariis, imò in jusculis etiam & pulmentis observare est, quæ tantò magis inspissantur, quantò coquuntur diutius: id quod coqui & mulierculæ das *Einsieden* oder *Einfochen* appellant; existimantes sc. cum liquidi copiam ad minus spatium reductam vident, residuas partes intra totam massam coactas & condensatas fuisse, eoq; pacto id spissius effecisse; cum potius tenuiores & fluidiores partes, vi caloris expositæ, residuam massam crassioꝝ remanquant, eo modo quo argilla valde mollis & aquosa evaporando indies magis inspissatur ac tandem exiccando penitus in lapidem concrevit.

VI. *Fortassis & animalium carnes, & plantarum pulpæ simili modo ex liquido quodam succo sensim inspissantur.*

Non carnes solum & pulpæ lignosæ, sed cartilagines etiam & viscera omnia, imò ipsa ossa, in animalibus, in plantis medulla, cortices &c. (utpote quæ sub initium omnia fluidiora, molliora & succulentiora existunt, ex fluido quippe succo sensim coagulato nata

omnia) vi caloris, aut intrinseci per totum corporis perpetuò circumflui, aut extrinseci, præsertim solaris, paulatim inspissantur: quemadmodum certè serum sanguinis, aquam pericardii, succum pancreaticum, lympham aliosque humores animalium (exceptis urinâ, sudore, lachrymis & saliva) à calore modico non aliter ac albumen ovi inspissari & in gelatinam converti videmus.

VII. *Numquid alia quoq; rariora
suppetunt exempla hujusmodi inspissatio-
num?*

Suppetunt utiq; & (1) quidem succorum quorundam ex insectorum quorundam corporibus quasi exsputorum & in filamina tenuia longissima ab istis animalculis; bombycibus nominatim, erucis, & araneis tractorum, vel in membranas tenues vesparum nidos componentes, foliatim quasi explicatorum: (2) Succorum aliorum ex arborum quarundam corticibus, præsertim studio vulneratis, qualia sunt balsamus, myrrha, terebinthina, similiaq; gummata & resinæ, intra plantas fluentia, extus autem coagulata; quibus etiam Manna è quibusdam arboribus prope Romam & in Calabria exstillans accensenda erit: (3) Credibiliter etiam succini & ambræ similiumque
con-

concretorum, imò gemmarum quoque & lapidum in universum, quos ab origine succorum formam habuisse, animalcula & alia intra quorundam meditullium quasi sepulta satis persuadent.

VIII. *Hoc pacto verò & Frigus suas partes habebit in coagulationibus & inspissationibus?*

Sic est omnino. Nam uti calor ex aquosis corporibus humorem evaporando, sic frigus ipsum calorem è succis animalium & plantarum calidis expellendo (ut cum vulgo hîc loquar) eos condensat & coagulat: prout sanè oleosa pleraq; per hybernos dies incrassantur, & sanguis extravasatus in aëre frigidiusculo coagulatur, imò halitus ore emissus aut ex animalium incalescentium corporibus assurgens, alioquin ob tenuitatem suam invisibilis, in aëre hyberno spissus evadit ac instar nebulae conspicuus; sicut ipsa nebula nihil aliud quàm vapor in aëre frigidiorè inspissatus.

IX. *Anne præter calorem & frigus aliæ quoq; inspissationis evidentes causæ supersunt?*

Sunt acidi cumprimis liquores, qui in venas animalium immediatè intromissi sangui-

nem ita concrefcere faciunt & coagulari (hæc enim ab acidis infufis oriunda concretio fpeciatim *Coagulationis* nomen meruit) ut aperiri poffint venæ maximæ , unde tamen ne gutta quidem fanguinis effluat ; & fi liquor acidus ad cor pervenerit , animal fubitaneâ morte perit : id quod de vitrioli fpiritu canis alicujus venis infuso primus fortè docuit Societatem Regiam Illuftris Boyleus. Ratio autem hujus effectûs effe videtur , quòd falinæ vitrioli particulæ aut subtiliores fanguinis particulas , quæ fluoris caufa funt , impedian , aut implicitæ fibrofis has graviores reddant & ad motum ineptiores.

X. *Oppofita verò inſpiſſationi attenuatio quasnam caufas agnoſcit ?*

Primò calorem iterum , dum e.g. concreta oleoſa caloris ope in priſtinam fuam fluidam tenuitatem facilè reſtituuntur , & operationibus chemicis ſexcentis compoſita craſſiora in partes tenuiores reſolvuntur , flammarum item violentiâ ſebum , cera , oleum , pix & ſimilia , in fuliginis , fumi , ignis ſubſtantiam attenuantur : igniculis ſc. copioſis admixtis , qui virtute ſuâ cohærentes coagulatorum particulas iterum ſolvunt , & ſic corpus ipſum fluidius ac tenuius reddunt.

XI. *Non-*

XI. *Nonne filtrando quoq; seu percolando crassiora quædam attenuantur?*

Ommino, idque chemicorum & pharmacopolarum officinæ, imò culinæ nostræ, satis testantur; quibus non pauca exempla Natura quoque, e. g. in percolationibus aquarum pluvialium per terras arenosas, in sequestrandis è sanguinis spissiore fluore, sero, bile, lymphæ, spiritibus &c. suppeditat. Ut alium attenuandi modum obiter adjiciam, qui fit tenuiorum affusione vel admixtione; dum e. g. coquæ nostræ jusculis & pulmentis justo spissioribus, affuso lacte vel aqua &c. tenuitatis amissæ gradum aliquem restituunt; cujus ratio per se patet.

XII. *Quid speciatim de Medicamentis sanguinem viscidiorē incidentibus, fundentibus & attenuantibus, & contra nimis fluxum inspissantibus, habendum est?*

Priora suâ acrimoniâ & portionum subtilitate visciditatem ac tenacitatem nimiam perrumpunt ac incidunt: Posteriora particulas salinas cum fibrosis sanguineis concreescere faciunt; ut graviores factæ & ad motum ineptiores, præcipitatione quadam descendant, sibiq; invicem adhærentes in grumos coëant &c.

CAP. IX.

De

Sonorum variis mutationibus.

I. *Numquid etiam Sonis mutationis quiddam accidere potest?*

Nullum est dubium, & quidem innumeris modis hæc etiam qualitas variare solet, quos tamen ad tria genera revocare commodè licet, quæ sunt (1) *Soni Remissio* aut debilitatio, qualem submissè loquentium vox, claræ & elatæ voci succedens, satis declarat: (2) *Soni Intensio* vel augmentatio, cujus specimen clamor & vociferatio post loquelam moderatam exhibet: (3) *Soni distincta Multiplicatio*, quam in Echûs mirabili ratione cumprimis observamus.

II. *Velim remissi soni exempla quædam specialia in medium afferas.*

Peristromatis aut tapetibus tecti parietes perorantis vocem obtundunt: Concionatores in festis celebrioribus, & adolescentes coram frequentiore auditorio perorantes multò submissiùs loqui creduntur, quàm aliàs in eodem loco, sed vacuo magis, loqui videbantur, loquique adeò contentiore voce coguntur, si fa-
tis

tis audiri ab omnibus cupiunt: Sic in areis nive stratis, similive materiâ tectis, loquentium vox multò debilior percipitur, quàm cum illæ lapide suo ordinario teguntur & molliore tegmine denudatæ sunt. Nimirum radii sonori sphæricè dispersi & in corpora vicina mollia & parum elastica, inæquabilia item & asperiora incidentes aut debilius reflectuntur, veluti pila è stramentis aut pariete argillaceo nondum exsiccato, aut ob inæquabilem partium & objectorum plurium positum nimis dissipantur vel magnam partem absorbentur; paucis adeò reflexionibus cum radio directo sese conjungentibus.

III. *Dantur ne alia plura soni clarè distincteq; percipiendi impedimenta?*

Dantur utiq; , cadentes e. g. per aërem nives & pluvix, venti adversi sono ad aurem transmigranti, lucis item diurnæ præsentia; qua absente nocturno tempore idem sonus per aliquot passuum millia sæpe percipitur, quem de die vix toties centenorum passuum intercapedo ad aures deferret: quod ab his obstaculis & primarius sonus & reflexiones cum ipso conjungendæ impediuntur & interceptantur, ipsæque cadentes pluvix aut grandines, imò luminis ipsius motus, aëris & solidorum

rum quoque partes commovent, strepitumq; adeò majorem vel minorem, aut non planè nullum, excitant, qui aurem occupans aliorum corporum sonos reddit minus perceptibiles.

IV. *Cur verò ipse quorundam corporum contactus eorum sonos obtundit?*

Fit hoc utiq; in resonantioribus, quorum soni à totius corporis universali tremore multum adjuvantur; quem tremorem cum ejusmodi contactus liget magnam partem & cohibeat, sonum imminui necessum est. Ita pauca nix inter ningendum in Campanarum externam superficiem illapsa, sonum ejus admodum retundit; & si campana, vel calix vitreus, aut aliud sonorum corpus, supra mensam vel terram collocata, aut manu prehensa, pulsantur, obtusior multò eorum clangor percipitur, quàm si liberè in aëre pendula eundem pulsus recipiant; & sudariolo v.g. supra pectus ligata chelys multò submissiùs, quàm aliàs, sonare solet: dum contra tibia perinde sonet, siue forinsecus manu contrectetur aut funiculis obvolvatur, siue libera magis inflectur; quod illum sonum non totius corporis, sed internarum solùm particularum, levi flatu commotarum, tremor & vibratio producat.

V. *Enarratis potioribus remissioris aut debilitati soni causis, audi etiam ac intensi causæ dantur procul dubio?*

Dantur sanè, eæque plurimæ ac multum diversæ, inter quas *Angustia loci & Figura* primum locum tenent. Nam si quis capite intra arcam inserto loquatur, aut intra puteum vel cisternam aut specum quandam vocem edat, multò fortiozem illam percipit; eoq; spectat experimentum speciale, quo, ex relatione Panthoti Medici Galli, Urinator aliquis, cornu venatorium intra campanam urinariam secum deportatum inflans, adeò obstupefactus fuit, ut vertigine correptus præceps ferme daretur. Figuram verò valdè intendere sonos, aulæ fornicatæ, cellæ, dolia, cupæ, instrumentorum cavitates &c. satis loquuntur; Scilicet sonus per mille vias aliàs dispergendus in ejusmodi angustis, maximè fornicatis & rotundo-cavis, ad aurem, tanquam centrum, undiquaque & ex magna vicinia reflectitur & multiplicatur; cumque aliàs venatorii cornu sonus simplex ac directus vicinam aurem vehementissimè percellat, reflexiones ejus innumerabiles unitis viribus effectum enarratum præstare faciliè potuerunt.

VI. *Alia*

VI. *Alia quoque & plura aucti Soni exempla enarres velim.*

In aperto licet aëre, in vicinia tamen ædium, murorum, sylvarum & montium, valdè augetur sonus, ita quidem, ut non solum intensior, sed etiam diuturnior multò audiatur. Sic tympanum nunc prope urbis mœnia pulsatum, nunc remotius ab istis, docet: ita latratus unius canis prope saltum officinæ lateritiæ vicinum plurium venaticorum canum unitam vocem olim nobis repræsentavit: Sic explosi propius sylvam sclopeti fragor, auribus ab eadem sylva non ita procul remotis, ingens ac diu continuatus percipitur; & speciatim exigui sclopi sonitum adinstar horrendorum tonitruum, per $\frac{1}{2}$ horæ quadrantem ferè continuatorum, percepit in montium Carpathiorum convallibus *David Frölichius* Math. Hungarus, ut ipse testatur in Viatorio suo verbis à Varenio quoque in Geogr. Gen. p. 366. allegatis; quibus similia *G. Schottus* in Mag. Phonicampt. p. 133. de Tormentis ex arce Herbi-polensi explosis narrat.

VII. *Quanam verò ratio est non aucti solum in his casibus, sed diu quoque continuati soni?*

Augmenti ratio eadem est, quæ in Quæst. V. solu-

soluzione data fuit, reflexionum sc. ex circumstantibus vel adjacentibus, tamen non æque prope, corporibus multitudo. Diuturnitatis autem causa ex diversa corporum circumstantium distantia petenda est. In sylvis enim & convallibus arbores & montes, alii magis, alii minus distant, sonusque à propioribus reflexus citius ad aurem pervenit, à remotioribus serius, à remotissimis magno post demum intervallo: sed cum hæc intervalla arborum & collium montiumque gradatim propiora vel remotiora sunt, ut remotiorum reflexiones succedant, antequam illæ propiorum extinguantur, fit ut hæc inter se confusæ unum quasi continuum sonum auribus exhibeant.

VIII. *Annon etiam canalibus longis incluse voces aliq. Soni per longissima intervalla audiuntur?*

Sic est omnino, ejusque rei multa habemus experimenta, e. g. aquæductuum Romanorum, intra quos, arcuatos & satis polito tectorio incrustatos, loquentium voces ex intervallo quingentorum pedum, tanquam præsentem audiri poterant: canalium semicylindricorum, in portis templorum antiquis Gothico more constructorum, in quorum cavitate si quis submisit prorsus verba quædam pro-

pronunciet, oppositæ parti admota auris illa distinctissimè percipit, intermedio loco constitutis nihil penitus audientibus aut intelligentibus; quod idem etiam in fornicibus semicylindricis nulla cavitate instructis fieri solet: trabium item longissimarum, sive humi jacentium sive (quod melius,) fulcris impositarum; quarum unâ extremitate digito levissimè percussâ, auris alteri extremitati admota ictum, aliis intermediis imperceptibilem, distinctè percipit, experimento in vulgus satis noto. Scilicet Sonus à canalibus integris aut trabium poris conclusus, aut semicylindricis cavitatibus, vel solâ fornicum curvitate cohibitus, quò minus dispergi queat, collectis viribus in aurem oppositam ruit, cujus adeò vix pars centesima per aërem liberum ad eandem perveniret.

IX. Quid verò de Tubis & cornibus veredariorum, & speciatim de Tuba acustica locutoria, deq. Sonis ipsorum intensissimis, sentiendam est?

Horum omnium communis videtur eademque ratio, nisi quod tubarum bellicarum & cornuum veredariis usitatorum figura & usus in vulgus notior est, & oris flatu eorum sonus procuratur; cum in Tubam Locutoriam,
sive

sive Stentoream, istis multis modis majorem, vox ipsa hominis immittatur, mirando effectu, ita ut per milliare germ. tantum non integrum, nocturno præsertim tempore, exaudiri non solum sed distinctè intelligi queat; prout sc. robustior aliquis homo elatâ voce per eam clamitaverit. Primus ad hunc loquendi usum tubam adhibuit Eques Anglus nomine *Morlandus*, majore gradatim formâ, quam deinceps multum variarunt artifices, nunc in rectitudinem exporrectam, nunc variè inflexam, universim circa os loquentis angustam, deinceps versus finem in amplissimum orificium exporrectam. Causa soni & vocis auctioris, in hac æquè ac in cæteris, est multiplex & gradatim auctior soni reflexio, quæ per magnam illam longitudinem pluresque flexuras, innumeris repetita vicibus, & cum præcedentibus nullo fere temporis intervallo conjuncta, stupendos illos sonitus & clangores producit.

X. Annon Acustica quoq. appellari solet illa Tuba locutoria?

Ita est, & quidem ob alium usum, quem auditui juvando præstat. Quamvis enim & prior ille usus auditum longius remotum juvet, immensum adauctis vociferantium vocibus;

bus ; tamen inverso modo submissè loquentium voces quoque multò distinctius clariusq; audire facit, si patulum ejus orificium loquentibus submissè in vicinia, vel altius è longinquo acclamantibus obvertatur, auris autem angustiori ejus aperturæ admoveatur. Quod beneficium surdastris præsertim subvenire quibusdam in casibus possit : Nec dubium est à cornibus inflexis, utpote tractabilioribus, aut à quovis infundibulo auribus eodè modo accommodato, si non pari efficacîâ, saltem majori commoditate id beneficii expectari posse.

XI. Nullumne datur aliud subsidium, quod surdastris commodare queat ?

Multi putant, in os loquendo surdis ac surdastris vocem reddi posse perceptibilem; idq; ratione quadam ducti potiùs, quàm certo experimento, statuere videntur, quòd sc. patulus ex ore ad auris cavum penetret meatus, quem aquæductum vocant Anatomici. Alii surdos aut surdaistros audire tradunt, si quis ipsis suprà caput aut cerebrum loquatur, occasione l. 10. Cod. de iis qui testamenta facere possint vel non ; idque fieri putant mediante cranii offe & meninge dura cranium intus succingente &c. Nos hæc suis Autoribus relin-

quen-

quentes , duo experimenta indubia huc facientia adnotabimus: (1) quod chelys aut simile instrumentum, dentibus alicubi mordicus apprehensum & mox plectro perstrictum, sonum multis modis auctiorem auribus mordentis offerat: (2) quod, funiculo sat longo per focariam forcipem supernè trajecto, digitisque primoribus utriusque manûs circumvoluto, si digiti deinceps utramq; forcipem tenentis aurem obturent, & forceps interim ex funiculo pendula alterutro suo crure ad parietem aut aliud corpus durum allidatur, sonum (quem circumstantes mediocrem tantum percipiunt) is qui aures obturatas habet ingentem exaudiat instar grandioris cujusdam campanæ.

XII. *Quam causam verò utriusque hujus Phenomeni optimam assignabimus?*

Quod chelys dentibus prehensa, aut lamina sonora funiculo digitisque mediantibus auri proximè admota, sonum edant egregiè intensum, ex eo est procul dubio, quod ipsa auris internæ prorsus ossea concameratio, ibi mediantibus maxillis contiguisq; ossibus cæteris, hîc per funiculi digitorumque tremefactas, & ab his porro concussas auris externæ contiguas, particulas aëreis particulis multò

solidiores , multò quoque fortiùs , quàm aliàs
aëre nudo mediante, contremefiat.

*XIII. Sed quid de Echo , mirabili
illa sonorum quasi imitatrice ac redditrice,
censendum est ?*

Hoc est generaliter supponendum, sonos
non aliter ac lumen aut pilam aliquam in pa-
rietem aut obstaculum aliquod illapfos inde
reflecti , & si reflexus ille sonus ad aurem per-
veniat tum demum , cùm directus in eadem
aure receptrus jam evanuit , ita ut distinctè à
directo, & notabili post illum intervallo, per-
cipiatur , tunc Echo appellari solet.

*XIV. Cur verò talis Sonorum re-
flexio non ubiq; contingit ?*

Fit equidem reflexio sonorum quorum-
cunq; semper & ubique, ex terra aliisque cir-
cumstantibus objectis ; sed cùm soni motus sit
valdè velox, si objecta illa reflectentia sunt justò
viciniora, reflexio illa tam celeriter ad aurem
redit , ut cum directo sono , in auribus adhuc
resonante , coincidat & sic directus & refle-
xus unà confusè percipiantur : Id quod sonum
quidem auget juxta Quæst. superiorem V.
Echum tamen distinctam haut gignit, sed con-
fusum quendam & adauctum reflexionis con-
cur-

currentis cum directo sono strepitum. Itaq; notabilem objecti reflectentis distantiam postulat echo, quæ efficiat ut soni directi efficacia in aure nostra interim evanescat, dum is ad objectum illud pertingat, indeque eadem viâ ad aurem reflectatur. Hinc experientia testatur, ea ipsa loca, quæ vocem ex intervallo sufficiente distinctam reddunt, quò propius accesseris, eò magis celeriusque reflexiones cum directa voce conjungere, tandemque ubi proximè iis adstiteris, utrasq; penitus confundere echumque nullam ampliùs exhibere.

XV. Hæc equidem ita habent, uti dictum est, sed tamen non è quovis obstaculo, licet sufficienter distante, Echo auditur.

Verissimum hoc est, indeque satis evidenter patet, intercapedinem objecti notabiliorum nondum sufficere ad echum gignendam, imò sæpiùs hanc ipsam, si justò major sit, echum intercipere: observavimus enim ex eadem moeniorum parte, quæ intervallo ducentorum aut trecentorum passuum vocem emissam pulchrè iteraverat, intercapedine octingentorum & ampliùs, echum nullam ampliùs auditam esse. Nimirum requiritur porrò, ut reflexio illa non solùm è longinquo, adeoque post vocem directam in aure jam extinctam,

sed etiam ut fortis & unita satis, & à circumstantibus obstaculum aliis corporibus multum aucta, redeat : Unde experti sumus ex eadem illa octingentorum passuum distantia, cum vox ore simpliciter emissa non rediret (quia nimirum inter eundem tam longè multum debilitata erat, ut reflexiones vocis debilis ab obstaculo ac circumstantibus in tantum augeri non posset, quò sufficeret auribus ex tanta retrò distantia efficaciter movendis) illam statim rediisse & echum formasse, cum per tubam stentoream multò auctior egressa fuisset.

XVI. Cur ergo nihilominus quædam loca satis distantia vocem fortem licet & per tubam locutoriam emissam non remittunt, nec echum procurant?

Id in causa est, quòd fortiter emissa vox non æquè fortis ab obstaculo ad aurem redeat, sed pro hujus conditione & positu istam dispergat, nec unita satis (quod in quæst. præced. requisivimus) ad aurem redeat. Scilicet ea obstaculi conditio requiritur, ut soliditas aliqua & qualiscunque lævitas, quædam quasi concameratio & superficierum plurium oppositio, verbo talis corporum vicinorum ac circumstantium dispositio adsit, quâ reflexiones concurrentes non multæ solùm, sed collectæ & ver-

& versus aurem loquentis aut vociferantis præcipuè directæ, augmentum & robur sufficiens acquirant ad aurem remotam efficaciter movendam.

XVII. Sed quæ causa est ejus diversitatis, quâ echo quædam monosyllaba tantum est, & ex pluribus emissis vocibus aut syllabis non nisi ultimam reddit, alia verò polysyllaba, quæ plures voces & syllabas distinctè repetit?

Nulla alia hîc causa est, quàm intervallo-
rum differentia: nam voces aut syllabæ plures
è vicinia in objectum resonans emissæ rede-
unt quidem omnes ad aurem vociferantis, sed
nimis celeriter, ita ut syllabæ vocis pen- &
antepenultimæ cum reflexis, non in via (ceu
cum Scholis nonnulli putârunt) sed in aure
utrasq; excipiente confundantur, solâ ultimâ
vix adhuc distinctè satis, post reliquas confu-
sas interim evanidas, perceptâ; dum interim
ex intervallo majore emissæ plures voces ac
syllabæ tantum temporis eundo ac redeundo
insumunt, ut interim directæ earum perce-
ptiones totæ evanescant, & reflexis paulò post
eodém ordine redeuntibus, vocivas aures ex-
hibeant. Sic Echo Altdorfina è regione ob-
servatorii antiquioris in distantia 150 circiter

passuum reddebat 3 distinctas syllabas vocis *Omnia*, in minore notabiliter non nisi duas, adhuc breviorē unicam, paucis à muro passibus ne unam quidem: Intervallo 300 passuum sex aut septem syllabæ [*Echo responde mihi*] ex ulteriore 430 passuum quatuor integras voces novem syllabarum [*Echo responde mihi citò*] ad passum ferè 500um, undecim syllabas [*Echo responde mihi citissimè*] distinctè iterabat & ordine suo.

XVIII. *Cur verò quædam echo monophona est, h. e. easdem voces semel tandem reddit, alia polyphona, quæ easdem voces bis, ter & pluries repetit?*

Hujus rei ratio tota in obstaculorum fortiter satis vocem reflectentium paucitate aut pluralitate, & intervallis singulorum tum in se satis notabilibus omnibus, tum verò inter se quoque notabiliter differentibus, est posita: ex quo fit, ut vox eadem, temporum intervallis satis distinctis, ad aures successivè ex diversis locis allata, & pluries audiatur, & notabili quoque roboris & fortitudinis differentiâ resonet: prout nimirum obstaculorum reflectentium, & vicinorum aliorum corporum habitudo, exceptam graduq; diversam vocem variè reformaverit.

XIX. *At*

XIX. *At enimverò , ex uno quoq;
eodemq; obstaculo ebum multiplicem audiri,
sepiùs inaudivi?*

Sic est sanè , & inter multa alia exempla, celeberrima illa Echo villæ Simonettæ , uno circiter milliari Mediolano distantis , quam Casp. Schottus Mag. Phonocamptica p. 122. & seqq. fusè describit , id abundè testatur: Ubi vox è fenestra unica mediaque parietis in con-
tignatione superiore 26 passûs vel ulnas Me-
diolanenses longi & 16 alti , de cætero verò plane æquabilis omnique scabritie carentis, in oppositum parietem , priori isti parallelum passibusq; 33 inde distantem , emissa ad fene-
stram dictam , atque adeò ad aures loquentis aut vociferantis (nec enim alio loco ita reso-
nat) quater & vigesies, imò nonnunquam tri-
gesies redditur & reciprocatur. Scilicet e-
missa vox è dicta fenestra , in oppositum qui-
dem unicum parietem , sed illius diversas par-
tes ac diversimodè remotas , illapsa , inde non
solum ad aurem loquentis immediate, celerius
tamen tardiusve referri potest , sed mediate
quoq; ex ejusdem oppositi parietis partibus &
porticibus , in primi parietis partes , porticus
& anfractus , indeq; rursus ad obstacula diversa
parietis oppositi , & hinc demum ad aurem

loquentis alteris, ac tempore quidem notabiliter distinctis, vicibus recurrere, idemq; secundâ tertiaque vice ultrò citroque currentibus reflexionibus, si vox prima fuerit clamorior, præstare; eodem modo sc. quo lumen inter duo plurave specula plana positum speciem suam in infinitum fere reciprocatis reflexionibus multiplicat & ad eundem oculum desuper inspectantis remittit.

XX. Cur verò e densis sylvis echo quidem polyphona, sed indistincta & quasi continens ad aurem redit?

Ideò hoc fit, quod totidem fere obstacula, quot sunt arbores, vocem successivè quidem, sed, propter harum viciniam, celeri nimis successione, reddant, ut primum ex propioribus, deinceps successive ex remotioribus, arboribus resonet, verùm adeò celeriter, ut vocem potius continuam, quàm distinctè percipiendas plures, repræsentet.

C A P. X.

De

Mutationibus Lucis & Luminis
& in specie hujus reflexionibus
& refractionibus.

I. Qua-

I. *Quanam est notabilissima lucis
luminisq; mutatio?*

UNO verbo ejus obscuratio : qualis in ipso Sole , lucis fonte, ut olim credebatur, purissimo , à Christoph. Scheinero primùm Ingolstadii anno 1611 , deinde à Galilæo multisque aliis , animadversa fuit , maculis nempe nigris & obscuris, nunc pluribus nunc paucioribus , aliquando quinquaginta pluribus obscurari viso ; qualisque in fixis quibusdam stellis, nominatim in *stella mira* inde dicta , quæ in collo Ceti statis temporibus paulatim decre-scere tandemque penitus extinguï , ex intervallo verò rursus conspici eodem loco cum successivis incrementis, usq; ad pristinam magnitudinem, hodiernum observari solet ; ut taceam luminis in superficie Terræ nostræ quotidianas vicissitudines , Lunæ item ac Circumjovialium defectus sive eclipses, ejusdem Lunæ , Veneris & Mercurii phases sive luminis incrementa ac decrementa : quæ omnia in speciali physica pluribus enarranda & ad causas suas reducenda erunt.

II. *Ecquæ porrò lucis luminisve varietas notatu digna occurrit?*

Utriusque vel *Intensio* vel *Remissio*. Crepuscula namq; matutina successivis incrementis,

tis, & vespertina successivis decrementis, quotidie conspicienda se præbent: Faces ardentes, quò plures, eò & longius vim lucendi suam exporrigunt, & in eodem loco tantò majorem exhibent: Luna plena fortiùs illuminat aërem nostrum quàm dimidia aut falcata: Latè serpens incendium diem quasi media nocte reducit; inprimis autem collecti per specula concava aut lentes vitreas vel Solis vel lucidi alterius radii, uti caloris, ita luminis & alboris augmenta insignia procurant. Quorum omnium ratio ex illo vulgari, *Vis unita fortior*, evidentissima est: Nam in crepusculis matutinis paucissimi primùm Solis radii aëris nostri parvulam portionem attingunt, deinceps continuò plures amplius ejus spatium illuminant, quod adeo majorem vim luminis ad oculos nostros reflectit; in vespertinis contrà: Sic plena lunæ facies uti plures à Sole radios excipit, quàm dichotoma, sic pluribus etiam aërem nostrum, & sic sensibiliùs illuminat: In speculis cavis & lentibus convexis innumerabilium radiorum ad idem punctum aut reflectendo aut refringendo determinatorum unio, indeque vis auctior, ad oculum patet.


III. *Hæc ipsa luminis reflexio & refractione, in quo consistat, explicari mihi distinctius velim.*

Luminis reflexio eodem modo fieri observatur, quo pilæ in objectum parietem planum & æquabilem obliquius projectæ repercussio; ita sc. ut angulus incidentiæ sit angulo reflexionis sensibilibiter æqualis: Refractio verò ita fit, ut radius ex aëre in vitrum aut aquam transmissus sub inclinatione viginti & pauciorum graduum, versus perpendiculum refringatur parte tertiâ circiter anguli inclinationis; econtrâ ex aqua aut vitro retrò egressus à perpendiculo digrediatur, parte dimidiâ anguli inclinationis.

IV. *Utramq; hanc luminis variationem distinctius mihi, per schematismum aliquem, explices velim.*

Ut quàm distinctissimè id præstem hoc ante omnia monendum est: Radios lucis non esse lineas merè-mathematicas, sed corpulentiam aliquam habere, neque rectius concipi posse, quàm si, cum Cartesio, tanquam series globulorum contiguæ considerentur, & pressione vel nisu potius rectilineo dicantur agere. Sic enim (1) si talis nifus recti-

lineus



lineus radii aut
seriei EF per-
pendiculariter
fiat in subje-
ctum planum
positum IK,
globulus ulti-
mus, nec in
dextram nec in
sinistram (cur
enim in unam
magis quàm in
alteram?) ro-
tans, impedi-
tum à solido
plano nifum
retrò versus E
necessariò con-

tinuabit: Quod si verò (2) series globulorum
AB obliquè illabatur, globulum B parte sui
sinistrâ in subjectam planitiem solidam ac du-
ram depressum unà rotabit in dextram, ut is
jam situm G obtinens, & parte sui dextrâ
impingens, dextrorsum etiam versus H ni-
fum suum eadem inclinatione continuabit,
quâ priùs impegerat.

V. Sed

V. *Sed hoc pacto reflexio non continget ex eodem puncto, in quo facta fuerat incidentia?*

Ita quidem rem habere imaginatio evidenter deprehendit, sensui verò id est imperceptibile: nam globulorum æthereorum aut punctulorum luminis ea est subtilitas, ut hæc distantia globulorum B & G evadat insensibilis.

VI. *Numquid refractione eadem facilitate per hanc hypothesin declarari potest?*


Ita planè sentio. Cum enim obliquè incidit series æthereorum globulorum AB in aquam v. g. per quam difficilius movetur quàm per aërem, propter majorem crassitiem globulus B, sui parte sinistrâ superficiem aquæ attingens, ob hujus aliquam resistantiam, rotabitur dextrorsum, ac inter rotandum insimul illam superficiem perrumpens in globulum C (detorto jam paulisper introrsum nisu) secundum lineam CD pressionem suam continuabit, tantò magis ad perpendicularum EF, quantò major est subjecti corporis resistantia.

VII. *Sed cur Lumen in Luna, ☿ & ♀ faciebus ita successivè crescit & decrescit?*

Causa est horum Corporum rotunditas, & lumi-

luminis à Sole mutuò accipiendi ratio. Quia enim lumen suum à Sole mutantur, globus autem ultra dimidium sui vix sensibiliter illustratur, insuper autem hi globi partim circa Solem, partim sub Sole interea sensibiliter quiescente, moti, non eam semper partem, quam Sol illuminat, oculo præcisè exhibet, sed ejus partem tantum gradatim vel majorem vel minorem, aliquando verò eam ipsam totam, ideò facies illorum nobis obversa lumine crescere ac decrescere videtur.

VIII. *Potestne hæc res aliquo schematismo paulò clariùs distinctiusq; exponi?*




Omnino potest. Nam (1) cum Luna sub Sole (Fig. IV.) menstruo spatio per circulum ABCD &c. ita moveatur, ut pars ejus dimidia intra circulum cadens terræ semper eadem obversetur; fit e. g. in A, h. e. in conjunctione cum Sole sive in Novilunio, ut hæc pars dimidiæ terræ obver-

obversa prorsus obscura sit, averſa verò tota à Sole illuminata: progreſſâ verò Luna ab A ad B, particula hemiſphærii à Sole illuminati cadit intra circulum ſive in partem Lunæ nobis obverſam & conſpicuam, eaque particula illuminati hemiſphærii prima Falx ſive Luna falcata appellatur: In C conſequenter dimidia

pars hemiſphærii nobis obverſi, in D pluſquam dimidium, in E denique tota facies nobis conſpici lumine plena cernitur, deinceps in *d, c, b*, magis magiſq; iterum decremента ſua ordine habitura Cùm verò (2) ♀ & (Fig. V.) ♂ circa ſolem trimeſtri vel oſtimeſtri ſpatio moveantur, hemiſphærio ſui illu-

Fig. 5.



illuminato versus Solem semper converso; nos extra illum circulum in T constitutos, eandem illam partem illuminatam semper videre impossibile est, sed in G ferè totam & plena facie fulgentem intuemur, in H dimidiam ferè tantum illuminati hemisphærii portionem, in I dimidio minorem, in K planè nullam; deinceps in *z*, *h*, *g*, sua rursùm incrementa ordine retrogrado habituram.

IX. Cur deniq; lucida Solis facies nonnunquam obscuris quibusdam maculis obfuscatur?

Hoc equidem in parte Phys. speciali plenius intelligetur; hîc autem anticipando hoc notâsse sufficiet: Possè Solis ex solida quadam & ignis fluida substantia constantem, aut partibus suis quibusdam exuri & lumine aliquantisper deficere, aut (si merè-flammeus supponatur) fumorum & fuliginum densis obtegi nubibus, quæ parte à Sole aversâ lumine omni destituantur, & sic obscuras in ipsius facie maculas repræsentent; donec vel exustæ partes, novum interum pabulum nactæ deuoò ardere incipiant, vel atræ istæ nubes absumantur ab igne ac dispellantur.

CAP. XI.

De

Mutationibus Colorum, Opacitatis
& Pelluciditatis.I. *Quenam est communissima
colorum mutatio?*

Illa, quæ lentè fit ac temporis progressu, ut
cùm arborum verna viriditas à copioso
succo dependens, æstate sensim expallescit pro-
pter eundem succum ab augescente Solis calo-
re magis depastum ac deficientem: Cùm lin-
teamina per vices humectata rursumque in
aprico Sole exiccata, candescunt; quia sc. for-
des & impuritates lini, quibus aqueæ parti-
culæ sese circumvolvunt, ab his à calore Solis
expulsis unà sensim auferuntur, & residuam
filamentorum texturam nitidiorem indies re-
linquunt: cùm ipsa nostra corpora, vegetâ &
juvenili ætate ex ebulliente magis sanguine
rubentia, in senectute propter caloris in san-
guine defectum magis expallescent.

II. *Numquid & subitaneæ muta-
tionis in coloribus exempla in promptu sunt?*

Sunt utique, & bene multa. Nam e. g.
sulphuris accensi fumus & suffitus rosarum

P

pur-

purpuram subito dealbat ; aqua fortis ovorum in ligni Brasiliensis aliarumque rerum infusionibus decoctorum gratum vel ruborem vel virorem repente tollit ; liquor balsamicus, qui serpentes, lacertas, salamandros, aliaque animalcula sibi immersa cum omnibus suis coloribus immutata servat, florum injectorum colores in momento fere dissolvit ac perdit &c. quia nimirum sulphuris accensi vis penetrantissima (vel odoratu satis perceptibilis) tenuem & facile evaporabilem succum rosarum, qui pulchrum illum ruborem ipsis conciliaverat, facile abripit, & major adhuc potentia corrosiva aquæ fortis, quæ vel solidissima metalla arrodit, particulas inducti superficialiter pigmenti abrasit ac imbibit, idemque balsamicus liquor, è Sp. Vini, terebinthina &c. paratus in fugacioris florum succo idem præstare valet, tametsi fixiori colorum in cute animalium compagi solvendæ non sufficiat.

III. *Cur verò chartæ & linteamina madefacta, viæ publicæ aëre sicco subcandicantes, ex lapsa recenter pluvia colorem mutant, & nigricare videntur ?*

Hoc inde est, quod radii Solis in corpora illa sicca illapsi copiosiores reflectuntur, in hame-

humectata incidentes, magnam partem ab ipso humore absorbentur & minore copiâ ad oculum redeunt.

IV. *Nonne & quorundam corporum color aliunde obscuratus aut obfuscatus aut nativum revocari novâ mutatione potest?*

Potest utique, ejusque rei exempla habemus in auro sordidato, quod igne, aquâ forti, lixivio, purgatur & mundæ nitidæq; flavedini restituitur; & impressio in lapide Lydio, post affricatam auri aliorumq; metallorum plurium mixturam relicta, & ab auri colore multum differens, levi aquæ fortis adspersione solum colorem aureum eleganti spectaculo exhibet: Quia nimirum aqua fortis particulas reliquorum admixtorum metallorum solvit & absorbet, intactis pro more suo aureis, in priori casu verò & ipsa & ignis & lixivium fordes intestino suo motu detergant, absumunt, sibiq; implicatas auferunt.

V. *Quid calor continuus & digestio circa colores præstant?*

Mutationes varias eorum inducunt, quas experimenta chemica suppeditant plurimas, e. g. in præcipitationibus amalgamatum auri

& Mercurii ex continuato debito calore argenticolor amalgama in nitentem pulverem rubrum reducitur: Et oleum sive spiritus Terebinthinæ, clarum licet adinstar aquæ limpidissimæ, super *saccharum Saturni* candidissimum digestum (h. e. in vase clauso diuturno & continuato calori expositum) largitur brevi temporis spatio tincturam intensè rubram, quam nonnulli Balsamum Saturni appellant. Et generatim tincturæ ex *Falappa*, *Guajaco*, *Succino*, *Benzoino* spiritu vini mediante, florum sulphuris spiritu Terebinthinæ, factæ pulchram exhibent rubedinem, cujus rationem specialem reddere non adeò facile est, generalem autem dare in proclivi; siquidem, cum caloris essentia in agitatione consistat, ejus continuatio continuatam partium agitationem variamque adeò successivè dislocationem ac translocationem necessariò infert, quam diversitas reflexi luminis, h. e. coloris mutatio necessariò consequitur.

VI. *Dilutio etiam liquorum colores mutare solet?*

Nec mirum, si v. g. atramentum aquâ copiosâ dilutum palleascit, & aqua limpida infuso multo croco densè flavescent flavedinem magis magisque exuat, quò plus aquæ deinceps

ceps affusum fuerit : aqueæ enim particulæ particulis nigrorem aut flavedinem inducentibus majori copiâ se intermiscentes lumini transitum liberiores adaperiunt & plus pelluciditatis inducunt ; tametsi reperiantur aliqui liquores, ut solutio Cochenelii in spiritu urinæ, dilutionis valdè patientes absque notabili coloris variatione, quòd subtilior materiæ colorantis divisibilitas majori aquæ copiæ suo colore imbuendæ sufficiat. Rarius exemplum est, quod Boylius p. 336. de Color. narrat de calce argenti vivi cum triplo olei vitrioli pondere per retortam vitream in arena destillando siccata, quòd etsi nivæ esset albedinis corpus, affusâ tamen aquâ copiosâ momento fere temporis à colore lacteo ad elegantissimam flavedinem migraverit.

VII. *Quid porro notabile circa has colorum mutationes occurrit?*

Illud maximè, quòd liquores colorati solâ sui copiâ vel paucitate colorem varient, ut e. g. idem croco infectus liquor in vitro quodam ampliore densè - flavus apparens, in thermoscopiorum aliisve angustioribus tubulis vitreis pallidus planè & aquosus conspiciatur, & balsamum sulphuris majore copiâ contentum in vitro laxiore saturæ rubedinis, in paucis verò

guttis super chartam albam effusis & expansis flavum potius appareat; quod idem de tinctura succini spiritu vini parata, similibusq; aliis experientia testatur: magno certè argumento, colores in mera luminis, eaque variâ, debilitatione consistere, siquidem in angustis tubulis & magna liquorum coloratorum paucitate minus impeditur ac transitu arcetur quàm in magna vasorum ampliorum copia.

VIII. *Annon alia dantur experimenta, quæ id ampliùs confirmant?*

Dantur utique, & illud cumprimis, quòd è commixtione duorum liquorum omnis coloris expertium, momento quasi temporis color valde satur generetur; siquidem bonæ notæ sublimatum commune, aquæ quantitatem quam volueris plenissimè satians, ubi cum cura per mandam stipatamque chartam filtratum & ad aquæ fontanæ limpiditatem reductum fuerit, & hujus parvæ dosi unius circiter cochlearis in vitro vinario satis claro tres aut quatuor guttæ bonæ notæ olei tartari per deliquium, ad coloris expertem limpiditatem similiter filtrati, instillentur, subito in opacam quandam saturi coloris aurantii mixturam convertitur, agitando manu vitrum, ne cito nimis color ad fundum subsideat, aliquo-
usque

usque conservanda : quia nimirum (ut aliquam effectûs mirandi rationem simplicissimè reddam, profundiorē ap. Boyleum de Coloribus p. 314 seqq. inventuris) unius particulæ alterius, aut coagulatae quædam ex utrisque utrorumq; poros, lumen alioqui sine impedimento transmittentes, obstruunt lumenque transitorium debilitant.

IX. *Ita subito genitus color annon subito rursum cum pelluciditate pristina permutari potest ?*

Imò potest, si mixturæ modò commemoratæ quatuor aut quinque guttæ olei vitrioli instillantur, agitato interim fortiter vitro; protinus enim omnis color evanescit : enarratque hujus experimenti inventor Boyleus p. 334. aliud huic cognatum, accepto nempe spiritu urinæ fermentatione parato & infusis convenienti quantitate æris minutiis valde elegantem solutionem cœruleam se obtinuisse; cujus uno circiter cochleari in vitrum mundum effuso, si guttulas aliquot fortis olei vitrioli instillâset, momento temporis illam saturo suo colore privatam & communis aquæ speciem ipsi conciliatam fuisse: nimirum (ut rationem aliquam simplicissimè innuam) particulis mixturæ poris inhærentibus per spi-

cula sua salina exturbatis & lumini libero transitu denuò procurato.

X. Quinam sunt alii modi opacandi pellucida & ad pelluciditatem reducendi opaca corpora?

Varii sunt illi, variis exemplis satis vulgaribus comprobati; ut cum e.g. charta oleo inuncta, & hydropicorum crura copioso aquæ affluxu tensa pelluciditatem aliquam acquirunt; cum item pingua, hyemali frigore concreta, colliquando, liquores mixti & impuri filtrando, præcipitando, destillando, separatis adeò impuritibus, plus minus pelluciditatis acquirunt; ex adverso autem pellucida polita, ut vitrum, crySTALLUS, glacies, terendo, exasperando, comminuendo, suffumigando &c. opacantur, vitriolum similiaque calcinando, liquores ad spumescentiam usque agitando, transparentiam deperdunt, aut heterogenea quædam admiscendo pelluciditatem amittunt, oleum hyberno frigore, albumen ovi coctione concrevit ac translucere desinit, aqua limpida infuso croco aliisque tingentibus obscuratur &c. quorum omnium rationes hariolatu non adeò sunt difficiles.

XI. Num.

XI. Numquid & specialia in albedinem conversorum aliorum colorum, aut pelluciditatis antecedanea, suppetunt?

Non una quidem ista; quandoquidem e. g. butyrum liquatum, post frixum in eo ovum, cum tantillo aquæ rosarum intra patellam diu fortiterque agitata albedinem fere niveam assumit, & aqua, præsertim saponata, vorticoſa quadam agitatione in candidam albescit spumam: evidenti quidem ratione à bullulis innumeris, omne lumen extrorsum reflectentibus, petenda. Sic cera flava (æquè ac linteamina) insolando temporis progressu, breviori verò tempore arte chemica dealbatur, affundendo ipsi in tenues lamellas rasæ, aut minutim sectæ satis magnam spiritûs vini copiam, & hac mixturâ intra cucurbitam arenæ calidæ impositâ, posteaquam Sp. Vini trepidare inceperit, filtro chartaceo infundendo &c. Sic aqua limpida calefacta & injecto bonæ notæ sublimato communi saturata, tandemq; filtrata & ad claritatem reducta, si uni alterique ejus cochleari 4 aut 5 guttæ sp. urinæ instillentur, protinus alba, lactis ad instar, conspicitur. Sic per præcipitationes chemicas corpora discrepantium colorum (e. g. corallia, minium, antimonium &c.) in Spiritu

vini aliisve menstuis soluta oleo tartari, aut affusâ copiosa aquâ limpidâ, in calces pulveresque albos rediguntur &c. sc. quod de spumarum bullis, idem de filamentis cylindricis linteaminum à sordibus adhærentibus purgatis dici potest, & in cæteris exemplis similiter concipi, quòd per solventia sive associando sese, sive alia tollendo, ea particularum superantium inducatur dispositio, ut lumen receptum uberius extrorsum reflectant.

XII Suppetuntne similiter exempla productæ nigredinis in corporibus alio, vel etiam nullo, colore imbutis?

Quidni suppetant, & illa quidem bene multa? Nam e. g. solutâ in aqua forti mixtura ex auro & argento, pulvis aureus (in illo menstruo non dissolubilis) colore nigro ad fundum præcipitatur: gallarum fractarum forti infusioni in aqua limpidâ (amplius deinde majoris admirationis ergo dilutæ & ad pelluciditatem filtratæ) admixta sufficiens claræ similiter, sed admodum fortis, solutionis vitrioli quantitas, mixturam nigrescentem & atramentosam protinus producit: ebur peritè ustum pictoribus nigredinem ministrat è saturrimis: ligna ex abiete, corylo, aliaque plane alba decenter perusta in atros carbonēs con-

convertuntur : oleo vitrioli sensim admixta
 conveniens olei absinthii essentialis quantitas,
 & per retortam sollicitè destillata , relinquit
 in retorta materiam siccam atrore carbona-
 rio præditam : Solutio argenti tingit crines
 colore nigro & argentum ipsum vestes luci-
 diores per attritum denigrat, & calami in the-
 ca argentea gestati atro colore fere undiquaq;
 obliniuntur, &c. Nimirum quia hoc attritu
 tenuissima quædam argenti scobs corporibus,
 ac leviter adustis ossibus fuligo adhærens aspe-
 ritatem quandam extimæ superficiei induci-
 quæ lumen illapsum magnam partem absor-
 beat, vehementiore ignis vi facilè retunden-
 dam ; & in aqua limpida ab admixtis galla-
 rum vitriolique particulis pori quidem ita ob-
 struuntur, ut luminis radii non amplius liberè
 per eos transeant, sed intra pororum profun-
 ditatem sistantur & absorbeantur.

CAP. XII.

De

Saporum & odorum alterationibus.

*I. Unde proveniunt saporum & odo-
 rum præcipuæ mutationes ?*

A Liquando manifestè à calore, ut cum e. g.
 assatio carnibus crudis gratum palato sa-
 pore

porem conciliat, & calor solaris fructibus arborum ab initio acerbissimis pedetentim dulcedinem & suavitatem ingenerat; quia nimirum calor in continua celerique agitatione consistens, ubi moderatus est, vel intimius latentes particulas salinas è latebris suis sensim quasi protrahit, organoque distinctius admoveat (id quod extrema assaturarum superficies, notabiliter falsior interioribus, haut parùm confirmat) vel illas ipsas particulas saporificas, quæ molestius paulò sensorii fibras ante pupugerant, mutuis impulsibus atterit, comminuit, & pungentiores apices paulùm obtundit &c. Similiter florum odores primum crudiores, agitatione lentâ exaltat, velut ex opposito nimius & adurens calor non solum exhaurit, sed in pejus etiam commutat sapores alioqui suavissimos & foetores fragrantiae loco producit; dum figuram particularum dicto modo commutat & subtiliores gratiore allisu titillaturas, penitus expellit, relictis crassioribus & irregulari suâ figurâ molestis &c.

II. *Numquid à frigore quoq, aliqua harum qualitatum mutatio induci potest?*

Omnino; nam vinum in aquis nivatis & glacialibus refrigeratum obtusius sapit, congelando verò à phlegmate liberatum, exaltato

tato valdè & sapore & odore gaudet, & juscula rectius cum calent, quàm refrigerata, sapiunt; quia nimirum frigus quietem particularum internam dicit, sapores autem & odores ad actiorem quandam earundem, sive crassiuscularum in fibrillas nerveas linguæ & palati, sive volatiliorum in illas odoratorii organi, præsupponunt: hæc verò actio à frigore ligatur ac impeditur, econtrà verò in congelato vino ligatis aqueis, reliquæ spirituosiores liberius utriq; sensorio impinguntur.

III. *Danturne plures alii fontes evidentes talium mutationum?*

Dantur utique, & nominatim humor calori junctus in coctionibus; quandoquidem elixa caro ab eodem igne alium planè saporem & odorem, quàm assata recipit, & pyra quædam, quæ cruda sapore valdè austero prædita fuerant, cocta dulcescunt &c. nimirum quia in crudioribus & humor solvendo, & calor adigendo, particulas saporíferas & confertiores eliciunt & sensorio admovent; in acerbis & austeris autem, calor facilius obtundendo pungentiores corpusculorum aculeos, humor autem læves & glabras aquæ particulas intermiscendo, illorum actionem leniunt ac temperant.

IV. *Non-*

IV. *Nonne solus etiam humor alterare saponem odoremq; macerando potest?*

Potest omnino, idque exemplo hordei, quod in aqua maceratum & jam tenuēs radicū surculos mittens cerevisiæ dulcedinem conciliat, & masticatum tunc melius multò quàm crudum sapit; & farinæ quasi inodoræ, ubi cum aqua mixta in massam subigitur, odorem spargit non penitus aspernandum: ut de carnibus aliisque aceto vinove maceratis nunc non dicam. Scilicet in hordeo & farina maceratio spiritûs, salia, sulphura &c. prius sopita excitat ac elicit; in illis autem, quæ aceto, vino &c. macerantur, ipsi liquores macerantes connatum sibi saponem maceratis communicant, aliquas sui particulas in ipsorum poris relinquendo.

V. *Quid fermentatio conferre potest ad saporum & odorum mutationem?*

Quod multum conferat, massæ farinacæ modò commemoratæ exemplum docet, quæ fermentata longè aliter & sapit & olet, quàm non-fermentata; nec non urinæ, quæ diuturnâ fermentatione intolerabilem acquirit fœtorem, ac cerevisiæ intra cellaria fermentantis ac acidulo suo & penetrante odore gravis,

& si-

& similia. Cur autem hanc alterationem inducat, ex eo judicandum est, quòd fermentatio sit lentus quidam & intestinus minutiarum motus, corporum compagem lentè laxans ac dissolvens, ideoque effectum etiam effectui macerationis similem producat, prout ipsæ inter se valdè affines sunt.

VI. Cum putrefactio sit quædam fermentationis species, illa quoque saporibus & odoribus corporum putrescentium mutabitur?

Sine dubio, idque experiëntiâ quotidianâ teste, in carnibus e.g. ovis, pomis eduliisque aliis putrescentibus, odorati simul & gustui valdè ingratis: pertinentq; huc aquæ stagnantes sub æstivo calore, vestimenta diu non ventilata, aër ipse conclusus alicubi diuque immotus &c. Nimirum, cum in putrefactione frequens sit partium spirituosarum & subtiliorum (quæ gratiam saporis & odoris pristinam constituerant) exhalatio & exhaustio, palam est relictas crassiores & magis irregulares deinceps fibrillas molestius pungere & afficere, h. e. ingratum saporibus & odorem procreare.

VII. Numquid adhuc alii supersunt mutandorum saporibus & odoribus fontes?

Supersunt utique, nec uni: nam admixtio & commixtio saporibus, ut salis, olei, sacchari, croci,

croci, piperis, aliorumque aromatum, vel etiam admixtio insipidioris, ut aquæ cum vino &c. alteratorum subinde odorum & saporum exempla in culinis nostris quotidie offerunt; nec pauciora pharmacopœorum, chirurgorum, coria perfumantium, similiumque officinæ, ex causa nimis manifesta. Notabile verò sigillatim est, quòd moschus, ubi purus est, non olet suaviter, si verò cum aliquot guttis spiritûs rosacei misceatur, fragrantiam demum acquirat suavissimam; vel quòd spiritus ille latentiores adhuc subtilioris odoris particulas eliciat, vel quòd ex utriusque suaviter odoris particulis tertium genus adhuc suavius organa titillans concreascit.

VIII. *Potestne etiam ex commixtis duobus insipidis aut minus fragrantibus, suavior aut ingrator aliquis exoriri?*

Omnino potest, & mutationis quidem in melius exemplum in præced. quæst. jam habuimus; in pejus autem mutati odoris specimen edit aqua inodora cum calcis vivæ pulvere & pauculis micis casei Hollandici trita, & graveolentiam singularem producens: Ex eo procul dubio, quòd ejusmodi insipidiora vel inodora se mutuò solvant, motuque adeò intestino particulas saporiferas vel odoriferas, pro-

profundiùs ante mersas eliciant, prout aqua calcis vivæ caseique poros subeundo facit; vel sapida aut suaveolentia duo inter se commixta mutuis hujusmodi actionibus intestinis aut particularum suarum figuras & apices invicem obtundant, aut cohæsiōe mutua particulas componant, quæ novâ figurâ aliter planè quàm priùs organorum fibrillas lacescant.

IX. *An adhuc alius restat mutandorum saporum modus?*

Transcolando utique vel insipida per sapida corpora vel sapidorum per insipida, saponos suos immutant, velut acidulæ aliæque medicatæ aquæ saponos suos acquirunt ex mineris, quas transeunt aut salis communis, aut sulphuris, aut chalcanti, aluminis &c. & vinum Hippocraticum sive Saccatum ex aromatis per quæ transmittitur; aut vicissim aquæ falsæ per arenam aliquoties transcolatæ quodammodo dulcescunt: hîc nempe particulas salinas in arenarum poris relinquendo, ibi easdem solutas & quasi abrasas imbibendo.

CAP. XIII.

De

Mutationibus Qualitatum insensibilium.

Q

I. For-

I. *Fortassis insensibiles vel occultæ, quas vocant, qualitates mutationi minus obnoxie sunt, quàm hæcenus enarratæ sensibiles?*

ITta quidem videri posset, attendendo v. g. ad vires in ciendis maribus adeò constanter diurno menstruoque motu sese exerentes, ut inter ea, quæ certò præsciri in futurum possunt, meritò numerentur, in maritimarum locorum Calendaria quoque referri secundum præcipuas effectuum suorum circumstantias solita. Sed enimverò in ipsis etiam constantium periodorum circumstantiis subinde occurrit aliqua mutatio, ut in uno v. g. novilunio major sit & auctior affluxus, quàm in altero, in una quadraturâ debilior quàm in altera &c. propter Lunæ nunc majorem nunc minorem viciniam, indeque pendentem majorem aut minorem ætheris ipsam terramque interfluentis pressionem.

II. *Anne in Magnetis quoque virtute, quam vocant, directiva mutatio quædam accidit?*

Cùm tale quid vel ideo præsumendum haut videatur, quòd universum navigationis negotium hoc uno fundamento, & satis tutò fortasse, nitatur; nihilominus compertum est ac in-

indubium, non solum acum istam ab ordinaria directionis linea facillimè deflecti, per magnetis alicujus aut ferramenti, aut alius acûs magneticæ viciniam, sed etiam ejus virtutem Directricem ita penitus inverti posse, ut, quâ sui parte antea boream respexerat, eam deinceps in austrum, & vice versâ, convertat; si nimirum e.g. polus magnetis australis australi parti acûs magneticæ admoveatur, & in illo situ utraque violenter ac diu detineantur: fit enim hoc pacto, ut observatum aliàs polorum istorum cognominum quasi naturale odium in amorem naturalem convertatur, & qui prius fuerat australis acûs magneticæ polus, impofterum septentrionalis evadat, & contra.

III. *Potestne hujus etiam mutationis aliqua dari ratio?*

Non est dubium, nec desperandum unquam de ratione aliqua tum hujus tum aliorum phænomenorum similium tandem invenienda, si maximè non statim illa in promptu sit, aut non plenè statim satisfaciens; nec in occultarum qualitatuum desperata nomenclatura unquam acquiescendum, sed meditandum, fingendum, donec aliquid quod veri speciem habeat reperiatur, idque deinceps sub-

inde refingendum & corrigendum, ut propius propiusque à vero nobis abesse contingat. In quam spem illud nos erigere maximè potest, quòd sciamus nihil in natura fieri posse nisi mediantibus materiæ minutiis earumque figura, magnitudine, nexu, quiete, motu &c. & consequenter sperari posse, ut, effectibus ac phænomenis ipsis nos manu ducentibus, eam particularum materialium figuram, magnitudinem, cohæSIONem, agitationem &c. conjectemus, quæ dictis effectibus declarandis sufficere possint : prout certè in eo quod sub manibus est exemplo, haut difficulter hario-
lari licet, cùm ordinariè materialis ille influxus magneticus, qui ex unius magnetis vel acûs magneticæ polo septentrionali in australem alterius viam sibi dudum paraverat, interiores pororum prominentias boream versus inflectendo, quòd inverso altero & polis cognominibus sibi mutuo obversis, illæ prominentiæ primum quidem influxui illi obstant, progressu verò temporis, dum interim obstantes illæ prominentiæ in partes contrarias inflectuntur, eidem assuescant & oppositi poli rationem induant ; quemadmodum e. g. ubi quis per dumetum aliquod sæpius præpendo exitum sibi promptum ac facilem efformavit, deinceps foris introrsum per
idem

idem foramen irrepturus primum dumeti spinas obsistentes offendit, sæpius autem eadem viâ subrepens eas in contrariam partem paulatim inflectit, ut æquè facilis tandem ex illa parte ingressus fiat, quàm prius egressus fuerat.

IV. Ergo virtutis etiam attractivæ mutatio quedam in magnete si contingat, hujus etiam ratio aliqua sperari poterit?

Omnino : Et hanc etiam esse mutationi obnoxiam, vel multiplex illa cura evincit, quâ curiosi harum rerum magnetes panno rubro munire, vel sub aquis aut limatura ferri sepultos detinere solent, qui prunis ardentibus tumulatus vim omnem certo certius amittit, nunquam postea restituendam ; quia sc. violenta ignis operatio pororum figuras influxui magnetico aptatas destruit ac immutat, & in priori casu æris quoque vis corrosiva notissima efflorescentiam rubiginosam in iisdem poris produciens obstacula manifestè ponit influxui magnetico liberè processuro.

V. Annon venenorum etiam nociva qualitas ita immutari potest, ut aut minus noceat, aut etiam prosit?

Ita fanè testantur Chemicorum prudentiorum experimenta, quibus venenea nocen-

tissima, correctionem aliquam passa, in alimenta, medicamenta, & alexipharmaca sæpe commutantur: Et hausto statim post venena oleo, lacte, vino malvatico &c. venenorum vim obtundi ac minus nocere in vulgus notum est; nec ex opposito novum quid est, optima quoque medicamenta & alimenta, inconsideratiùs adhibita, in mortifera venena converti. Nimirum, cum vel emovendo nimis & inflammando sanguinis fluentia, vel fingendo eadem & coagulando, pleraque noceant; quid mirum, si lacti, butyro &c. admixtæ & quasi irretitæ eorum particulæ vim suam ordinariam exerere non valeant? aut ab igne chemico retusæ eliminatæ &c. impetuosiores, vel attenuatæ, excitatæ torpidiores, ad accomodam magis corporis temperamento proportionem reducantur, ut jam prodesse magis quàm nocere possint? quemadmodum ex opposito medicamentorum & alimentorum salubritas, vel quantitate nimia, vel corruptione & immutatione aliunde factâ notabili, statum sanguinis, antè temperatum ac laudabilem, in præternaturalem & illaudabilem præcipitare valet.

VI. Potest ne hæc medicamentosarum facultatum immutatio uberius confirmari?

Confirmant hoc illæ officinæ, quæ magnam medicamentorum copiam quotidie consumunt ideoq; materialia recentia parata semper habent, adeoque salubria magis & efficaciora promunt medicamenta, quàm aliæ quæ formulas præscriptas eadem quidem cura & industria sequuntur, sed materialia effœta, exesa, vetustate exhausta, adhibent: Nimirum cum ferrum & æs progressu temporis rubigine & ærugine arrodantur, aliaque etiam metalla per expirationem insensibilem tandem pondere suo imminuantur; quidni ex medicamentis, quæ laxioris texturæ sunt pleraque, sensim exhalare poterunt actuosissimæ partes, relictâ sic exhaustâ effœtaque massâ, quæ solitam deinceps virtutem non ampliùs habeat?

VII. Hac occasione querere liceat, annon etiam plurium nec raro contrariorum aut mediâ naturâ gaudentium commixtio infringat potius quàm augeat medicamentorum virtutes?

Ita omnino videtur: Nam commixtis pluribus diversæ aut contrariæ operationis,

ab unius torpidis e. g. tardisque particulis alterius excitatiores & agitatiores necessariò impediuntur, mutuisque his impedimentis turbisque confusæ, non tam ad mediocritatem operandi reducuntur (quod multi sibi frustra persuadent) quàm novam ex utrorumque virtutibus, & ab his planè diversam, morboque adeò pellendo vel solvendo minus idoneam, vim & efficaciam acquirunt, quæ noceat sæpe magis quàm profit.

VIII. *Numquid averfio illa naturalis etiam, quæ animalibus quibusdam cum aliis rebus intercedit, mutabilis est?*

Nullum est dubium: Vidimus enim ipsimet canes e. g. felibus, & feles canibus, ita vicissim amicos, ut uni super alteros recubantes securè dormirent; vidimusque diuturnâ assuefactione lusum esse factum quibusdam animalibus ea, quæ ipsis naturæ suæ relictis ordinariè fuerant exosissima. Novimus enim quanta vis sit consuetudinis (vel exemplo magnetis & actûs magneticæ IX. quæst. II. ac III.) nec mirabimur amplius naturales illas quorundam animalium ab aliis rebus aut animalibus averfiones, quæ in disproportionata sensoriis effluviis & impressionum actione consistunt, diuturnâ consuetudine mitigari

tigari aut tolli penitus posse, præsertim cum ab ineunte ætate tenellæ flexilioresque nervorum sensoriorum fibræ assuefactione continuâ sic sensum disponi possint, ut quæ ingrata prius acciderant ipsis agitationes, paulatim accommodatiores & proportionatæ magis evadant.

C A P. X.

De

Mutationibus Quantitatis, sive de
Augmentationibus ac Diminutionibus.

I. *Num omnia corpora Naturalia quantitatis suæ aliquam subeunt mutationem?*

ITa quidem videtur; cum Solem ipsum & D. cæterosque Planetas nunc majores nunc minores sensibilibiter observemus: sed hæc quantitatis mutatio non est realis in ipsis corporibus facta, sed apparens tantum, à majori vel minori à nobis distantia dependens; prout etiam in terris arbores, turres, homines &c. minores videntur in majori distantia, majores in minori.

Q 5

II. *Sed*

II. Sed terra saltem nostra quantitatis augmenta capiet, si verum sit circa polos congestas quotannis nives nunquam penitus liquefcere?

Sic ferunt communiter; sed primò Septentrionalem polum oceano vasto undique cingi, paucis terris exceptis, constat, Australis autem penitus ignotus est; deinde, posito quod singulis annis novæ nives prioribus accumularentur, cùm illæ è vaporibus & exhalationibus aquosis ex oceano &c. ortæ necessariò fuissent, quantum augmenti regiones circumpolares ex earum accessione cepissent, tantundem aliæ necessariò habuissent decrementi: ut hoc pacto totius telluris magnitudo nihil aucta, sed figura solum tantisper immutata fuisset.

III. Idem ergo de Oceano, per tot fluminum in eum delapsum nihil sensibiliter aucto, dicendum foret?

Rectè inferis; nam quantum aquæ omnia ista flumina in oceanum quotidie evomunt, tantundem ex immensa ejus vastitate caloris interventu sub forma vaporis attollitur, & ex aëre rursus in fontes, rivos, ac flumina constituenda demittitur: Ut hoc modo non possit plus

plus aquarum à fluminibus in Oceanum effundi, quàm illa ab Oceano priùs receperant.

IV. *Sed cùm in maria particularia, e. g. cassium plurima flumina se exonerent, quæ suas aquas ab eodem mari cassio præcisè non accipiunt (utpote longiùs advectas) ejusmodi maria minus ampla saltem in immensum augeri & exundare tandem necessum videtur?*

Videtur utique, & rectissimè quidem; sed quia tamen ejusmodi exundatio non fit, ratio id evidenter deprehendit, quod sensum fugit, ejusmodi maribus subterraneam intercedere cum Oceano communicationem, quâ receptæ ex tot fluminibus aquæ per immensam Oceani amplitudinem, ex qua evaporando prodierant, iterum distribuuntur.

V. *Annon autem prope littora saltem notabilia marium incrementa observantur?*

Observantur utique, & illa quidem vel ordinaria, cùm bis in die sive singulis 12 horis aquæ circa littora assurgunt aut longiùs in terras planas exundant, vicissimque bis in die sive 12 horarum aliarum spatio à litoribus recedunt, rursusque decrescunt; vel extraordinaria,

ordinaria, cum tanta fluctuum abundantia contingit, ut haut rarò provincias integras inundent & absorbeant. Et ordinariorum quidem incrementorum causa saltem occasionalis habetur, quæ suâ præsentia faciat, ut aquæ ab æthere interfluente arctius pressæ ex mari medio versus litora expellantur; recedente verò & ac pressione cessante, sua sponte ad medium maris refluant; id quod in parte speciali plenius explicabitur: Extraordinaria verò augmenta proveniunt ab extraordinaria pluviarum copia, quæ fluminum alveos ultra modum adimplet & consequenter maria, in quæ has immodicas aquas exonerant, prope litora intumescere & exundare faciunt.

VI. Hujusmodi ergo augmentationes ab extrinseco fiunt, per appositionem novæ materiæ vel copię?

Sic est omnino; & contingunt quidem etiam ordinariæ quædam ejusmodi accessiones aquarum in fluminibus quibusdam, ut Nilo, Nigro, Gange & similibus, ex pluviarum lapsu ordinario iisdem mensibus quotannis, præsertim in zona torrida, contingente: Eodem modo per extrinsecam appositionem nives continuato floccorum lapsu augescunt: Eodem modo metalla quoque sub terra in exhaustis

haustis fodinarum venis longo plurium annorum tractu nova incrementa capiunt; credunturque lapides etiam, saltem certum eorum genus argillaceum, corticatim ex plurimis quasi laminis superinvicem congestis generari; calculi verò in animalium corporibus per successivam arenularum appositionem producuntur indubiè.

VII. *Anne verò ab intrinseco etiam aliqua corpora augeri deprehenduntur?*

Fit hoc in tenellis plantulis mediante succo pluviali introrsum per radices assumpto aut potius ab aëre gravitante intruso, ac deinceps etiam in adultis eodem principio continuante: Fit item in animalium embryonibus succum nutritium pariter, ut in plantis, per vasa umbilicalia, tanquam radices, recipientibus, deinde verò, cum os & reliqua organa cibo ac potui hauriendo destinata perfectionem suam nacta sunt, etiam hac viâ nutrimenta haurientibus, intusque per singulas corporis partes distribuentibus; contra verò & his & prioribus gracilescantibus & marcescentibus, ubi alimentum defecerit.

VIII. *Non.*

VIII. *Nondum satis capio discrimen inter hanc intrinsecam & priorem ab extrinseco factam augmentationem, vèlimq; adeò id adhuc distinctius mihi exponi.*

Vocatur equidem plantarum ac cæterorum viventium augmentatio intrinseca, quatenus alimentum respectu totius corporis intus assumitur; reverà tamen respectu partium singularum, per assumptum intus alimentum aut potius per succum inde præparatum, augendarum & nutriendarum fit appositio particularum illius succi extrinseca, adeoque eodem planè modo, quo in augmentatione extrinseca: dum nimirum partes nutriendæ intimæ ab appositis novis particulis, ab illis proximæ aliæ, & ita consequenter, extrorsum protruduntur totumque adeò corporis habitum expandunt; prout e. g. vesica ab aëre per orificium ejus forinsecus inspirato sensim exporrigitur.

IX. *Cur ergo planta & animalia, ab assumpto semper alimento, non etiam semper augentur & incessanter crescunt?*

Non potest illa fibrarum expansio & exporrectio diutius continuari, nisi quamdiu illæ extensionis capaces sunt, h. e. mollitie & humi-

& humiditatis aliquid servant. Cùm verò illæ progressu temporis magis magisque exsiccentur & obrigeant (in unis citius in aliis ferius; prout nimirum cujusque usui & operi proprio varietatem illam staminum in primis rudimentis sapientissimè accomodavit Divinus conditor) ulterius illæ se extendi difficiliùs patiuntur.

X. *Annon etiam per rarefactionem quædam corpora augescunt & expanduntur?*

Ita deprehendimus aëris terram ambientis Sphæram æstivo tempore à Calore Solis ad majorem multò altitudinem expandi, quàm hyberno, id quod satis testatur Crepusculorum ibi major diuturnitas, hîc major brevitās : Et videntur quidem hæc talia per rarefactionem quandam augescencia corpora simile quid pati cum viventibus ab intrinseco adauctis; siquidem hîc etiam aliud quoddam corpus, e.g. ignis forinsecus receptus internos poros vel interstitia ingreditur, iisque adeò dilatatis omnibus ac singulis totum corpus pededentim expandit: sed eâ tamen differentiâ, quòd partes illæ intus appositæ (v.g. igneæ particularum aërearum interstitiis admixtæ) non assimilentur aut eandem naturam induant

cum

cum partibus corpori dilatato propriis ; id quod tamen in plantarum animaliumque nutritionibus fieri solet.

CAP. XV.

De

Mutatione Loci five Motu locali.

I. *Daturne Motus in Corporibus naturalibus?*

CORPORA naturalia subinde mutare sua loca, h. e. è vicinia unorum in viciniam aliorum transferri adeò manifestum est ipsis sensibus, ut vel unquam hoc ab ullo serio negatum, sit incredibile (quicquid etiam de Parmenide & Melisso Aristoteles Lib. I. Phys. c. 4. [aliis 3.] de Zenone idem Lib. VI. c. 14. [aliis 9.] aut de Diodoro Crono quodam alii narrent) uel, si quis id serio negasset, emotâ id fecisse mente dicendus sit, & Aristoteles Lib. VIII. cap. 3. rectè judicasse, quod mentis imbecillitas sit (*ἀπρωτία τῆς ᾤσεως*) si quis arbitretur omnia quiescere, & sensu dimisso rationem requirat; neque vel justior vel certior tales convincendi & confutandi ratio detur eâ quâ Diogenes adversus Zenonem, & Hero-

& Herophilus medicus contra Diodorum usus fertur.

II. *Annon etiam corpus unum alteri suum motum, aut partem saltem illius communicare potest?*

Ita quidem cum vulgo credimus, & sic cum eodem vulgo loquimur; verum si, quod res est, dicere velimus, impossibile est conceptu, quo pacto motus, merum accidens, aut merus existendi modus [de quo Sect. I. cap. 3. prolixè dictum est] ab uno subjecto in aliud absque vehiculo aliquo substantiali, migrare queat, neque facilius dictu, quodnam illud vehiculum sit, quo mediante transferatur. Itaque hoc sensuali observatione certum est, impingente corpore quodam jam antè moto in aliud superabilis resistentiæ, hoc incipere moveri, tantundem interim altero sui motûs deperdente; id quod *motus communicationem*, & *motum communicatum* appellamus: vel, si resistentia alterius sit insuperabilis, impingentis motum quidem imminui, haut facile tamen penitus extinguui, sed impeditum retro vel rectius vel obliquius (prout sc. impactio rectior aut obliquior fuerit) continuari; id quod *motum reflexum* vocare consuevimus.

R

III. Sed

III. *Sed quid rei tandem est motus localis?*

Fassus jam olim est Aristoteles Lib. III. Phys. c. 1. *χαλεπὸν αὐτὴν λαβεῖν τί ἐστιν*, *difficile esse sumere, quid ipse sit* : Et quamvis Epicurus recte dixerit motum nihil aliud esse, quàm migrationem de loco in locum, & Aristoteles eum ens potentiâ, quod in perpetuo fieri fluxuque successivo, consistat, appellaverit, nondum tamen ex istis descriptionibus capi potest, quo pacto & quâ vi fiat ille fluxus successivus è loco continenter deferendo in alium continenter acquirendum. Recentiores equidem aliqui ad qualitatem aliquam à movente impressam, quam *impetum* vocant, confugiunt, nec tamen, quid impetus ille sit, magis declarant, quàm ipsum primum quæsitum, quid motus sit; neque quo modo Impetus ille motum producat, sciunt, imò negant motum propriè loquendo ab impetu produci, sed exigì tantùm illum ab hoc asserunt, quod metaphoram aliquam sapit, non rei distinctè imaginabilem rationem.

IV. *Quid igitur in his tantis difficultatibus statuendum est?*

Id quod Sect. I. cap. 3. pluribus inculcâtum, quod Motus ejusmodi res sit, quæ à mero

à mero DEI arbitrio dependeat, cujusque adeo ratio nulla dari potest, nulla postulanda est, quique adeo exigentiam aliquam, non imperiis, quæ improprie dicta & inexplicabilis est, sed Divinæ voluntatis, quæ propriissime loquendo exigere ac imperare potest, involvit. Vid. alleg. cap. III. Q. III. & seqq. in quibus pleraque dubia, quæ huic asserto solent occurrere prolixè soluta reperiuntur, ne cramben bis coctam hîc incongruè apponamus.

*V. Optarim mihi simili quopiam
hanc motus naturam ex causa quadam naturali frustra deducendam illustrari.*

Sicut in Arithmeticis rationem quidem aliquam inquirere jure possumus, cur duæ hæ notæ 1 & 2, hoc ipso ordine conjunctæ (12) significant duodecim, inverso ordine scriptæ (21) significant viginti & unum? eamque etiam reddere ex lege generali, quòd nota quævis in loco primo sive dextimo posita unitates tantum, in secundo sive proximè sinistro decades &c. denotare debeat; ad quæstionem autem ulteriorem, cur quævis nota in secundo loco decades exprimere debeat? rationem dare nec possumus nec debemus, sed ad liberam Inventoris voluntatem jure pro-

vocamus : ita quærenti, cur e. g. globo tormentario ingenti violentiâ in objectum parietem projecto hic prosternatur? rationem quodammodo reddere possumus ex lege generali, ut corpus unum actu motum, ubi impegerit, in aliud hoc etiam moveri faciat pro recepti aliunde sui motûs proportionem; ipsius autem hujus legis rationem amplius reddere nec possumus nec tenemur, quia eam DEVS in natura ex mero suo arbitrio posuit, ac ipsemet ex mero suo beneplacito ubique exequitur.

VI. Applicetur hoc, amabo te, ad superius exemplum de globo tormentario?

Globus tormentarius projicitur à dilatato magna cum vehementia pulveris pyrii halitu: hic halitus tantâ vehementiâ dilatatur à particulis nitrosis explosivis per igneas particulas summâ celeritate actis & quaquaversum dispulsis: celerrima illa ignearum particularum agitatio dependet à particularum subtilissimæ materiæ, ab omnibus sub diverso nomine agnitæ, incredibiliter celeri agitatione: hujus denique agitatio (nisi procedere in infinitum, & hac subtilissima adhuc subtiliorem, hac porrò aliam adhuc subtiliorem &c. fingere velimus) à DEO motore immobili, quique adeò propriè

priè & activè movet, dum cætera movent una altera, sed prius acta, prius mota, ab alio mota, h. e. propriè non movent, sed ejusmodi motorem immotum necessario supponunt, si vel maximè subtilissimâ materia subtilior, & hac porrò subtilior &c. &c. infinito processu fingatur. Cùm enim omnes hæ materiæ, una ab altera aut per alteram moveantur, necessum est primum aliquod movens, non motum, supponere, quod verè & activè moveat primam & subtilissimam omnium, per hanc ita motam secundam, per secundam tertiam &c.

VII. Numquid hoc ad motûs humani corporis à mentis voluntate pendentes similiter accomodari potest?

Utique. Nam cùm animæ nostræ voluntas ne quidem unicum pulvisculum, vestimentis aut corpori ipsi insidentem, suâ solâ virtute, h. e. per nudum suum velle de loco movere possit (cujus imbecillitatis anima sibi ipsi nimis conscia est,) multò minus innumera- biles pulvisculos, spiritum animale constituentes, movere poterit. Quamobrem, cùm spiritibus animalibus motis musculorum vesicularis textura infletur, inflatis ac dilata-

tis musculis tendines attrahantur, his adductis ossa ipsis connexa circa suos articulos volvantur, & hoc pacto motus artuum ex nutu mentis nostræ confuso consequantur, necessum est animales illos spiritus à materia subtiliore, hæc à subtilissima, hæc tandem à motore immoto, eadem qua supra necessitate, moveatur.

VIII. *Dic tandem uno verbo, quid rei motus sit, & quomodo concipiendus?*

Non est motus res aliqua peculiaris, sed rerum motarum existendi modus tantum, sicut moveri nihil aliud quam existere non in uno, sed in aliis aliisque successivè locis; qui modus existendi non minus quàm ipsa cujusq; rei existentia à virtute divina mere arbitraria unicè dependet, siquidem existere in pluribus successivè locis, quodammodo plus est quàm existere simpliciter; quemadmodum plus est existere pluribus successivè vicibus, sive existentiae continuatio, quàm existere semel & simpliciter, adeoque rerum conservatio non minus, sed magis etiam, à Voluntate DEI potentissima dependet, quàm ipsa earum existentia.

CAP. XVI.

De

Motûs continuatione.

I. Cur motus corpori alicui per contactum semel impressus, deinceps, cùm movens rem motam non amplius contingit, tamen continuatur?

Quemadmodum effectus ipse sexcentis exemplis quotidie conspicitur, in lapide v. g. aut pila à manu projectis in sagittis & globis tormentariis ab arcu tenso & pulvere pyrio projectis; &c. ita de causa hujus effectûs mirum in modum se torserunt Philosophi, alii (ut Aristotelici, hanc esse genuinam Aristotelis opinionem reputantes) aërem antè propulsum & per circulationem ad lapidis projecti tergum recurrentem, alii ad aëris subsequents nativum elaterem, alii ad impetum à primo movente impressum, qui deinceps motûs continuationem exigat, Aristoteles ipse denique ad aëris motum ab eadem manu, quæ lapidem projecit, receptum, frustra recurrentes.

II. *Quid igitur obstat, quò minus aër recurrens ad lapidis tergum possit haberi pro genuina causa motus deinceps continuati?*

Id obstat, quòd impulsus retrò currentis aëris in locum cedentis lapidis non potest esse major quàm anterioris & ulterioris resistentia, ut hoc pacto, quantum posticus aër lapidem protrudere conatur, tantundem anticus ei resisteret, & sic motus nullus fieret: Imò, si rectius rem putemus, anticus plus resisteret, quàm posticus urgeret, quia ille lapidis impulsu comprimitur, & consequenter validior redditur, hic autem, antea compressior & validior, à tergo lapidis quodammodo dilatatur & consequenter ejus vis pellendi imminuitur: quemadmodum in sclopetis pneumaticis videmus, eorum primos ictus esse validissimos, quia ab aëre valde compresso dependent; reliquos gradatim debiliores, quòd ab aëre gradatim dilatatiore, atque adeò debiliore, proveniunt.

III. *Sed cum aër habeat suâ naturâ ingentem vim elasticam, ut e. g. in tormentum exoneratum vi maximâ irrumpat & ingens tormenti pondus retrò pellat, cur non parvum etiam lapidem possit propellere?*

Ita sanè argumentatur Stairius, pluribus
etiam

etiam adductis experimentis, quæ vim illam aëris elasticam abunde probant; sed notandum inprimis est, illam vim elasticam sive expansivam efficaciter se non exerere, nisi in illam partem, ubi eadem vis elastica aëris vel per exhaustionem (ut in recipiente exhausto, in cujus apertam vacuitatem aër circumstans magno impetu irrumpit) vel per rarefactionem (ut in tormento ab accenso pulvere pyrio) valde debilitata est. At enimverò in casu projecti lapidis anterior aër nihilo minus elasticus est quàm posterior, imò anterior ab impulsu lapidis magis comprimitur indeque majorem vim elasticam acquirit, adeoque majorem resistantiam, quàm posterioris nisus ac impulsus licet etiam elasticus, lapidem promoverè possit.

IV. Nonne verò impetus à primo movente impressus tantus esse potest, ut non solum primum motûs initium, sed & ejus continuationem deinceps exigere possit?

Lubens equidem hoc concesserim, dummodo primò, quid ille impetus impressus sit, clarè & imaginabiliter doceri possit, secundò id quoque dilucidè exponi, quomodo ille impetus deinde motum actualem exigere, &

quâ necessitate actualis motus illam impetûs
exactionem consequatur?

V. *Quomodo igitur tota hæc res distinctissimè concipi potest ac debet?*

Primus impetus in materia simplicissima immediate receptus est effectus arbitrarius infinitæ, atque adeò summè efficacis voluntatis Divinæ, cujus velle cum posse & actu agere idem est. *Secundò* hæc summè efficax actualis materiæ motio nunquam cessatura esset, si portionem materiæ unicam, & in vacuo quidem spatio, agigaret, nisi primitus ab ipso Divino arbitrio definita esset, ne in infinitum continuetur. Cùm verò *tertiò* omnis materiæ portio, non in vacuo, sed in pleno undique universo, efficaciam dictâ voluntatis divinæ sive limitatæ sive illimitatæ, moveatur, ea ipsa efficacia, quæ sufficiens fuisset ad portionem unam in vacuo sine fine agitandî, sufficiens quoque erit, ad portionem secundam quoque unâ cum prima, & tertiam cum secunda, & sic porrò, movendi; ea tamen conditione iterum arbitrariâ, ut quantum illius impetûs in primâ portione recepti redundaret per primam in secundam, tantundem ille in prima imminueretur, eoque pacto quævis materiæ portio motionem suam mediatè

mediatè receptam tamdiu continuaret, donec eâ successivè in obvia alia corpora totâ quasi distributâ, ipsamet à motu cesseret, & ad quietem reduceretur.

VI. Hoc igitur modo eadem causa primitus impressi motûs, erit etiam causa motûs continuati?

Sic est omnino: idque vel in motibus nostris voluntariis, & in naturalibus familiarioribus abundè videre est. Cùm enim vis artuum nostrorum, & potentia halitûs accensi pyrii (quam utramque à sola DEI virtute originaliter dependere suprâ evicimus) major sit quàm ad movendum loco suo globum requiratur, ideò ad plura loca ejus motum continuat, & in obstacula occurrentia quoque porrò se effundit, donec in innumera tandem divisa, sensibiliter saltem, cesserit ac desinat. Nec evidentius quicquam esse potest, quàm quòd eadem Virtus Divina, quam unicam & solam causam efficientem incepti semel motûs esse superiùs evicimus, sola etiam & unica causa efficiens motûs continuati sit, aliaque frustra quærat; id quod etiam inanes hætenus Philosophorum conatus satis à posteriori confirmat.

VII. Id

VII. *Id quidem in superius adductis
variorum cogitatis ac suppositis clarè conspexi-
mus: Sed velim ipsius quoq; Aristotelis hypo-
thesin ejusq; vanitatem pariter nobis
demonstrari.*

Aristoteles alleg. loco sic existimat: Ma-
num quæ projicit lapidem, unà movere aërem
proximum, ut simul ei tribuat vim movendi
sequentem aëris partem, adeò ut idem aër
simul moveatur à manu & moveat alium
aërem, & hic iterum alium cohærentem &c.
ita quidem ut, cessante licet moveri à ma-
nu aëre primo, sequentes tamen non ces-
sent movere ultiores aëris partes & unà la-
pidem ipsum. Sed enimverò cùm (1.) aër
primus non nisi à manu motus moveat secun-
dum, non apparet quo pacto, cùm non am-
plius à manu movetur, possit tamen alium,
& sic lapidem quoque, movere. (2.) non
potest hoc de aëre pone lapidem intelligi, cùm
inter lapidem & manum nullus interjaceat;
neque de aëre ante lapidem, qui lapidis mo-
tum impediat potius quàm promoveat ne-
cessum est, neque de aëre laterali vel circum-
fluo, qui partes aëris alias sibi prorsum con-
tiguas premere & urgere, non item lapidem,
quem à latere solum attingunt, propellere,
facile concipi potest.

VIII. Ergo

VIII. *Ergo vi hactenus dictorum
dicere amplius haut licet, corpus unum movere
alterum vel animam nostram movere suum
corpus?*

In rigore Philosophico certè utrumque
falsò dicitur, si motuum causa verè efficiens
aut corpus aliquod, aut spiritus aliquis finitus,
ut anima nostra, diceretur. Verùm quia vis
motrix divina in corpus aliquod redundans
per aliud corpus proximè antecedens in hoc
se exerit, illa tanquam ab illa antecedente pro-
veniens considerari ipsique attribui, tanquam
propria potest, salvò interim veritatis rigore,
quem vulgus hominum satis capere non potest.
Similiterq; cum animæ nostræ volitiones sive
actiones immanentes, causa sine qua non, sive
occasionalis aut moralis saltem sint motuum
corporis consequentium, hos ipsis attribui
& imputari, æquè ac si efficienter ab ipsis pro-
ducti essent, non adeo insolens est. Ideò
& nos impofterum, cum vulgo locuturi &
corporibus vim movendi alia, & animæ no-
stræ vim movendi suum corpus, quia sic loqui
receptum & quodammodo commodius est,
attributuri sumus.

CAP. XVII.

De

Motûs Reflexione.

I. *Quid per motûs reflexionem, sive motum reflexum, hoc loco intelligitur?*

Accidit nimirum frequenter, ut corpus aliquod obvium plus habeat resistentiæ, quàm ut ab alio actu moto, & in istud impingente, de loco suo sensibiliter se deturbari patiatur; & tunc motus impingentis haut facile penitus extinguitur, sed impeditus porrò continuari retrò flectitur, cum majore vel minore sui debilitatione vel imminutione.

II. *Cur verò in una reflexione motus incidentis magis imminuitur, quàm in altera?*

Causa est diversa habitudo conditioque corporum tum impingentium in alia, tum eorum in quæ impingunt. Aliqua nimirum majorem patiuntur compressionem, alia minorem in loco contactûs mutui, & rursus alia post ictum compressa, aut contusa potius, manent, (ut plumbum, cera & similia) alia verò in pristinum statum sese quamproximè restituant (ut folles lusorii) alia denique par-

tim

tim se restituunt, partim compressa manent: Et à primi quidem generis corporibus (non elasticis dictis) nulla est aut insensibilis, à secundi generis, valdè elasticis, fortior & vehementior, à tertii generis intermediæ conditionis, mediocris est reflexio.

III. *Quanam ergo est efficiens causa illius motûs reflexi?*

Eadem est procul dubio, quæ prius directum sive incidentiæ motum produxit, qui cum in corpus obstans impingit, nec illud tamen totum loco movere valet, aliquam saltem sui partem in partes contacti transfert, residua verò parte, cum continuare motum, propter obstaculum interpositum, porro non possit, retrò saltem fertur, ab obstaculi vel rectiore vel obliquiore positu diversimode determinatum.

IV. *Sed cur in objecta omnino mollia omniq; elaterio destituta incidens mobile planè non reflectitur?*

Quia, profundius penetrando, in partes obvias innumeras promteque cedentes, impetum suum diffundit, ac distribuit, ut sensibilis quidem ejus portio, quæ per ambientes undique ac tantillum saltem comprimen-
tes

tes retro eniti valeret, non superet: eodem modo sc. quo homo bene nummatus, in gregem ingentem mendicantium incideret, nec ullum horum discedere vacuum pateretur, omnibus exhauriri nummis emungique posset.

V. *Quid vero contingeret, si corpus motum impingeret in corpus summè-solidum?*

Tametsi nullum fortè detur corpus summè solidum, uti nec summè molle aut cedens, supposito tamen tali mentis fictione quadam prorsus inflexibili, ejus partes, utpote immobiles, nullam motûs partem à corpore impingente in se transferri paterentur, adeoq; necèssum esset, impingens corpus omnem suum impetum servare, retroq; (dum rectà non potest) integrum continuare: quemadmodum e. g. nummatus in catervam incidens non-mendicantium, quos mendicòs tamen credidisset, si oblatos nummos omnes respuerent, æquè nummatus, ac prius accesserat, discederet.

VI. *Annon autem hoc modo subverteretur lex universalis toties inculcata, quod corpus impingens in aliud debeat huic partem suæ motûs communicare?*

Nequaquam subvertitur, quia lex illa universalis loquitur de corporibus cedere tantillum

lum saltem, ac motus particulam aliquam in se recipere valentibus; quæ suppositio hoc loco cessat: aut rectius fortè diceretur, corpus tale inflexibile portionem quidem aliquam motûs impingentis, vi legis universalis, in sese recepturum, ac tantundem impingenti demtuum, fuisse, nisi omnimoda ejus inflexilitas ac resistentia (quam ab alio contrario motu esse necessum est) tantundem statim motûs impingenti, vi ejusdem legis universalis, redderet, quantum ab ipso deberet recipere.

VII. *Hæc non satis capio, ideoq₂ paulò clariùs exponi mihi exoptem.*

Quicquid hîc obscuritatis occurrit, ex eo solo præjudicio promanat, quo supponimus, omnem resistentiam aut saltem omnem quietem (quæ sine resistentia nusquam in natura reperitur) esse meram motûs privationem; cùm certissimum sit, omnem quietem (prout nunc in natura reperitur) ab aliquo motu vel nisu vel pressura dependere, quam non quivis alius motus (uti quidem necessum esset, si quies esset mera motûs privatio) superare valeat, sed is solùm qui isto sibi contrariante major sit. Et hinc est e. g. cur parvum aliquem lapidem, etsi quodammodo re-

S

nitentem

nitentem, (quia sc. ab æthere gravitante pro ratione suæ molis deorsum premitur) haut difficulter allevare & sustollere queam (quia nimirum vis motrix in musculis meis &c. major est, quàm ille nifus gravitantis ætheris in parvam lapidis molem) non possim autem vel ad pili unius latitudinem attollere saxum ingens, cujus partes millies plures à millies pluribus ætheris deprimentis impulsibus millies majore nifu virtuti motrici meorum musculorum resistunt.

VIII. *Quid ergo futurum esset, si
obstaculum sit mediæ conditionis, b. e.
nec summè cedens, nec summè
solidum?*

Tunc equidem partes obstaculi impulsæ, introrsum tantisper cedunt, donec impingentis impetus, vi sæpiùs dictæ legis paulatim decrescens, primùm ad æquilibrium cum elastica virtute obstaculi reductus, mox eadem superatus fuerit, ipsæque nifu opposito sese restituant: Ac tum quidem corpus impingens, partim à portione motûs directi adhuc residua, partim à dicto elaterio partium sese restituentium, receptam motûs partem omnem ferè reddente, retroflectitur, eadem ferè celeritate quâ impegerat. Et quidem,
prout

prout hæc restitutio impetus accepti fidelius & exactius, aut minus exactè, fieri supponitur; ita vis ac celeritas reflexi motûs vim ac celeritatem motûs incidentis magis aut minus adæquat.

IX. His ita se habentibus nec soli corporum obstantium elaterio incidentium reflexio adscribi, nec mora quedam inter motum incidentem & reflexum statui potest?

Sic est omnino. Nam quis credat à solo elaterio reticuli v. g. pilam ipsi incidentem & in puncto incidentiæ omnem motum deperdentem, de novo ad tantum intervallum reflecti, quantum experimur; cùm experimento obvio certum sit, si quis reticulum, aut chordam aliquam tensam simplicem, digito tantundem, vel etiam amplius, deprimat, quantum aliàs à globulo desuper illapso deprimitur, & sic depresso globulus imponatur, nunquam eum ab elaterio subito laxatæ vel remissæ chordæ, tam longè repelli, quàm longè repellitur motu præcedente tensionem vel depressionem istam efficiens: Id quod argumento est reflexionis impetum maximam partem à motûs directi reliquiis, minimam ab elaterio corporis tacti vel impuls

pulsi pendere. Quod si igitur motus directus non totus cessavit, mora etiam inter directum & reflexum nulla potest intercedere.

X. Annon experimentum notum sagittæ à pede mali perpendiculariter emissæ & ad eundem pedem recedentis, navigio interim celerrime provecto, moram istam negandam evidenter evincit?

Ita quidem Hamelio visum est, existimanti, si sagitta in puncto recursus tantillam traxisset morulam, navem interim continuo motam malo suo à sagitta, durante illa morulâ, discedere necessario debuisse; sed hæc consequentia in rigore philosophico non procederet, quia motus sagittæ AC compositus est, ipso Hamelio fatente, ex motu AD rectâ sursum, quem ab arcûs nervo impressum habet, & motu horizontali rectâ antrorsum AB, quem à navigio impressum habet. Jam si maximè prior aliquam moram admitteret, posterior tamen à motu navis continuo pendens nullam moram admitteret, atque adeò sagitta inter decidendum malo semper adhæreret.

CAP. XVIII.

De

Mutationibus omnium maximis,
essentiæ puta & ipsius existen-
tiæ.

I. *Cur essentiæ & existentie muta-
tiones omnium maximas appel-
las?*

IDeò id facio, quòd in cæteris mutationi-
bus, de quibus hactenus egimus, corpus
aliquod mutetur & transferatur solùm ex tali
in tale, ex tanto in tantum, ex hoc loco in
alium, ipsum interim reipsâ permanens ac
inter cætera non existens tantùm, sed id-
ipsum, quod antè fuerat, etiamnum existens;
in præsentì verò existentie & essentiæ muta-
tione res aut simpliciter esse desinit id quod
antè fuerat, adeò quidem ut nomen ipsum
etiam deperdat, quod cum aliis ejusdem na-
turæ priùs commune habuerat: quâ fanè
major in Natura mutatio non datur.

II. *Nonne verò major adhuc est mutatio, si res aliqua simpliciter existere desinat, h. e. prorsus in nihilum redigatur?*

Utique hæc esset adhuc major mutatio; sed talis in hac rerum natura non contingit: Nam cum e. g. homo moritur, aut animal quoddam brutum interit, aut planta quædam esse desinit, ista non in nihilum rediguntur, sed in aliud tantum genus corporum transformantur; adeo quidem ut materiæ ex qua constiterat, ne unusquisque pulvisculus intereat, sed forma solum pristina, h. e. pulvisculorum illorum sive atomorum dispositio tantum destruat, & alia in prioris locum succedat. Unde, cum de Existentiæ mutatione hoc loco acturos nos profiteamur, id intelligendum est non de existentia simpliciter, sed de existentia sub tali forma essentiali; ut e. g. animal mortuum non amplius existere dicatur inter animalia, tametsi existat adhuc in genere rerum, sub forma cadaveris, & pauculo tempore interjecto sub forma sceleti, tandemque sub forma pulveris &c. & consequenter per mutationem existentie
hic

hîc idem planè quod per mutationem essentiaè intelligatur.

III. *Anne verò dantur in hac rerum natura ejusmodi mutationes?*

Si quæstio de hoc elementari mundo intelligeretur, supervacanea videri posset, quandoquidem talium mutationum exempla quotidie oculis nostris obversantur; generalissimè verò de universo mundo intellecta, dubia quondam videbatur, cùm crederentur cœlestia omnia uti ἀγέννητα, sic ἀφθάρτα quoque: hodie verò partim verosimillimis, partim certissimis experimentis compertum est, in cœlo quoque dari essentielles ejusmodi mutationes, sive Cometarum & Stellarum Novarum κατ' ἐξοχλὴν ita dictarum exempla respiciamus (de quibus in utramque adhuc partem disputatur) sive in Solis maculas oculos intendamus, quas oriri & rursus interire notorium est & in confesso. Neque dubium in aliis quoque cœlestibus corporibus similes aliquas in eorum partibus contingere, quæ propter nimiam distantiam nobis sint inobservabiles.

IV. *Concessa hac in parvis quibusdam particulis cœlestium mutabilitate, nec sol tamen aut luna, aut alius planetarum, nec ex fixis ulla à mundo condito interiit.*

Id quidem verum est, si fixam illam grandem in Cassiopejæ sidere verè destructam neges, quæ sub initium Novembris 1572 apparuit, & cum durasset toto anno sequenti & insuper usque ad principium veris 1574, donec mense Martio conspici desiit, interea temporis perpetuò decrescens, ita ut cùm sub initium Veneris stellam visibili quantitate adæquâset, sub finem ne sextæ quidem magnitudinis stellæ par æstimaretur, ac tandem conspici prorsus desineret, nunquam in hunc usque diem restituta. Posito igitur, nullum corpus totale in cœlo unquam interire, non est tamen hoc cœlestibus proprium, sed terræ nostræ, imò toti huic sphæræ elementari cum istis commune, utpote quæ ab ipso mundo condito pariter durat.

V. *Qua-*

V. *Quanam verò causa potest assignari tantæ durabilitatis in his Mundi globis totalibus?*

Cùm hæc totalia corpora priora sint Naturâ ipsâ , quam constituerunt, non potest eorum causa efficiens, adeò neque conservans, Natura esse, sed DEVM ipsum eorum, nullâ dum Naturâ mediante , Conditorem & conservatorem agnoscere necessum est, & in ipsius Beneplacitum durabilitatis hujus rationem resolvere. Verùm cùm ne in hoc effectu videatur absque omni medio egisse, in globo hoc elementari gravitate partium ad commune centrum perpetuo tendentium usus meritò conjicitur, hanc ipsam verò tendentiam ac depulsionem (quam effectûs quotidiani oculis ipsis ingerunt) mediante gyro quodam ætheris vasto , ita ut ultra Lunam se exporrigere & hanc menstruo motu circa Terram revolvere videatur , prorsus arbitrariè procurâsse : qui gyros in orbem, cum aliquo nisu à centro conjunctus, elementaria quæque, sursum violenter emota, statim versus suum centrum repellat , ut hoc modo sphæram hanc elementarem dissolvi aut dissipari, quamdiu hæc Naturæ compages durat,

fit impossibile : Nec obstat quicquam quò minus similes gyros circa reliquos mundi globos divinitus constitutos, cum eodem effectu, concipiamus.

VI. Cur verò minutiores totalium portiones minus durant & faciliùs destruuntur ?

Ex opposita hoc ratione consequitur; quòd illa partialia corpora non habeant intra se gravitatis vel tendentiæ centrum, ad quod ipsorum partes continuo quodam nifu detruderentur, sed uti dictum extra se in totalium suorum medio: ex quo fit, ut, cum illæ partialium partes aliæ graviores sint & magis aptæ ad depulsus istos recipiendos, aliæ leviores, à gravioribus adeò sursum extrudendæ, hoc ad partium diversarum distractionem potius ac dissolutionem, quàm ad constantem earum unionem faciat.

VII. An

VII. *Annon alibi docuisti, aëris ponderosi circumpressionem ad solidorum corporum firmitatem ac duritiem plurimum conferre?*

Non possum hoc diffiteri; sed ea ipsa aëris ambientis pressio crassiores corporum partes in arctiores complexûs compingens, subtiliores alias, à calore tum intrinseco in animalium sanguine, visceribus terræ &c. tum extrinseco solaris aliorumque ignium, solutas, impulsas, allevatas, exprimit, & à toto suo divellit: Unde viventia omnia, quæ laxioris & heterogeneæ magis sunt structuræ, perpetuò indigent pabulo, ex quo subinde re-
 staurandum est, quod per continuam extrusionem ac transpirationem (insensibilem illam quidem, at copiosissimam) deperditur, siquidem conservari talia saltem ad notabile temporis spatium velint. Scilicet innumera latent intra compagem partialium principia, quæ ex unis in alia, juvante etiam illâ ponderosi aëris circumpressionem, transmigrant, mutuisque impulsibus alia aliorum texturas non solum forinsecus deterunt, sed ad intima penetralia quoque subeundo laxant, dilacerant, rescindunt &c.

VIII. *Sed*

VIII. *Sed cur alia facilius, alia difficilius destruuntur & corrumpuntur?*

Hoc totum dependet partim à diversitate texturæ alibi laxioris & minus cohærentis, alibi solidioris, & implicationis, in ipsis corporibus destruendis; partim à destruendum ac solventium majore vel minore impetu ac violentia. Sic integræ sæpe terræ regiones & immensæ montium moles ab incendiis subterraneis concutiuntur & loco suo moventur, ne quicquam resistente tantarum molium gravitate aut aëris comprimentis nisu; scopuli durissimi à fluctibus marinis lentâ saltem violentiâ exeduntur; altissimè-radicatæ arbores ventorum flatu radicitus eveluntur &c. quibus alius debilior impulsus, etsi sæpissimè repetitus, aut nullam infert noxam sensibilem, aut non nisi longissimo temporum tractu: quia nimirum aut gravitatis, aut intricatioris texturæ major vis est, quàm ut ab isto superari, dissolvi, distrahivè possit.

IX. *Quan-*

IX. *Quando igitur essentialis hæc
corporum mutatio & plenaria cor-
ruptio contigisse judicanda
est?*

Tum demum pro tali est habenda, cum
ita immutata est corporis forma seu structura,
ut functionem ordinariam & opus proprium
non solum amplius actu ipso non exequatur,
(id quod sæpius impeditur tantum formâ,
nondum licet destructâ, contingit) sed etiam
aptitudo ad illud porro exequendum sublata
penitus agnoscatur: quo sensu animal aut ho-
mo interiisse mortuusque æstimatur, cum vi-
tali calore penitus extincto, sanguis fluere
cessat & prorsus coagulatur, & consequenter
spirituum animalium ulterior secretio in ce-
rebro sperari nulla amplius potest, adeoque,
his deficientibus, omnis sensatio motusque
localis totaliter deficit, indeque in homine
totum commercium inter animam rationa-
lem & corpus non amplius vivum plenariè
ac citra spem restitutionis sublatum est.

X. *An-*

X. Anne igitur omnis spes restituenda naturaliter formæ decollat, postquam illa semel dissoluta est ac destructa?

Distinguendum hîc videtur inter formas viventium seu animatorum organicas, & inter illas inanimatorum inorganicas. Illæ semel destructæ naturaliter reparari non possunt, sicuti nec ab initio naturæ viribus, sed solâ divinâ virtute speciali originaliter productæ fuerunt : hæ verò, sicut eadem quidem virtute divina, sed generali, & mediante naturâ, prodeunt ; ita, quin eadem mediante destructæ semel iterum restaurentur, nihil obstat ; præsertim si in levi quâdam & quasi superficiali partium textura consistant, quemadmodum e. g. terebinthinæ spiritus, teste Boylio, levi calore extractus & capiti mortuo redditus, primum in crassum aliquem liquorem, tum longâ digestionem in veram & genuinam terebinthinam redit, & in meteororum generatione vapores in nubes, nives, pluviasque facillimè convertuntur, quæ tamen eadem facilitate in vapores iterum resolvuntur.

XI. Pau-

XI. Pauca tamen hujusmodi reparationum exempla cùm inveniantur in natura , num difficultatis hujus ratio aliqua in promptu est ?

Est omnino , nec illa longè adeò petenda . Nimirum cùm formarum destructio solvendo partium nexum essentialem ut plurimum contingat , quâ solutione subtiliores partes à crassioribus separantur , ac sæpius in auras longissimè abeunt , ventis deinceps aliisq; impulsibus longè lateq; dissipandæ , (id quod in iis , quæ computrescendo , lentâ quâdam corruptione , intereunt , præcipuè contingit) unde à Natura citra consilium operante haut facilè repeti & cum capite suo mortuo reuniri possunt , prout ars in exemplo terebinthinæ similibusque , partes sc. subtiliores avolaturas studiosè cohibendo , colligendo , ac deinceps cum relictis crassioribus iterum commiscendo , præstare potuit : Ut taceam , nonnunquam corporis alicujus formam essentialem sæpe destructam credi , cùm externa sensibilia mirè mutata sensu inermi deprehenduntur , quam tamen armatus oculus salvam adhuc evidenter deprehendit ; cujus
insigne

insigne exemplum præbet Mercurius, qui in mille formas, uti videtur, arte chymicâ transmutatus, subinde tamen pristinam iterum facillimè induit, quam nunquam sc. plenè deposuerat, prout oculus microscopiis armatus in plerisque mutationis putativæ casibus evidenter deprehendit.

TANTVM,
&
SOLI DEO GLORIA.



PHY-



PHYSICÆ
MODERNÆ SANIORIS
PARS SPECIALIS.

SECTIO PRIOR
De
GEOCOSMO

seu
Mundo (Sublunari)
Elementari.

CAPVT I.

De
Elementis eorumque numero.

I. *Quid intelligis per Geocosmum seu mundum
elementarem?*



Um Mundi nomenclatura nihil
aliud designet, quàm pulchram
& concinnam plurium corporum
coordinationem, in certum ali-
quem scopum imò innumerabiles,
prudentissimè directam; Geocosmi nomen ejus-
T modi

modi *Ἀναρροσμησι* dicit inter aquam, terram, aërem & ignem, magno viventium omnium commodo factam, ex quibus nimirum ita decenter coordinatis, tanquam ex elementis suis, totus hic Orbis terraquaërigneus est compositus.

II. Quemnam verò elementi conceptum formare oportet, si terra, aqua, aër, ignis, mundi hujus sublunaris elementa rectè dici velint?

Elementi vox respectiva est & simplicioribus quibusque convenit respectu magis compositorum, quorum substantiam ingrediuntur tanquam partes integrantes: prout sanè prima literarum elementa dicuntur vulgares alphabeti characteres in unaquaque lingua, quia ex illis syllabæ, mediantibus his vocabula, & sic porro orationes, periodi &c. componuntur; & Euclides elementa Geometriæ suos libros appellavit, quòd aliorum scriptorum Mathematicorum demonstrationes passim ingrediuntur. Hoc ergo modo quatuor istæ aëris, aquæ, ignis, terræque massæ, & totius hujus mundi sublunaris elementa rectè dicuntur, quatenus certo quodam ordine inter se disposita eum ut partes integrantes componunt, & partialium quoque corporum magis compositorum elementa saluari merentur, quatenus horum nullum uspiam extat, cujus compositionem non aliquæ portiones è singulis istis massis ingressæ conjiciuntur.

III. Quo

III. *Quo pacto verò è singulis istis massis elementaribus quadam portiones ad mixtorum partialium compositionem concurrent, si eum habeant inter se locorum ordinem, què vulgò ipsis tribuitur?*

Hoc nimirum vis dicere : Si ignis summum obtinet super cætera elementa locum, & quidem super aërem quinquaginta, ut nonnulli credunt, aut duodecim milliaria, aut quatuor saltem, ut volunt recentiores, altum, eumque ad lunæ concavum usque protensum; quo pacto ad componenda piscium in profundo mari corpora, vel ad mixturas metallorum in terræ profundis peragendas, ignis aut ær ex tanta altitudine descendere poterunt, & mixtorum talium compositionem ingredi? etiam contra naturalem inclinationem suam, quâ sursum potius quàm deorsum feruntur. Ego verò huic solvendo dubio duo præcipuè moneo : (1) Fabulam istam de Sphæra ignis supra aërem dudum explosam, & experimentis evidentissimis compertum esse, ignem elementarem in terræ profundis potius sedem suam, quam supra aërem habere; id quòd in sequentibus uberius demonstrabitur : (2) Hunc ipsum ignem subterraneum ad superiora perpetuis exhalationibus enitentem, omnibus cæteris quoque elementis passim permisceri, aëremque similiter, tametsi totâ suâ sphærâ super aquæ terræque graviores massas eminentem, aliquas tamen ejus portiones in ipsis terræ cavernis ac profundissimis

poris, imò intra ipsam aquæ substantiam, ubique reperiri, multis experimentis constat, quemadmodum etiam aquæ portiones haut exiguæ infra terram utique reperiuntur; ut hoc pacto corporibus infrà, supraque terram, in aëre & aqua media generandis elementarium particularum penus necessarius ubique præsens sit.

IV. *Et hoc fortasse illud est, quod ipsimet Aristotelici confitentur, Elementa nusquam reperiri pura in hoc mundo? Interim verò ista per mentis quandam abstractionem, in sua puritate, tanquam corpora omnino simplicia, spectanda esse?*

Sic est ut dicis; & videntur quidem in hanc sententiam perducti Peripatetici definitione elementorum, quâ ipsis prævit Magister Aristoteles Lib. III. de Cœlo cap. 3. supponens (ἡτοιμασμένον) *Elementum corporum id esse (ἔστι δὲ) ait non ἔστι δὲ) in quod cetera dividuntur, in quibus inest potentia vel actu (utrum autem sit, adhuc disputatur) ipsum autem est indivisibile in alia specie differentia.* Quæ suppositio si admittatur, ipsis elementis, quatuor vulgaribus prout actu in natura se habent competere nequaquam potest, uti postea videbimus. Nec enim sibi invicem tantum per accidens commixta sunt (quo casu per abstractionem mentis in essentiali sua puritate considerari possent) sed singula: essentialem quandam ætheris aut alius adhuc subtilioris

lioris materiæ admixtionem requirunt, quâ per mentis abstractionem remotâ, saltem ignis, aëris, & aquæ elementa, inertes quædam massæ, sine omni motu, fluiditate & activitate, futuræ essent.

V. Hoc igitur pacto plura quàm quatuor vulgaris elementa forent statuenda, duo sc. actusosa vulgaribus istis in sua puritate merè passivis tanquam horum animas superaddendo?

Non solùm hoc esse necessarium inferiùs videbimus, posteaquam elementorum singulorum naturas præcisius inquisiverimus; sed etiam, ne sic quidem elementa (præsertim terreum) omnino similia & homogenea statuere licebit; quandoquidem terrestrium corporum mira diversitas, ut auri, argenti, stanni, plumbi &c. metallorum, mercurii item seu argenti vivi peculiaris prorsus natura, salium item sulphurumque genera innumera, peculiaris sua semina sive particulas inter se in quovis genere ejusdem, in diversis generibus diversæ conditionis & figuræ, videntur præsupponere.

VI. Quid verò de ista controversia sentiendum, quâ, ut Aristoteles in sua definitione innuit, disputatur, utrum elementa actu sint in mixtis, an potentiâ tantùm?

Videtur ista in mera quadam ἀνομομαχία consistere ac distinctione quadam tolli posse. Nimirum secundum suas particulas materiales per

totius mixti compagem dispersas actu utique sunt in mixto; secundum formas autem suas (quæ collectionem particularum materialium involvunt) potentiâ tantum ibi reperiuntur: Eodem modo sc. quo turma quædam militum per hyberna, pagos & oppida, dispersa actu quidem adest, quoad singulos milites ex quibus antè fuerat composita; quoad formam verò, quæ in collectione militum ad unum communem locum, & in certa eorundem coordinatione consistit, potentiâ tantum intra territorium reperitur.

VII. *Unum adhuc in genere scire velim, an Aristotelicorum analysis, qua numerum elementorum quaternarium probare solent, satis confirmet id quod intendit?*

Illud videlicet experimentum intelligis, quo lignum accensum primò flammam evidenter edit multò maiorem, eâ quæ ipsi primitus admota fuerat, & sic ignis elementum è ligno elicitum evidenter ostendit; cinis autem finitâ combustionem relictus elementum terræ ad oculum ostendit; humor ex ligno sub cineribus periundus, elementum aquæ indigitare dicuntur; exhalantes denique in aërem portiones, aëris quoque elementum demonstrare. Verum, si, quod res est, dicere velimus, crassa nimis est hæc analysis, & crassiores adhuc ex ea deductæ consequentiæ: Nam quod cineres e. g. spectat, iis terrei quiddam subesse planum est, sed, cum ii ipsi cineres in salinas partes & alias non-

non-salinas ulteriore analysi resolvi possint, plura potius specie diversa, quàm unum & simplex terræ elementum arguunt : & humor in in quibusdam casibus manifestè residuus, non præcisè aqueus est, sed in diversis corporibus, imò in diversis lignis quoque, alius atque alius; eas denique portiones, quæ in aërem ascendunt, terreas potius esse quàm aereas, fuligo caminis adhærens evincit.

C A P. II.

De

Elemento ignis in specie.

I. *Quenam methodus optima est mirabilem ignis naturam expiscandi ac detegendi?*

Non potest esse melior eâ, quæ varios ignis effectus & proprietates ante omnia scrutatur, & postmodum è generalibus materiæ conditionibus & principiis ea supponit, è quibus istorum rationes verosimillimè promteque reddi possint.

II. *Qui sunt ergo ignis notissimi effectûs?*

Vulgatissimi omnium ignis flammantis effectus sunt *lucere & calefacere*, cominus etiam adurere, cremare, in cineres redigere, verbo arctissimè connexa resolvere, partium validissimam cohesionem rumpere, ad intimos etiam corporum solidissimorum plexus penetrare. Nec enim aquas tantum aut aërem aliave fluida

intimiùs pervadit & incalescere facit , sed in ferri quoque aliorumque metallorum & lapidum durissimorum poros ita se insinuat, ut ea penitus candefaciat, intensior etiam in calcem ea tandem redigat, aut ruptis omnibus partium vinculis eorum solidissimam substantiam influorem diffundat.

III. *Quid ex his effectibus rectè concluditur, pro hypothesis ad ignis naturam explicandam accommodata?*

Istud primùm , quod hæc vis in solidissima etiam corpora intimiùs penetrandi magnam arguat particularum ignis subtilitatem : deinde quod hæc subtilitas non sit tamen nimia, quia per corporum poros aliàs penetraret intactis, aut illæsis saltem , eorundem fibrillis & particulis harumque nexibus ; sed respectu dictarum fibrillarum & connexionum dissolvendarum ac dirumpendarum ignis particulæ sint quodammodo crassiusculæ supponendæ , & poris vel interstitiis particularum & filaminum majores ; ut sc. addactæ violentius, isthæc violenter etiam dilatent ac diducant , & hoc modo in sentientibus , doloris alicujus magis minusve intolerabilis sensum inducant ; in aliis autem laxationem, distractionem, tandemque ictuum iteratorum crebritate omnimodam dissolutionem causentur.

IV. *Hoc*

IV. *Hoc igitur pacto particulas flammantis ignis oporteret esse terreas, rigidas, acuminatas &c. sed unde illæ haberent agitationem illam vehementissimam, quam effectus ipse testatur?*

Quod prius attinet, id nimis manifestum est: Nam & sensus ostendit in fuligine terrearum particularum innumerarum præsentiam, & ratio demonstrat, cum corpora per ignem affici, lædi, dissolvi, solita ipsa sint terrea, aut ex terreis maximè composita, corpuscula his compositionibus dissolvendis apta, saltem æquè rigida, solida, terrea esse debere, ut instar acicularum aut spiculorum summa celeritate adactorum profundius adigi suaq; rigiditate particularum nexum dispungere, discindere, disseccare &c. possint. Quoad posterius autem, cum terreas istas particulas, suâ naturâ torpidas & imotas, summa vi ac celeritate adigi necessum sit, ac sensualis etiam observatio non obscure testetur; summa quoque necessitas requirit, ut supponamus materiam aliquam incomprehensibiliter subtilem & incomprehensibili pariter celeritate divinitus motam, à cujus rapiditate corpuscula illa terrea & rigida in omnes partes unà rapiantur.

V. *Sic igitur flammans ignis erit mixtum aliquod corpus, ex duobus saltem corporum generibus?*

Ita est omnino, & hoc fatentur ipsimet Peripatetici;

ripatetici ; tametsi distinctè haut edifferant, quodnam ergo sit elementum ignis in sua simplicitate spectatum, quam ipsi tamen perpetuò urgent. Quod si igitur flammans ignis ex duobus generibus elementarium particularum componatur, uti hætenus deduximus ; evidens est abstractis mente terreis illis spiculis, reliquas subtilissimæ materiæ particulas, quæ terrea ista spicula tanquam instrumenta sua vibrant, ipsum simplex elementum ignis constituere, quod vim urendi aut calefaciendi sensibiliter, nullam habet nisi mediantibus alteris rigidis terrei elementi corpusculis, per se autem omnia totius mundi corpora pervadit, ipsum adeò Hippocratis *Ἰερμὸν* decantatissimum, & Aristotelis *Ἰερμότητα ψυχρὴν διὰ πάντων διήκουν*, constituens.

VI. *Dabuntur igitur ignes lucidi quidem sensibiliter verò non calidi ?*

Utique, & experientiâ quidem ipsâ comprobante. Lampyrides enim sive cicindelæ noctu volantes in æstate, itemque ignes fatui, ab hoc ipso urendi defectu sic dicti, ignes lambentes &c. lucem quidem in tenebris emittunt, h. e. particularum suarum vario motu ætheris partes secundum rectas lineas undiquaque ad inspectantium oculos propellunt, iisque motum rectilineum, etsi debilem, istis tamen alio splendore non occupatis, satis sensibilem imprimunt ; qui motus interim debiliior est, quàm ut obvias in aëre aliisque terrestribus corporibus rigidiores particulas violenter celeriterque satis agitare queant

queant ad calorem aliquem sensibilem & urentem producendum.

VII. *Ergo dabuntur etiam ignes calidi fortasse qui non luceant?*

Hoc etiam extra dubium : Et calor quidem vitalis (quem flammam vitalem nonnulli abusive vocant) in corpore humano aliorumq; perfectiorum animalium , item calor in aqua ferventi &c. hujus generis sunt , ut calefacere quidem , vel etiam adurere , queant , lucere verò non item : Quia nimirum ejusmodi calores nihil aliud sunt quàm igniculi , seu spicula terrea à materia subtilissima validè quidem , sed impeditiùs , agitata , propter admixtas aqueas aliasque in sanguine particulas , unde calor vel moderatus vel immoderatiores , (pro varietate mixturæ) nunquam tamen summus & cremans , ut in flamma , exoritur ; luminis autem motus rectilineus ætherem supponit à materia subtilissima immediatè secundum rectas lineas propulsus ; quod in his mixturis fieri non potest.

VIII. *Quod si igitur elementum ignis purum ac simplex , quod sc. in diversa specie corpora dividi non possit , velimus concipere , quidnam ejus conceptus est futurus?*

Omibus ritè ex omni parte examinatis & excusis , nihil aliud reperimus , quàm , cum omnis ignis vel calidus & non lucens , sive lucens & non calidus , sive calidus & lucidus
simul

simul (maximè verò calidi omnes) mixti sint è corpusculis materiæ subtilissimæ, tanquam agitantibus, & corpusculis terreis, salinis, sulphureis &c. tanquam terreis, aut aqueis similibusve fluidorum, tanquam agitandis; ipsam materiam subtilissimam solam esse posse id, quod elementum ignis simplex & purum esse dicitur Aristotelicis.

IX. *Hoc verò modo elementum ignis non esset summe calidum, quod Aristotelici tamen ubiq; supponunt?*

Sic est ut dicis: Verùm cùm summus calor non sentiatur nisi in flamma, hæc autem mixtum quid sit ex partibus terreis & ignis elementaris particulis, & vim urendi sine terreis istis spiculis crassioribus in corpus nostrum & alia non exerat; manifestum est, agitationem quidem summam ac celerrimam ab ipso puro ignis elemento esse, effectum autem agitationis illius summæ, tantò sensibiliorem esse, quantò rigidiora & crassiora sunt corpuscula illa terrea, modò summæ tamen illius agitationis capacia sint. Scilicet vis ipsa agitans ab elemento ignis est, sed ejus particulæ agitæ nimis subtiles sunt, ut fibrarum poros in corporibus animalium aliorumque promptissimè illæsis fibris ultrò citroque transeant: quod si verò eadem vis in crassiores terreas immediatè incidens, has in illos poros angustiores celerimè adigens, fibrarum rupturam causatur, idque demum unctionem, cremationem, & respectu

spectu sensus nostri summum calorem vocamus. Summus igitur & adurens calor puro ignis elemento nequaquam competit, aut si elemento ignis tribui velit, id adeò simplex, velut ab Aristotelicis fieri solet, concipi non debet.

X. Sic igitur facile concipietur ignis flammantis ex ligno aliisque inflammabilibus generatio?

Ita sanè opinor. Nam flamma parvula admota incipit solvere nexum partium, & harum aliquas, nec nimis tenues, nec nimis crassas, sed mediocres unà secum abripit, sui que adeò augmentum procurat; auctaque sic flamma sibi met subinde alia nova majora augmenta adjungit, atque ita in incendium brevi tempore erumpit, tenuissimis ac mediocribus fluxu quodam perpetuo sursum, sub forma tandem fumi, expulsis, crassissimis autem & gravioribus sub forma cineris relictis; interim verò loco expulsarum mediocrium, alias harum similes ex pabulo vel materia inflammabili sibi ad sui conservationem adjungens.

*XI. Sed quomodo nova flamma, collidendo v. g. silicem cum chalybe, ex fomite elicitur, sine applicatione flammula jam antè ardentis? **

Quia & silices sunt satis duri & rigidi, & chalybs similiter, illi verò insuper friabiles, fit
ut,

* Vid. hic Cartes. Part. IV. Princip. p. m. 170. & seqq. prolixius varios gignendæ flammæ modos ordine deducens.

ut, concussione mutuâ factâ , spatiola particulis
 filicum interjecta coarctentur & ætheris globu-
 los minimos, quas continent, explodant, ita so-
 lâ materiâ subtilissimâ & agitatissimâ circa illas
 relictâ, cujus agitatione rapidissimâ (resilitione
 quoque earum post compressionem jam cessan-
 tem, negotium facilitante) aliquæ ipsarum ab-
 ripiuntur, ignis ita flammantis parvas scintillas
 constituentes; quæ in fomitem ad inflammabili-
 tatem facillimam jam præparatum illapsæ, inde
 novas quasdam particulas sibi adjungunt, quibus
 auctæ ex admoto sulphurato (materia similiter
 facillimè resolubili) novum ac notabile porrò
 augmentum accipiunt, tandemque ex candela-
 rum, lignearum assularum &c. copiosiore mate-
 ria, copiosius gradatim augmentum capiunt.

XII. *Quo pacto verò ignis jam adu flammans extinguitur?*

Fit hoc ejus particulas collectas, & à subti-
 lissima materia sufficienter agitata, dividendo
 per admixtas majori copiâ particulas aquæ, fu-
 mi, aliorumque corporum crassiores, quibus
 omnibus sufficienter agitandis pauca illa mate-
 riæ subtilissimæ, sive ignis elementaris, portio,
 quæ in flamma adest, non amplius sufficit.
 Quod si verò talis admixtio sive aspersio vel a-
 quearum, vel salinarum particularum in parvula
 dosi contingat, hæc robur potius aliquid flam-
 mæ addit (experientiâ id testante) quia paucae
 illæ particulae, præsertim salinæ, à communi
 flammæ torrente abreptæ, priores suo impetu
 adjuvant.

XIII. *Cur*

XIII. *Cur verò ignis corpora solvendo, heterogenea segregat & homogenea congregat?*

Tametsi hoc nec perpetuum sit, nec igni planè proprium, multò minus ipsam ignis essentiam exprimat (quod aliqui credidisse videntur) est tamen attributum quoddam igni ut plurimum conveniens: non quòd is quasi distinguere inter heterogenea & homogenea nòrit, ac tanquam ex proposito hæc colligat, ista ab invicem separet, sed quòd impetu suo partium nexum dissolvens, ea, quæ faciliùs separantur (ut sunt aqueæ particulæ, ut plurimum primo ignis gradu expulsæ & hoc modo collectæ) faciliùs etiam extrudat, ad fortiùs implicitas particulas autem (e. g. spirituosas) expellendas auctiore ignis gradu opus habeat, qui tamen ad oleosas v. g. magis ramosas & intricatiores disjungendas nondum sufficiat &c. Hoc igitur pacto per se quidem partes heterogeneas segregat, per accidens autem homogeneas congregat.

XIV. *Quod si verò hoc attributum igni & calori non est proprium, cuinam ergo aliàs competit?*

Competit etiam frigori, quod per se quidem heterogenea promiscuè congregat, aut potiùs ante jam congregata non disgregat, sed in quiete (quæ ad frigoris essentiam pertinet) conservat; prout e. g. in aqua multis impuritatibus permixta & superveniente frigore congelata, videre est; per accidens tamen etiam heterogenea

nea segregat , quod experti sunt Belgæ in mari Hyperboreo , ubi vina in Moscoviam destinata extus in glaciale crustam concreta, non sine magna animi percussione deprehenderunt ; deinceps autem spirituosiores partes ad medium collectas, magno rursus solatio , compererunt ; quæ res hodie nihil novi est.

XV. Fortassis etiam calor ex opposito quædam heterogenea quoq; congregabit ?

Nullum est dubium : idque fit in quorundam corporum, præsertim metallorum mixturis intimiùs perficiendis. Nam si aurum, argentum, stannum, cuprum, &c. in eodem catino fundantur & colliquecant, oritur inde mixtura metallica haut faciliè in miscibilia sua iterum resolvenda & segreganda , nisi aquarum fortium ac regiarum adminiculo ; cujus testes habemus æs corinthium (quod ex auri, argenti, & æris confluxu , ex perustorum templorum statuï pluribus, ortum esse creditur. Vid. notæ ad Vitruvium p. m. 167.) & campanarum fundendarum aptissimam materiam , vulgò die Glockenspeis appellatam.

XVI. Quo modo verò ignis & calor exsiccant, indurant, emolliunt, rarefaciunt &c.

Hæc in partis Gener. Sect. III. cap. III. V. &c. pluribus sumus prosecuti ; nimirum, quæ propter humores admixtos humida sunt aut mollia, per humorum expulsionem exsiccantur & indurantur ; econtrà, quorum corporum fibræ aquoso humo-

humore destitutæ facilè dilatabiles sunt, ea per meram particularum ignearum valdè agitata-
rum subitionem emolliuntur, h. e. earum fibræ leviter antea sibi implicitæ à subeuntibus igni-
culis distrahuntur, ut pressæ deinceps magis in-
trorsum iterum cedere, expressis igniculis, possint, aut, si copia tandem illorum major se insinuaverit, omnino solutæ in fluore illo igneo natare incipiant; id quod liquefactionem seu fusionem (in metallis etiam ac solidis silicibus consequentem, si vis ignis satis magna adhibeatur) appellamus, cum rarefactione quadam ex eadem admixtione agitatissimarum ignis particularum proveniente evidenter conjunctam; quæ rarefactio ac dilatabilitas tanto major est, quantò particulæ corporis rarefaciendi (ut in aëre) sunt solutæ magis ac leviores.

CAP. III.

De

Elemento aëris separatim.

I. Quenam sunt aëris effecta & phænomena præcipua quæ ad ejus naturam indagandam manuducant?

Primum omnium & vulgatissimum phænomenon est ejus subtilitas, tanta quidem, ut è vicinia sit planè invisibilis, & pro nihilo haberetur, nisi manus & ventilabra per ipsum celeriter mota ejus resistantiam & corpulentiam ipso tactu sentirent. Non est tamen æquè sub-
U
tilis

tilis ac partes ignis tenuiores, quippe quæ per vitra, metalla, vesicas inflatas &c. penetrant, per quæ penetrare aëris partes hautquaquam valent. Quod verò ignis, etsi tenuioribus particulis constans, visibilis tamen sit vel maximè, causa est particularum ejus celerrima agitatio, cujus interventu ætherearum particularum series quaquaversum secundum rectas lineas propelluntur, oculumque adeò afficiunt; cum aëreæ partes agitentur quidem, sed lentè ac debiliter, ab ipso potiùs æthere aliunde agitato, quàm ut ipsæ ætherem agitent ac propellerent.

II. *Annon ulterius etiam ac præter solitum attenuari potest?*

Si quæstio de ipsis aëris particulis intelligatur, an illæ minutiores fieri & subtiliores possint, ignis præsertim vehementiâ, id negare quidem simpliciter vix licet, nec tamen luculentis adeò obviisque experimentis confirmari. Quod si verò de aëris massa, aut plurium particularum collectione, sermo sit; nullum est dubium, ab igne & calore aërem rarefieri, attenuari ac dilatari in amplius spatium posse: id quod e. g. vesica aliàs flaccida, circa collum tamen firmiter colligata, si vel Solis radiis, vel foco aut fornaci calenti exponatur, intumescencia sua & quasi spontaneâ inflatione testatur, nec non aëris crepuscularis major æstivo tempore altitudo, imprimis autem thermometrorum jucundissima phænomena, oculis ipsis ingerunt.

III. *Non-*

III. *Nonne hæc aëris rarefactio ac dilatabilitas, etiam nullo urgente calore, observatur?*

Utique multis experimentis ea comprobatur: Nam conclusis alicubi, si ab ambiente extus aëre artificio quodam liberetur, suâ quasi sponte, & validè quidem, se dilatat; prout vesica semiplena, aut lagena vitrea, probè clausæ intra recipiens exhauriendum, vesiculæ cyprinæ intra tubum Torricellianum subitò inflatæ, vesica suilla flaccida, sed collo sollicitè constricta & in summitatem altissimi cujusdam montis delata, aliaque experimenta plurima testantur.

IV. *Velim mihi hæc experimenta paulò distinctius exponi.*

Primò si vesica mediocriter inflata & rugis adhuc multis profundisque quasi sulcata, collo interim arctissimè constricta, aut ampulla vitrea aëre ordinario plena, similiterque vesicis sollicitè obligata crassisque laminis plumbeis (ne distendi vesicæ possint) desuper obstricta intra vas recipiens suspendatur, & hoc more solito per antliam evacuetur, prior equidem ad suctus antliæ singulos visibiliter magis magisque expanditur, donec tandem plenissimè distenta rugas omnes exuerit; posterior autem, agitatâ diutius antliâ, tandem derepente magna cum vehementiâ dirumpitur & in frustra plurima disfilat. *Secundò* vesiculæ cyprinorum parvulæ aëre multo ordinariè distentæ, si studio perforatæ suo aëre

magnam partem expresso evacuentur, & postmodum filis arctè constringantur, ne residuo adhuc aëri pauculo exitus porrò pateat, eoque habitu intra tubuli ampliore supernè, & patulo quidem, capitulo instructi cavitatem demittantur, denique inferâ tubuli apertâ parte probe munitâ mercurius desuper infundatur ad summum usque, & obligatâ tandem aperturâ superâ, inferior intra stagnantem in vasculo mercurium adaperiatur; mercurium ex capitulo superno ad consuetam profunditatem delapso, vesiculas antea flaccidas & rugosas nunc distentissimas & globosum capitulum totum explentes videmus. Denique si vesica suilla satis flaccida & rugosa ad radicem alicujus montis firmiter constringatur, indeque per montis acclivia altius altiusque deportetur; aër intus conclusus paucior gradatim magis magisque expandi & vesica ab eo sensim distendi & erugari manifestè cernitur, donec tandem rugis omnibus exuta, tanquam flatu quodam vehementiore dispanfa, compareat.

V. *Quenam verò causa est hujus spontaneæ dilatationis in aëre?*

Cùm dilatarî sit quoad partes suas moveri & longius latiusq; diduci, non possit autem ulla, ne minima quidem, particula materiæ a seipsa moveri; palam est, sicut in casibus quæst. II. ab ingredientibus igniculis partes aëreæ dispelluntur ac distrahuntur, sic in aliis casibus quæst. III. & seqq. (ubi calor sensibilis non intervenit)

aliud

aliud corpus aëre multò subtilius & agitatius supponi debere, quod occasione sibi datâ vim suam in partes aëris crassiusculas exerat, easque sui intermixtione & ordinariâ agitatione dispan- dat ac difflando dilatet. Cujusmodi quidem aëre multo subtilius corpus, quia multa alia na- turæ phænomena supponi postulant, & vasta il- la cœlorum spatia replere cœlestiumque motûs immediate causari credibile est, *Ætherem* appel- lare consuevimus, ab Aristotele dudum expres- sis verbis agnitum, dum Lib. II. de an. cap. VII. t. 68. *aërem & aquam, & solidorum complura pellu- cida esse, dicit, non quâ talia, ἀλλ' ἐπὶ ἐστὶ φύσις ἐνυπαρχούσα ἢ αὐτῇ ἐν τῇ τοῖς ἀμφοτέροις, καὶ ἐν τῷ αἰθέρι τῷ ἄνω σώματι*, h. e. quatenus natura quadam in his utrisq; eadem inest, & in aeterno illo supero corpore.

VI. *Cur verò hic æther non semper & ubiq; sed occasione solùm datâ, aërem ita dilatat?*

Rationem ab aëris gravitate, inferiùs spe- cialiùs comprobanda, petere licebit; cuius vis major est, quàm quæ ab agitatione ætheris solita superari possit. Nimirum cùm partes aëris gra- ves sint singulæ, & supra se invicem ad magnam altitudinem (minimum 30000 pedd.) congestæ; palam est & experimentis vulgaribus coäcerva- torum altiùs fœni, lanæ, similiumque cumulo- rum, quòd inferiores partes tantò magis premi comprimique ætheremque adeò frustra reniten- tem exprimi oporteat, quò major est ejusmodi

congestarum partium gravium altitudo. Quamobrem, ubi contingit vel arte quadam, vel naturaliter, aëris desuper incumbentis altitudinem imminui, aut inferioris compressi pressionem, sive exhauriendo eum è loco aliquo clauso, sive aliâ quacunque ratione, debilitari; tum æther antè ex interstitiis aërearum particularum violentè expressus magno conatu iterum se insinuat, earumque interstitia proportionaliter ampliat ac dilatat: non aliter ac spongia manu compressa, aërem intra poros antea laxiores contentum exprimit, hic autem pressione cessante in poros, quos invitus quasi deseruerat, regreditur spongiamque hoc pacto iterum dispandit.

VII. *Applica, queso, hæc distinctius ad superiora quest. IV. experimenta.*

Vesica compressi aëris inferioris partem complexa, dum ab ambiente intra recipiens aëre, & ipso compresso, undique premitur, rugosa manet nec expandi ab interno suo aëre potest: Ubi verò ambiens vesicam aër hauriendo è recipiente extrahitur, (ut amamus loqui) atque adeò residui vis elastica quodammodo debilitatur, is qui intra vesicam est integrâ adhuc virtute sui expansivâ, vesicam aliquousque dispandit, & sensibiliter quidem. Et cùm vesiculæ cyprinæ ab ambiente mercurio valide compressæ, hoc per apertum orificium inferius aliquousque delapso, liberantur penitus ab omni (etiam aëris, qui succedere in locum mercurii non potest) compressione, ideò
 paucu-

pauculus in vesiculis aër à subeunte jam liberiùs & copiosius æthere longè lateque dispan-
ditur & vesiculas validè inflat. Denique vesica semi-
inflata & rugosa, & quidem ob hanc ipsam cau-
sam rugosa, quod ad montis radices à majoris
altitudinis aëre validiùs comprimitur, ubi ad
altius montis fastigium defertur & gradatim
ab aëre minus alto, & consequenter debiliùs,
premitur, ab aëre suo interno plus ætheris gra-
datim intromittente, gradatim magis dispan-
ditur &c.

VIII. *Annon aër ita à subeunte æthere valdè
dilatatus, vicissim mutatis, quas commemo-
ravimus, circumstantiis, valdè est
compressibilis?*

Sic utique multa nos experimenta ad sen-
sum docent. Etenim, ut narrata dilatationis
exempla retrò legamus, vesica in cacumine
altioris montis sua quasi sponte inflata, in de-
scensu per eundem montem gradatim iterum
comprimitur; quia aër ipsi desuper incumbens
gradatim altior fit, & hoc pacto magis premit,
ætheremq; antè admissum sensim iterum expri-
mit: In vesiculas autem cyprinas, aut grandiores
etiam in vacuo inflatas, si vel per exile aciculâ fa-
ctum foramen externus aër iterum admittatur,
repente illæ ab hoc compressæ concidunt, aëre
nimirum intus concluso à partibus æthereis,
quæ antea ipsum dilataverant & nunc iterum
discedere coguntur, deserto & pristinae desuper
incumbentis gravitati succumbente.

IX. *Sed hic ipse superincumbentis ponderi succumbens, multò adhuc validiùs comprimi, & in arctissima spatia cogi potest?*

Ita fanè multa rursum experimenta evidentissimè testantur, ut e. g. aër intra canalem alicujus bombardæ quoad foramen inferius parvulum sollicitè obturatæ, à bacillo desuper inserto (posteaquam hic gossipio obvolutus oleoque inunctus fuerit, ut aëri premendo exitum intercludat) validissimè depressus ad spatium e. g. subvigecuplum, & in sclopetis, quæ vocant, pnevmaticis ad multò etiam arctius, cogi possit; dum nimirum æther inter aëris particulas adhuc contentus ulteriùs cedere & per poros bombardæ discedere tantò majori copîa cogitur, quantò major est violentæ pressionis vehementia.

X. *Atq; hinc est procul dubio subitanea illa elasticitas, cujus vehementia magnos edit effectûs?*

Illos cumprimis, quos in sclopetis pnevmaticis videmus, & in fontibus quibusdam salientibus arte paratis. Aër enim in fistulæ bombardicæ partem valvulis clausam violenter intrusus valideque compressus, ubi alia valvula datâ operâ aperitur, summa vehementiâ ac celeritate ab irruente æthere expansus & in partem fistulæ, quâ globus plumbeus continetur, explosus ipsum globum plumbeum eadem

dem fere vehementiâ per spissos
asserēs adigit, quâ is aliàs ab
accenso pulvere pyrio per ob-
via corpora adigitur. Et in va-
sa robustiora aquis aliquousque
repleta, suisque instructa epi-
stomiis, antlando detrursus,
aperto deinceps repente epi-
stomio, aquas subjectas, per
canales præsertim valdè angu-
stos, altissimè projicit: adeò
quidem ut intra machinulam
tamen vitream simplicissimam
circa orificium AD Fig. 6. pro-
be munitam per angustissimum
superne canalem EDC solo oris
flatu contentiore intromissus,
fonticulum satis diu salientem
subitò exhibeat.



XI. *Numquid aliæ etiam supersunt aëris pro-
prietates præter hæcenus memoratam stupen-
dam dilatabilitatem & compressibili-
tatem?*

Supereffet equidem ejus ponderositas &
gravitas, à qua modò dictæ maximam partem
dependent; sed de hac, utpote cæteris elemen-
tis communi, peculiari capite agetur. Super-
est verò ejus etiam vis nutritiva, item vis dis-
solutiva & corruptiva, aliæque qualitates, non-
nunquam venenatæ, contagiosæ, & pestiferæ.

U s

XII. *Quæ-*

XII. Quenam ergo est illa vis aëris nutritiva?

Videtur sanè quibusdam animalculis exilioribus, ut Araneis similibusque nutrimentum aliquod præbere, quando in vasis e. g. vitreis aëre solo repletis, diutissimè vivunt, citra ullum aliud conspicuum alimentum: quia nimirum aër undique particulis, salinis, sulphureis, aqueis &c. abunde repletus est, quæ nutriendis ejusmodi pusillis corpusculis sufficere per dies complures possunt.

XIII. Annon speciatim igni alendo quoque inservit?

Ita quidem multi credunt, aëremque nitro-
sis suis partibus alimentum igni præbere contendunt, ideoque novi subinde aëris accessum ad conservandas flammæ requiri urgentes. Verum cum in sublimiore quoque aëre flammæ alantur, in quo tamen nitrosarum partium defectus experimentis de consilio institutisprehenditur; illa necessitas aëris in conservandis flammis ex eo potius fonte petenda videtur, quòd ejus flatu & pressione tum fuligines dissipentur, alioqui flammæ obruturæ & suffocaturæ, tum igniculi in ardenti materia delitescentes copiosius exprimantur: id quod afflatus oris & follium, flammæ statim adaugens, evidenter evincit.

XIV. Quæ-

XIV. *Quænam ergo tandem aëris natura & constitutio ex dictis elicitur?*

Ea hinc ritè infertur, quòd aër, prout actu ipso in natura reperitur, admixtas sibi accidentaliter habeat partes ex aquis terraque exhalantes heterogeneas multifarias, quæ ad ejus naturam hautquaquam pertineant; illam tamen particularum suarum propriarum cum æthere interfuso istas perpetuò agitante commixtionem essentialiter involvat: nisi quis elementorum omnimodæ simplicitati ab Aristotele assertæ mordicus inhæsurus, ipsas illas aëris proprias particulas tenuissimas & quasi membranaceas, plicatiles, vel ramosas & plumosas, tanquam simplex aëris elementum, concipere velit, quod ab admixto altero ætheris elemento agitationem demum accipiat; id quod tamen conceptum elementi aërei suâ naturâ inertis & immoti satis difficilem & inconsuetum esset pariturum.

CAP. IV.

De

Aqueo elemento seorsim.

I. *Enarra nunc mihi breviter aquæ præcipuas proprietates, è quibus ejus naturam similiter conjectare queamus.*

PRima & notissima est ejus Fluxilitas seu per declivia prolabendi promptitudo, oculis ipsis quotidie conspicua, quæ & particularum ejus mini-

minimarum solutum statum, & lubricitatem seu volubilitatem (quâ super invicem provolvi facile queant) evidenter arguit; ut & (2) ejus facillima evaporatio ac dissipatio caloris ope perfici solita, ita quidem ut siccioribus quibusdam æstatibus integra flumina fere exhausta & exiccata fuerint.

II. *Fortassis igitur congruentissimum erit insensibiles aquæ minutias rotundas sive sphaericas supponere?*

Ad memorata duo effecta seu attributa quidem explicanda hæc suppositio apprimè quadraret, quandoquidem ad facilem dissolutionem & separationem, & ad volubilitatem per declivia nulla figura aptior cogitari potest, quàm sphaerica seu globosa. Verùm cum (3) separabilitas quidem particularum, non verò summus separabilitatis gradus observetur, sed potius aliqualis earum cohæsiō & visciditas (id quod in guttis ex stillicidiis pendentibus ad sensum evidens est) figura globosa seu sphaerica minutiis aqueis tribui vix potest.

III. *Quenam ergo alia effectibus istis aptior figura erit assignanda?*

Vix aptior excogitabitur, quæ dictis effectibus meliùs satisfaciât, præter figuram teretem & quasi vermicularem, si politam insuper & glabram concipias, & flexilitatem ei superaddas.

IV. *Sed*

IV. *Sed hæc flexilitas compositionem quandam in iis ex aliis minutioribus materiæ portionibus supponet?*

Id utique videtur omnino necessarium, suadetque analogia in flagellis, scuticis, articulis animalium, aliisque innumeris, quæ flecti se quodammodo patiuntur. Neque mirum est particulas elementares compositas esse, quandoquidem elementa non sunt ipsa materia prima, neque adeò eorum particulæ ipsæ primæ atomi, quæ primam materiam componunt.

V. *A quonam igitur ita compositæ, & in hujusmodi formam teretem, politam, & flexibilem, coordinata erunt?*

Non certè à Natura hac universali & aspectabili, utpote quam ex elementis præsuppositis conflata esse, & in hanc mundi formam compaginata necesse est; quæque insuper cognitione consilioque destituta, non potuit prænosse illos usus, iisque figuram cæterasque conditiones particularum elementarium adaptare, quibus tamen eam destinata operâ accommodata esse nimis manifestum est. Ergo agens quoddam Naturæ materiali contradistinctum est præsupponendum, quod ex proposito ac certo consilio tales formaverit elementares particulas, quarum conditiones, innumeræ & admirandæ, non elementorum tantum, sed aliorum quoque corporum ex istis mirabili rursus consilio compositorum, affectiones, proprietates, & utilitates locis

cis temporibusque innumeris necessario sunt consecutæ , porroque ad finem mundi usque consecuturæ : id quod summam aliquam , h. e. divinam arguit evidentissimè tum potentiam tum providentiam.

VI. Quid si verò quis neget Naturam esse materialem , sed legem quandam esse dicat divinitus latam universalem &c. annon tunc Naturæ huic adscribi iste similesq; effectûs alii possunt ?

Ita sanè recentior quidam Aristotelicus , in Tract. nupero , Natura sibi & Medicis vindicata inscripto , operosè conatur Illustris Boylii nostramque de Idolo Naturæ sententiam confutare , & Naturæ existentiam (quam simpliciter nos negasse , sed frustra , supponit) omnibus modis confirmare , per Naturam nihil aliud intelligendum ratus , quàm legem quandam DEI universalem , juxta quam nunc in mundo omnia fiant & gerantur , ut non opus sit ad immediatam DEI virtutem in effectibus etiam vilissimis recurrere &c. Valdè verò seipsum aliosque fallit Vir Clarissimus , ignorationem elenchi perpetuam per totum illum Tract. committens. Etenim si legem ejusmodi DEI universalem pro Natura habet , ejusmodi legem jam dudum nos agnovisse , vel è Conaminibus Physicæ nostræ Conciliatricis p. 91. & seqq. cognoscere potuisset , simulque expressis ibidem verbis moneri , non esse necessum in omnibus motionibus & actionibus peculiarius DEVM ipsum , tanquam imme-

immediatè motum quemvis in individuo de novo producentem allegare ; interea tamen omnes motûs ita DEO Summo motori acceptos esse ferendos , ac si immediatè singulos de novo produxisset , (NB.) qui vi æternæ illius legis fuere consecuti. Nam lex illa æterna divinitus lata nihil aliud est , ipso fatente , quàm DEI voluntas , ut operante lege DEI voluntas , atq; adeò ipse DEVS , necessariò operetur. Sed de his in Phys. Elect. p. 164. & seqq. pluribus ex professo egimus.

VII. *Posito ergo , quòd DEVS ex mero suo beneplacito tales formaverit aquæ particulas , quales eas imaginamur , num inde effectûs aquæ cogniti satis promptè deduci possunt ?*

Nondum equidem , nisi , quas flexiles ex colligatione quadam distinctarum particularum , facile separabiles ob glabritiem &c. supponimus , ipso actu inflecti , moveri ac separari supponamus , vel immediatè ab ipso DEO omnium motore (quod nondum necessum est supponere) vel mediante alia quadam subtiliore & jam aliunde agitatior materia , quam , inter aëreas partes eadem necessitate jam suppositam , ætherem vocavimus. Tametsi enim aqueæ particulæ videri possent ob solam suam politiem & connatam gravitatem in loco declivi super invicem pro-
volvi , experimentis tamen evidentissimis soluti v. g. salis aut sacchari aut terræ sigillatæ &c. de intestino quodam motu perpetuo particularum aquearum , in aquis etiam stagnantibus ,
libra-

libratis ad libellam & prorsus quiescere visis, convincimur, cujus rationem naturalem dare nullam possumus, nisi subtiliore & prius jam agitatâ materiâ suppositâ; cujus sc. impulsu crassiores aqueæ particulæ leviter saltem elevatae & quasi suspensæ ad provolutionem per declivia eò promptiores reddantur.

VIII. *Hoc ergo modo etiam aqueum elementum, prout illud in natura nobis obviat, esset mixtum quiddam ex duplici particularum genere?*

Ita sanè statuere res ipsa cogit. Simplicem enim aquam fingere si velimus, ex particulis meris teretibus, politis, mobilibus quidem & flexilibus, sed nondum actu motis & flexis, nihil aliud habebimus præter rigidam glaciem, quæ in aquam mutari prius haut potest, quàm alius subtilioris & agitatioris corporis particulæ, istis quietis & rigescentibus interfundantur.

IX. *Sic igitur aquæ fluxu per declivia visibili & motu intestino invisibili à priori deductis, quomodo ejusdem adeò facilis evaporatio concipietur?*

Nihil hoc conceptu est facilius. Cùm enim evaporatio omnis à calore dependeat, aquæ verò adhuc frigidae particulæ actuali jam ætheris motu saltem leviter suspensæ & separationi ab invicem proximæ teneantur; manifestum est, accedente

accedente novo caloris quantulicunque impetu separationem actualem necessariò consequi, separatasque in aërem vicinum tantò longiùs propelli, quantò major est caloris accedentis impetus.

X. Cur verò aqua corporibus asperis tam facile, licet non adeò pertinaciter, adhæret, eaq; hoc pacto humectat?

Quia partes ejus flexilitate suâ prominentiis & capillamentis asperorum corporum, pannorum e. g. chartarum &c. facile circumvolvuntur & implicantur, ac præterea suâ glabritie in eorum poros & filaminum interstitia saltem aliquatenus subeunt; ideò in superficiebus illis hærentes plurimæ madorem prensantibus manibus exhibent, aut visui, per alias suas affectiones visibiles, madoris præsentiam percipiendam offerunt.

XI. Dilatari ergo aqua mediante calore in spatia ingentia valens, cur nullam tamen aut non sensibilem compressionem patitur?

Quia ejus particulæ immediato contactu junctæ, proprius coïre non possunt, nec in poris inter eas relictis angustioribus, & sola materiâ æthereâ repletis, recipi possunt, ut, æthereis illis expulsis, ipsæ in majorem angustiam cogerentur.

XII. *Cur sicca & aspera per adspersionem aqua glabra & lubrica redduntur?*

Fit hoc ob aquearum particularum nativam glabritiem teretemque figuram, quæ efficit, ut alia corpora super illos cylindrulos insensibiles lubrico motu provolvantur, non aliter ac pavementum pisistratum instabilem lubricumque pedibus ingressum conciliat.

XIII. *Quâ ratione aqua sordium expurgationi & lotionibus inservit?*

Quia nimirum longæ flexilesque aquæ particulae, sordidatorum e. g. lintheaminum poros saltem ex parte subeunt, & sordibus ibidem ac circa eorum filamenta hærentibus, suâ flexilitate sese circumvolvunt; fit ut expressa contorquendo aqua, sordes sibi implicitas simul avehat, & hoc pacto lintheamina à sordibus depurata relinquat. Cui effectui facilitando multum conferunt pingues & salinae saporis particulae; quarum illæ sordium adhæSIONem promovent, hæ verò contorquendo præsertim adaectæ, suâ rigiditate, profundius latitantes aut fortius implicatas, sordium particulas altius eruunt & quasi expungunt.

XIV. *Quo pacto denique quorundam corporum solutio solius aquæ, etiam stagnantis, adminiculo peragitur?*

Hoc è quæst. VII. jam ex parte patere potest. Quoniam laxior quorundam corporum
& quasi

& quasi superficiarius tantum contextus tali dissolutioni plenariae obnoxius est, & verò aqueæ particulæ suâ tum lubricitate tum aliquali gravitate in eorum poros facile subeunt, insuper autem intestino motu, ab ætheris impulsu continuo pendente, tanquam totidem cuneoli adiguntur; fit ut uni horum ab aliis subsequenti- bus altius intrusi, nexum partium levius co- hærentium tantò facilius dirumpant, quantò difficilius quidem lignatoris cuneus ejusdem tudine adactus, multò fortio- rem fibrarum li- gnearum cohesionem diffociat ac dirumpit.

XV. *Cur vero oleosi & pingues liquores fa-
cilius & pertinacius adherent aquosis, &
è contrario difficilius inde sepa-
rantur?*

Fit hoc ob particularum aliam, & ab aqueis diversam e. g. ramosam figuram, qua illæ magis implicari fortiusque poris ac eminentiis hæ- rere & caloris impulsu difficilius tolli ac separari possunt; nisi fortè ab alia pinguedine magis implicitæ, unâ cum istis sive lavando sive ca- lefaciendo auferantur & separentur.

XVI. *Annon etiam reperiuntur liquores ipsâ
etiam aquâ promptius evaporantes aut ex-
siccari soliti?*

Dantur utique tales, e. g. aqua sambuci, quæ vix illita manui aut alii corporis parti, hanc subito siccam iterum relinquit: nimirum

ob particularum non solum glabritiem, sed etiam multò majorem subtilitatem, quâ promtius ac celerius in corporis poros deprimuntur, & extremam superficiem subito deserunt.

XVII. *Cur verò bujuszmodi subtiliores & spirituosiores liquores difficillimè congelantur?*

Ideò quod eorum particulæ volatiles, tenuiores & leviores, (testantur autem hanc levitatem ad oculum instrumenta hygrostathmica) à paucioribus & minutioribus ætheris particulis sublevari & agitari tantisper possunt, quæ aqueis, multò ponderosioribus, allevandis & agitandis haut sufficiunt: Unde etiam fit ut atramentum v. g. spiritu vini permixtum difficilius, quàm aliàs, congeletur.

XVIII. *Oleosa verò & pingua cur concrescunt quidem, non tamen ad duritiem & quasi lapidescentiam usq.*

Ita quidem res habet in his oris à Septentrione paulo plus remotis; in Septentrionalioribus autem, ubi frigus intensissimum regnat, etiam vina generosissima congelascere & in glaciem converti, nec non oleosa & butyracea in solidum lapidem indurari, ipsamque ex aqua concretam glaciem multis modis duriorē esse nostrā, probat Boylius indubiis testimoniis in Tract. de Frigore. Quod interim difficilior sit hæc induratio, quàm vel luti vel aliorum humidorum corporum, ex eo videtur arcessendum,

dum, quod pingua & oleosa ramosis constant particulis, quæ suâ crassitie facilè quidem concrefcere & fluiditatem amittere possunt, suis autem eminentiis & ramositatibus interceptas calidi pauciores particulas commodiùs asser-
vare, ab iisdemque tantisper dilatari & violentiori compressioni resistere valent.

C A P. V.

De

Terræ elemento particulatim.

I. *Num eadem methodo, qua in cæterorum elementorum naturis indagandis usi sumus, hic etiam uti licet?*

Licet utique; sed quò plures hic terreorum corporum proprietates habemus obvias, quæ ex elementi terreni natura deduci debent, aut potiùs occasionem huic indagandæ dare, tantò magis impossibile nobis evadet simplicitatem illam Elementorum Aristotelicam tueri, aut sine diversis secundùm speciem particulis tantam terreorum corporum, & specie quidem diversissimorum, farraginem deducere. Et cùm in cæteris elementis unam quandam quasi generalem particularum figuram licuerit supponere, in hoc elemento id planè frustraneum esset futurum, adeò diversæ nobis occurrunt terreorum affectiones, ut ab una generaliore particularum figura illas omnes deducere velle irritus plane conatus esset futurus.

II. *Ergone neq₃ Platonis cubicæ, nec Honorati Fabri sphæricæ particula huic negotio sufficient?*

Minimè gentium. Nam si ad elementi terrei torporem & immobilitatem ac terreorum quorundam summam duritiem declarandam sufficeret illa figura cubica, quâ poterit aliorum maxima friabilitas ac totuplex e. g. metallorum varietas affectionesque in singulis generibus adeò diversæ, ex ea una satis declarari: Et si figura sphærica quorundam friabilitati concipiendæ quadraret, unde quæso aliorum stabilitatem à tam volubili principio deduceres?

III. *Quid igitur hîc statuendum?*

Illud primò extra dubium ponendum, quòd particulæ hoc elementum constituentes, igneis, aëreis, aqueisque generatim majores, indeque fixæ magis solidæque & minus mobiles sint concipiendæ: Deinde quod tum soliditatis tum magnitudinis & figurarum irregularitatis intuitu, variantissimæ esse debeant, adeò ut ne fingi quidem aliqua figura adeò irregularis possit, quæ non aliquibus elementi terrei particulis adtribui possit ac debeat: Tertiò cum varia metalla è terris effodiantur, alicubi quidem, sed rariùs, pura, plerumque verò lapidosæ substantiæ permixta & arte demum separanda, & cum ad puritatem reducta sunt, & pondere, & ductilitate, & aliis proprietatibus valdè differentia, intereà verò similia quoad sensum singula; necessum utique est

est in his singulis ejusdem circiter figuræ, magnitudinis, similiumque conditionum particulas supponere, quæ ab aliis aliorum metallorum particulis inter se pariter similibus, notabiliter differant, & quasi seminum vicem subeant, quæ in unum locum congesta massas istas metallicas, diversarum mixturarum, quæque suas separatim, aut sibi invicem permistas frequentius obvias, constituent.

IV. Procul dubio igitur harum etiam particularum adeò multiplex varietas DEVM Productorem & Formatorem supponit?

Ita statuere omnino necessum est. Fortuitus enim ortus eis assignari non potest, quòd innumerabilium in quovis genere similitudo, indeque consequens corporum è singulis generibus, collectorum variantes adeò proprietates, consilium evidenter arguit: neque Naturæ adscribi earum origo debet, utpote istâ necessariò priorum, eodem sc. argumento, quo usi sumus cap. præced. quæst. V. Restat ergo sola Divina manus, quæ in magna illa particularum terrearum varietate, varias tamen etiam inter se similium classes ita promiscuè posuerit, ut è similium collectione varia metallorum & mineralium genera, in hominum usum & Geocosmi ornamentum extarent.

V. *Optârim equidem hæc mihi paulò
distinctius exponi.*

Observatum est diversa salium è terris erutorum genera , cùm in aquis soluta deinceps particulas suas invisibiles in crystallos coïre faciant , has in singulis generibus eandem ut plurimum figuram geometricam constanter servare ordinariè , ita ut e. g. Salis communis crystallicubicæ sint , sive ex aqua marina , sive ex sale gemmeo , sive ex fontibus salis eliciantur ; Nitrum in crystallos sexangulas , tenues , longas , & æqualiter crassas concreascet &c. quæ pluribus persequitur Martinus Lister in Tract. de Fontibus Medicatis Angliæ , quem recensuerunt Act. Lips. ad Ann. LXXXIV. p. 92. & sequ. Conf. Act. Lips. ad Ann. LXXXIX. p. 235. & Supplem. tom. p. 104. Id quod certè satis apertè docet , prima quoq; semina in singulis generibus certâ & determinata figurâ prædita esse , quæ videlicet cujusq; generis effectibus proportionata erat futura. Sic auri cæterorumque metallorum minutias in singulis generibus certo consilio peculiari figurâ instructas esse oportet , ut qualitates & conditiones cuique generi propriæ inde provenirent , imò alia quoque corpuscula diversissimis saporum , odorumque productioni in ejusdem generis corporibus eidem constanter obtinendæ , non nisi sapientissimo Conditoris consilio appropriatas quæque figuras obtinuisse necessum est.

**VI. Ita verò quaternarius elementorum
numerus sibi nequaquam constare
poterit?**

Id ipsum est, quod semel iterumque diximus impossibile esse, si elementorum simplicitatem in eo rigore urgere velimus, ut in diversa secundum speciem dividi non possint. Cum enim nec ignem, nec aërem, nec aquam, prout ea in rerum natura extant, suisque proprietatibus nobis innotescunt, absque compositione minimùm binorum simpliciorum concipere liceat, prout superioribus capp. ostensum est, insuper autem terreorum corporum varietas diversas specie particulas in elemento terreo necessariò postulat; apertum est ampliorem multò elementorum numerum agnoscendum esse.

**VII. Quotnam igitur tandem statuenda
venient?**

Vix poterit eorum numerus præcise definiri. Nam i.) subtilissimum omnium erit elementum ignis, quod in flamma prædominatur, in Sole stellisque nativâ luce præditis purius procul dubio reperiundum, indeque ab Aristotele dictum, *Φύσις ἀνάλογος ἔσται τῷ τῶν ἀστέρων στοιχείῳ*, *Natura stellarum elemento analoga* Lib. II. de Gen. an. cap. III. quo loco hoc idem subtilissimum elementum, diversum à cæteris vulgò vocatis elementis ac, *θεϊότερον σῶμα*, *divinius corpus*, appellat, idque per omnia permeare ac in-

star animæ cujusdam replere &c. Lib. III. de Gen. an. cap. XI. (al. X.) & cap. IV. Lib. de Mundo; quæ loca digna sunt, ut conferantur. 2.) Subtilitate proximum est *æther*, quem Aristoteles sub nomine πρώτης στοιχείας five primi elementi, Τόντε συνόλον ἔργον καὶ τὰ μέρη αὐτοῦ i. e. *totum cælum & partes ejus constituere* dicit Lib. III. de Cœlo cap. I. & cap. II. Lib. de mundo ætherem expressè dicit ὁσίαν, στοιχείον ὅσον ἔπαινον τῶν πασάρων, h. e. *substantiam, quæ sit elementum diversum à quatuor vulgaribus*. His igitur si 3.) accenseamus quatuor vulgaria elementa simplicia, quæ à prioribus istis quasi animata, massas has elementares, quibus sustentantur omnia viventia, constituunt; necessum est minimum sex elementorum genera agnoscere; in quibus ipsis tamen singulis vix possumus, quin diversas particularum species agnoscamus.

VIII. Videtur ergo ipse Aristoteles non ita mordicus inbasisse quaternario elementorum numero?

Non videtur tantum, sed res est apertissima. Nam cap. III. de Mundo πέντε στοιχεῖα, quinque elementa expressis verbis statuit, & cap. VIII. Lib. I. de Cœlo, sub finem, τριῶν σωμάτων στοιχείων considerationem ex professo instituit; cap. I. verò Lib. III. cùm de primo elemento hætenus actum esse dixisset, reliquum, addit, ἐστὶ τῶν δυοῖν εἶπεῖν, etiam de duobus cæteris dicere, nempe, secundum Simplicii interpre-

terpretationem, de graviore sive deorsum mobili, quod aquam & terram, & levio- rem, quod aë- rem & ignem complectitur: quaternarium in- terim hunc numerum Lib. III. de Cœlo cap. III. & Lib. IV. cap. IV. ad corpora sublunaria sive ge- nerabilia manifestè restringens.

CAP. VI.

De

**Elementorum gravitate & levitate,
indeque pendente totius mundi
Sublunaris Systemate.**

**I. *Suntne omnia elementa gravia, aut omnia
levia, aut aliqua gravia & aliqua
levia?***

SI de elementis, prout actu nunc in hoc Geo- cosmo reperiuntur, quæstio fuerit, (nam in abstracta sua puritate nusquam existunt ex- trà mentem abstrahentis, ideoque frustra sub hanc quæstionem vocarentur) omnia fortè gra- via sunt dicenda, nisi ætherem quis velit exci- pere, tanquam causam gravitatis in cæteris, uti postmodum dicetur. Aristoteles certè de suis quatuor generabilium elementis idem statuit Lib. IV. de Cœlo cap. 4. solo igne ex- cepto, ἐν τῇ αὐτῇ γὰρ χώρᾳ, inquit, πάντα βα- ρύχει, πλὴν πυρὸς, καὶ ὁ αἶρ, h. e. *In sua* (quod- que) *regione* (non solùm cum extra locum ordi- narium ponuntur) *omnia pondus habent, excepto igne, etiam aër.*

II. *Ju-*

II. *Jurene ab Aristotele exceptus est ignis è gravium numero?*

Ignem quidem leviozem esse cæteris elementis omnibus, negari non potest, ejusque ascensus in aëre id abunde probat; inde verò minimè sequitur, cùm minus gravis sit cæteris, illum planè omni gravitate destitui. Nec enim ratio tantùm evincit, eum non omni prorsus pondere carere posse, quia vi Quæst. V. cap. II. ignis flammans, qualis apud nos reperitur, plurimas particulas terreas essentialiter includit; sed experimenta ponderatæ flammæ Boyliana ipso facto rem ad oculum demonstrârunt.

III. *Quo pacto verò ponderari flamma potuit?*

Potuit inclusa & cohibita poris corporum ignescentium, auri, argenti, cupri, cæterorumque metallorum. Nimirum adhibuit laminas metallicas diversi generis Vir ingeniosus, easque ad bilancem Philosophicam, quam vocat, h. e. quantum possibile fuit exactissimè fabrefactam, accuratissimè examinatas (notato summa cura cujusque pondere) totidem crucibulis inclusit, postea suis operculis accuratè tectis & luto quodam chymico sollicitè munitis. Hæc crucibula furno ardentiori immisit, ibique tamdiu detinuit, donec laminas metallicas ignem concepisse fermè ad fluorem usque satis constaret. Tum verò remotis operculis & luto circum-

lito

lito priùs omni curâ separato, laminas ignescentes bilanci suæ rursus imposuit, omnesque ac singulas aliquot granorum aut scrupulorum pondere auctas deprehendit: quam ponderis accessionem non aliunde quam à flamma subtiliore, quæ per crucibuli poros transire potuit, provenisse palam erat.

IV. *Cur Aristoteles dixit elementa in proprio loco, vel sede propria, pondus habere?*

Videtur quasi præsensisse illud effugium, quo nonnulli hoc ævo asseruerunt, elementa (nominatim aërem, aquam, terram) gravia quidem esse ubicunque fuerint, sed non gravitare actu, aut gravitatem suam exercere, nisi cum fuerint extra suum locum, in proprio verò loco, aquam e. g. in aqua, aërem in aëre &c. non gravitare: id quod exemplo situlæ aquâ plenæ, & sub aqua nullo negotio attrahendæ, in aërem verò extra aquam sublata multò difficiliùs attollendæ, similibusque aliis probatum putant.

V. *Anne igitur hæc exempla non sufficiunt ad probandum id quod intenditur?*

Minimè verò gentium. Nam quod in situla aquæ plena, idem in lapide intra mediam aquam ex fune suspenso perinde evenit. Quamdiu is intra aquam suspensus ac libratus manet, ejus pondus attrahendo vix sextâ aut decimâ sui parte sentitur; ubi primùm verò ex aqua
in

in aërem sublatus fuerit, multis modis ponderosior percipitur. Quis verò tam ineptus erit, ut dicat, lapidem, cum subter aquam est constitutus in proprio loco esse, ideoque non gravitare, in aëre verò gravitare, utpote alieno loco positum? Num aër magis alienus est lapidi locus, quàm aqua?

VI. Firmum ergo manet, elementa etiam in proprio loco gravitare? Sed cur illa gravitatio tunc non sentitur?

Sentitur utique (sentimus enim aliquod situlæ repletæ, vel etiam lapidis per mediam aquam adductorum pondus) sed non tota sentitur aut tanta, quanta in adductis extra aquam




Fig. 7.

percipitur; id quod ipsâ experienciâ teste probat falsitatem asserti, quòd elementa in suo loco planè non gravitent. Quod autem illa gravitatio situlæ aquâ plenæ, quamdiu est intra aquam, minus sentiatur, quàm dùm extra aquam emerfit, hæc vera quidem & genuina ratio est (quam ex progressu plenius intelligemus) quòd e. g. Cylindrus aquæ CD, (Fig. 7.) ei cylindro AB quem situla premit æqualis, gravitet in fundum D omni

omni suo pondere (eodem modo ac cæteri vicini his pariter æquales;) sed quia illa pressio in D sistitur à fundi soliditate, ideò tamen non cessat statim aut evanescit ille nisus (uti pilæ motus dum sistitur à pariete, non ideò perit) sed lateraliter se diffundit ad B indeque sursum reflectitur versus S ac situlæ gravitationi, deorsum versus B tendenti, renititur, ipsamque adeo situlam sursum trudendo leviolem reddit, & vim trahentem in Z multum adjuvat.

VII. Quod si ergo omnia elementa gravia sunt, etiam in propriis locis, scire meritò desideramus, unde sit hac mirabilis tendentia deorsum, quam gravitatem vulgo dicimus?

Circa hanc maximi momenti quæstionem facillimè omnium sese expediunt latinæ Aristotelis Scholæ, dicendo, gravitatem & levitatem esse duas qualitates elementorum (& consequenter corporum elementarium) intrinsecas, quarum tanquam causarum instrumentalium virtute cujuslibet corporis forma, tanquam causa principalis versus centrum terræ deorsum, altera à centro terræ sursum expellat. Verum cum in hoc responso nudum qualitatis formæque nomen, loco causæ quæsitæ, substituitur, neque quid rei illæ sint, explicetur, neque modus aliquis imaginabilis doceatur, quo effectus hosce mirabiles præstent; non potest certè animus sciendi cupidus in hoc responso acquiescere: prout sanè ipsemet Aristoteles

teles Lib. VIII. Phys. c. IV. alias causas, easque varias ac diversas, (id quod incertitudinis ac hæsitationis indicium,) comminisci coactus est.

VIII. *Quenam est prima, quam allegat, causa?*

Cùm rectè supposuisset, quicquid moveatur ab alio moveri, adeoque illud aliud, quod gravia deorsum, levia sursum actu movet, præcipuè quæreretur, primùm ad causam generantem effectus istos refert, dicens cùm leve fit ex gravi, v. g. aër ex aqua, levitatis hujus causam esse id quod genuit ex aqua aërem. Verum cùm quæstio sit de ipsis quoque aqua & aëre, à quonam actu hic sursum, illa deorsum moveatur, generans equidem dici causa posset, cur aqua, quæ prius deorsum movebatur, posthæc in aërem commutata sursum pellatur aut sursum pelli apta potius redita sit; restante tamen interim pristinâ quæstione, quodnam sit illud aliud, à quo actu sursum aut deorsum pellatur, etiam non ampliùs superstite generante.

IX. *Quenam est altera allegatarum causarum?*

Gravia & levia, inquit, sub finem cit. capitis, non à seipsis, sed vel ab eo, qui genuit, vel ab eo, quod impredientia & prohibentia amovit, moventur, [Τὰ κῆφα ἢ τὰ βαρέα μὴ ὑφ' αὐτῶν, ἀλλ' ἢ ὑπὸ τῷ γεννήσαντι ἢ ποιήσαντι κῆ-

Φον ἢ βαρὺ , ἢ ὑπὸ τῶν ἐμποδίζοντα καὶ κωλύον-
 τα λύσονται , κινῆται.] Verum neque hæc po-
 sterior causa quæsitum exhaurit , cum verum
 quidem sit , id quod impedimenta removet , ali-
 quo modo causam esse actualis motûs sive de-
 scensûs , non verò causam verè efficientem illius
 (quemadmodum qui valvas aperit , causa quo-
 dammodo est illuminationis in conclavi , non
 efficiens tamen , quam Solem esse nimis evidens
 est , sed causa per accidens , aut causa sine qua
 non) quandoquidem non rarò hæc verè - effici-
 ens illius nisûs , ipsa sibi impedimentum remo-
 vet , & filum e. g. abrumpit , ex quo grave suspen-
 ditur , adeoque etiamnum quærenda restat ; ipso
 Aristotele hanc difficultatem satis agnoscente ,
 dum paulò superius dicit , eum , qui impedimen-
 tum amovit , quodammodo movere , quodam-
 modo non movere , (ὁ πὲρ ὑφισταμένου καὶ κωλύον
 κινήσεως , ἔστι μὲν ὡς κινεῖ , ἔστι δὲ ὡς ἔ.) imò ex ac-
 cidenti tantum movere . (καὶ συμβεβηκὸς γὰρ
 κινεῖ .)

X. Cum igitur Aristoteles hic in varias par-
 tes frustra se verterit , quæ tandem causa verè-
 efficiens illius nisûs , sive sursum sive deor-
 sum , assignanda erit ?

Causam nisûs deorsum sive gravitatis , re-
 centiores Philosophi ab ætheris gyro sive vorti-
 ce quodam divinitus constituto & in hunc diem ,
 eodem mero suo arbitrio , conservato arcescunt ,
 (id quod jam olim Empedocli suboluisse ex
 X Arist.

Arist. Lib. II. de Cœlo cap. 13. videre est) sed diversimodè. Simplicissimus omnium modus est ut concipiamus, elementorum adhuc confusam massam DEI voluntate ac mero beneplacito, circa id ipsum punctum, quod nunc terræ centrum est, olim in gyrum actam, extrorsum singulis sui partibus connisam (prout experimenta hodie plurima demonstrant, motum circularem cum nisu versus circumferentiam conjunctum esse) hunc communem nisum tamen non eodem modo & eventu in actum deducere valuisse, sed ea quæ solidiora sunt ac minus porosa, tametsi subtiliora, (uti sunt partes ætheris) cæterorum minus solidorum, tametsi crassiorum, nisum superasse, & hoc modo (cùm omnia materiæ plena sint) crassiora elementaria, promiscuè in locum à se derelinquendum deorsum coegisse: Eodem modo scilicet, quo in cribrationibus frumentorum promiscuâ farragine granorum, palearum, festucarum &c. in gyrum acta, grana frumentaria sola versus circumferentiam enixa, reliquas impuritates versus cribri centrum compellunt.

XI. Quod si hæc est absoluta gravitatis in elementaribus ratio, cur una tamen horum graviora sunt, & ab æthere sursum enixo magis deprimuntur, quàm altera?

Hujus respectivæ gravitatis ratio ab ipsa cujusque corporis elementaris forma sive textura petenda venit, non activè tamen, sed passivè tantùm se habente. Nimirum, cùm efficiens
seu

seu deprimens causa in unis æquè ac in alteris maneat æther modo dicto ad superiora enitens ac ista ex opposito ad inferiora detrudens, effectus tamen hujus detrusione in compactioribus corporibus necessariò major esse debet, quàm in laxioribus ac porosioribus; quia sub æquali magnitudine illa plures, hæc pauciores partes materiales, continent, adeoque illa quoque plures, hæc pauciores ætheris deprimentis impulsûs recipere apta sunt: quemadmodum e. g. si duo orbis lignei ejusdem magnitudinis ex duobus funibus suspensi fuerint, alter quidem integer ac nullibi perforatus, alter autem plurimis & satis amplis foraminibus pertusus, uterq; verò pari lancearum numero petatur; evidens est & cuivis obvium, imperforatum orbem fortiùs propulsum iri, quàm perforatûm: quia illum omnium lancearum impetus feriet, in hoc autem quarundam, in foramina directarum, impetus frustraneus abibit.

XII. Sic igitur declaratâ modo quodam imaginabili gravitatis tam absolute quàm respectiva ratione, numquid etiam levitatis ratio dari similis potest?

Laudati Philosophi moderni, cùm omnia 4. elementa vulgaria absolutè gravia esse experimentis confirmaverint, absolutam levitatem in iis nullam agnoscunt, respectivam autem levitatem nihil aliud esse quoad rem ipsam dicunt, quàm minorem gravitatem, ob quam aër e. g. minus gravis, aquæ magis gravi & fortiùs

fortiùs prementi cedere loco cogitur, nec verò cedere (propter mundi plenitudinem) aliorum potest, quàm in locum superum ab aqua graviore deferendum. Similiterque àër igne gravior, hunc premendo & urgendo sursum ferri cogit &c.

XIII. Sic ergo patebit tandem ratio totius systematis elementaris?

Rem ipsam tenes. Nam ex hac causa, terra in aqua, aqua in aëre, àër in igne descendit, & prius quodlibet posterius supra se attollit, nisi quid obstet, quòd per accidens levius infra gravius detineat, prout e. g. multis in locis aqua infra terram reperitur in antris & cavernis, statim tamen supra eam ascensura, si cavernarum fornices hætenus descendere impeditæ, collaberentur; parietesque àër alicubi infra aquam, & ignis infra ipsam terram, detinentur, si nimirum arctis corporum poris inclusi, ab incumbente graviore, in istas pororum angustias penetrare prohibito, urgeri & extrudi non valent.

XIV. Hoc itaq; modo, cùm àër ignem experientiâ quotidianâ teste, supra se extrudat, ignis sphaera supra aërem agnoscenda erit, quàm tamen recentiores negant?

Rectè utique hanc negant; quia, si sphaera ignea esset supra aërem, necesse esset, ut, quòd altiùs in aëre ascenderemus, igneæ illi sphaeræ propiores facti plus caloris sentiremus; cùm
expe-

experientia oppositum planè testetur, ac in altissimos montes delati multò plus frigoris sentiant, quàm infernè ad montium radices, insuperque nives in cacuminibus editissimorum jugorum perennent, in ipsa etiam Zona torrida, quæ in ima terrearum planitie aut nullæ planè sunt, aut diu perdurare non possunt. Verum tamen etiam illud est, ignis in aëre libero ardentis partes, etiam crassiusculas, ab aëre sursum extrudi, quamdiu sc. in motu adhuc, & sic aëre leviores sunt. Quia verò ille motus gradatim decrescit, quo altiùs evehuntur (decrecente nempe ipso, qui eas moverat, calore) tandem moveri planè desinunt, ideoq; in sublimi nihil minus quàm ignis particulæ sunt, sed ad terream suam naturam & gravitatem reductæ, terram iterum petunt: ut rectissimè dixerit Aristot. I. Meteor. cap. III. terram & aquam, tanquam graviora versus medium sive centrum existere, aërem autem his confinem esse, καὶ ὁ Διὰ συνήθειαν καλεῖμεν πῦρ, ὅν ἐστι ἡ πῦρ. h. e. *Id, quod per consuetudinem ignem dicimus, non est autem ignis*, (sed, uti post paucas lineas addit, ἀναθυμίασις, διωάμεθ οἷον πῦρ, *exhalatio quasi potentiâ ignis*, supra aërem, aliquandiu saltem, ponitur.

C A P. VI.

De

Corporibus ex diversa elementarium particularum coitione mixtis , ipsoque mixtionis , oppositæque resolutionis modo.

I. *Cum ratio elementi relativa sit (sunt enim elementa alicujus elementa) quodnam est eorum correlatum generatim loquendo ?*

Quemadmodum elementa eorum intuitu, quorum sunt elementa, dicuntur simplicia, sic eorum correlatum sunt corpora composita sive mixta. Ac non solum *primò* hæc ipsa tota sphaera elementaris ex illis massis elementaribus grandioribus terra, aëre, aqua & igne est composita, sed *secundò* ipsæ quoque hæc massæ, prout in rerum natura extant, non sunt absolutè simplices aut puræ, sed quod (Aristotelici quoque dudum confessi sunt) in unaquaque quidem prædominatur illud elementum à quo denominatur, sed tamen è cæteris particulæ plurimæ cuilibet sunt admixtæ: Ex quo illud commodi *tertiò* promanat, ut particularia quæque in hoc mundo elementari illisq; massis, aut olim producta, aut hodiernum producenda, ex particulis elementaribus diversi generis commisceri vel olim potuerint, vel hodiè possint,

sint, absque eo ut in sui generatione (e. g. si piscis in aqua sit generandus) opus habeat particulas e. g. terreas è terræ profundo, aëreas ex aëre sublimi, igneas è sphæra (quam antehac supponebant) ignea è longinquo accersere; quandoquidem in aqua ipsa partes terræ, igneæ & aëreæ, ad piscis generationem necessariæ, sufficienter præstò sunt.

II. Quo verò modo hæc partialium corporum ex elementis mixtio fieri concipienda est?

Communiter in Scholis distinguunt inter mixtionem vulgarem & improprie dictam, pro quacunque quarumcunque rerum accumulatione, & Philosophicam seu proprie dictam, prioris alii duos modos speciales adnotant (Vid. Zeisold. in Notis ad Zacheum cap. XII. Lib. VI. Phys.) quòd nimirum ea contingat vel per *appositionem*, cum ea quæ miscentur, ita in pauca divisa fuerint, & hoc pacto juxta se posita, ut nullo sensu dignosci possint; e. g. si particulæ hordei ac tritici simul junguntur in farina, ut quævis propter quamvis sit collocata; vel per *confusionem*, in qua ea quæ miscentur, non modò in minimas partes dividuntur, verum ita inter se confunduntur, ut separari nequeunt, prout e. g. pharmaca pharmacis mista discerni nequeunt. Posteriores autem in eo maximè differre dicunt à priori, quod (1) in illa quælibet pars mixti debeat esse mixta, in hac non item; quodque (2) Miscibi-

lia in ista debeant in se mutuò agere, seseque invicem alterare; quod in priore non requiratur. Hinc Mixtionem cum Aristotele Lib. I. de Gen. cap. 10. definiunt ἑνώσιν τῶν μικτῶν ἀλλοιωθέντων, h. e. *miscibilium alteratorum unionem*; vel cum Conimbr. *Generationem mixti ex miscibilibus alteratis.*

III. *Quid sentis de his distinctionibus?*

Si velim, quod res est fateri, non capio, quomodo vel Appositio à Confusione, vel hæ utraq̃ue à Mixtione physica differant, nisi miscibilium subtilitate & crassitie, quæ mixtionis modum non variant. Cum enim in mixtionibus actiones in se mutuas elementorum supponunt, tanquam potissimum requisitum ad mixtionem (uti loquitur Zeisoldus c. l.) sine quo non nisi mixtio per appositionem, h. e. improprie dicta foret; hæ mutux actiones & alterationes in nulla alia re consistunt, quàm in interpositione particularum minimarum unius elementi (nam in minima divisa esse præsupponunt) inter minimas particulas alterius; quâ ipsâ fit, ut singula alterentur & quoad formas refringantur: quandoquidem formæ seu virtutes elementorum in sui generis collectione & non impedita agitatione consistunt, prout è superioribus abunde constat. Quamobrem cum particulæ elementares sibi mutuò interponuntur, hoc ipso formæ & vires elementorum franguntur, ut attemperatis singulorum, aliàs cum excessu agentium, viribus, eorum particulæ inter se

con-

confusæ fibique variè appositæ & coalescentes, novam mixti formam constituent.

IV. *Sic ergo elementa non essent actu in mixtis?*

Sunt actu in mixtis, quoad sparsas per se invicem particulas, h. e. quoad materiam; non sunt actu in mixtis quoad formam, quæ in singulorum generum separata collectione consistit. Quemadmodum enim in vulgaribus crassioribus confusionibus, vini v. g. cerevisiæ, lactis &c. nulla mixti pars vel vini, vel cerevisiæ, vel lactis, saporem aut virtutem præcisè retinet, sed hæ variè se invicem obtundentes, mixtum quandam saporem ac mixtam virtutem percipiendam exhibent: ita prorsus in elementorum mixtione, ignis e. g. particulæ calorem sibi connatum, h. e. agitationem celerrimam, non servant integram, propter interpositas, aëreas, aqueas &c. illam agitationem impediētes, & sic in cæteris.

V. *Sed quævis mixti Physici portio, etiam minima, debet esse mixta?*

Non aliter ac in mixto vulgari, per appositionem aut confusionem tali. Nam in antedicta mixtura vini, lactis, ac cerevisiæ, penitiùs inter se confusarum, nulla ipsius guttula tam exigua concipi potest, quæ non aliquam vini, aliquam cerevisiæ, aliquam lactis guttulam intra se continere similiter esset concipienda. Quod si verò ipsas has miscibilium particulas seorsim consideratas, pro mixti partibus, habere velis;

de iis non minus negare poteris, quòd sint mixtæ, quàm de particulis minimis elementaribus, igneis, aëreis &c. quæ in mixto sunt, ejusque adeò partes, sed non quæ mixti, aut ipsæ quoque mixtæ.

VI. Ut res hæc per exempla specialiora dilucidior evadat, annon certi ac distincti mixtionum gradûs constitui possunt?

Possunt omnino: Nam quælibet mixtio sive compositio involvit, aut (1) congregationem aliquam promiscuam minutiarum ferè sine contactu immediato intra aërem vel ætherem interfluum, ut in *fumosis* & *vaporosis* corporibus ac in ipso aëre nusquam puro; aut (2) contactum quidem, sed leviculum, ob intercedentis vehiculi perpetuam agitationem, ut in *fluidis*, & speciatim in aqua, spiritibus destillatis, oleisque & similibus; aut denique (3) connexionem & cohesionem aliquam magis minusve implicatam firmamque, & innumeris modis variam, ut in *stabilibus*, lapidibus puta, metallis, animalium ossibus, carnibus, membranis, cartilaginibus &c.

VII. Quid mixtioni in Physicis congruentissimè opponitur?

Vulgus Scholasticorum Mixtioni opponit Putrefactionem. Sed hæc oppositio minùs congrua videtur nisi quis putrefactionis vocem nimis laxè & abusivè velit accipere. Itaque cum Mixtio sit quædam plurium compositio, com-

modis-

modiffimè ipfi opponetur Resolutio, -cujus species quædam est Putrefactio.

VIII. *Erunt igitur dubio procul totidem solutionum, quot fuerant paulò antè, mixtionum, genera?*

Sic est: Et *primi* quidem generis resolutio consistit in corporum fumosorum aut vaporosorum, vel ulteriore distractione & omnimoda tandem difflatione ac dissipazione, prout nubes ac nebulæ à Solis calore dissipantur, aut à ventis disjiciuntur; vel in arctiore ad pristinum contactum coactione, quo sensu eadem nubes ac nebulæ in rorem, pruina, nivem, pluviam &c. resolvi dicuntur. *Secundi* generis solutio, fluidorum in vaporosam aut fumosam dispanzionem, h. e. partium antea sese contingentium ac super invicem quasi repentium facilem segregationem, & è statu fluiditatis in statum volatilitatis emotionem quandam importat. *Tertii* generis solutio, divisionem propriè dictam involvit corporum stabilium & firmiore, plus minus, partium nexu cohærentium, impetu quodam facto, non solùm in externam superficiem, frangendo (quo modo v. g. saccharum, glebæ salinæ, terreæ, lapideæ &c. tundendo in pulveres resolvuntur) sed adactis intimiùs, tanquam minutis cuneis, *Solventium* particulis, ut ignis & aquæ, five purioris ac inermis, five armatæ salium aliisque rigidioribus spiculis, in spiritu e. g. vini, nitri, vitrioli &c. spiritibus, aquis item fortibus, regiis, similibusque, quæ vocant, menstruis.

IX. *Que.*

IX. *Quenam autem sunt horum generum precipuæ species?*

Plurimæ sunt & multæ varietatis, ut *Evaporatio*, *Liquefactio*, *Pulverisatio*, *Calcinatio*, *Filtratio*, *Percolatio*, *Exhalatio*, *Destillatio*, *Sublimatio*, *Fermentatio*, *Præcipitatio*, & post multas alias tandem *Putrefactio*; de quibus singulis vel superius in Parte generali de Mutationibus corporum jam dictum est; vel in sequentibus nunc ordine ita dicetur, ut modus aliquis imaginabilis in unaquaque solutionis specie pro virili declaretur.

X. *Quomodo igitur fieri concipitur evaporatio?*

Fiunt evaporatio, liquefactio & calcinatio, omnes ope caloris, nunc mediocris, nunc excessivi. Cum enim omnis calor in particularum rigidiorum celeri & confusa agitatione consistat, fit, ut fluidorum solutæ magis minusve particulæ à calore etiam non summo facile agitentur, & à reliqua liquoris massa separantur & in aërem aliquousque attollantur, vaporisque adeò formam induant, hac ipsa verò agitatione jam leviores redditæ, ab aëre graviore altius attollantur, donec, calore interim gradatim deficiente, pristino ponderi redditæ terram repetant: Et hoc est, quod *Evaporationem* dicimus & *vaporum* vicissim in fluorem pristinum *resolutionem*.

XI. *In*

XI. *In quo consistit liquefactio?*

Hæc propriè loquendo est corporum solidorum, quorum partes nondum sunt solutæ, sed solvendæ demum, (quod ideò majorem vim caloris & ignis postulat, pro firmiore aut debiliore partium nexu) & postquam solutæ sunt agitandæ, & quantum fieri potest, similiter dissipandæ, & per aërem vicinum disjiciendæ, ut e. g. in glaciei aut ceræ liquefactione visibiliter contingit. Verùm, quia quorundam ejusmodi corporum (ut e. g. metallorum) particulæ valdè graves sunt, ut, solutis licet earum vinculis, in aërem attolli ne à magno quidem calore possint, ideò lateraliter saltem ab interfusis ignis particulis emoveantur, ut superinvicem provolutæ & quasi repentes, fluorem aut liquorem constituent; deficiente autem postea sensim agitatione igniculorum, superinvicem confidant & qualitercunque rursus implicatæ & connexæ pristinam stabilitatem acquirant.

XII. *Quomodo calcinatio à prioribus solutionum generibus differt?*

Modus operandi ratione solventis idem est, effectûs autem discrimen à diversa objecti constitutione dependet. In lapidibus e. g. ossibus aliisque (quæ propriè loquendo calcinari dicuntur) videtur esse particularum componentium nexus & cohæsiô paulum intricatior, ut penitus dissolvi nequeant, aut (quod verius est) tanta ac tam compacta vis ignis, aut tam
diu

diu continuata, non adhibetur, qualis & quanta in fundendis metallis &c. adhiberi solet; quia scopus & propositum in ejusmodi calcinationibus non aliud est, quàm ut eò usque procedat partium solutio, ut plenaria tandem aut levi contusione, aut aquæ affusione, vel etiam humidi aëris ingressu, nullo negotio consequatur. Palàm autem est in hoc calcinationis negotio (sive à vulgari sive à solari calore peragatur) multam etiam evaporationem humorum contingere, qui vinculum quasi & gluten siccarum portionum constituerant.

XIII. *Quid est Filtratio sive percolatio?*

Hæc in liquoribus impuris, aut heterogeneis saltem, præcipuè obtinet, dum per qualos & vasa sensibilibus perforata transmittuntur, ut impuriora aut crassiora in vase relinquant, subtilioribus partibus solis trajectis & ex reliqua massa separatis. Neque verò tales percolationes in artificialibus tantum frequentes sunt, per corporum texturas poris & meatibus visibilibus destitutas, (ut per chartas bibulas, per coria &c.) sed in naturalibus quoque, & nominatim in animali corpore, frequentissimæ; siquidem chyli, sanguinis, feri, lymphæ, bilis, spirituum &c. generationes, hujusmodi organorum colatoriorum (in intestinis e. g. pulmonum, renum, hepatis, cerebri substantia mirâ varietate dispositorum) operâ perficiuntur.

XIV. *Qui*

XIV. *Quinam sunt Exhalationis, Destillationis & Sublimationis distincti conceptus?*

Exhalatio generatim dicitur, cum è corporibus minutæ quædam particulæ, ope caloris cumprimis solutæ & ab aliis separatæ, ejusdem impetu & aëris gravitate sublevantur & exprimentur, sive in aërem apertum, sive in cucurbitas rostratis alembicis tectas, & in retortas, recipientia καὶ ἐξοχήν sic dicta visibiliter aut invisibiliter, gregatim quasi & in copia. Talis enim minutiarum separatarum aggregatio quia halitus appellari consuevit, ideò earundem à suo corpore paulo longior Separatio, Exhalatio appellatur. Et quemadmodum ille halitus vel humidis vel siccis particulis constat, humidarum aggregatio *Vapor* dicitur, & ipse separationis actus *Evaporatio*, tanquam altera Exhalationis species, quam ab effectu per accidens consequente (dum nimirum evaporantes minutæ, ubi ad frigidiusculos vasorum quasi parietes appulsæ in stillas iterum confluunt & per alembicorum rostra destillant) *Destillationem* vocitamus: quemadmodum è contrà, dum halitus siccior sive particulæ terrestres sub forma *Fumi* ascendentes, vitrorum lateribus adhærent & in granula salina, sulphurea &c. concresecunt, id *Sublimationis* nomine insignimus.

XV. *Quid intelligis voce Fermentationis?*

Nihil aliud intelligo, quàm non nimis arctæ.

etæ aut firmæ colligationis partium lentam quandam, intrinseco principiorum heterogeneorum motu factam semotionem, ita ut nullo alio vinculo amplius quàm contactu simplici uniantur; qualis e. g. in cerevisia & massa farinacea, forinsecus immisso fermento, h. e. fœcibus ex alia cerevisia jam fermentata transsumtis, aut parte massæ recens fermentatæ ad acefcentiam sepositâ, caloris præfertim alicujus interventu, in musto verò, pomaceis &c. sine externo additamento, peragitur; cujus motionis intrinsecæ causa ab elementis subtilioribus, æthere puta, & hoc adhuc subtiliore innominata materia, petenda est, quæ nusquam quiescit, sed perpetuò crassiorum elementorum partes alibi invisibiliter, alibi visibiliter, exagitat. Quod si ejusmodi partium semotio, non lentè sed celeriter, & uno quasi impetu fiat, *Ebullitio* potiùs quàm fermentatio appellari solet.

XVI. Quid est Præcipitatio?

Est hoc vel alio modo solutarum partium diversi generis, at contactu mutuo massam adhuc confusam constituentium, subitanea separatio, quâ particulæ omnes, quæ sunt unius generis, deserunt contactum particularum alterius generis, e. g. liquorum solventium, fundumque præcipiti motu petunt. E. g. Coralliorum frustula aceto destillato, Mercurius ab aqua forti ita solvitur, ut utrorumque minutia cum liquore solvente invisibiliter commisceantur. Quod si verò isti mixturæ aliquot
olei.

olei tartari guttulas, huic muriam vel aquam falsam superinfuderis, ibi pulverem rubentem, hîc candidum depluere & in vitri mixturam continentis fundum præcipitari videbis. Quibus addi potest experimentum P. Lanæ, quo Butyrum antimonii, post rectificationem in fluorem limpidum & satis ponderosum mutari, deinde verò si aquam infundas, pulverem album in magna copia præcipitari testatur. Vol. II. p. 108.

XVII. *Quinam est hujus præcipitationis
modus, aut quanam genuina ratio
concupienda?*

Duplicem concipio modum, quo particulæ solutæ intra solventis substantiam virtute motûs intestini tantisper sustentatæ, subito ab ipsa separari & ad fundum detrudi queant: (1) Si solvens fluidum, quod sua gravitate, adjuvante motu suarum partium intestino, particulas salinas, sulphureas, metallicas &c. prius sustentaverat, specie levius reddatur per affusionem fluidi levioris; prout e. g. ova gallinacea intra aquam falsam natantia, si hæc, affusâ multâ aquâ dulci, diluatur ac levior reddatur, fundum petunt, [quo referri posset experimentum Lanæ quæst. præced. alleg.] (2) Si particulis solventi innatantibus superpondium aliquod addatur, ut ipsæ specie graviores redditæ, nec à solvente amplius sustinendæ, fundum suâ sponte petant: prout ova gallinacea intra falsam aquam natantia, si singulis pondusculum
Z ali-

aliquod plumbeum adderetur, hoc auctario sufficiente utique detruderentur. Et huc reliqua duo experimenta revocari posse videntur.

XVIII. *Quâ ratione deniq; Putrefactionem distinctius possum concipere?*

Hîc ante omnia putrefactio imperfecta seu inchoata, à perfecta seu plenaria distinguenda videtur. Hujus totus processus in seqq. consistit gradibus: Primus est solutio quædam initialis aliquarum saltem particularum humidarum, præcipuè in corporum poris detentarum, quæ postea expulsæ corpus integritati pristinæ restituunt. Secundus gradus est, quando solutio fit non aliquarum solum & in poris corporum conclusarum, sed omnium, atque adeò ipsius nexûs staminum & contexturæ essentialis, quod apparet in pomis & lignis putridis. Tertius denique gradus est, quando solutio fit plenaria in ipsa quasi prima elementa, tunc demum absoluta, quando humore omni exhausto, res in siccum quendam pulverem abit; prout hic gradus, unâ cum duobus præcedd. in putrefactione cadaveris humani clarissimè apparet. Et in hac plenaria putrefactione impossibile est corpus quod computruit naturæ viribus in suam integritatem restitui.

XIX. *Quenam est causa efficiens putrefactionis?*

Aristoteles definit Putredinem Lib. IV. de Meteor.

Meteor. cap. I. quod sit *corruptio proprii & naturalis caloris in unoquoque humido, ab alieno ambientis calore dependens*, ubi per humidum intelligitur non ille humor qualiscunque, qui in unoquoque corpore mixto (etiam adamante, vitro &c.) supponitur, sed notabilis ac sensibilis, five naturalis sit five adventitius: per calorem naturalem autem is, qui cuique corpori proportionatus est ad ejus contextum conservandum. Qui si vel augeatur ultra modum, vel deficit, fit *ἀνόρεα* & naturæ corporis minus conveniens aut proportionatus; quatenus nempe justò auctior, ob ambientis contactum quodammodo furit in particularum nexum, & furibundus quodammodo seipsum sensim dissipat, humoremque nativum, accedente ex poris laxatis subinde novo, abundantior primùm, dein sensim evaporantem, tandem per longam temporis moram, ex humoris tanquam vinculi & glutinis defectu corpus exuccum & in pulverem dilabens efficit. Quod idem contingit, si defectus quidam caloris externi statim ab initio evenit, à quo calor naturalis in suo vigore conservandus foret, tanquam agens illud primum, quo miscibilia in attemperazione debita conserventur.

XX. *Sic ergo calor externus vel excedens vel deficiens erit præcipua causa putredinis?*

Ita quidem visum est Peripateticis ex illa Magistri definitione. Verùm, si rem ipsam in-

tueamur propiùs , multæ sunt, præter calorem
 computrescentiæ causæ, exque partim internæ,
 partim externæ. Inter internas , est (1) ipsa
Subjecti dispositio, quâ fit ut nimis densa , firma ac
 tenacia , nimisque subtilia non putrescant , ut
 adamas , vitrum , oleum , spirituosiores liquo-
 res &c. hi quidem propter subtilitatem partium
 actu solutarum , adeoque Solutionis non capa-
 cium , illa propter partium firmiorem cohæsi-
 onem. Quò pertinet etiam (2) *Partium diversi-
 tas ac heterogenea natura* , quarum aliæ faciliùs,
 aliæ difficiliùs mobiles sunt; unde aqua limpida
 & purior aër putredini minus obnoxia sunt.
 (3) Spiritus interni , in nonviventibus ampliùs
 inordinatiùsque moti partiumque nexum lentè
 solventes ; unde fructûs maturi faciliùs corrum-
 puntur, quàm crudi & nondum satis excocti &c.
 (4) Particulæ quædam fermentativæ in corpo-
 rum poris inclusæ, quæ , ubi liberatæ collectæq;
 fuerint , lentam partium emotionem multum
 juvant , uti chymicorum praxis docet , e. g. in
 Phosphoro ex urina humana parando. Et has
 internas promovent , tanquam causæ procatar-
 cticæ , (5) Spirituum & actuosarum partium
 abundantium , obstructis aut constrictis frigore
 poris, retentio, quæ debebant exhalare ; ex quo
 fit ut vestimenta non ventilata , acervi frumen-
 torum rariùs agitati aut subversi , aquæ stagnan-
 tes &c. putredinem pati soleant. (6) E contra-
 rio spirituum non abundantium , per labores &
 sudationes nimias aut alio quodam modo facta
 dissipatio & exhaustio ; cujusmodi in vino &
 cerevi-

cerevisia, vasis adaperitis contingit &c. Tandemque (7) eorundem, e. g. in peste per corpuscula aëris venenata confertim in corpus humanum sese insinuantia, quædam quasi *Suffocatio*, quâ non solum ipsa hominum corpora repente moriuntur, sed alia quoque proniora ad corruptionem evadunt.

XXI. *Quenam porrò sunt cause putrefactionis externa?*

Has inter (1) vel inprimis censerì debent halitûs putridi ex aliquo corpore jam actu putrescente egressi, & in vicinum aut contingens aliud se insinuantes, inibique similem solutionem causantes; id quod vulgò *contagium* appellamus. (2) Humor aqueus, quem putrescentiam valdè promovere experientia notum est, non præcisè quatenus se faciliè in poros insinuat ac partes solvit (sal enim dum ab aqua solvitur non dicitur putrescere) sed quatenus prona est ad extrahenda salia (quæ putredini aliàs resistunt) & ad liberandas particulas fermentativas & acidas, quæ postea putrefactionem perficiunt: (3) Aër non purus, sed heterogeneis particulis imprægnatus, quibus magis ferè quàm aqua promovere putrefactionem solet, propter invectas, uti jam dictum, varias heterogeneorum particulas, quæ vel juvant cœptum inordinatum intrinsecus motum, vel etiam de novo excitant: (4) denique *Calor* ambientis, de quo suprâ satis dictum est, & hoc unum superaddendum, quòd caloris actio in hoc negotio, videatur esse præcipuè corpusculorum fermentativo-

rum, totum corpus lento motu perreptantium, excitatio quædam, qualis in fermentationibus vulgaribus contingit; siquidem putrefactio est reverà quædam fermentatio.

XXII. *Quenam sunt remedia adversus putrefactionem?*

Primum est *Frigus*, quod & motum sistit intestinum, & adventitias putrefactionis causas arcet: Secundum *Calor*, non lentus tamen, sed vehemens, & putrefactioni sevientia expellens; exemplo sunt carnes assæ, arefacta, infumata, aër incendiis purgatus &c. Tertium *Ventilatio*, quâ particulæ putrefactivæ expelluntur aërisque flatu dissipantur; cùm econtrà *Aëris exclusio*, stagnantis sc. & lenti, quartum sit remedium, plurimis experimentis comprobatum; quia aër invehit corpuscula talem inordinatum motum vel juvantia, vel de novo excitantia. Sextum suppeditant *Salina & adstringentia*, tum constringendo humores putrefactivos eorumque motum sistendo, tum verò corporum texturam firmando. Exemplo sunt Salita, Rosæ sale conditæ &c. Septimum *Pingua*, aërem quippe ejusque putrefactivas particulas arcendo. Exemplo sunt Balsamationes, & oleorum guttæ succis &c. supernè affusæ. Octavum denique *Spirituosa*, quæ humores putrefactivos in poris corporum contentos eliminant. Exemplo fit Sp. Vini atramentum à mucò conservans, & immersa sibi, uti balsamica, diu à putredine custodiens.

PAR-

PARTIS SPECIALIS
PHYSICÆ
 MODERNÆ SANIORIS
 SECTIO POSTERIOR
De
MACROCOSMO
sive
Mundo Supra-lunari.

CAPVT I.

De
Coelo & Stellis in genere.

**I. Quid vocas Macrocosmum seu Mundum
 Supra-lunarem?**



Astum illud expansum, quod ultra
 aërem nostrum, noctu præsertim,
 prospicientibus oculis occurrit,
 corporibus mirabiliter splendenti-
 bus (quas *Stellas* vel *Astra* commu-
 niter appellamus) innumerabilibus undiquaque
 distinctum ; quod ipsum expansum lumine de-
 stitutum, tanquam commune stellarum recepta-
 culum,

culum, ab apparente suâ cavitare, *Cælum* vocare consuevimus.

II. *Cùm igitur astra luceant, cœlum non luceat, sed pelluceat, terra deniq; nec lucem habeat nec pelluciditatem; annon hinc omnium in toto Mundo corporum commoda peti distinctio potest?*

Ita certè Cartesiani observârunt, omnia totius mundi corpora, sive magna sint sive parva, ad hæc tria genera commodè revocari posse, quòd alia *lucida* sint & propriâ nativæque luce fulgeant, è sua substantia originaliter emissâ, veluti Sol, & (quod postea vero similiter ostendetur) pleræque stellæ cæteræ, quas, observatam inter se fixam eandemque perpetuò distantiam, *Fixas* nuncupamus; alia non propriâ quidem luce fulgeant, sed à sole aliisque lucidis illuminata, hoc mutuatio lumine resplendeant ac *reluceant*, uti terra nostra cum à Sole illuminatur, & (quod infra probabitur) Luna, cum paucis quibusdam stellis erraticis sive Planetis dictis; alia denique nec luceant, nec illuminata reluceant, sed receptos aliunde radios transmittant, h. e. *pelluceant*, veluti cœlum sive æther in summo gradu, aër verò, & aqua minori, vel majori solùm gradu, utpote partim pellucida, partim verò etiam opaca & relucetia.

III. *An-*

III. *Anne verò in parvis etiam (uti dixisti) & partialibus corporibus, hoc triplex discrimen observa- tur?*

Utique : nam in terra v. g. reperiuntur
luce nativâ præditæ partes variæ, ut ignes cu-
linarum, faces & flammæ candelarum, incen-
dia montium ignivomorum, ignium in aëre
fatuorum, lambentium, stellarum cadentium &c.
parvulæ cicindelarum ac lampyridum, vel toto
corpusculo vel particulâ quadam sui corpusculi
parvulâ lucem in tenebris emittentium, scin-
tillæ, similesque ex felium perstrictis dorsis,
adamantum quorundam duriore quadam cuspi-
de prefforum aut perfriCTORUM, facieculis emi-
cantes; splendor denique obtusior lignorum
quorundam putridorum, squamarum in pisci-
bus quibusdam putridis &c. maris denique flu-
ctuum nonnunquam in tenebris nocturnis cre-
perâ quadam luce oculos perstringentium &c.
Relucentiam sive opacorum suâ naturâ corpo-
rum, at receptum à præcedente genere lumen
retroflēctentium, exempla, omnes parietes,
lapides, omnia metalla, specula, tota deniq;
sicca tellus ejusque partes singulæ ex mutuati-
tio Solis lumine egregie resplendescentes, sup-
peditant innumera: Pellucetium denique sive
pellucidorum exempla, terram ambiens aër,
aquæ in maribus, fluminibus, rivis, fontibus,
humores in oculis &c. Vitrum denique, cry-
stallus,


stallus, & similia passim repræsentant : Verbo, nullum occurrit in hoc universo mundi elementaris systemate corpus, quantumvis pusillum, quod ad unum dictorum trium generum, aliquo saltem gradu revocari non possit; neque dubium est in aliis mundi Corporibus totalibus, Luna, Sole &c. eadem deprehensum iri, si lustrare ea cominus daretur.

**IV. *Jam velim singulorum horum generum,
& primò quidem lucidorum, rationem
genuinam mihi distinctiùs
explices?***

Lucis ratio, quatenus in ipsis corporibus lucidis spectatur, nihil aliud esse videtur, quam agitatio aut rotatio quædam localis particularum ignearum aut similium, ex quibus corpus lucidum constat, eaque confusa & inordinata in omnes partes; quatenus autem efficaciam illam luminis admirabilem in oculos animalium à lucido remotissimos exerit, in mera quadam ætheris interjecti & per omnia diffusi pressione videtur consistere, (prout in Partis Gener. Sect. II. cap. VI. Quæst. III. jam dictum est) qua fit, ut ab uniuscujusque particulæ igneæ similisve in Sole flamma, aut alio lucido, rotantis impulsu, series particularum contiguarum ætheris integra & quantumvis longa sic prematur, ut proximâ Soli particulâ e. g. 1. (Fig. 8.) impulsâ & pressâ, ultima, quæ terram aut oculum aliquem in terris vel
potiùs

potiùs ipsum oculi fundum attingit simul eodem momento prematur, & fibrillam aliquam retinæ urgeat & afficiat; simili-que modo ab eadem ætheris particula similis ali-ûs seriei rectilineæ pressio ad omnia alia loca hemisphæricè circumposita continuetur oculos-que in singulis, ex hypothesi, collocatos eadem ratione afficeret.

Fig. 8.



V. *Qui porrò Opacorum corporum ratio
& natura commodissimè concipie-
tur?*

Si concipiamus e. g. à Solis agitata particula 3, (in ead. Fig. 8.) hujusmodi pressiones rectilineas hemisphæricè quaquaversum, atque adeò plures in Lunæ quoque, intra hemisphericam illam radiationem forte fortuna existentis, superficiem L terminentur, à cujus opacitate & soliditate prohibeantur ulterius rectà exporrigi; ut necessum sit illarum pressionum non statim prorsus evanidam vim retroflecti & rursum quidem in omnes partes, adeòque versus tellurem T quoque, ibique positos oculos eodem modo afficere, ac si è corpore Lunari originaliter advenissent: quo ipso fit, ut Dæ effectum illum adtribuentes, ipsam ut lucidam intueamur, non aliter ac soli lucem & lucis sensum attribuimus, à quo talis pressio in oculos nostros originaliter, nullo opaco medio emanavit.

VI. *Qualiter deniq; pellucidorum natura
concupienda est?*

Cùm æther sit ipsum luminis subjectum ac vehiculum, apparet pressiones ætherearum linearum in infinitum quasi continuari, nisi in opacum quoddam incidant, indeque ad nostros oculos reflectantur; quo fit ut illud ipsum opocum, à quo reflexio facta est, videamus. Quoniam autem ætherea substantia à se ipsa reflecti

reflecti non potest, cum ejus pressiones in semet etiam non incidant, sed ipsi potius ut subjecto inhæreant; ideò æther summè pellucidus est omnique lumine destitutus. Aër autem aqua, vitrum, crystallus &c. ideò pellucida sunt, quòd substantiam ætheream per suos poros undique permeantem contineant, & pororum quidem suorum qualicunque rectitudine sic contineant, ut æthereæ pressiones per illos rectâ, vel quasi rectâ, lineâ continuari queant. Quia verò hi talium corporum pori particulis quibusdam solidis clauduntur, illæ quæ in hæc pororum interstitia incidunt (non in ipsos poros æthere repletos) inde reflectuntur, & hætenus illa corpora non sunt summè pellucida, sed ex parte quoque, alia magis alia minus, opaca.

VII. *Hac igitur ratione cœlum sive æther corpus simplex dici cum Aristotele poterit?*

Per nos equidem hoc dicere cuique licebit, maximè si mentis quadam abstractione partes heterogeneous ætheri sæpe admixtas (quales e.g. in caudis saltem cometarum, lumen seu radios Solis manifestè reflectentibus, conspicuæ fiunt) ab eo separemus. Utrum ea simplicitas etiam stellis pari jure tribui possit, dubitamus, posteaquam in Sole maculas, adeoque partes heterogeneous ad ejus integritatem constituendam pertinere visas, deprehendimus: nisi quis has etiam peregrinas Soli judicet, ideo ipsas
expel-

expellere & à se removere conanti. Verùm qui & qualiacunque sint illa cœlestium effluvia, ad cœlestia tamen pertinebunt, & à cœlestibus proveniunt, omnimodamque illam eorum simplicitatem ac puritatem omninò redarguunt.

VIII. *Quid verò sentiendum est de orbibus cœlorum solidis & crystallinis?*

Certum est Aristotelem olim & alios eo antiquiores Philosophos, ejusmodi solidos & crystallinos orbes confinxisse, pro faciliore motuum diversorum, imò quorundam è diametro repugnantium, inter se conciliatione; tametsi fateor nunquam satis hanc Aristotelis hypothesein cum iis quæ Lib. II. de An. cap. VII. dicit, *quod aër & aqua non sint pellucida, quatenus aër sunt & aqua, sed quia natura quadam in his utrisq; eadem inest & in æterno illo supero corpore*, in gratiam reducere potui; nisi ætherem fluidum, hîc aëri & aquæ contradistinctum, ibi quoque crystallinis orbibus, (per quorum poros scilicet idem æther fluidus æquè ac per aërem & aquam commeare possit) contradistinguamus.

IX. *Quænam erat illa diversorum, imò prorsus oppositorum, motuum per orbes solidos conciliatio?*

Hæc erat, quod fixas stellas omnes uni eademque orbi supremo sive octavo affixas statuebant, septem autem cæteros inferiores quemlibet non nisi unicum ex Planetis gestare
sup-

supponebant, assignato interim cuique horum orbium suo dæmone motore (quem intelligentiam vocabant) & octavo quidem orbi seu primo mobili omnium robustissimo, qui hunc immani rapiditate intra viginti quatuor horas ita ab ortu in occasum circumraperet, ut insimul cæteros inferiores intra se conclusos unà versus eandem plagam raptaret: dum interim, horum intelligentiæ, in oppositum paulò obliquius connisæ (quia directè obniti octavi orbis rapiditati difficilius erat) suum quæque orbem, quantum poterat ab occasu in ortum provolvebat: ut hoc pacto communis sive primus Motus his per accidens (propter supremum orbem à quo includebantur) proprius autem per se (ex propria cujusvis intelligentiæ motrice virtute) competeret, & is quidem tantò tardior, quantò supremi orbis rapiditati propior existeret; insimulque aliqua ratio motûs planetarum in latitudinem extaret.

X. Annon igitur hæc solidorum orbium hypothesis etiamnum servari posset, ad istas motuum diversitates faciliùs explicandas.

Ut nihil nunc dicam de suppositione illa gratis assumpta dæmoniorum sive intelligentiarum, quarum numerum ex observationibus subsequentium temporum, quæ sursum etiam ac deorsum planetas emoveri, h. e. nunc longiùs à terris abesse, nunc propiùs &c. testantur, subinde augeri oportuit adeò Kircherus in Itin. ecclæ-

ecſtatico p. 152. etiam in hypotheſi cœli fluidi plures angelos ſingulis planetis indefinente labore variè movendis præficiat ; ipſam cœlorum illam ſoliditatem Tycho- nis demum ævo ſuſpectam primùm reddiderunt , deinceps autem penitus exploſerunt 1.) Cometa- rum (quos Cœlorum non aëris incolas eſſe Tycho- nem Parallaxis eorum primum docuerat) per cœlos , ſurſum , deorſum ac tranſverſim , liber tranſitus ; itemque 2.) Martis infra Solem deſcenſus , eadem parallaxium utriusque comparatione deprehenſus ; quandoquidem nec iſte nec hic explicari vel concipi poteſt , citra penetrationem orbium ſolidorum , centum aut mille milliarium ſpiſſitudinem habentium. Quin & 3.) Colorationis omnimodus in Cœlo nocturno defectus (quod Solis tamen infra Horizontem tum exiſtentis radios excipere Planetarum in eodem cœlo obviorum illuminatio teſtatur) qualem futurum eſſe cryſtallina ſpiſſiſſimorum orbium ſubſtantia negat , cum cryſtallus non ſummè pellucida ſed opacitate multâ mixta ſit , quæ ex tam vaſtis orbibus non poſſet non incomprehenſibilem radiorum multitudinem , adeoque ſenſibilem aliquem ſplendorem totâ nocte ad nos reflectere. Quod cùm non fiat , & fluidam eſſe cœlorum ſubſtantiam , ex præcedentibus , & tam ſubtilem , ex præſenti concludendum eſt , ut aërem tenuitate tantundem circiter , quantum aër aquam , ſuperare videatur.

XI. *An igitur orbes omnes in cœlo nunc exulabunt ?*

Nequaquam : nam loco illorum solidorum & crystallinorum , qui Phænomenis cœlestibus rectè explicandis insufficientes deprehensi sunt, Orbes nunc fluidi utilitate multò majore fuere substituti , h.e. gyri quidam & quasi vortices fluoris ætherei, ex conditoris liberrima voluntate (quam ex effectibus ipsis hariolamur) ita coordinati , ut (1) circa quamlibet stellam fixam non minus ac circa solem, fixis naturâ similem , ingens gyrus æthereus perpetuò volveretur , sive ab ortu in occasum in hypothese Tyconica, sive ab occasu in ortum in copernicana : (2) ut circa terram quoque, & planetarum quemlibet peculiaris aliquis respectivè parvulus vortex æthereus gyret ; qui porrò (3) omnes à generali Solis vortice circumducantur, suosque adeo singuli Planetas, pro ratione distantiae cujusque à Sole, celerius aut tardius absolvere faciant motûs suos proprios.

XII. *Quenam est major illa utilitas, quam ex hac orbium fluidorum hypothesis, præ illa solidorum, expectare licet ?*

Multiplex illa & varia, quas ordine quidem exponere singulas, nec tamen pro indubia veritate cuiquam obtrudere, constitutum est. Et prima quidem illa ipsa est, quòd hoc pacto concinna pateat ratio, cur Planetæ gradatim plus temporis in motibus suis annuis insumant,

quantò majores sunt illæ peripheriæ , quas eorum quilibet intra gyrum communem Solis habent decurrendas. *Secunda* huc redit ; quòd , cùm aliàs experienciâ constet , ea corpora , quæ intra hujusmodi vorticem reponuntur , (ut si pomum projiciatur in vorticem aquosum) per helices gradatim angustiores circumagi , donec ad ipsum vorticis centrum pervenerint , huic difficultati per vortices parvulos particulares obviam eatur , à quibus planeta quisque in determinato loco vorticis communis detineatur , & eadem quamproximè distantia ab hujus centro circumvehatur.

XIII. Illa procul dubio etiam ex dictis utilitatibus una est , quòd hoc modo satellitum Jovis & Saturni quoque gyrationes , circa hos primarios planetas , commodius declarari possint ?

Est omninò hæc , & numero quidem *tertia* , Vorticum utilitas , quam etiam in Luna circa tellurem spatio temporis menstruo revolvenda percipimus ; dum interim quidam è satellitibus superiorum Planetarum breviori mora temporis periodos suas absolvunt , quia minus à Planeta primario distant , insuperque suis singuli vorticulis minutioribus inclusi servantur , uti dictum est , ne vel ad se invicem ferri & collidi , vel etiam cum primario centrali concurrere queant. Accedit *quartò* , quod ipsa omnium horum corporum figura sphærica & prima quasi genesis , semelque genitorum constans ex tot.

retrò

retrò seculis perpetuitas , faciliùs concipi queat
& ad causam aliquam naturalem revocari.

XIV. *Quamnam Verò causum naturalem ipsis vorticibus assignabimus ?*

His causa naturalis assignari nec potest,
nec debet. Non potest, quia per hos vortices
natura demum constituta concipitur , & con-
sequenter etiam horum vorticum interventu
operari : non potest igitur Natura vorticibus
posterior, his tanquam prioribus causa esse suæ
existentiæ. Quia igitur naturalis vorticum
causa assignari non potest, nec etiam talis assi-
gnari debet; quin subsistendum aliquando, &
supernaturalis aliqua & merè arbitraria tandem
agnoscenda : quem illum ipsum Naturæ finem
ac scopum primarium sub hujus operæ initium
diximus, ut ex ejus mirabili fabrica Factorem
ejus & Opificem agnoscere tantum non coge-
remur.

CAP. II.

De

**Sole & fixis Stellis, tanquam na-
tivâ luce præditis corporibus
in specie.**

**I. *Cùm de Solis nativa luce nemo, nisi cœcus
natus dubitare possit, an de eadem in fixis
stellis æquè certi sumus ?***

Summam saltem Verosimilitudinem habet
hæc de fixarum luce nativa sententia, 1.)

ex eo capite, quod, cum Planetarum lumen gradatim debilius observetur, quò longius à Sole distant, prout in supremo omnium Saturno manifestissimum est, si fixæ suum lumen à Sole pariter haberent mutuatum, hoc multo adhuc debilius esse, propter ingentem earum ultra omnes Planetas distantiam, necessum foret: cujus oppositum tamen, nimirum vigorem lucis multo majorem, ipsis oculis ingerunt. Quem insuper 2.) vivacior multo & frequentior in fixis luminis scintillatio confirmat, (cui in Sole quoque magna lucis fluctuatio, præsertim circa margines, respondet) quæ in Planetis aut planè nulla est, ut in Saturno, omnium supremo, aut rara & per intervalla temporis majora tantum sensibilis. 3.) Præcipuum & robustissimum argumentum ex eo petitur, quod Astronomorum plerorumque consensu tanta sit fixarum à Sole distantia, (minimum nimirum centuplo major à fixis, quàm à terra distantia, vid. Kirch. itinerarium p. 344.) ut hic ex aliqua fixarum spectatus, fixæ alicujus magnitudinem habiturus esset. Jam cum omnes fixæ simul & junctim tantum luminis communicare terræ nostræ non possint noctibus illuminibus, ut proximus ei oculus noster, aliquam inde reflexam sentire possit luculam; quæ quæso possibile erit, unum Solem, (respectu distantiae fixarum immensæ pro una stella fixa habendam) innumera fixarum corpora tanto splendore imbueret, qui, non dicam oculo ipsis proximo sensibilis foret, sed qui ex immensa earum à nobis quoque

quoque distantia, ad oculos nostros reflexus, ipsum splendorem Saturni, nobis multò propioris, vigore & vivacitate multum superaret.

II. *Hoc igitur modo Stella fixæ omnes, ut totidem in mundo Soles essent consideranda?*

Essent utique, si propriâ & nativâ luce radiant, (velut hætenus evictum opinamur,) & præterea corporum suorum absolutâ magnitudine Soli vel paria faciant, vel non multum cedant, nonnullæ saltem (quod Astronomis plerisque credibile videtur) illum nostrum quoque superent.

III. *Annon inde invidium peti argumentum potest, quod aquæ supra-cælestes, h. e. supra omnes stellas fixas circumflua, non dentur?*

Ita fanè videtur. Nam, ut præteream, istas aquas naturâ fluidas (nisi quis fortè congelatas fingere malit) in cœlo fluidissimo subsistentiam, aut fundum aliquem cui innitantur, nullibi reperturas; illud saltem incomprehensibile videtur, quantumcunque subtiles fingantur, ut vix aëri nostro subtilitate cedant (quod tamen salvâ aquæ naturâ ne fingere quidem licet) cur à tot vicinis Solibus illustratæ, non totâ nocte resplendant; quandoquidem aërem nostrum ab uno Sole jam lapso & nondum exorto, ab imo colustratum, rutilante quodam splendore nostros

oculos in crepusculis vespertinis & matutinis insigniter perstringere manifestò sentimus.

IV. *Ergone aquæ supracœlestes penitus negandæ erunt?*

Eo sensu utique negandæ sunt, quo supracœlestes esse, h. e. supra omnes cœlos positæ concipiuntur; quatenus autem aquis nostris in terræ superficie obviis opponuntur, tanquam his oppositæ & per expansum intermedium ab iis divisæ, eatenus negari nullo modo possunt, propter expressum Scripturæ textum Genes. I. v. 6. & 7. Sed vel in nubibus pendulæ cum quibusdam nostratibus Theologis statuendæ sunt, vel secundum eorum hypothesin, qui Lunæ maculas pro maribus probabilissimè habent, in illa terra opposita sive *antipodi* concinnè locarentur.

V. *Quenam igitur est natura vel substantia Solis & consequenter etiam stellarum fixarum?*

Igneam esse Solis substantiam (1) sensus ipse evidenter deprehendit, in Solis vultu vespere paulò ante occasum, vel manè ante ejus ortum, oculis nudis impunè inspecto. (2) Maculæ in ejus facie frequenter observatæ, post aliquam temporis moram iterum evanidæ, & suæ obscuritatis loco splendidius deinde, quàm prius, lucentes, indeque facularum nomen meritæ, id apertè satis testantur. (3) Denique ipsa ratio ex eo certissimè concludit, quòd in Sole & lumen

men & calor indissolubili nexu semper conjuncta reperiuntur ; quæ sola ista duo criteria sunt, quibus ignis alicujus præsentiam agnoscimus, sæpiùs etiam alterutro tantùm contenti. Accedit (4) Sacræ Scripturæ autoritas Psalmo 19. v. 7. & Ecclesiastici 43. v. 3. 4. (tametsi apocryphi nostrâ opinione) item Patrum Ecclesiæ quàmplurimorum, quos congregasse Scheinerum Lib. 4. Rosæ Ursinæ & Rheitensem in Oculo Enoch & Eliæ Lib. IV. cap. 2. memorat Ricciol. Almag. Novi Lib. III. cap. 1. n. 111. & ipse quoque recenset Lib. 9. Sect. I. cap. IV. quæst. 4. Objectiones contra ☉ igneam substantiam vid. solutas à Schotto in Itin. ecstático p. 176. seqq.

VI. *An verò puri ignes videntur esse Sol & fixæ stellæ?*

Negant multi celebratissimi Astronomi Solem esse purum & merum ignem, sed ex solido quodam & liquido igneo conflatum credunt, quemadmodum Terra, & probabiliter Luna cæterique planetæ, ex solido & liquido aqueo composita sunt ; Multò minus persuadere sibi possunt, ex mero auro fuso sive liquato constare Solem, quod Honoratus Fabri putat Tract. VIII. Lib. I. Prop. 13. minime omnium autem, quæ ejusd. Tract. Lib. II. Prop. 4. & 5. de fixis gemmeis & polyedris, Cane v. g. ex adamante, oculo Tauri & Arctuno è Carbunculo, Corde Scorpii è Smaragdo, Capella è Sapphiro, Lyra è Crystallo &c. tornatis vel cæsis quasi ; de Saturno item plumbeo, Jove stanneo, Marte ferreo, Mer-

curio argenteo &c. tametsi Autor ipse hæc talia ex hypothesi solùm ac divinando se statuere expressis verbis contestetur.

CAP. III.

De

Luna & stellis erraticis cæteris,
nativâ luce destitutis.


I. *Cùm luna stellis non solùm communi omnium hominum opinione, sed luminaribus magnis ab ipsa Scriptura S. accenseatur, num ipsi quoq; nativum quoddam lumen inest?*

ITa quidem creditum fuit omni ævo, usque ad hoc nostrum, aut proxime superius, fere seculum, absurdumque putatum inter stellas numerare talia corpora, quæ nullam ex se lucem propriam & nativam emitterent. Cùm verò primariam illam lucem, cujus incrementa ac decrementa singulis mensibus in facie lunari ad nos conversa docti pariter & indocti spectamus, à Sole esse, atque adeò mutuatitiam nimis manifestum esset; illam saltem obscuriusculam in lunæ crescentis facie, juxta luminis primarii primas & postremas phases, à paucis observatam, luculam (plebeji namque homines, & inter eruditos quoque plerique exceptis paucissimis, illam non observant, nisi fortassis in quibusdam Eclipsibus, extra has autem de ea nefando quidem audiverunt.

II. *Opor-*

II. Oportet ergo valdè debilem esse illam luculam, velimq; adeò mihi distinctius exponi, quando, & ubi, illa præcipuè observari possit?

Distinctissimè (1) ea cernitur in iis pleniluniis, quæ in terræ umbram incidentia, primum lumen, quod à Sole paulò antè plena facie hauserant, amittunt, ac interim tamen, dum propter interpositam terram à Sole directè nullos luminis radios recipere possunt, in umbra etiam terræ media rubentem quandam luculam sæpe valdè notabilem spectandam exhibent. (2) Conspicitur etiam in eclipfibus Solis, ubi lunæ facies inferior (quæ adeò à Sole superiore illuminari non potest) obscura quidem, non omni tamen luculâ destituta, sed instar prunæ quodammodo candentis aut rubentis, spectatur. (3) Denique conspici faciliè quoque potest tribus aut quatuor diebus post novilunium, & quidem post & versus solis occasum, vel totidem diebus ante novilunium, manè ante Solis ortum. Facile, inquam, observari potest, modo quis leviter attenderit; quia in utroque casu falx primaria noviter vel ultimato resplendens A (Fig. IX. n. 1.) par-



Aa s

tem

tem disci lunaris maximam B sibi vicinam etiam tantillum candicantem, & vicino æthere C sensibilibiter albicantiozem exhibet : Et quidem his præcipuè conditionibus, quòd *primò* lucula illa secundaria (quam vocamus) manè ante novilunium (n. 2.) spectanda sensibilibiter intensior & vivacior observetur, quàm vesperi post novilunium; & quod *secundò*, prope utramque quadraturam, illa minus minusque conspicua evadat, & in ipsis quadraturis penitus evanescat.

III. *Estne igitur hæc secundaria Luna lucula ipsi nativa & propria?*

Ita quidem opinati sunt antiquiores, ne stellam aliquam in cœlo admitterent (ut quod absurdum valdè putabant) quæ lumine nativo omni destitueretur : tametsi vix assequi conjectando licebat, cui usui tam debile lumen in terris nostris (ad quas cœlestium omnia referre solebant) futurum esset, quod oculis nostris ægrè conspicuum est. At enimverò, posteaquam Luna in quibusdam suis eclipsibus ut anno 1580, 1583, à Keplero, 1588 à Tychone, & 1620 à Vendelino, inprimis autem in eclipsi totali altera 1642 d. 14 Aprilis, visa est in Belgio à Vendelino & aliis, & Bononiæ à Ricciolo multisque Sociis, & Pisis à Vincentio Reuerio, in umbra terræ penitus evanuit, ut, sereno licet cœlo eam frustra per unam fere horam in cœlis esset requisita, evanuit simul omnis de lumine nativo Lunæ opinio. Luminis enim natura est tantò cerni distinctiùs, quantò profundiùs umbris immersum est.

IV. *Unde*

IV. Unde ergo deinceps illa lunæ lucula in cæteris casibus frequentioribus accersebatur?

Tycho Braheus adscribit Lib. II. progymn. Veneri hujus luculæ causam; sed hæc opinio multis ex causis rejicitur, quia (1) ♀ non semper præsens est, cùm lucula illa cernitur, & (2) si præsens est & lunæ à latere posita, marginem fortè lunæ aliquo modo illustrare posset, non verò anteriora, quia ♀ Lunâ multò altior est & sublimior; eandemque ob causam (3) neq; planetis, vel absentibus, vel ☽ altioribus, neque vel his vel stellis fixis oppositis hic effectus adscribi potest, quia non semper tales ex opposito reperiuntur, neque etiam ratio justa dari facillè posset, cur in quadraturis pars Lunæ à Sole averfa à fixis oppositis non illustraretur, nec etiam appareat, cur lumen fixarum in lunam incidens indeque ad nos reflexum adeò conspicuum esset, cùm totum fixarum hemisphærium non sic illustret terram nostram, ut nos huic proximi vestigium ullum lucis inde ad oculum reflexæ videremus.

V. Ut aliorum opiniones nunc omittamus, explica mihi evidentiorē & verissimam hypothesin, his phænomenis explicandis excogitatam.


Illā procul dubio vera unicè est ac certissima hypothesis, quæ (uti lux primaria à Sole est indubiè) ita secundariam illam luculam à terra esse confidenter pronunciat; id quod (1) in casu

casu eclipsium solarium est evidentissimum: tunc enim Luna supra medium hemisphærium terræ à Sole illuminatum existit, quod quindecies plus luminis illo tempore ad lunam valet reflectere, quàm Luna, etiam plena, terræ reddere unquam potest; quia nimirum terræ hemisphærica superficies quindecies major est superficie hemisphærica Lunæ, adeoque quindecies plus luminis à Sole recipit, ac vicissim aliorum reflectit. [*Vid. Lit. B adjecti in margine Schematismi sive Fig. IV.*] Cùm verò (2) Luna secundo vel tertio post novilunium die inter B & C existit, tunc lucula illa secundaria in parte obscuriore, juxta falcem primariam (post solis præsertim occasum adhuc distinctè conspicua est, quia Luna adhuc supra hemisphærium terræ illuminatum, licet non supra ejus medium, consistit: Et quidem (3) secundo vel tertio die ante Novilunium, in *b* illa lucula sensibilibior est, quam die tertio aut quarto post ipsum in B, ideò quod in priore casu, hemisphærium telluris plus terrarum siccarum (quæ radios solis fideliter reflectunt) in posteriore autem, plus vastorum oceanorum & marium comprehendit, quæ magnam radiorum partem absorbent. (4) Denique in utrisque quadraturis, nempe in C ac c, & post & antè diebus in D & d, lucula illa secundaria Lunæ penitus nulla est, quia tunc Luna super terræ hemisphærio nocturno consistit, quod lumen ad eam reflectere nullum potest.

VI. *Quomodo verò Luna in eclipsibus propriis à terris accipiet luculam secundariam, cum ipsum terræ hemisphaerium ipsi obversum tunc nocti tenebrisq. immersum sit?*

Non est contemnendum hoc dubium, sed facile tamen solubile, si ad hoc unum attendatur, quòd non tam ab ipsa terra solida per radios reflexos, qui nulli esse tunc possunt, quàm ab aère terram ambiente, per radios refractos, illa lucula ad Lunam perveniat. Nimirum radii Solis 2 *d* & 3 *f* (Fig. VIII. & XI.) cum ceterioribus in aèrem prope *d* & *f* illapsi, & in aère bis refracti, semel in ingressu & altera vice in egressu, ab *f* versus *l* & à *d* versus *K* decussatim refracti umbram terræ intersecant lunamque istos radios, alicubi plures, alicubi pauciores, excipientem variè illuminant. Quod si verò infrà vel supra decussationem (v. g. in *c*) transire lunam contigerit, ea, jam omnibus radiis luminis destituta, prorsus evanescere & inconspicua reddi potest. Vid. Ricciol. Almag. Lib. V. p. 304.

Fig. ii.



VII. Hoc

VII. *Hoc igitur modo Luna, cùm lumen suum
primarium à Sole immediatè, secundarium ab
eodem, sed mediante terra habet, pro cor-
pore terræ nostræ simillimo habere
debebit?*

Sic est omnino, tametsi hoc rectæ rationis
judicium valdè repugnet plebejis de natura coe-
lestium opinionibus: id quod mirum esse homi-
ni philosopho non debet; quandoquidem Phi-
losophia illud ipsum & unicum quidem medium
est, quo philosophus, h. e. sapientiæ studiosus,
ab homine plebejo distinguitur. Quamobrem,
cùm terra similiter lumen primarium, nempe
diurnum, à Sole immediatè, secundarium au-
tem ab eodem, sed mediante lunâ, habeat, evi-
dens utique est insignis horum duorum globo-
rum similitudo, dum mutuas sibi operas in com-
municando sibi invicem lumine secundo,
præstant, ut non sine causa veteres Lunam
ἀντίχθονα, h. e. oppositam terræ terram, Terram
contrà *ἀντισελήνῳ*, h. e. Lunæ oppositam Lu-
nam appellaverint.

VIII. *Numquid alia quoque sunt, in quibus
Lunæ cum terra, & huic cum ista,
conveniat?*

Sanè quàm plurima. Nam (1) ut in com-
municando lumine secundo se mutuò juvant;
sic in extinguendo vel imminuendo saltem pri-
mario, sibi invicem nocent, id quod peculiari
capite

capite in seqq. evidentissimè demonstrabitur. (2) Dierum noctiumque vicissitudine gaudent utriusque partes successivè. (3) Constant utræque partibus heterogeneis, alteris planis magis & æquabilibus, obscurioribus, indeque quodammodo pellucidis; alteris asperis, montosis ac relucens magis. (4) Hinc facies maculosas, oculo eminè inspectanti utræque exhibent &c.

IX. *An ergo cæteri quoq; Planetæ pro similibus terreæ naturæ globis habendi erunt?*

Nihil equidem certi hîc asseremus; non desunt tamen in singulis indicia quædam id magnâ veri specie suadentia. (1) In ♀ & ♂ deprehenduntur per tubos opticos phasæ & incrementa vel decrementa luminis successiva, lunaribus simillima. (2) Cum infra Solem promoti iidem, inter hunc & oculos nostros medii versantur, ad instar nigrarum & rotundarum macularum lucidam ejus faciem obfuscant, proprii adeò luminis carentiam satis manifestè prodentes. (3) ♂ etiam non falcatus quidem aut dichotomus unquam, at gibbosus tamen, & aliàs plenâ facie resplendescens observatur, præterea diversis quoque maculis distinctè conspicuus; quæ similitudinem ejus cum Luna, atque adeò cum terra quoque luculenter ostendunt. (4) In ♄ & ♀ diversæ luminis figuræ non observantur, ne gibbosa quidem phasis; partium lucidiorum tamen ab obscurioribus differentiam, faciemque maculosam, ♄ præsertim, oculis armatis distinctè offerunt, & in ♀ umbrosa quædam

dam linea nunc per medium, nunc supernè nunc infernè conspicua, satis arguit, lumen quo resplendet, ipsi proprium & nativum non esse, sed à Sole ipsi, uti cæteris communicatum; id quod (5) in ♃ ejusq; Satellitibus frequentissimè contingentes eclipses (de quibus postea separatim dicetur) evidenter demonstrant.

X. Quod si verò hi globi quoq; omnes lumen, æquè ac Luna ♀ & ♂, à Sole mutuuntur, cur non easdem luminisfigurationes omnes eodem modo subeunt?

Ratio hujus diversitatis ex eo manifesta est, quòd ♀ & ♂ proximè circa ☉ moti hemisphæria sua illustrata semper ad Solem, non verò semper ad terram, sed nunc plus nunc minus ad terram, quippe extra ipsorum circulos consistentem, convertant; (Vid. Fig. V.): ♂ autem, terram quoque intra suum circulum complexus sed intervallo circa conjunctiones & circa oppositiones valdè inæquali, hoc utroque casu faciem à Sole illustratam versus terram quoque totam sensibilibiter conversam habeat, circa quadraturas autem notabilem illustrati hemisphærii partem ab ea averfam, ideoque sub gibbosa saltem facie conspicuam: Vis denique & hi orbes tam ampli sunt, ut à terra pariter ac ☉, prope centra illorum in medio quasi quoad sensum utrique consistentes, faciem à Sole illustratam, terræ quoque vicinæ totam quoque ubique exhibeant. Vid. Petri Megerlini Systema Copern. p. 15. cum Fig. 11. comparandam.

XI. Quid

XI. *Quid igitur tandem dicendum? An luna
ceteriq; globi planetici habitabiles aequè ac
terra, vel actu ipso habitati,
habendi sunt?*

Nihil temerè hîc asserendum videtur, ne-
que verò etiam simpliciter negandum, sed τὸ
ἐπὶ χεῖρ philosophicum, si ullibi, hîc certè te-
nendum. Non desunt rationes, quibus in par-
tem negativam deflectimur, ut, quod nulla
unquam in Luna, ne minima quidem, parti-
cula, sereno quidem aëre nostro, tecta vel oc-
cultata fuit deprehensa (id quod in terra no-
stra frequentissimum fore mentis oculus è luna
in hanc despiciens evidenter videt) ut conclu-
dendum inde videatur, nullas circa lunam ge-
nerari nubes, consequenter nullas in eam ef-
fundi pluvias, & his deficientibus, nec plan-
tas nasci, nec animalia (quæ plantis ad sui nu-
tritionem indigent) nec denique homines (qui-
bus vel plantæ vel animalia pabulum præbent)
inibi vivere aut sustentari posse; ut alias ta-
ceam, quæ affirmativam urgent, difficultates.
Verùm cùm alii has adhuc superabiles credant,
& præterea dierum in luna noctiumq; vicissitu-
dines, montium valliumque varietatem, aliam-
que multiplicem cum terra convenientiam,
non sine specie magnâ, urgeant; nos iudicium
nostrum tamdiu suspendimus, dum in altero
seculo major harum rerum certitudo nobis af-
fulgeat.

XII. *Dixisti suprà quæst. IV. cap. II. Lunæ maculas pro maribus probabilissimè haberi: velim igitur hujus probabilitatis fundamenta paulò distinctiùs exponas.*

Duplicis generis maculæ in facie lunari observatæ sunt; alteræ constantes ac perpetuæ, notabilis pleræque magnitudinis, ut oculum etiam inermem haut effugiant; alteræ pusillæ & per tubospecilla tantum ideoque noviter conspicuæ, eæque variabiles ac temporariæ. Hæ posteriores nihil aliud sunt, quàm umbræ partium in luna eminentiorum; quandoquidem 1.) in luna crescente usque ad plenilunium (quo toto tempore Solem ex parte occidentis positum habent) in orientem exporrectæ cernuntur; 2.) Cum ipsa plenilunia (dum Sol ipsi perpendiculariter est oppositus) maximam partem evanescunt; in luna decresciente indies auctiores, in occidentem (Sole tunc ipsius respectu orientaliore) projiciuntur. Priores autem, sive antiquæ & olim notæ, pro maribus communiter, ob rationes haut contemnendas habentur.

XIII. *Quænam verò sunt illæ rationes?*

1.) Cùm ex eodem lucis fonte hauriant lumen suum portiones maculosæ cum reliquis partibus multò splendidioribus, eas quodammodo pellucas esse, ut receptum à Sole lumen magnam partem quasi absorbeant, necessariò infertur; reliquis lumen acceptum fortiùs qua-

qua-

quaversum reflectentibus. 2.) Has ipsas maculas planâ magis constare superficie, & lucidiores contrâ magis asperas & montosas esse, ocularis utrarumque per tubos inspectio docet, inprimis autem lucis & obscuritatis confinia in luna tum crescente tum decrescente manifestò evincunt; utpote quæ, quâ parte maculas attingunt, rectilinea magis spectantur; quâ verò parte per lucidiores partes excurrunt, serrata prorsus apparent: ut maculas istas grandes æquora quædam & vastas esse planities, in propatulo sit. Quid verò 3.) Vastas hasce planities aliquoties centena milliaria suâ longitudine aut latitudine emetientes, easque simul pellucas esse credamus, quàm vasta quædam maria, nostris in tellure similia, vel fingere saltem talia, cum aliqua quidem veri specie quidnî liceat? Maximè cum 4.) figura earum valdè irregularis & Oceanorum nostrorum figuris simillima; nec non 5.) promonteriorum ad earum oras undiquaque dispositorum ordines, & 6.) lucidiorum particularum in media macularum obscuritate passim elucentium uniones, sparsas per maria nostra insulas omninò referentes, assensum vel nolentibus extorqueant; iis maximè quibus à pueritiæ præjudiciis liberari aliqua saltem ex parte contigit.

**XIV. Numquid aliud restat, circa lunam
ac cætera planetarum corpora generalius inquirendum?**

Effet equidem de ipsorum eclipsibus adhuc

dispiciendum; nisi operæ pretium crederemus, & has & lucidorum κατ' ἐξοχλὴν sic dictorum defectûs ordinarios peculiari, eoque sequenti, capite, ex professo considerare. Interim de Solis pariter ac Lunæ influentiis, sive efficacia in hæc corpora sublunaria, nonnulla definire inconsultum haut fuerit. Et Solis quidem influentiam seu efficaciam in hunc mundum sublunarem nemo negaverit, qui, non dicam, ratione sanâ, sed sensu ullo fuerit præditus: utpote à cujus lumine & calore omnis viventium vita, vigor & perseverantia per se, defectus & marcescentia, ipseque adeò tandem interitus per accidens, dependet. Estque sanè frivolum penitus, ad nescio quam virtutem Solis occultiore provocare, ubi solum lumen, cum cognatis manifestis qualitatibus, causas effectuum talium reddere potest evidentissimas: & rediculum plane ♂ fidus Sole magis calidum & exsiccans fabulari, quòd hybernis tamen noctibus intensissimo sæpe gelu rigentibus, ne minimus quidem caloris sensus ab ipso producat: illud denique stolidum ac prorsus intolerabile, ♀ & ♂, tanquam maleficis, opponere ♄ & ♀ tanquam beneficos planetas; Solem autem inter mediocres numerare cum Astrologis; cujus evidentissima in universam terram, imò (si rem accuratiùs expendamus) unica beneficia, Benefactoris ipsi nomen omni jure vindicarent.

XV. *Quenam asseruntur communiter influentiarum Lunarium varietates?*

Verulamius in Sylva sylvarum sive Histor. Nat.

Nat. Experim. 890. quatuor inprimis influentias Lunæ observationem celebrare dicit, in quarum veritatem accuratiùs inquiri desiderat, & modos quidem inquirendi præscribit. (1) est *Provocatio caloris* seu frigefactio corporum; cujus experimentum capi posse commodè putat, si aquæ calidæ pars exponatur radiis lunaribus, pars alia in umbra, ad quam radii illi non pertingant; aut, si quis malit, splendente & non splendente lunâ &c. (2) est *Putrefactionis inductio*, quam experiri liceat carne aut pisce expositis lunaribus radiis, & rursus expositis aëri, lunâ non splendente, utrobique pari temporis spatio &c. (3) *Humorum augmentatio* in corporibus humectis augescante lunæ lumine, & opposita diminutio, eâ decrescente; quarum experimenta capienda putat, cum seminibus aut radicibus, cepis e. g. &c. nunc immediatè post lunam decrescentem, nunc immediatè post crescentem, eidem terræ intra ollas e. g. mandandis, eoque loco statuendis, quo nec pluvia nec Solis radius pertingere queat, interim observando diligenter germinationis & incrementorum diversitates. (4) *Spiritus excitatio*, quam in Lunaticis manifestò notari existimat. His addi posset (5) tanquam specialior effectus, Marium fluxus & refluxus, quos à luna dependere (quocunque tandem id modo fiat) indubium videtur.

XVI. *Quid sentiendum videtur de his lunarium influentiarum variis generibus?*

Quod ultimum seu quintum attinet, de illo in Parte Physicæ specialissima commodius agitur, ejusque causâ probabilissimâ ibidem detectâ, fortassis occasio habebitur similem aliquam de Spirituum in Lunaticis excitatione conjectandi: Si modò certum sit hanc à lunæ mutationibus per se dependere, & non potius per accidens, uti menstrua mulierum profluvia, nonnunquam saltem (semper enim illa lunæ crescentis aut decrescantis respondere periodis falsum est) cum illis præterpropter coincidere, quandoquidem post singulos 7 dies nova lunæ mutatio contingit, ut uno alteroq; die post antecedentem, vel antè sequentem, talis in sanguine vel spiritibus ebullitio vel agitatio (quæ postea alterutri lunæ mutationi adscribatur) queat evenire. Quoad priores verò tres modos observandi Lunarium influxuum certitudinem, non paucæ se difficultates ingerunt, quæ cætera esse paria non sinerent; quod omnino tamen necessarium esset, ad efficaciam Lunaris certitudinem inde stabiliendam.

XVII. *Velim has difficultates paulò distinctius exponas.*

Primo in observanda prima frigefactionis differentia, si tempus aquæ calefactæ iterum refrigerascentis, nunc Lunâ splendente, nunc non splendente, observandum esset, supponendus utique foret idem frigoris in aëre gradus utro-

utroque tempore, id quod supponi citra errorem haut facile potest : Et sanè in aperto & concluso aëre sensibilis aliqua frigoris differentia, eodem etiam tempore deprehendetur. Quod idem etiam *secundò*, circa celeriozem aut tardiozem putrefactionem judicandum est ; quandoquidem lunâ non splendente posset aër esse paulò frigidior quàm splendente vel etiam vice versâ, & sic splendori Dæ adscribi putrefactionis facilitas, quæ calori illius diei potiùs adscribenda esset. Similiter etiam *tertiò*, cùm non semper sit eadem aëris conditio tempore crescentis ac decrescantis Dnæ, difficillimum profectò fuerit dignoscere, utrum major aut minor germinationis felicitas, ab hujus incrementis aut decrementis, an verò ex aëris foecundioze aut minus foecundâ conditione, dependeat &c. Sanè omnes illi tres effectûs ab aliis planè causis per se, à Lunæ splendore verò non nisi per accidens, dependere videntur.

XVIII. *Quomodo hoc intelligis ?*

Equidem negari haut potest Lunâ splendente plerumque plus frigoris in aëre esse quàm splendore ipsius à nubibus occultato ; at hujus diversitatis ratio per se non tam ad splendorem aut ejus defectum referenda videtur, quàm ad diversitatem conditionis in aëre. Nubibus enim tectus aër calidior esse solet, quia calor è terræ visceribus perpetuò exhalans ab iis tanquam tegmine aut stragulo cohibetur quò minus avolare queat ; sereno verò & aperto aëre, qualis est cùm Lunam splendentem videmus, illo sine

impedimento avolante, plus frigoris in aëre esse necessum est; eodem modo sc. quo corpus humanum infra stragulum à cohibito proprio calore fovetur, remoto verò hoc egregiè friget. Similiter, quòd carnes & similia in radiis lunari-
bus faciliùs putrescant, non tam illis, quàm aëri, tum per accidens humenti, adscribendum videtur. Serenis enim noctibus (quibus lunæ splendor oculos per accidens perstringit) præsertim æstivis, multus cadere ros solet, quòd sublatis de die vapores in frigore nocturno concrecant terramque guttatim petant; id quod nubilis noctibus, ob antè dictam causam calidioribus fieri non solet. Denique quòd humores in corporibus (e. g. cerebrum in capite, pinguedo in piscibus, ostreis, succus in arboribus &c.) crescente luna crescant, decrescante decrescant, *primò* non apparet, quo pacto potuerit observari, cùm e. g. cerebrum in homine nunc crescente lunâ, nunc decrescante inspicere, salvo homine non detur, nisi in casu vulnerationis, in quo cerebri intumescencia aut detumescencia ab aliis causis præternaturalibus manifestò pendet; deinde verò in piscium capturis, in ovilibus &c. pingua & macra junctim semper reperiuntur, sive crescat lunæ lumen, sive decrescat.

XIX. *Quid de cæteris planetis speciatim adhuc notari meretur?*

Multa quidem illa sunt & vulgo incredibilia, quæ suprà Quæst. IX. ac X. de ipsis annotavimus saltem probabilissimè ostendentia, eos
opaca

opaca esse terræque ac Lunæ simillima corpora. Num verò influxum quendam in hæc terrena & notabilem efficaciam exercean, tantò magis nunc dubitari potest, quando lunares influxûs haut parum dubii redduntur, & speciosè infer-tur: Cùm lunæ lumen, etsi valdè notabile, tam parum habet in terris ac terrenis corporibus ef-ficaciæ, quæ vix ab ægrotis ac tenerioribus sen-tiatur (robustiora enim & firma non sentiunt ullam in se mutationem, sive nova sit luna, sive plena, sive in quadraturis; ut taceam incertum adhuc esse, annon ex Lunæ vicinia, indeq; pro-veniente majore uno tempore quàm alio, com-pressione quadam, tenerioribus tantùm sensibili, isthæc omnia dependeant) quid sentiendum erit de remotissimorum illorum planetarum, imò & fixarum omnium, influentiis, quorum omnium lumen collectim sumtum tantas vires haut ha-bet, ut terræ faciem nobis proximam sensibilibiter illuminare queant. Nimirum in se quidem isto-rum splendorem satis efficacem esse facilè con-ceditur (alius autem quàm per lumen occultior influxus eadem facilitate negatur, quâ asseritur, vel eo ipso quia occultus asseritur) sed in tam immensa distantia efficacem esse posse eadem ratione negatur, quâ Vesuvii ardentis furores nimiùm sentitager Neapolitanus, remotior au-tem Italia, & magis adhuc Germania nostra, eo-rum nihil percipit.

CAP. IV.

De

Stellarum ordinariis Eclipsibus.

I. *Cur inscribitur hoc caput de Stellarum,
& non de Solis ac Lunæ eclipsibus?*

Quia olim quidem hæc affectio Soli ac Lunæ propria credebatur, hoc nostro seculo autem aliis etiam stellis communis est deprehensa, tam fixis quàm erraticis, & ipsæ Solis eclipses ratione causarum diversitatem aliquam subierunt.

II. *Declara mihi hoc ampliùs.*

Eclipsium sive defectuum aut deliquiorum luminis in Sole & Luna hæc antehac differentia notabatur, quòd Luna verè deficiat, & lumine, quod paulo antè plenâ facie à Sole acceperat, insperatò privetur, sub initium pallescens tantùm, deinceps autem magis magisque in veram obscuritatem & quasi tenebras aliquas, incidebat, è quibus tamen post spatium duarum circiter horarum iterum emergebat & pristino suo lumini ac plenitudini restituebatur. Sol autem non reverà suum lumen amittat, sed oculis nostris solùm occultetur ab interposito aliquo corpore obscuro, servans interim intaminatum splendorem suum: non aliter ac candela noctu supra mensam ardens obscurari videtur, & occultatur oculis nostris, dum manus inter ipsam
& ocu-

& oculum ponitur; ipse interim oculus, & vultus totus, realiter obscuratur, & lumen, aliàs à candela receptum, deperdit, à manu quippe interposita interceptum. Prius *Occultationem*, posterius *Obscurationem* vocabant; & utriusque generis in lumine defectuum exempla deinceps in aliis quoque stellis observabant, de quibus commodiùs dicemus, ubi Solis priùs occultationes & Lunæ obscuraciones plenius perspectæ fuerint.

III. Quo pacto igitur contingunt Solis occultationes sive obscuraciones apparentes?

Fiunt, cùm Luna, sub Sole ejusque circulo sub ecliptica menstruo spatio circumvoluta, in quibusdam noviluniis sive conjunctionibus inter Solem & quandam terræ partem ita ponitur, ut facie suâ obscurâ Solis vultum lucidissimum illius terræ incolis ita tegat, ut iis vel totus, vel ex parte obscuratus videatur; tametsi reverà Sol splendorem suum integrum & intaminatum fervet ac aliis terræ partibus eodem illo tempore ostendat: non aliter, ceu suprâ dictum, ac manus aut paulò grandior ex charta nigra circulus inter meos oculos & Solem collocatus, eundem his occultaret ac denigratum quasi repræsentaret, vicinis interim aliorum oculis integro & immutato splendore conspectum.

IV. Cur

IV. *Cur dicis in quibusdam noviluniis si ve conjunctionibus?*

Quia non omnia Novilunia sunt eclipctica, ideò quòd Via Lunæ sub via Solis si ve eclipctica non directè sed obliquiùs, summi conditoris arbitrio, sic locata est, ut hanc in duobus punctis oppositis opticè interfecet (quæ intersectionis puncta *Nodi* Astronomis, Astrologis *Caput & Cauda draconis*, appellari solent) in punctis autem intermediis, inde maximè remotis (Astronomis *Limites* dictis) quinque circiter graduum, si ve decuplâ Lunæ vel Solis latitudine, ab ea distet: quò fit, ut Sol, Luna, & oculus, in eadem recta linea aut fere recta, constitui non possint, neque adeò Luna Solem obtegere oculo valeat, nisi vel in ipso nodo conjungantur (ita Sole à Luna totaliter occultato) vel non longè à nodis pars aliqua Solis tantùm oculo sub Luna perpendiculariter constituto obtegatur; cùm aliàs, si via Lunæ viæ Solis directè subjaceret, in omnibus noviluniis terræ incolis sub Luna nova directè locatis Sol totalem occultationem, vicinis autem ex utroque latere saltem partialem, necessariò subiturus esset, prout schematismo quodam reali & corporeo tota hæc res commodissimè declarari potest.

V. *Cur dicis cuidam terræ parti solum, non terræ simpliciter, Solem tegi à Luna?*

Quia Luna non Sole tantùm reipsâ incomprehensibiliter minor est, sed hemisphæricæ terræ

terræ faciei vix quintam ac decimam partem constituit; fit ut ejus umbra versus terram projecta & conicam induens figuram magis magisque gracileſcentem, ibi ubi terram attingit vix 30. mill. germ. ſemidiametrum habeat, reſtantibus ex toto quadrante (1350 milliaria complexo), ferè 1300 milliariibus Solem liberè conſpicientibus & ab eo toto illustratis; adeò ut umbræ illius parvus circellus, intra diſcum terræ lucidum inſtar maculæ cujuſdam circularis parvulæ videndus eſſet, ſi quis hominis oculus è Luna in terram proſpicere eo tempore poſſet, quo ejus umbra exiguam ejusmodi terræ illuminatæ portionem obumbraret, & quaſi macularet.

VI. Quantum igitur percipio, terra potiùs à Luna realiter obſcuratur eo ipſo dum nos in hac obſcuratione conſtituti Solem ab ipſa obſcurari credimus?

Ita reverà res habet, & Viri docti jam pridem, id quod nos eclipsin ſive defectum Solis appellamus, Terræ potiùs eclipsin & realem defectum eſſe agnoſcunt, ejus ſc. luminis, quod aliàs à Sole fuiſſet receptura, niſi ab interpoſita Luna fuiſſet interceptum.


VII. Quo pacto verò contingunt Lunæ reales & veræ obſcurationes?

Fiunt, cum Luna ſub ecliptica aut prope ipſam, menſtruo ſpatio circumvoluta, in quibusdam pleniluniis vel oppoſitionibus in umbram

bram terræ, ex opposito Solis projectam, incidit, ibique propter interpositam terram opacam, Solis radios ad locum illum umbrosum pervenire prohibentem, lumine suo primario, quod à Sole aliàs recipit, reverà privatur & exuitur; idq; tamdiu donec motu suo duodecuplo celeriore, quàm Sol in oppositam aut umbra terræ in eandem partem emovetur, ex umbra terræ rursus emergit, & mutuaturum suum à Sole splendorem denuò sine impedimento recipit: non aliter ac grandiusculus ex alba charta circulus; in umbram disci alicujus lignei, inter hunc & ardentem lychnum aut lucernam positi, incidens eo lumine destituitur, quod ante hunc ingressum, & post sequentem egressum, ab ardente lychno recipit.

VIII. *Cur dicis, luna sub ecliptica aut prope ipsam circumvoluta &c.*

Ob expositam suprà quæst. IV. rationem, quòd Luna non incedat præcisè sub ecliptica,



sed hanc in duobus, ita dictis, nodis opticè interfecet, adeoq; ab his discedens gradatim in latitudinem excurrat, sive septentrionem, sive austrum versus. Qui ipse ejus excursus simul

simul in causa est, quod non in omnibus pleniluniis eclipsis lunæ contingat; sed vel in ipsis nodis tantum, totalis & cum maxima mora, ut in A (Fig. X.) quia umbræ terrestris diameter, ubi à via lunæ secatur, minimum tripla est diametri lunæ; vel non procul à nodis, etiam totalis adhuc, sed absque mora, ut in B, ubi nimirum centrum \mathcal{D} à centro umbræ distat præterpropter $\frac{1}{2}$ grad. umbræ totâ semidiametro existente $\frac{3}{4}$. In majore paulò distantia verò à nodo potest partialis saltem eclipsis \mathcal{D} contingere ut in C, quamdiu sc. distantia centrorum tantillo minor est aggregato semidiametrorum, h. e. proximè 1. gradu: Extra hunc terminum autem & ultra decimum octavum à nodo gradum, ubi centrorum distantia notabiliter major est aggregato semidiametrorum, sive 1. gradu, semidiameter Lunæ umbram prætervehitur intactam, ut nulla ampliùs contingat eclipsis, ut in D &c.

IX. Dixisti qu. II. Lunam in suis eclipsibus sub initium tantum palescere, antequam in veram obscuritatem incidat; quenam igitur est illius palloris causa?

Vulgus hominum credit, Lunam quasi exhorrescere ad instantem proximè obscuritatem, & præ horrore aut metu quasi pallorem induere. Sed metus & exhorrescentia in Lunam, inanime & cognitione destitutum corpus, cadere nullo modo potest. Itaque physicam aliquam causam subesse necessum est, quæ pallorem

rem illum inducat, aliqualem sc. luminis à Sole recipiendi defectum ex eo oriundum, quod tota quidem \mathcal{D} à Sole illuminetur antequam in umbram terræ demergitur, sed non à toto Sole, verùm ab ejus parte tantùm, eaque gradatim minore, quantò propiùs umbræ imminet.

X. *Velim hoc mihi schematismo quodam declares?*

Si in Fig. XI extremos radios Solis cfn & adn item afg & cdb ducas extra id spatium nfg Luna tota à toto Sole ac potest illuminari, intra verò illud spatium ex toto Sole radii cadere non possunt, sed paulatim è paucioribus ejus partibus, (e. g. ex dimidio tantùm Sole xc in spatium nfx) quantò spatium illud ad umbram dnf propiùs accedit. Solent autem illud spatium nfg *penumbram*, quasi penè umbram, vel *umbraginem*, & meritò quidem, appellare, quia quodammodo saltem umbrosum est, h. e. radiis solaribus pluribus aut paucioribus, imò proximè umbram non nisi paucissimis illustratur: unde necessum etiam est Lunam illam umbraginem ingressam lumine jam quadantenus deficere & sic magis magisque expallescere, quò magis ad umbram meram appropinquat. Cur interim in ipsam hanc umbram meram ingressa Luna non omni tamen lumine penitus destituatur; ejus rei ratio in quæst. VI. cap. præced. jam dicta est.

XI. *Postquam igitur eclipsium Lunarium & Solarium rationes exposuisti, ostendas, rogo, quanam alia mundi corpora similes vel occultationes vel obscurationes subire solent.*

Quod occultationes primò Solaribus eclipsibus quodammodo similes attinet, aliquæ in ipso quoque Sole contingunt, cùm non à Lunæ corpore, ob viciniam grandiore viso, totus vel ex parte tegitur, sed à ♀ aut ♂ discis ob distantiam majorem apparenter multò minoribus, ac circa Solem moveri solitis, nonnunquam quasi maculatur: dum nimirum inter ☉ & oculum incedentes & partem huic à Sole averfam, ideoque obscuram obvertentes, instar maculæ aliqujus nigræ per discum Solis lucidum ab ortu in occasum incedere cernuntur; id quod aliquoties jam factum, ad leges quoque Astronomicas revocari cœptum est, ut in futura tempora præsciri prædicique queant similia phenomena. Deinde verò contingit aliquando, ut Luna, extra novilunia, in quadraturis, vel etiam plena, sub stellis Zodiacalibus menstruo motu circumlata, aut fixam aliquam, aut planetam quempiam ex minoribus tegat & occultet: id quod non solum ipso facto deprehensum est, sed quo tempore porrò simile quid futurum sit, calculo Astronomico subduci potest. Denique contigit etiam, etsi multò rariùs, ut superiorum planetarum unus alterum, paulò ante adhuc visum, subtereundo tegat, & hoc ipso sui majorem prodat viciniam.

XII. *Num veræ quoq₃ obscurationes in aliis corporibus cælestibus, præter Lunam, contingunt?*

Ante hoc nostrum Seculum & inventos tubos opticos nihil tale innotuerat: hodie verò nihil id novi est, & in circumjovialibus stellulis sive lunulis singulis ferè noctibus fit, ut unus ex illis, paulò antè plenâ facie fulgere visus, in Jovis umbram incidat, inibique eodem modo, quo Luna in umbra terræ, lumine suo (quod à Sole unicè habent, æquè ac Jupiter ipse) privetur & interjectâ quadam temporis morâ ex alterâ parte iterum emergat. Quin & secundò in ipsa Jovis facie illuminata videre maculam quandam mobilem contigit, quam, ratione bene subductâ, vicini satellitis, inter Jovem & Solem positi, umbram fuisse constitit: eodem modo scilicet, quo Luna inter Solem ac terram posita nonnunquam umbram suam in faciem terræ illuminatam projiciens, terræ quandam eclipsin causatur & macula quâdam nigrâ vel obscurâ ab una terræ regione ad alteram mobili, ejus discum lucidum obscurat.

XIII. *Optarim hanc Circumjovialium historiam, cujus alibi quoq₃ jam injecta mentio est, aliquantò distinctius enarrari.*

Cùm sub ipsum fere superioris proximè seculi initium Galilæus Galilæi Mathematicus Florentinus paratum noviter tubum opticum in Jo-
vis

visfaciem lustrandam direxisset, fortè fortunâ stellulas aliquas pusillas prope eam observavit, quas ex fixarum oculo nudo alias inconspicuarum numero esse, (quales innumerabiles passim in cœlo tubus opticus recens - inventus detegebat) primùm credidit; deinde verò, continuatis per insequentes noctes observationibus, deprehendit evidentissimè, stellulas istas loca sua, situmque subinde mutare, ideoque planetarum numero accensendas esse: Et cùm communicatâ re cum aliis Astronomis celebrioribus, hi quoque novitatem hanc suis etiam oculis confirmassent, in veritatem tandem indubiam res exiit, ut hodie cuivis, saltem octo vel decem pedes longo telescopio instructo, sit obvium, quatuor ejusmodi veluti Lunas circa Jovem jugiter convolvi, Circumjoviales inde dictas, ita quidem, ut proxima Jovi d. 10. horis 18, secunda diebus 3 & horis 13, tertia diebus 7 & horis 4, quarta denique 16 diebus & horis 19, quamproximè, circuitum suum absolveret.

XIV. Annon suspicio hinc nata est, similium circa ceteros planetas antiquos reperiendorum phænomenorum?

Ita factum est utique; sed, posteaquam unus & item alter circa Martem, Venerem &c. simile quiddam se observâsse rati, aliorum multò plurium confirmationem obtinere haut poterant, tandem anno hujus seculi quinquagesimo quinto *Christianus Hugenius*, nihil tale an-

tea fuspicatus , ftellulam quandam circa Satur-
num erraticam deprehendit, ope tubi 23 pedes
longi, quæ periodum fuam abfolvit 16 fere die-
bus. Deinceps autem à Dn. Caffino in obser-
vatorio Regio Parifiensi fucceffivè defecti funt
ope lentium Dn. Campani 36 & 100. pedd. pro-
ximus & intimus Satelles, qui bidui ferè fpatio
revolutionem fuam abfolvit, anno 1684; dein
fecundus trium ferè dierum fpatio revolvi foli-
tus; Tertius porrò 4 dierum & 12½ horarum
intervallo circuitum finiens; & poft quartum
(qui Hugenianus eft) quintus anno 1671 reper-
tus, 80 circiter dies unâ fui revolutione infu-
mens: Ut hoc pacto præter 7 planetas antiquos,
hodie numeremus novos five fecundarios no-
vem, in univerfum adeò fedecim.

*XV. Mira mihi narras hîc ex tam immenfis
intervallis confpecta; quid futurum effer,
fi cominus hæc talia intueri
daretur?*

Mirabile utique fpectaculum fuæ imagina-
tioni fiftet is, qui mente quafi alatâ in Jovis glo-
bum evolabit, ibique quatuor Lunas intra fpa-
tium quafi femimenftruum, circa fe, & unam
quidem bis, alteram quater, tertiam oëties cir-
cumvolvi confpiciet, & sæpe quidem plures ea-
rum unâ, fub diverfis phafibus, nam v.g. fal-
catam, aliam dichotomam, tertiam plenâ facie
lucentem: Similiterque in globum Saturni al-
tiùs evecta mens, præter quinque ejusmodi lu-
nas

nas intra trimēstre spatium vel unicam revolutionem vel duas & quod excurrit, vel viginti, vel quadraginta, ejusmodi periodos absolventes, insuper ingentem circa se annulum perpetuò fulgentem conspiciet; novorum adeò mundorum aspectabilem faciem hîc & ibi, eamque multum diversam, intellectûs sui oculis lustratura.

C A P. V.

De

Stellis novis, temporariis sive extra-ordinariis.

I. *Quid intelligis per has novas, temporarias & extraordinarias stellas?*

EAs intelligo, quæ non semper aut ordinariè, uti cæteræ, in cœlis conspiciuntur; sed aut noviter oriuntur & generantur, brevique rursus intereunt ac dissipantur; aut, si perpetuæ sunt ac cæteris coævæ, saltem longo tempore latent & inconspicuæ manent, ex improvviso aliquando in conspectum iterum venientes, at brevi respectivè tempore, sensim & successivè rursus evanidæ.

II. *Suntne unius ejusdemq; generis?*

Nequaquam: sed idem subeunt discrimen, quod cæteræ ordinariæ; ut aliæ fixæ sint, h. e. fixum inter fixas ordinarias locum servant, qualis illa fuit, quæ Tychonis ævo ab initio

Novembris Anno 1572, per totum annum sequentem usque in principium veris anni 1574, quando mense Martio conspici desiit; interea temporis eundem perpetuò locum, ad latus dextrum Cassiopeæ in sedis ipsius reclinatorio, & ipso limbo viæ lacteæ, occupans; aliæ verò vagabundæ sub stellis fixis instar planetarum oberrant, vario in diversas mundi plagas excursu.

III. *Hoc notabile discrimen utiq; diversæ naturæ suspicionem in utrisq;, indeq; nominum quoq; diversitatem peperit?*

Rectè conjectas: nam illæ, quæ fixâ semper hærent sede neque motum in cœlis proprium ullum habent (communis enim cum omnibus aliis stellis motus, quo oriri, culminare, occidere cernuntur, apparens tantum, ac terræ vertigini tribuendus Astronomis oculatioribus plerisque creditur) Novarum Stellarum appellationem καὶ ἐξοχήν, sive per excellentiam, retinent; vagabundæ verò reliquæ, propter comam quâ cingi solent nebulosiores, *Comatæ*, sive *Cometæ*, & à cauda, quam sæpe trahunt longissimam, *Caudatæ stellæ* vocari solent.

IV. *Quantus observatus est talium stellarum extraordinariarum numerus in utroque genere?*

Nova illa in Cassiopeæ fidere vix habet aliam, sibi omnino comparem: nam illa, quæ in collo ceti conspecta, per vices apparet rursusque disparet (*Stella mira* inde dicta) & aliæ similes
in

in pectore cygni Anno 1600 primùm conspēcta, dein 1626 rursus evanida, & 1659 ab Hevelio noviter observata, aliaque parvula in ejusdem cygni collo, quam Kirchius mense Octobri 1686 observavit, quæque mense Febr. 1687 rursus evanuit, ejusdem verò anni mense Octobri denuò apparuit, & pauca quædam ejusdem conditionis aliæ, pro novis stellis vix amplius habentur, sed mundo coævæ habitæ, per vices apparere tantum & disparere creduntur, sive altius in cælum à conspectu nostro subtractæ, sive alio quodam modo absconditæ. Illa verò in Cassiopea Tychonis ævo visa, posteaquam jam ante sesquiseculum disparuit, ejus nec vola nec vestigium amplius conspicitur; ut verè nova, h. e. noviter exorta, & post notabile tempus iterum destructa fuisse ac sensim dissoluta, non sine causa credatur.

V. *At Cometarum saltem multò major est numerus?*

Certissimè: nam vel hoc uno proximè elapso seculo plures numerati sunt indubiè tales; & Stanislaus Lubenitzius Polonus, in Theatri sui Cometicæ vasto volumine, ex omni seculorum antecedentium historia, plures quàm 400 connumeravit.

VI. *Numquid hi quoq; pro noviter exortis & postmodum iterum dissolutis ac destructis, an pro antiquis mundoq; coævis corporibus habentur?*

Hic in duas partes abierunt Philosophi; &

Aristoteles quidem olim Cometas inter Meteora aëris ignita, ex halitibus terræ ficcis & inflammabilibus concreta, recensuit, eaque opinio, uti pleraque istius Philosophi decreta, per annos bis mille animos philosophantium, autoritate unius illius Viri (hujus enim unius fere scripta ex omni antiquitate per Arabes in Europam nostram penetraverant) potius, quàm rationibus duci assuetorum, occupavit; donec superiori seculo *Tycho Brahe*, Celeberrimus Astronomus, oculos quasi primus adaperuisset, & indubiis argumentis evicisset, Cometas non aëris, sed cœli incolas, longè suprâ Lunam exoriri, & in æthere motûs suos vagabundos exercere.


VII. Quænam fuere ista Tychonis argumenta, & quemnam habuere inter Aristotelis Aestimatores nimios successum?

Unum è sublimiori Astronomia petatum, ab observatis Cometarum parallaxibus desumptum, quod à rerum Astronomicarum peritis, utpote nimis evidens, avidissimè arreptum, hos plerosque omnes statim commovit ad veritatem adeò manifestam ambabus ulnis amplectendam; ab aliis autem, rationem parallaxium haut intelligentibus, integro fere decennio acriter oppugnatum fuit, donec tandem magis magisque illam parallaxium doctrinam vel ipsi capere assuefacti, vel aliorum eam capientium exemplo & autoritate ducti, manûs darent: ut hodie vix reperias inter rigidiores etiam, qui sparsim supersunt, Aristotelis Sectatores, qui Cometas in
aëre

aëre gigni ampliùs contendat. Nam & alterum, captu multò facilius argumentum, nimis apertum est, quòd, cùm meteora alia in universum omnia non alio, quàm irregulari, plerumque celeri & ocyùs evanido, in diversas plagas inordinatè excurrente, motu ferantur, Cometæ pariter ac stellæ Novæ καὶ ἐξοχλὼ sic dictæ, ab ætate Tychonis usque in hunc diem spectati omnes, motu diurno ab ortu in occasum indeque rursus ad ortum, omnibus cœlestibus communi, perpetuò & constantissimè quotidie moveantur; eandem adeò cum illis naturam & originem evidenter arguentes.

VIII. *Annon, quid parallaxis sit, quodammodo saltem explicare mihi potes, ad vim argumenti quoq; prioris quomocuncq; percipiendam?*

Ipfa ratio parallaxeos adeo simplex est & conceptu facilis, ut vix simplicius quippiam excogitari possit. Nihil aliud enim est, quàm distantia duorum locorum opticorum, ad quæ res una ex duobus diversis locis spectata refertur. E. g. cùm oculi duo A & B (Fig. XII. n. 1.) rem eandem C successivè, alterutro interea clauso, spectatam ad remotiorem ipsâ parietem à sinistro oculo A ad punctum parietis D, à dextro




C c s

verò

verò B ad punctum vel locum E referimus, hæc vocantur rei spectatæ duo loca optica, & horum distantia ejusdem parallaxis: estq; sensui ipsi manifestissimum, quò propius oculis est objectum, e. g. in E, eò majorem ejus esse parallaxin; quò remotius, eò minorem & vicissim; adeoque infallibile argumentum esse distantiae vel majoris vel minoris, majorem vel minorem rei parallaxin.

IX. *Velim hæc ad stellarum parallaxes observandas quodammodo applices?*



Loco duorum oculorum hîc assumuntur duo in terris spectatores A & B, (Fig. XII. n. 2.) qui idem phænomenon C eadem nocte simul observent & ad cœlum stellarum fixarum, tanquam remotiorem parietem, referant, & communicatis invicem observationibus ope accuratiorum instrumentorum Astronomicorum institutis, quàm longè illud ab hac aut ista stella fixa deprehenderint, indicent; ex hoc enim indicio computare faciliè parallaxin, & hac cognitâ (quæ aliis quoque modis ab uno solo observatore investigari potest) æstimare phænomeni distantiam faciliè licet: deprehensumq; adeò est, stellas novas καὶ ἑξοχῆς sic dictas omni parallaxi sensibili destitutas,

tutas, suprà omnes Planetas existere; Cometas autem hoc seculo visos omnes minorem Lunâ habuisse parallaxin, ideoque longè supra Lunam fuisse elevatos.

X. Quod si ergo in cœlis supra Lunam existunt stellæ novæ, & tamen ex hac prima hypothesis de novo generantur, ex qua materia nunc generabuntur?

Credibile videtur ex effluviis Solis aliorumque astrorum ignitorum longiùs explosis, longo temporis tractu invisibiliter augescentibus, tandemque in communem aliquem locum casu collectis & nubem quandam ætheream constituentibus adeò grandem & vastam, ut illuminata à Sole videri è terris possit, hæc corpora concre-scere, & propter hunc ipsum concretionis modum ea tam fluxa facileque rursus solubilia esse.

XI. Sed cur aliæ ex his ita concretis nubibus eodem loco subsistunt, longiusq; durant, aliæ contra planetarum instar per ætherem ex-currentes citiùs iterum evanescent?

Dicam quod possum, & fingam, ubi certi quid asseverare nondum licet. Pono (1) circa quodlibet astrum fixum gyrum quendam seu vorticem æthereum esse constitutum, à quo in suo centro fixum detineatur. (2) Effluvia quædam subtilissima è tribus e. g. vicinioribus
A, B, C




Fig. 13.

A, B, C (Fig. XIII.) vorticibus extra sphæram gravitatis longius explosa in spatium tribus istis sphæris interjectum D, ubi plus quietis est, facillimè colligi recipique, & ob hanc eandem causam diutiùs ibi servari, & à vici-

nis istis Solibus illuminari. Quod si verò contingat, vel collectam in tali spatio nubem ab uno vorticum vicinorum abripi, vel etiam ipsam collectionem intra talem vorticem fieri; tunc eam ab eodem vortice abreptam localiter, planetarum in morem, moveri, & sic *Cometam* factam partim ob hunc ipsum motum, partim ob majorem igniti astri, per cujus vorticem provehitur, viciniam multò citiùs dissolvi & difflari.

XII. *Cur verò Cometæ plerumq; caudati apparent, stellæ novæ specialiter ita dictæ non item?*

Id quidem conceptu non adeò est difficile. Circa nubem enim ejusmodi ætheream densiùs compactam, quin rariores etiam ac distractiores halitûs longè lateque diffusi, quorum plurimi ab eodem Sole v. g. illuminati tenuiorem quandam luculam constituent, quam *Comam* vocamus, circumstent, nullum est dubium. Hi verò à radiis

diis solaribus pulsi maximam partem ad nubis tergum, ubi securiores quasi sunt ab illis pulsibus, compelluntur, in longitudinem multò majorem exporrecti. Cùm tamen interim non pauci Solis radii per ipsam nubem mediam penetrantes, longam illam appendicem tantillum saltem illuminare possint, ut inde reflexi oculum in tenebris constitutum sensibiliter moveant; & caudæ illius fulgor mediocris, & positus ejus ex adverso Solis constans, satis luculenter ad causam suam reducti videantur. Quod verò Stellæ novæ fixæ inter vicinas fixas æquali ferè intervallo positæ nunquam appareant caudatæ, fortassis inter alia ex eo est, quòd halitûs tenuiores circa nubem densiorem à tribus Solibus in partes sibi oppositas simul compulsi non possint in unum locum cogi, qui uni magis quàm alteri esset oppositus, ideoque necessario distracti maneant & Comam tantùm constituent.

XIII. *Quænam verò alterorum est hypothesis, cùm suprâ Quæst. VI. dixeris Philosophos in duas præcipuè partes abiisse?*

Multi sanè & egregii Viri, *Auzutius*, *Petitus*, *Cassinus* in Gallia, *Montanarius* in Italia, *Bernoullius* in Germania nostra, in ea sunt sententia, Cometas & Stellas novas antiqua esse & mundo coæva corpora, quæ nunc altius in cœlum elevata sensim decrefcere videantur ac tandem penitus è conspectu nostro discedant, suo tempore, cùm vel in eadem recta, quâ subvecta sunt, rursum

sum versus nos descendant, ut stellæ novæ specialiter ita dictæ, vel in vastis circulis circa aliquam fixarum sursum delata, post notabile temporis intervallum ex altera parte ad nos iterum accedant propius noviterque conspiciantur: prout certè clarissimus Bernoulli in Systemate suo Cometarum, illius magni, qui anno LXXX. & LXXXI. in cœlo conspectus fuit, reditum ad suum perigæum, in quo iterum conspectui se nostro exhibiturus sit, prædicere ausus est (pag. 52. & 53.) in annum 1719. ejusque diem 27. Maji (st. v.) loco insuper determinato, nempe in 1. gr. 12. min. Libræ: Cui prædictioni utrum eventus sit responsurus, posteri saltem nostri experientur.

XIV. *Anne verò etiam caudas Cometarum Mundo coevas credunt Authores isti?*

Nequaquam; sed hanc de novo in cœlis gigni ab exhalationibus & effluviis Solis cæterorumque Planetarum, ab istius calore perpetuò quasi coctorum, & gyro vorticis solaris in summum ætherem expulsis, obvioque ibi cometico corpori adhærescentibus (unde Cometarum figura non exactè rotunda, uti cæteræ stellarum perpetuarum omnium, sed inæquabilis & quasi crispata conspiciatur) aut instar atmosphæræ cujusdam circumfusi tenuioribus; prout nos quoque suprâ quæst. XII. ex alterorum mente rem concepimus.

XV. *Quid*

XV. Quid igitur nunc de utrisq; his hypothesibus censendum putas?

Equidem nostram de hac intricata controversia mentem in peculiari Disp. de Cometarum natura motu & origine, jam olim, occasione illius ipsius, qui Domino Bernoulli ansam sui Systematis condendi præbuit, fusiùs exposui; ampliùs etiam, si DEVS volet, in Phys. Hypoth. Tom. II. Speciali deducturus. Ea verò brevi huc redit: Tametsi posterior hæc hypothesis magnâ specie & probabilitate arrideat, priorem tamen speciosiore nobis videri, ob sequentes rationes: (1) Quòd, cùm ipsi posterioris hypotheseos patroni necessum habeant fateri, Cometarum appendices sive caudas, immensæ sæpe expansionis, novam ætheris aut effluviolorum æthereorum esse sobolem, credibilius videatur, etiam caput seu nucleum multis modis minorem, licet etiam densiorem, ex iisdem cœlestium effluviis concreescere; maximè cum (2) Ratio nulla satis probabilis reddi possit, cur eadem effluvia planetis ordinariis non adhærescant, similesque circa ipsos caudas progignant, & (3) Hevelii observationes cometarum capita sub apparitionis finem in diversos minores nucleos sensim separari ac dissolvi luculenter ostendant. Quod si tamen sperare per ætatem liceret nobis, exitum Bernoullianæ prædictionis nos visuros, eumque talem, qualem laudatus Author sibi promittit; tum in ipsius castra transire nulli essemus dubitaturi. Id verò posteriorum nostrorum curæ relinquendum erit negotium.

XVI. Quid

XVI. *Quid deniq; de Cometarum effectibus & significationibus judicas?*

Quod effectus reales & phyficos attinet, illos equidem in has terras nullos esse censemus; tum ob immensam eorum à terris distantiam; tum verò ob substantiam nubilam & verè-nebulosam, à qua deinceps per ætherem vastissimum dissipanda, nihil nobis esse periculi metuendum ex eo colligimus, quòd innumera- biles toto anno in aëre nostro concrectiones similes, etsi nobis proximæ, neque dum generantur, neque dum iterum dissolvuntur, ullam terris inferant noxam, sed potius utilitates afferant nunquam satis agnoscendas. Ad eorum significatus autem quod attinet, quasi signa sint divinitus constituta vocandis ad frugem & poenitentiam hominibus, & ad minitandum impoenitentibus poenas gravissimas, nî resipiscant &c. id quidem nullâ veri specie asseri putamus; ex eo (1) quòd naturali modo genita illa corpora, aut saltem eorum caudas imperitæ plebi vel maximè terrificas, inde certissimum est, quòd ipsæ illæ caudæ à Sole, nubes istas æthereas illuminante, manifestò dependeant; ex ejus opposito quippe semper conspicuæ: (2) ex earum motu circa totam tellurem quotidie cum cæteris stellis communi; id quod in signis DEI arbitrariis nusquam obtinet: (3) ex ea circumstantia, quòd Cometæ haut pauci adeò exiguæ magnitudinis & brevissimæ durationis, extiterint, ut vix à paucis curio-

curiosioribus & oculatissimis Astronomis, nedum à rudi plebecula spectati sint : (4) quod communi omnibus astris motu circa terram totam ferantur, ita ut judicari non possit, cui nam populo præ aliis (quod supponunt tamen Astrologi) ejusmodi portentum cœleste hæc aut ista mala præfagiat ; (5) quòd, cùm Astrologi ad experientiam provocantes, quando rationibus urgentur, ex eo colligunt, quia Claudianus testatur, *nunquam terris spectatum impune cometen*, ipsâ etiam experientiâ concinente, eos vel efficere mala ista, quæ ipsos regulariter consequi solent, vel saltem instituto Divino præsignificare, *primò* non satis procedere hæc consequentia videatur, siquidem non magis esse mirum videri queat, post apparentiam alicujus Cometæ, vel eodem anno, vel elapsis pluribus demum (adeò laxè enim hanc effectuum post suas causas consecutionem definiunt) insigne quoddam malum alicubi in terris consequatur, quàm si, stante hodie baculo in angulo, cras, aut perendie, aut post aliquot saltem hebdomadas, alicubi in terris pluat; *deinde* verò & antecedens vacillare, quia non solum cum aliquorum Cometarum apparentia bona multa & egregia conjuncta fuisse Viri Celebratissimi adnotârunt, sed etiam Astrologis ipsis etsi sollicitè inquirentibus, sæpe nihil ex historiis obviare mali potuerit, quod præcedaneos Cometæ fuisset consecutum, nisi mors alicujus Papæ aut Principis, quæ utrum plus damni quàm commodi terris intulerit, dubitari adhuc valdè potest.

CAP. VI.

De
totius Mundi Systemate.I. *Quid intelligis per Systema?*

INtelligo cum Autore Libelli de Mundo, (quem Aristotelem esse negant *Joh. Ger. Vossius* cap. XVII. §. 13. de Sectis Philosophorum, & *Heinsius* in Oratione peculiari n. V. *Franciscus Patritius* autem affirmat in *Discuss. Perip. Tom. I. Lib. VI.*) *Totam corporum compagem ex cælo & terra & qua his continentur naturis, coordinatam, vel universorum ordinem & ornata dispositionem à DEO & per DEVM conservatam; quibus equidem descriptionibus tum causa mundi efficiens & conservans, nempe DEVS, (cap. 6. ejusd. Libelli fusiùs exposita) tum materialis, nempe terra, cælum, Sol, Luna, cæteraque corpora mundana, sive fixa, sive Planetica &c. tum denique formalis exprimitur, nimirum pulchra horum coordinatio, & ornata effectibusque observatis multifariis congruens dispositio.*

II. *Jam cum de postrema potissimum sit inter antiquos pariter & novos Philosophos altercatio; expone quæso paucis utrorumq; circa hanc universi conformationem opiniones.*

Si ad terram nostram habeatur respectus, in eo quidem omnes consentiunt, quòd Luna sit huic proxima, stellæ fixæ autem omnium ab

ea remotissimæ; sub fixis autem deorsum ordine consequantur primò Saturnus, sub Saturno Jupiter, sub Jove Mars; in reliquorum trium, Solis, Veneris & Mercurii positu, multus est eorum disensus; cùm 1.) Autor Libelli de Mundo ☿ proximè sub ♂, ♀ rem sub ☿ & Solem sub ♀ re locatum putet; 2.) Plato ♀ rem sub ♂ te, sub hoc ☿ rium & sub ☿ rio, Solem de- mum; 3.) Pythagoras & Ptolomæus, Solem su- præ! ♀ & ☿ statuerint; 4.) Ægyptii cæteris ve- riùs ☿ rium & ♀ rem circa Solem (quod hodie extra dubium est) gyrare, reliqua astra omnia verò circa terram tanquam centrum convolvi statuerint, & hoc ipso occasionem præbuerint, superiores illas sententias ita conciliandi, ut diversis temporibus omnes veræ evadant. Mercurio enim & ♀ re circa Solem perpetuò gyra- n- tibus facile contingit, ut nunc infra Solem respectu nostri, nunc supra Solem ut- ri- que consistant; nunc ♀ supra, & ☿ con- trà infra ipsum, nunc ☿ supra & ♀ infra po- n- antur &c.

III. *Hæc ita circa situm corporum munda-
norum fuisset differentia, nunc ferè in gratiam
reducta: Annon etiam circa motum eorum
discrepantes gliscunt inter Philoso-
phos opiniones?*

Gliscunt utique, eæque duplicis generis controversiæ, quarum altera motum diurnum sive communem (quem etiam primum appel-

lare solent) concernit; utrum is astris omnibus tam fixis quàm erraticis circa terram immotam ab ortu in occasum circumraptis reverà conveniat, (uti quidem quoad sensum apparèt,) an Telluri locum equidem suum non mutant, sed intra ipsum ab occasu versus ortum convolutæ adscribi debeat? altera motum annum sive proprium respicit; utrum is Soli circa terram, an terræ circa Solem, veniat attribuendus? Nam de Lunæ cæterorumque Planetarum motibus propriis nulla est concertatio.

IV. Quinam sunt illi, qui terræ potius uni, quàm stellis universis, primi sive diurni motûs apparentiam adscribunt? & quibus moti rationibus?

Fuerunt olim *Philolaus* Pythagoricus, *Aristarchus Samius* & plures alii veterum Philosophorum, quorum sententiam superiori seculo *Nicolaus Copernicus* resuscitavit, multique post hunc & magni Viri (ut *Rheticus*, *Mästlinus*, *Rothmannus*, *Keplerus*, *Stevinus*, *Galilaus*, *Schikardus*, *Lansbergius*, *Bullialdus* &c.) approbarunt, hodiernum autem Viri Doctissimi innumerabiles approbant & confirmant. Inter innumeras rationes (quas *Ricciolus* in *Almag. Nov. Lib. IX. Sect. IV.* uti adversas quoque non pauciores *Sect. III.* collegit) has duas aut tres tantùm hoc loco commemorare lubet: (1) Quod, cum adversa pars fateri necessum habeat, positâ terræ vertigine ab occasu in ortum intra 24 horas absolvendâ, necessum esse, ut sensui unâ cum terra vel horizonte circumrpto, stellæ

stellæ omnes videantur eodem tempore ab ortu in occasum circumvolvi ; indignum Divinâ Sapientiâ videri , eam ipsi adscribere voluntatem , quâ per innumera immensa corpora voluisset præstare eum effectum , quem unico Terræ globo in partes oppositas circa suum centrum convoluto præstare potuisset : Maximè cùm (2) si stellæ ex opposito circa terram immotam moveri statuumdum sit , cùm affixas illas uni orbi solido non ampliùs credatur , sed singulas separatim in æthere fluido circumagi oporteat ; incomprehensibile sit & rationem omnem superans , quo pacto innumerabilia ista corpora , diversæ amplitudinis circulos decurrendos habentia (nam polo viciniore humilioresque minores gradatim & consequenter tardiore motu , æquatori propiores & altiores etiam majores , atque ita celeriore cursu , necessariò describunt) eodem tamen temporis momento simul & semel absolvere suas periodos possint , ut & redire unà ad Horizontem , à quo simul discesserant , evidenter deprehendantur , nec interea vel hilum latum à pristino suo positu aberrant , etiamsi non inæquales tantùm , sed (3) tam rapidos esse oporteat singularum motûs , ut æquatori vicinior aliqua , intra spatium 1. minuti secundi horarii , (quod impulsium arteriæ unicum circiter adæquat) ex hypothesi Tychonis omnium minima , decurrenda habeat 800 miliaria germ. si intra 24 horas totum circuitum absolvere velit.

V. *Quinam sunt illi, qui motum Solis annum non nisi apparentem putant, reverà autem terræ globo adscribunt? & ob quas rationes?*

Sunt iidem illi maximam partem, qui terræ motum diurnum adscripserunt; idque ob sequentes præcipuè rationes: (1) quod, cùm circa Solem moveri cæteros planetas, tam inferiores ♀ & ☿, quàm superiores ♂ ♃ ♄, extra controversiam sit & in confesso, necessarium à priori sit, terram, quæ medium locum inter hos & illos indubiè tenet, circa eundem solem convolvi; maximè, & consequentiâ plane infallibili, si reliquorum planetarum motus circa solem ab orbe quodam seu vortice æthereo (uti probabilissimum est) dependere statuatur: Nam si remotiora pariter & propiora corpora circa solem ab illo gyro æthereo circumferuntur, impossibile est, corpus intra illa utraque locatum quasi medium, non unà circa eundem convolvi. (2) Quod, cùm cætera illa Planetica corpora omnia solis luce & calore indigeant ideoque circa Solem potiùs, quàm Sol circa ipsa, ferantur, credibile sit terram quoque, ejus & lucis & caloris pariter indigam, ambire potiùs hunc suum benefactorem, quàm ut ab ipso ambiatur. (3) Quòd cùm Planetæ tam superiores quàm inferiores adeò inordinate, & irregulariter nunc antrorsum & directè versus ortum, nunc retrò in occasum moveri, nunc penitus stare per plures dies & eodem loco harere videantur, quod reverà ta-

men

men ita in cœlis fieri indignum Deo, ordinis ac regularitatis amantissimo, ab adversariis ipsis censeatur, non aliâ hypothesi melius ac evidentius ratio illius apparentiæ reddi possit, quàm suppositâ telluris annuâ circa solem revolutione.

VI. Cum priores duæ rationes satis claræ sint, hanc tertiam tamen paulò distinctius mihi velim exponi.

Non potest melius hæc res, quàm per Schematismos demonstrari, quorum admodum duos hîc, alterum pro tribus planetis superioribus ♄, ♀ & ♂, alterum pro duobus inferioribus ♀ & ♂, exhibebimus aut potius (ne opus sit hîc Figuras multiplicare) è Tab. Astron. fig. 37. & 42. huc allegabimus. Sit igitur pro utroq; ☉ in mundi medio positus, ac circa ipsum Orbis terræ annuus ex hyp. Copernicana descriptus, in priore vero Schematismo in 12 partes æquales ab A factò initio divisus, supra hunc orbem autem portio orbis ♄, intervallo arbitrario, aut (quod melius esset, si fieri commodè possit,) in proportionem distantiarum terræ & ♄ à Sole, descriptus. Ex hoc orbe assumatur pars duodecima, quæ anni unius spatium in motu hujus planetæ designat. Hoc spatium in 12 partes distinctum & numeris 1. 2. 3 usque ad 12 &c. notatum significabit 12 menses, quibus ♄ successivè & æqualiter ab ortu in occasum provolvi concipitur; quemadmodum orbis terræ integer similiter in 12 partes menstruas divisus supponi debet, literis majusculis A B C D &c. designatas. Posito igitur

D d 4 quod

quòd terra in A constitutâ nos videamus Jovem in *i*, vel *a*, & post mensem delatâ terrâ ad B, Jovem interim etiam progressum in *2* vel *b*; post alium mensem in *3* vel *c* &c. manifestum est Jovem ex terris interea videri semper directum ab occasu in ortum sub stellis fixis progressum, ab *a* ad *b*, à *b* ad *c* &c. Ubi verò terra mense quinto ad F, & ♃ à 4 ad 5 vel à *d* per *e* ad *f* processisse supponentur, tunc è terra versus ♃ prospicientes, hunc videbimus retrogradum ab *e* in *f*, & consequente novo mense, cum terra ad G, & ♃ ad 6 vel *g* pervenit, magis adhuc retrogradum &c.

VII. *Nunc alterum Schematismum pro inferioribus duobus planetis exhiberi mihi velim.*

Positò rursus Sole in medio, ac circa istum descripto parvo ☿ circulo, & ultra hunc orbe terræ majore, dividatur ille in 8 partes æquales, quæ singulæ spatium 10 dierum complectantur, quia ☿ 80. præterpropter diebus orbitam suam circa Solem decurrit. Deinde ex orbe terræ resecetur quoque pars AI iisdem 80. diebus respondens, (quæ conficiet quàm proximè quartam partem cum dimidia) eaque similiter in 8 partes minores A, B, C, D &c. dividatur. His ita factis, si ponamus ☿ in 80. sive puncto suæ orbitæ ultimo positum progredi directè versus 10, & terram A ipsum in primo positu in *a* vidisse, in secundo positu circa 10, eundem ex B in *b*, in tertio 20, ex C in *c*, in quarto 30, ex D in *d*, semper

per interim directum videbit ; Ubi verò ♀ ad 40, & terra ad E perveverit, hæc istum interim retrogradum ex E in e, deinceps ex F in f videbit, donec progressus ad 60 ex G in g iterum videat, denuò directum.

VIII. *Quid est circa hanc utramq; hypothesin præcipuè notandum?*

Illud maximè, quòd utraque eos eventus secundum omnes circumstantias sibi evidentissimè connexos habeat, quos in ipsa natura ipso facto contingere observationes testantur; ut nimirum (1) superiores tres planetæ ♄, ♃ & ♀ non alio tempore, quàm circa ipsorum ♄ nes cum ☉; (2) Inferiores autem duo, ♀ & ♄, in suis ♄ nibus cum ipso, retrogradi fiant: (3) Sol autem & ☽ tales nunquam spectentur: (4) Retrogradationes ♄ frequentiores sint quàm ♃ vis, & hujus quàm ♄ tis; cum Mars intra biennium demum semel fiat retrogradus, ♃ uno mense post annum, ♄ vix mensis dimidio supra anni spatium: Econtra (5) major sit arcus retrogradationis in ♄ quàm in ♃, & in hoc quàm in ♄: Minus autem (6) vicissim tempus retrogressionis in ♄ quàm in ♃, verboque uno, quo altior quisque est, eò diutius maneat retrogradus &c. quæ omnia adeò præcisè cum hypothesi Copernicana conspirant, ut vel ex hac ipsa conspiratione, hypotheseos veritatem agnoscere quasi necessitemur.

IX. *Velim hæc paulò dilucidius exponas.*

I.) Non possunt superiores planetæ nisi circa ♄ nes suas cum Sole, retrogradi apparere; quia tunc Terra ipsis ex hypothese celerius mota eos post se relinquit, & hoc pacto retroititionis apparentiam ipsis necessario affingit; prout in rebus terrenis quoque similes apparentiæ ob similes rationes contingunt. Idem verò (2) in duobus inferioribus fieri circa horum conjunctiones necessum est, quia tunc ipsi, terram sese tardiolem prætervehuntur. Et cum (3) Motus ♄ tardior multò est Motu ♂ &c. non potest non terra ad ♄ ejusque ♄ nem citius redire, quàm ad ♂ ♂ vis vel ♂ is; quia ♂ maximè interim, dum terra periodum suam absolvit, dimidium suum circumlum decurrit, ut plus quàm dimidio anno opus sit, antequam terra eum denuò assequatur. (4) Retrogradationis arcus in ♂ vicino major ex necessitate appareat, quàm in ♂ & ♄ , tametsi (5) ex opposito tantò celerius absolvendus; prout hypotheseos applicatio ad oculum ostendet: Quòd autem (6) ☉ & ♄ nunquam retrogradi appareant, ex generali supposito, quòd omnes planetæ perpetuò directi incedant, & ex illo speciali, quòd Sol & ♄ circa terram, aut terra circa Solem moveatur, manifestum est. Sic enim, quando planetæ motus reverà semper directus, ex terra, tanquam suo centro, semper spectatur, non potest apparere retrogradus; cum retrogradatio in cæteris ex hoc solo principio optico contingat, quòd eorum motûs re-

verà

verà semper directi, ex alieno centro spectentur.

X. *Quicquid sit de summa hujus Hypotheseos Copernicanae probabilitate; S. Codicis tamen litera ipsi manifestè adversatur.*

Verum hoc est, fateor, quicquid etiam dissimulare conentur Copernicani. Verùm id ipsi hypotheseos veritati nihil derogat. Loquitur enim S. Scriptura, maximè in ejusmodi rebus merè naturalibus, accommodè ad vulgi captum; quod etiam in rebus majoris momenti, circa DEVM ipsum, facit, humanam ipsi faciem, oculos, aures, brachia, pedes &c. passim tribuens, quòd humana imbecillitas ab ejusmodi conceptibus sibi temperare vix possit, tametsi sanam rationem vel obiter consulens, facilè agnoscat illorum conceptuum falsitatem. Quamobrem philosophicas ejusmodi quæstiones non magis è Scripturæ verbis quàm controversias fidei ac merè theologicas è rationis principiis decidere par est, sed æquiùs multò, & utriusque scopo convenientiùs, ut in suo quolibet foro sub examen revocetur.

XI. *Numquid alia quædam supersunt, ad Universi Systema plenius concipiendum aliquo modo facientia?*

Sunt equidem, nec pauca. Et (1) quidem de fine seu extremitate hujus mundi sive universi corporei: quam extremitatem ibi olim posueramus, ubi fixas stellas oculo nudo conspicerè dabat.

dabatur. Verùm enim verò cùm inventa tubo-
specilla, ultra illas olim nudo oculo visas fixas,
ingentem, imò nunquam numerabilem, aliarum
multò minorum, ideoque sine dubio multò re-
motiorum, fixarum multitudinem detexissent,
pristina mundi extremitas multò longiùs erat
exporrigenda, ita ut desperare jam de mundi
finibus certò determinandis meritò incipia-
mus.

XII. *Erit ergo fortasse Mundus infinitus dicendus?*

Non debemus unquam plus dicere quàm
percipimus, ideoque, quemadmodum Mundi
fines hactenus certò definire non possumus, *Fi-
nitum* illum simpliciter asserere non audemus;
ita, cùm æquè incertum nobis sit, an habeat
aliquos fines nec ne? nec *infinitum* illum dicere
par est; sed voce quadam quasi neutrâ cum Car-
tesio *Indefinitum* illum dicere licebit: quicquid
etiam Hamelius contrà invidiosius urgeat, *Phys.
Gen. Tract. II. sub init. p. m. edit. Norimb. 116.*
nihil absurdius videri reputans, quàm Univer-
sum indefinitum dicere: Nam vel suis finibus
continetur, addit, tumque finitum est; vel nul-
lum habet finem aut terminum, tumque planè
infinitum, non indefinitum, dicendum est; po-
sito scilicet, quod meritò addendum fuerat, no-
bis alterutrum esse cognitum. At verò si nec
sciamus, illud finibus quibusdam contineri, ne-
que etiam sciamus illud omni fine destitui, quid
rectiùs dicere possemus & cognitioni nostræ
conve-

convenientiùs , quàm Indefinitam esse magnitudinem.

XIII. *Annon autem aliunde notum esse potest, universum non esse infinitum , quia DEVS est infinitus , duo autem infinita simul esse non possunt ?*

Si DEVS & mundus eodem vocis significato dicerentur infiniti , tum illatio hæc omnino procederet : Nam cùm DEVS essentiâ & perfectionibus suis, potentiâ , sapientiâ , duratione , justitiâ , misericordiâ &c. sit infinitus , si idem eodem sensu de Mundo diceretur , duo forent Dii ; quod est absurdissimum. Et cùm Mundus dicatur infinitus non nisi extensione suâ & mole , si DEVS eodem modo infinitus diceretur , utique horum unum alterum necessariò excluderet , siquidem unum reali extensione infinitum omnia spatia imaginaria expleret , nec alterum , nisi per dimensionum impossibilem penetrationem , valeret admittere. Verùm enimverò , cùm diversissimâ quoad omnia ratione DEVS & Mundus infiniti dicantur ; quid impediat , quæso , duo statuere , diversissimo sensu , infinita ? aut cur non potius eleganti analogiâ conveniat , ut causæ infinitæ potentiæ activæ at nullius penitus extensionis , respondeat effectus infinitæ extensionis , at nullius penitus potentiæ activæ ?

XIV. *Plu-*

XIV. *Pluresne uno sunt, aut esse possunt, mundi?*

Tota hujus quæstionis solutio, à solutione præcedentis pendet. Nam si mundus esset extensione infinitus, nec plures uno essent nec esse possent; quia hic unus omne repletet spatium, neque locum ullum novo mundo concederet. Quod si verò mundus hic actu finitus sit (quod omni ævo creditum fuit) extra illum aut spatium esset concipiendum vacuum, aut materiâ, sed nondum formatâ, repletum. Si posterius ponatur, utique DEVS eadem potentiâ, quâ nostrum mundum ex informi materia formavit, posset & novum alium ex illa residua portione informis materiæ, formare. Sin posterius esset; Eidem Divinæ potentiæ facilè foret, illud vacuum spatium reali quadam extensione sive materia replere, indeque novum mundum condere, qualis materia spatium pristinum hujus antiqui mundi repleverat &c.

XV. *Sed novus ille mundus (ita excipiunt Cartesiani) antiquo nostro esset aut contiguus, aut non adeò ingentis intervallo ab ipso remotus &c. Ergo non essent duo mundi, sed unus ex utrisq; conflatus?*

Respondeo: Hi sunt meri verborum lusûs & inanes rerum logomachix. Ille enim novus mundus ab antiquo etiam tempore esset disjunctissimus. Quorum autem unum ab altero etiam tempore separatum est, illud cum ipso
non

non potest esse realiter idem; cùm eorum, quæ realiter idem sunt, non possit unum esse, & unum deinceps demum consequi. Quod si verò talia duo quis conjungere velit, & ut unum quid concipere; per nos id licebit: quemadmodum nempe plures distinctissimi Cives, instar unius Societatis, corporis vel Personæ, spectari solet.

XVI. *Annon inter Philosophos antiquos extiterunt, qui statuerunt actu plures esse mundos?*

Ita statuiffe Epicurum communiter creditur, nec plures tantum, sed infinitos esse mundos (Gass. Animadvers. in Diog. Laërt. p. m. 165.) & sanè hujus rei assertio expressa habetur in Epist. ad Herodot. p. m. 35. in fine: "Ἀλλὰ μὴν καὶ κόσμοι ἄπειροι εἰσὶν, οἷα' ὅμοιοι τέττα, οἷα' ἀνόμοιοι, h. e. Caterùm (in ipsa Universitate seu natura rerum) *infiniti sunt Mundi, alii quidem similes isti, (quem nos incolimus) alii verò dissimiles.* Sensit idem Plutarchus contra Platonem & Aristot. saltem plures esse mundos, si non infinitos 1. Plac. 5. Inprimis Metrodorus commemorandus est, cujus dictum illud percrebuit: *Tam absurdum esse, in universo infinito unum fieri mundum, quàm in magno agro unam nasci spicam.* Verùm uti hos Mundos plures falsè irriferunt olim alii Philosophi, & Gassendus in Animadv. p. m. 233 & seqq. pluribus confutavit; ita hoc sensu saltem plures asserere mundos haut absurdum erit, quatenus Mundi facies diversissimæ, ex diversis

sis Mundi Corporibus menti quasi peregrinanti sub novo penitus adspectu sese oblaturæ, pro totidem diversis mundis agnoscerentur. Etenim è \hbar & \mathbb{Z} , horum Satellites, tanquam totidem Lunæ, conspecti, cum diversa penitus fixarum viciniorum, & Solis remotioris repræsentatione, alios planè mundos aspectabiles, quàm est hîc noster oculo corporeo se ingrens, oculo mentis essent exhibituri.

XVII. *Quid deniq; de iis statuendum est, qui Mundum animatum, imò ingens quoddam animal esse asseverarunt?*

Siquidem in sensu verborum proprio id asseruerunt, ineptivisse dicendi sunt, quia mundum destitui organis animalibus, ad motum, sensum atque ad nutritionem etiam destinatis manifestum est. Verum si per *ἀναλογίαν* quandam & similitudinem tale quid de mundo dicatur; id eodem sensu admitti potest, quo vicissim homo, omnium animalium perfectissimum Mundo æquiparatur & Microcosmus appellatur.



PHY-

PHYSICÆ
MODERNÆ SANIORIS
PARTIS SPECIALIS-
SIMÆ

SECTIO PRIOR

De

Corporibus partialibus
inanimatis.

CAPVT I,

De

Fossilibus.

I. *Quid per fossilia strictiùs loquendo
intelligis?*



Ipsum hoc nomen satis prodit, quid
rei sub ipsius cortice occultetur.
Nimirum (ut à sublimibus ad in-
feriora terræ nunc descendamus)
ea corpora fossilium nomine nobis
veniunt, quæ ex terræ profundis effodiendo
in lucem protrahuntur, & humanâ solertiâ ad
varios hominum usus, separatis ingeniosè im-
puritatibus ordinariè admixtis, artificiosè præ-
E e paran-

parantur : Qua in re metallifossoribus & Chymicis haut parum debemus , suâ adeò laude non defraudandis , nisi nimiâ , quam præ se ferunt aliqui , sapientiâ tumidi se solos Philosophos ineptè reputent.

II. *Cùm multùm variant, quæ ex terris effodiuntur, annon ad certa genera revocari possunt?*

Nihil impedit ; ac tria quidem quasi summa constitui possunt : Primum *terrarum καὶ ἐξοχλῶν* ita dictarum ; sive communes illæ sint & contentiores , sive in pretio aliquo habeantur ob virtutem aliquam medicam , aut alium insignem usum in arte pictoria , aliisque : Secundum *Succorum* , sive fluidorum adhuc , sive ex fluidis concretorum ; qui porrò vel pingues sunt & inflammabiles , ut sulphur , succinum , bitumen ; vel macri & in humido solubiles , ut Sales : Tertium denique *Mineralium* specialiter & propriè sic dictorum ; cùm aliàs generatim omnia Fossilia etiam Mineralia dici soleant , à mineris , quas vocant , sive glebis terræ , hoc aut illo salium aut sulphuris aut metallorum genere gravidis ; ut minera salis , aut minera sulphuris , ferri , cupri , argenti &c. dicatur excisa terræ lapidosæ portio , quæ particulas hujus aut illius generis copiosiores sparsim intra sinum suum occultat , peculiari deinde artificio ab admixtis aliis separandas , & cum sui similibus tantùm in unam massam continuam colligendas ;
- vel

vel etiam ipse locus è quo plures ejusdem generis portiones exscindi possunt.

III. *Quænam sunt primi generis, terrarum, nempe, præcipuæ species?*

Quædam terræ sunt steriles, ut plurimum candidæ, leves, & arenosæ, quæ, (minimorum quippe filiculorum congeries, permodicâ terræ portione commixtâ) humorem receptum non retinent, nec lutescunt, ideoque nutriendis plantis, & vegetandis earum seminibus, ineptæ sunt: Quædam verò pingues sunt & frugiferæ, quæ humore perfusæ nigricant & lutosæ fiunt, humiditatis tenaciores, sed dissolubilitate quadam mediocri gaudentes; cum citra partium aliquam resolutionem vegetatio & nutritio fieri nulla possit. Unde nec argillosum solum, ob nimiam suam densitatem & pororum exilitatem, humoris alimentitii percolationem impediens, plantarumque fibras potius suo glutine obstruens & obturans.

IV. *Annon argillæ quoddam genus pingue reperitur, quod terris inspersum eas facundat?*

Reperitur utique, sed ab humore solubile, *Marna* gallis, olim *Marga*, à germanica forte voce *Stein-Mark* oder *Mergel* ita dictum; quod sit velut quædam terræ medulla, idque duplicis generis: aliud sc. durius & lapidi simile; quod longiore temporis tractu dissolvitur, & humidioribus terris utilius habetur; aliud verò mol-

lius ac terris ficcioribus magis conveniens. Plinius sex illius species enarrat, quæ omnes tamen suam foecunditatem majorem vel minorem sali nitroso aut sulphureo, qui pinguedinem quandam occultat, acceptam ferunt.

V. *Nonne etiam genus quoddam terrarum datur, quas pretiosas dicunt?*

Id verò nemo fere ignorat; & appellantur quidem pretiosæ, propter utilitatem earum in casibus quorundam morborum. Talem olim in pretio fuisse terram Samiam, eamque pinguem, mollem, candidam & glutinosam, à Galeno docemur: Terram Lemniam in Lemno Insula hodiernum effodi & per universam Europam hodiernum etiam sub forma orbiculari parvorum pastillorum distribui, notorium est; quos pastillos olim figurâ capræ signabant, nunc autem characteres aliqui Turcici iis imprimuntur, ope sigilli cujusdam, unde terræ Sigillatæ nomen habent. Pinguis & hæc est, mollis simul ac densa, & (quæ virtus ejus est præcipua) adstringens: quas equidem virtutes ac diversos etiam sapores ab admixtis diversis succorum generibus habent, æquè ac *bolus*, quam vocant, *Armena*, *Melitenfis*, *Tockaviensis* &c. quæ vim habent eandem cum terra sigillata, exiccandi nempe & adstringendi, ideò ad dysenteriam, alvi profluvia, sanguinis exspuitionem, catarrhos, & ulcera pulmonum, adhibentur, quædam etiam contra pestem ipsam & contra venena valere creduntur.

VI. *Cum*

VI. *Cùm exteræ regiones ejusmodi terras pretiosas passim suppeditent, num Germania nostra earum similes nullibi habet?*

Habet omnino, & præcipuè in Silesia prope Strigoviam, (Strieg) oppidum, in ducatu Swidnicensi, ubi ex monte S. Georgii effoditur, hodiernæ terræ Lemniæ sive Turcicæ ob insignes vires præferri solita, & à colore speciatim *axungia Solis* dicta; Habetur etiam alia circa Lignitium & Goldbergam, quæ à colore candido *axungia Lune* à chymicis appellatur. Tales passim etiam alibi locorum reperiuntur, ac memini ante multos annos ex antro quodam subterraneo non adeò longè ab arce Hohenstein / 4 circiter milliaribus hinc distante (cui nomen Kreisloch / aliis Geisloch) inter alia ibi reperta mirabilia, talis terræ adstringentis genus rubro colore nos effodisse, quod paria facturum cum aliis terris medicatis medici nostri judicârunt.

VII. *Danturne aliæ adhuc terræ fossiles præter hæcenus enarratas?*

Utique dantur, quas macras & raras appellant, quibus pictores uti solent, ut varia creaturarum genera, rubrica item (der Rötel) Ochra (das Berggeel) ut & cærulea quædam species (Bergblau) viride æris (Grünspan) &c. quæ omnes vim aliquam medicam quoque obtinent, quam aquæ per ejusmodi mineras transcolatæ imbibunt, particulas nimirum aliquas abluentes & secum vehentes, indeque medicatæ evadunt.

Hæ macræ cum pinguioribus decenter subactæ figulis, statuariis, plasticis, operum suorum materiam præbent: Nam & figuli argillam sabulo miscere didicerunt, aliàs vasa ignis ardorem ferentia, vix effingerent; arenæ enim corpuscula, quæ dura, vitrea & aspera sunt, angulis suis terram pinguiorem vinciunt, & ne solvatur prohibent, meatûs occludunt & cæmenti vices obeunt.

VIII. *Unde verò reliquæ terræ feraces & pretiosæ suas habent virtutes.*

Feraces terræ virtutem suam habent à Sale volatili & nitroso, qualis ex urinis & fimis animalium eruitur; tametsi nitrum illud utplurimum non sit concretum, sed in humido exsolutum. Nusquam verò salis hujus nitrosi, tum volatilis tum fixi, copia in terris se prodit, quàm in marga ipsa, cùm aëri aliquandiu fuerit exposita; quippe novo nitro (cujus adeò halitibus aërem abundare necessum est) subinde fætatur, instar earum terrarum, ex quibus salpetræ eductus est, & capitis mortui ex aqua forti, terrarumque etiam vitriolicarum, aluminosarum &c. quæ sale suo exhaustæ, novum ex aëre salis proventum trahunt. Medicatæ similiter ab ejusmodi salium, sulphuris, bituminis &c. varietatibus diversisque suis virtutibus imprægnantur; de quibus nunc specialiora quædam adnotanda veniunt.

CAP. II.

De

Salium variis generibus.

I. *Quid Salis nomine hic intelligitur?*

Generalissimus Salis conceptus hic est, ut sit corpus durum aut firmum, quod in aqua tamen dissolvitur; quo quidem titulo alumen, vitriolum &c. inter Sales numerantur: quamquam ista *Hamelius*, succos fortè salinos potiùs, quàm Sales dici debere, existimet.

II. *Sunt etiam hi sales diversorum procul dubio generum?*

Nullum est dubium; & modo laudatus *Hamelius* ex alio Viro dictissimo, nobis enarrat 1.) Sales quosdam inflammabiles, qui in rebus sulphureis & bituminosis dominantur; quos ad præsentem locum tamen haut pertinere dicit. 2.) Ex iis, qui inflammari non possunt, quosdam simplices nuncupat, alios compositos; & illos quidem 3.) porro distinguit in nitrosos vel acres aut lixiviales, & in acetosos five acidòs, ac denique in neutros. Compositos autem enarrat diversos, ut salem armoniacum, salem gemmæ seu fossilem κατ' ἐξοχὴν ita dictum, Nitrum, Alumen, Vitriolum &c.

III. *Quid igitur per Salem acidum vel acetosum intelligis? quid per nitrosum sive acrem?*

Id salis genus acetosum voco, quod in plantis & animalibus viget quidem, sed dissolutum; in mineralibus autem, ut vitriolo, alumine, nitro vulgari &c. magis se prodit, sapore suo acido & adstringente. Nitrosos autem propriè appello, qui cum rebus sulphureis majorem habent cognationem, & cum acetosis tumultuantur; Mercurii sublimati solutionem turbant, eique aut lacteum colorem præbent, cum sunt volatiles, aut fulvum & subrubrum, cum sunt fixiores. Ac sæpe evenire notat Vir laudatus, ut sales illi nitrosi, nec sapore, nec fusione se prodant; ut in cancerorum lapidibus, ostreorum conchiliis, corallius, margaritis, & aliis, quæ cum acetosis liquoribus permixta tumultuantur & effervescent.

IV. *Fortasse per acetosos hosce sales idem intelligitur, quod aliis Acidum, & per acres seu nitrosos, quod aliis Alkali compendiosè dicitur?*

Rem acu, quod ajunt, tetigisti. Habemusque hoc Alkali ab Acido dignoscendi vix aliud indicium, quàm ut judicemus Alcalium esse id, cum quo aliud manifestè Acidum, si confundantur, tumultuatur; ita ut acidum tanquam notius & familiarius (in Vitriolicis quippe, aluminosis

minos &c. manifestè dominans) alcalica per effectum illum evidentem prodat, cujus ratio physica ex illarum numero est, quæ in profundis adhuc tenebris sepultæ jacere creduntur: tametsi repertus hodie sit Anonymus quidam Med. D. qui has è profundis istis protrahere & in clara luce collocare ausus sit, in libello Gallico jam anno 1686. Lugduni Batavorum edito & *Essais d'Anatomie* inscripto.

**V. Potesne mihi hanc rationem paucis
& clarè satis exponere?**

Etiam si laudatus Autor mirâ brevitate suâ, cum claritate tamen possibili conjuncta, mihi cumprimis arrideat, non potuit tamen ita brevis esse circa hoc negotium, ut totus huc exscribi queat, nec ita clarus, quin obscuritas aliqua exoriatur, si concisam ejus brevitate arctius adhuc contrahere velim adniti. Proponam ergo paucissimis 1.) Fundamenta generalia, quibus hæc & cæteræ ejus hypotheses omnes innituntur: 2.) Hanc specialem ejus hypothesein ex ipso Authore brevissimis concipiam.

**VI. Quænam igitur sunt illa fundamenta
generalia?**

Cùm scopus ejus sit de corpore animato ejusque elementis agere, supponit substantiam quandam subtilissimam & agitativissimam, quam ætherem cum Philosophis aliis appellat, & moleculas grandiores & crassiores infinite varias, ex quibus corpora terrestria, & conse-

quenter etiam corpora animata componantur; Et has quidem ad quinque genera reducit. 1.) Genus supponit habere angulos acutos in sua superficie cum multa soliditate, & has appellat *acidas*, h. e. aciditatis causas: 2.) earum, quæ multos habeant poros & satis patulos, easque vocat *alcalicas*: 3.) Genus earum, quæ ramosæ sint, & *sulphurearum* nomen ferant: 4.) earum, quæ sint longiusculæ & in extremitatibus suis quodammodo ovales, quibus *Phlegmatis* aut phlegmaticarum nomenclaturam adtribuit: 5.) Denique earum, quæ non habeant angulos acutos in sua superficie, neque poros patentiores in suis quasi visceribus, neque sint ramosæ aut cylindricæ, cum extremitatibus ovalibus; sed quæ vel obtusæ, gibbosæ, ferè sphæricæ aut ovales, verbo innumerabilium varietatum esse possunt, & has tandem *terram* vel *terreas* moleculas cognominat.

VII. *Numquid ergo, his ita suppositis, rationem aliquam reddere potest illarum ebullitionum aut effervescentiarum, quas in confusionibus acidorum cum alcalicis observamus?*

Reddit utique valdè simplicem & planam hanc p. sui tractatûs 25. Quoniam acida sunt aculeata, & alcalica porosa, in utrorumque confusione punctula sive aculei acidorum subintrant in poros alcalicorum, eosque adeò reddunt angustiores. Itaque materia ætherea, quæ

quæ per illos poros antea patientiores liberè fluxerat, non ampliùs eadem facilitate transmeabit, ideoque impedita, & à tergo per succedentes novas copias validè propulsa, exitum cum impetu quærit motûsque tales & luctas quasi causatur, donec remotis illis obstaculis vel etiam particulis quibusdam ipsorum alcalicorum revulsis eâdem quâ priùs facilitate per alcalicorum poros ultrò citroque fluat &c.

VIII. *Hactenus salium genera simpliciora consideravimus; nunc etiam de Compositis quædam me doceas, rogo.*

Inter hos, uti suprà jam dictum, sal communis primo loco commemoratur, cujus sapor ex acri & acido manifestè temperatur. Marinus saltem in aqua exsolutus sic evaporatione concrevit, ut pars nitrosa & acrior primùm coëat, cum sale tartari dissoluto quippe sine tumultu commixta; sed pars altera, quæ in vasis fundo, aquâ omni exhalatâ, remanet, multò acidior, ideò cum salis tartari solutione tumultuatur eamque coagulat, quæque hæc dissolverat, statim præcipitat. Deinde Salarmoniacus & Sal gemmæ sive fossilis, compositi sunt, ille ex nitro volatili & sale communi, in terris quibusdam levioribus, & in specubus, interdum efflorescens; hic ex sale itidem communi & nitro fixiore, solutionem sublimati præcipitans (quod Sal communis non præstat) & solutionem vitrioli subviridem flâvo colore tingens.

IX. *Nunc*

IX. *Num alii quoq; dantur compositi sales?*

Dantur utique , & nominatim sal petræ, alumen & vitriolum, ita tamen compositi, ut sal acetosus in iis dominetur, præsertim in duobus posterioribus nitro ferè destitutis : In Sale petræ verò nitrum cum acido temperatur; unde cum sale tartari mixtus nec effervesceat nec præcipitationem creat, ut alumen & vitriolum. Conferantur quæ porrò habet Hamelius è Chymicorum experimentis deprompta, p. m. Phys. partis secundæ edit. Norimb. 477. & seqq. De Salibus multa habet generalia & specialia Kircher. M. S. Lib. VI.

X. *Multa audi vi de salium fixorum & volatilium discrimine; hoc in quo præcipuè consistat, exponi mihi paucis desidero?*

Volatilia generatim illa dicuntur, quæ leni calore in sublimem aguntur, Fixa contrà quæ fortiori vix obsequuntur. Utriusque autem rationes ex affectionibus mechanicis pendere cum Dn. Boyle docet c. I. Hamelius. Nimirum volatilitas (1) à partium exilitate, quòd pulvisculi nimium subtiles majori polleant pro mole sua superficie, ut leviores inde evadant & calori debilissimo obsequantur : (2) ab earundem particularum exilium minori gravitate specifica, i. e. minori soliditate : (3) à figura earum minus implicabili; unde aqueæ particulæ, licet oleosis graviores, his tamen faciliùs in altum vehun-

vehuntur. Fixitas econtrà ex affectionibus mechanicis oppositis oritur, (1) ex partium crassitie, ob quam vapores aquei separati per aërem facile evehuntur, coaliti in guttulas suspendi amplius haut valent: (2) ex earundem soliditate & specifica gravitate, ut in minii pulvisculis & metallorum calcibus: (3) ex earum figura magis implicabili, aut aliàs ob politiem firmitus cohærente; quam cohærendi dispositionem ignis ipse haut rarò causatur. Exempla plurima apud Hamelium è chymicorum officinis allata rem hanc plenè declarant, ad salia deinde non magis, quàm ad Spiritus & Sulphura applicandam.

CAP. III.

De

Succis oleosis & sulphureis sub terra reperiundis.

I. *Ergone succi ejusmodi oleosi & inflammabiles subter terram fluunt?*

NUllum est dubium, & alicubi ex ipsis petrosæ terræ rimis extillant; alibi verò ex acidorum salium admixtione sensim concrescunt & coagulantur, variaque constituunt corpora, diversis sulphuris, picis, resinæ, bituminis, electri, sive succini, ambræ, carbonum fossilium &c. nominibus insignita, & mixtionis fortè gradu vario potiùs, quàm naturâ differentia; nisi quis malit, illum ipsum variantem mixtionis gradum

gradum sufficere posse ad specificam quandam differentiam constituendam ; prout certè in meteoris , vaporem , nebulam , nubem , nivem , pluviam , grandinem , ut diversas aquearum concretionum species consideramus , tametsi ex earundem particularum aquearum variante solum collectione & dispositione oriri omnia rectè credantur.

II. *Annon etiam in plantis & animalibus ejusmodi mistura & concretiones oleosæ & sulphureæ reperiuntur ?*

Quis dubitet ? quando per destillationes chemicas latitantes sparsasque per istorum substantiam particulas , uti salinas , ita sulphureas quoque , non solum singulari artificio ac dexterritate ex plantarum radicibus , caulibus , foliis , floribus , seminibus &c. sed ex animalium sanguine , carnibus , ossibus &c. elicere & colligere nôrunt ; sed ipsa natura quoque , in animalibus præsertim , adipem non unius generis in copia notabili & sæpe magna , accumulât : Neque verò mirum hoc esse potest , quandoquidem vegetabilia ista ex terræ solutis succis , & inter illos oleosis quoque & pinguibus , nutriuntur , animalia verò ex plantis & vegetabilibus , homines etiam & quædam bruta ex animalibus aliis omne suum alimentum petunt.

III. *Rem*

III. *Rem miram lego in libello quodam gallico novissimè dito, de quadam arbore in china, veri & genuini sebi ferace.*

Novi hoc, & libellum ipse possideo, *Nouveaux memoires sur l'état present de la Chine* inscriptum, cujus Author, Louis le Comte Jesuita, testis rei inauditæ oculatus, externam faciem quasi depictam verbis prolixis Part. I. pag. 145. exhibet, & rem insolitam pluribus circumstantiis enarrat. Quodque magis adhuc mirere, repertus est alleg. Hamelio c. I. in Anglia Vir egregius D. Grew. qui adipem artificialiter generavit, oleum ex olivis expressum cum spiritu nitri commiscendo; quæ mixtura per aliquot dies digesta primùm medullæ colorem, tum adipis aut butyri consistentiam adepta est, eamq; majorem adhuc & firmiorem, postquam digestionis vase recluso partes nitri sulphureas exhalare sive fuisse. Quin & resinam omnibus gummi resinosi affectionibus præditam ratione simili procreavit, cum oleum vitrioli oleo anisi guttatim affudisset, & accuratè miscuisset: Ut colligi inde possit, non solum gummi & resinam in plantis ex tali partium oleosarum & acidarum commixtione prodire, sed adipem quoque in animalibus ex parte sanguinis oleosa simili quadam ratione coalescere.

IV. *Fortè*

IV. Fortè & succinum & sulphur & omnia
bitumina intra terram similiter formantur?
de quibus adeò singulis specialiora
quædam audire gestio.

Credibile quidem est omnia hæc inflammabilia corporum sive genera sive species sive gradus, ex uno fonte manare, nimirum ex oleosa quadam substantia intra terram scaturiente, quæ, pro diversa puritate & impuritate, & pro diversitate succorum acidorum cum quibus concrescit, istorum corporum varietatem producat: ut, quemadmodum oleosa illa liquida sive petrolea vel subtilia sunt & candida (Naphtæ nomine venientia, sive naturalis illa sit veri Petrolei nomen servans, sive factitium sit & colamen quoddam seu flos bituminis Babylonii) vel crassa & nigra, ita puriore & candido petroleo succinum & Ambra prodeant, ex crasso & nigro reliqua bitumina & bituminosa concreta, ut asphaltum seu pissasphaltum, pix, resina, Maltha (instar lini crassa) Gagates, carbo fossilis &c.

V. De succini natura & origine specialius
informari cupio, quid sit, & ex quo
fonte manet?

Plerique quidem opinantur, succinum vel electrum (der Algtstein oder Bernstein) esse succum resinofum & quasi gummi quoddam ex arboribus exsudans & in Mare Borussicum destillans. Sed hoc verosimile nequaquam est,
ideò

ideò, quòd (1) ingentes electri seu succini massæ, quales in mari Borussico reperiuntur, ex arborum succis conflare non possent : (2) quomodo hoc resinæ genus in mare ex arboribus defluat, ut non citiùs ab aëre eas ambiente, eodem modo scilicet quo cætera gummata, concresceret, quàm in mare delabi posset : (3) nullibi ad litora maris Borussici (ex quo succinum piscantur) ejusmodi arbores aut sylvæ hætenus repertæ sint, ex quibus succus oleosus tantâ copiâ in mare defluxisset. Credibilius ergo est, è fundo maris Prussiam alluentis & è rivis vicinis oleum illud ebullire, idque, tanquam aquâ in leviùs sublimè evectum, sale marino, agitatione maris, aquæ frigore quoque sensim concrescere & indurari, aquisque innatare.

VI. *Annon autem electrum sæpe muscas, formicas, culices, imo lacertas quasdam & alia animalcula, intra se sepulta quasi ostentat?*

Sic est, experientiâ non inficiandâ teste; offertque spectandam lacertulæ semipalmari frusto succini inclusæ omnibus suis membris perfectissimè expressæ figuram *Athanas. Kircherus Mundi Subterr. Lib. VIII. Sect. III. cap. IV. pag. Tom. II. 76.* tanquam Doni Serenissimi Principis & Ducis Augusti Lüneburg- & Brunsvicensis, cui epitaphium hoc pentametro erexit : *Non poterat tumulo nobiliore tegi.* Addit autem simul rationem & modum, quo sepultura hæc contingere videatur. *Cum bitumen liquidum adhuc & molle,*
F f inquit,

inquit, *maris fluctibus ad litora devolvatur, fit, ut ibidem inter arenas ex saxa collectum siccitate aëris lentescat, unde animalcula hujusmodi, sapore & odore attracta, mox atq; illud insederint, simul etiam tenacitate materiae veluti visco quodam corripiantur; à quo cum se expedire non valeant, interim decumanis maris fluctibus, mobilis adhuc materia, paulatim in globos aut aliam formam subigitur; atq; hoc pacto, undâ & undâ trudente materiam, animalcula inviscata in meditullium obvoluta secedunt.*

VII. *At magna est succini cum resinis & gum-
matis affinitas, ut originem eandem quoq;
agnoscere videri queant?*

Non potest negari illa affinitas, ideoque concedi quoque originis identitas, ratione primorum nimirum principiorum, cum iisdem ferè principiis coaluerint, ex oleo nimirum & sale tum nitroso tum acido: Unde iisdem penè usibus, teste Hamelio, in Medicina adhiberi possunt, & maximè destillationi aut tussi tenui & falsæ mederi. Nam sal acidus, pergit, qui in sulphure, succino, & resina inest, uberiolem salem, qui in destillatione seu rheumate exuberat, omnino infringit & oleosâ sui parte eum diluit ac temperat, sicque materiam tenuiorem efficit crassiolem &c. quæ Medicis dijudicanda relinquimus. Ut verò eandem originem agnoscant quoque ratione medii vel modi concretionis, id nullâ necessitate consequi putamus; evidentissimo exemplo Sebi in animalibus & in arbore quadam

quadam Indica nati, cujus mentionem supra Quæst. III. fecimus. Nova hypothesis ac tota succini historia habetur in tractatulo recentissimo Philippi Jac. Hartmann, Phil. & Med. D. & Prof. Med. extraordin. Berlinens. &c.

VIII. *Cum succino siue electro peculiaris aliqua vis adscribi soleat, queritur, in quo illa vis electrica consistat?*

In eo consistit præcipuè, quòd res leviculas e. g. paleas, arenæ scriptoriæ, aliosque cujuscunque generis, pulvisculos, tenues chartulas &c. attritu quodam notabili præcedente, è vicinia ad se quasi trahat, sibi que adjungat. Neque verò hoc uni succino proprium est, sed ceræ obsignatoriæ siue laccæ, vitro ipsi, & magnæ gemmarum parti, commune; maximè si panno laneo fortiùs affricentur; nam sine præcedente affrictu vix exerunt illam vim *electricam dicta corpora*.

IX. *Unde ergò originem habet illa vis attrahendi?*

Olim quæstionis hujus solutio alia non habebatur, quàm ut dicerent, esse qualitatem occultam, h. e. ad certam rationem haut reducibilem; vel esse inter succinum aut aliud corpus electricum, & inter res istas leviculas aliquam sympathiam, propter quam inter se conjungi ament &c. Sed hæc sententia, præter id quòd quærentis desiderio satisfacere non possit, ali-

unde quoque improbabilis est, quòd cùm rebus adeò diversis unum idemque corpus electricum naturalem aliquam habere cognationem vix possit; nec una eademque res levicula cum corporibus electricis adeò diversis.

X. Fortassis in halitu quodam tenui & subtili à corporibus electricis post adfrictum emissò, vis ista consistit?

Id quidem arguere omninò videtur necessitas ista adfrictionis præcedanæ, præsertim præeunte insuper incalescentiâ quâdam ad ignem vel Solem vim istam adaugente; quod ampliùs ex eo confirmatur, quia corpora, quæ copiosiores halitûs fundere apta sunt, ut pleraque gummata aut resinæ, sulphur ipsum, bitumina, quæque multo odore se produnt, eadem fere omnia sunt electrica.

XI. Quo pacto verò emissi illi halitûs post adfrictum validiorem obviam quæq; corpuscula ad se rapiunt potius quàm repellunt ac dispergunt?

Hic Hamelius (p. m. 487.) Gassendus in Animadversionibus ad Physiol. Epic. (p. m. 348. &c.) & alii viri doctissimi ad halituum istorum visciditatem & cum emissionem conjunctam tensionem confugiunt, quâ viscidum effluviolum quasi radii, vi caloris versus levia corpuscula protensi ob pinguedinem & viscositatem suam iis adhæreant; & remittente tensione in

in seipfos & ad fontem suum reducti isthæc unà secum adducant & conjuncta servant : eodem modo sc. quo nervi violenter tensi subitoque rupti, retrosiliant, aut chamæleontis lingua ad vicinas muscas celeriter evibrata, & mox retracta, eas correptas ad os suum pertrahat.

XII. *Hæc ratio cùm satis speciosa videatur, scire tamen velim, annon alia adhuc melior in promptu sit?*

Videtur utique ista veritati propius accedere, quam Cabeus pridem quodammodo attingit, & quæ ab æris gravitate ac circumpressione, innumeris experimentis comprobata, petitur. Nimirum, displosi illi per calorem halitûs electricorum corporum, ærem inter hæc & levicula corpora medium dissipant, ejusque adeò pressuram versus ista quodammodo debilitant, quo pacto qui à tergo illorum vim pressivam seu elasticam salvam adhuc & integram habet ær, versus electricum corpus prorumpit & levicula unà eò protrudit, in varias prius partes ea manifestè emovens. Quam rem geminum experimentum inprimis illustrat : 1.) tormentorum post explosionem subitanea retropulsio, quæ vix aliter explicari potest, quàm quod ær vicinus per halitûs sulphureos vehementer expansus & disjectus, mox, cessante illâ expansione, ab æris remotioris, interim in seipsum cedere coacti, virtute elasticâ versus tormenti cavitatem impetuosè compulsus ipsum tormentum supra rotas




Fig. 16.

fulcri sui vo-
lubile retro-
agat; 2. dum
tubuli cujus-
dam vitrei
AB, (Fig.
XVI.) trans-
versim me-
diante alio

tubulo CD antliæ orificio in D applicati; in cu-
jus extremitatibus collocati cylindruli lignei A
& B facile mobiles, ubi primum pistillum antliæ
G adductum, aërque inter cylindros A & B me-
dius per tubulum CD succedens quodammodo
dilatando debilitatus fuerit, mox aër exterior,
integro adhuc elatere ad A & B irrumpens duos
cylindrulos ligneos ibi hætenus quietos ad
mutuum contactum circa medium tubuli C
compellit.

**XIII. Hætenus de Succino: Annon ambra
quoq; ejusmodi succis oleosis, concretis,
accensetur?**

Ita fit à nonnullis ac nominatim à Celeb.
Leydensium Prof. Hermanno (allegante Excell.
D. Lochnero nostro in Observ. CCXX Ephem.
Medico-Phys. anni MDCXC.) Ambram gry-
seam speciatim ita definiente, quòd sit sub-
stantia sebacea, pinguis, solida, levis, coloris
cinerei, inflammabilis, odorata, saporis oleosi,
pinguis & aromatici, instar bituminis, è scopu-
lis

lis & saxis in imo maris effluens, condensata & in litus ejecta: quamvis octodecim diversas opiniones de hujus origine recensuisse D. Justum Klobium Prof. Wittebergensem, ex Actis Philosophicis Oldenburgii Angli, anni 1667. narret Excell. noster Bruno in Lexico Castellii secundum aucto, & ex istis duas hæsitabundum elegisse, quæ vel Merdam alicujus Avis Indicæ in Madagascar, *Aschibobuch* dictæ, vel Merdam Balænarum quarundam, *Trompæ* dictarum, esse statuunt.

XIV. *Quia grysea cognominatur hæc ambra, procul dubio & alia datur alterius coloris?*

Datur utique & fulvum quoddam genus sive Citrinum, quod nihil aliud est quam *Succinum*; & à nonnullis etiam Sperma Ceti, falsò sic dictum, pinguedinis quoddam genus mari supernatans, (quæ unde oriatur nondum certò constat) eo nomine insignitur. Sola verò grysea id nominis præcipuè meretur, & in frustis sæpe grandioribus ex mari colligitur; quale quidem ante annos octo (nempe anno 1691) ex Indiis Amstelodamum allatum esse quadraginta duarum librarum, ex indubio Dn. Domsdorff Amstelodamensium Pharmacopœi indicio, narrat laudatissimus antè Dn. D. Lochnerus l. c.

XV. *Num & alia dantur hujus generis fossilia?*

Dantur utique, & nominatim Carbones
F f 4 fossi-

fossiles per Angliam passim, lignorum loco, usitatissimi, qui nihil aliud sunt, quàm lapides copiosis halitibus sulphureis prægnantes, ideoque alendis ignibus aptissimi, sed atris suis fuliginibus pulmonibus hominum, & vitæ ipsi denique, infesti.

CAP. IV.

De

Lapidibus & Saxis.

I. *Quid lapidis nomine veniat, omnibus notum est; quænam verò sunt præcipua & communia lapidum adtributa?*

ESt ante omnia durities, dein ductilitatis omnimoda carentia, porrò solubilitatis in aqua, liquabilitatis in igne omnimodus defectus; quibus affectionibus ab aliis fossilium generibus distinguitur; à Salibus, quòd hæc in humore solvantur; à concretis sulphureis, quòd hæc ab igne liquecant; à metallis, quòd præter liquabilitatem etiam duci, & malleo extendi, se patiantur; ab oleosis denique & similibus, quòd notabili hæc firmitate duritieque careant.

II. *Quænam est communis Lapidum distinctio?*

Distinguuntur communiter in vulgares & pretiosos, quos posteriores gemmas appellant. Utrumque genus varias sub se continet species; Vulgares e. g. factitios, ut sunt lateres & testæ, & nativos, ut sunt, marmor, saxa arenosa, cæmen-

cæmenta &c. Pretiosi verò gemmas, vel pellucidas, ut sunt adamas & crySTALLUS, vel coloratas, ut sapphirus, smaragdus, carbunculus &c. de quibus postea plura.

III. *Quænam igitur est materia, & quæ forma lapidum?*

Ut alias sententias præteream, hæc de materia lapidum videtur esse verosimillima, quòd sit succus aliquis per terræ poros percolatus particulis terrestribus vel subtilioribus vel crassioribus imprægnatus, pededentim exiccandus & indurandus: Forma verò consistit in illarum particularum terrestrium cohæsione, per lentam humoris exiccationem vel expressionem, & viscidarum sive glutinosarum humoris reliquiarum inter se & cum pulvisculis illis terrestribus implicationem; quam aëris ponderosi circumpressio, & pulvisculorum illorum planæ facièculæ plures aut pauciores, magis aut minus politæ, magis etiam minusque promovent.

IV. *Sic igitur formam lapidis explicare non adeò difficile erit, uti Scaliger existimavit?*

Rectè judicas: nec alia causa fuit creditæ ipsi tantæ difficultatis ac tantum non impossibilitatis, ut ne nominari quidem eam posse crediderit, quàm quod illam, & formam aliam quamlibet, substantiam aliquam à materia diversam esse debere persuasus fuerit; quam tamen neque corpoream esse cum aliqua veri specie dicere,

multò minus spirituales afferere poterat : id quod vel artefactorum lapidum exemplo nimis manifestum est. Quid enim necessum est ad illorum formam demonstrandam fingere substantiam aliquam, cum materiam eorum esse lutum vel argillam aquâ maceratam, & arenâ vel scobe ligneâ &c. mixtam, formam autem seu firmitatem ac duritiem, ab exsiccatione primùm lenta, deinde gradatim validiore per ignis flammæque vim procuratâ, dependere, sit evidentissimum? Nec ignotum est, nativos etiam in animalium corporibus lapides, ex mera collectione & conglutinatione sabuli subtilioris, vehiculiq; circumpressione & calore gigni: ut aliorum extra corpora animalium, intra vel extra terram factam generationem, non nisi simili pulvisculorum saxeorum à vehiculo fluido in certum aliquem locum congestorum ejusdem fluidi uliginis quadam conglutinatorum, ab aëris circumpressione validâ magis magisque compressorum, interimque à calore ambiente paulatim exsiccatorum, &c. expediri, sit manifestum.

V. *Numquid igitur & gemmæ seu pretiosi lapides ex aliquo succo seu fluido induruerunt?*

Nullum est dubium : Idque suadet omnino (1) quarundam gemmarum pelluciditas; cum pellucida quæque alia vel actu adhuc fluant, ut aquæ tam dulces quam salæ & spirituosos liquores omnes, vel quæ actu jam induruerunt, ut vitrum, liquida prius fuisse, experimento constet; ratione

ratione probabili insuper, ex hypothesi de luminis & pelluciditatis natura, facile superaddenda: quòd sc. per fluida ejusmodi levi ambientis frigore subito consistentia, ætheris ultrò citròque, quamdiu liquida molliaque fuerint, meatibus sive poros sibi formet, in subitanea illa particularum antea fluidarum rigefactione, ab occupantibus adhuc æthereis particulis deinceps conservatos: (2) Figurarum in quibusdam, præsertim in crystallo, notabilis regularitas; quæ, (ut e. g. sexangularis figura in crystallo spicatum quasi concrecentibus) si non ex matricis alicujus prius formatæ modulo quasi efformanda, saltem ex particularum sabulosarum invisibilium motu quodam intestino intra fluidum ambiens hariolanda est; eodem modo sc. quo soluti in aqua calente sales diversi, deinceps, post evaporationem aliquam & succedentem liquoris residui frigefactionem, in crystallos certâ & cuique generi propriâ figurâ formatos concrecunt; quorum aliquos singulari curâ nobis descripsit Martinus Lister Anglus è Soc. Reg. recensentibus Collect. Lipsiens. mense Febr. Actorum anni 1684 p. 93. Quibus conferenda sunt observata Dn. Dominici Guilelmini, in Actis iisdem A. 1689 p. 235. (3) denique inclusa gemmis pellucidis præsertim heterogenea, prout e. g. Boylius testatur se possidere adamantem in quo medio guttula aquea fuisset conclusa ultro citroque fluctuans; & vidisse se lapidem crystallo similem, qui circa filum metallicum & ramosum, quod purum fuisse argentum existimabat, concreverat.

VI. Quid verò de gemmis opacis, eorum variis coloribus & virtutibus medicatis &c. sentiendum est?

Colores quod attinet, illi omnino adventitii censendi sunt, vel à minerali quodam colorato, vel ab exhalatione tingente, quæ nimirum gemmam adhuc liquidam penetrent: unde vi ignis suis coloribus plerumque exuuntur, & ordinariè gemmæ coloribus splendidæ non longè à metallorum aut aliorum mineralium fodinis eruuntur &c. (quæ factitiarum gemmarum exemplis egregiè illustrantur, & pluribus insuper argumentis firmantur ap. Boyleum de gemmis, & ap. Hamel. Phys. part. II. p. m. 492, aliàs pluribus videnda.) Quoad vires medicas gemmarum autem, tametsi multa de iis apertè fabulosa circumferantur, non potest tamen aut debet de iis penitus dubitari, nec opus erit aut stellis fixis cum Chaldæis, aut nescio quibus rationibus seminariis, aut formis specificis, aut spiritui cuidam universi (rebus adeò multò magis obscuris & inexplicabilibus, phænomeno præsentis quod explicare debebant) istos effectûs adscribere, sed succis mineralibus & metallicis fumis lapidibus hisce permixtis, acceptos illos ferre licebit, quando videlicet hosce sub forma tenuis halitûs jugiter iterum emittunt, prout magnetem & electrica corpora similes effluxûs incessanter effundere extra controversiam est.

VII. Quia

VII. *Quia Magnetis modò injecta est mentio ex innumeris lapidum speciebus, hujus quæ sit natura speciatim inquirendum est, ob admirandas ejus virtutes?*


Varias esse lapidum tum vulgarium tum pretiosorum specificas differentias, in vulgus notum est, & horum aliquos magnam metallicarum portionum copiam intra se concludere, vel pondus eorum arguit. Cùm enim marmor album vulgarium lapidum genus ponderosissimum, ad gravitatem aquæ sit ferè ut $2\frac{1}{2}$ ad 1; magnes ut plurimum est aquâ quadruplo gravior, hæmatites quintuplo, lapis calaminaris (cujus ope cuprum in æs vel orichalcum convertitur) magnetis ferè specificum pondus habet, ut & smyris, quo nihil ferè est durius. Cùm igitur horum pondus specificum ex admixtis metallis sit, uti dictum, Magnetem esse lapidem plurimis particulis ferreis prægnantem, vel ex eo arguere licet, quòd in ferrifodinis præcipuè reperiatur: ut σιδηρόλιθος, ein Eisenstein/meritissimo suo dici possit.

VIII. *Sic igitur materia magnetis esset mixtura quedam ex lapide ferroq; mixta; quo pacto verò ex tali materia tam admirabiles proprietates profluere possint, operæ pretium erit inquirere?*

Id verò ex illius specifica dispositione seu forma dependere certum est: quænam verò sit illa

illa forma seu dispositio, ut hariolari quacunque ratione liceat, ipsæ proprietates vel affectiones ejus admirabiles distinctius enarrandæ venient. Et (1) quidem ejus jam antiquitus nota proprietas est, *Attractio*, quam vocant, alius vel magnetis vel ferramenti, h. e. magnetis aut ferramenti penduli, vel supra naviculam aliquam aquæ innatantem librati, ad magnetem vicinum & fixum spontanea quasi accessio & hanc subsequens adhæsiō. (2) ejus *Directio* in septentrionem & ad polos terræ, extra æquatorem quidem cum aliqua inclinatione ad polum viciniorem conjuncta; ita quidem, ut e. g. in nostris his oris polo septentrionali terræ vicinioribus, magnetis alter polus versus septentrionem tantillum deorsum inclinetur, alter verò versus austrum tantundem elevetur; inverso verò modo res habeat in oppositis trans Æquatorem terræ climatibus: (3) denique ejus *Declinatio*, quæ non ubique, sed in uno solum meridiano, inter Angliam Hiberniamque à nautis notato, præcisè in septentrionem dirigitur, in aliis verò versus ortum vel occasum meridianis, ibi in occasum, hîc in ortum eò magis declinat, quantò magis ab illo quasi primo meridiano in ortum vel occasum disceditur; variantibus etiam quotannis hæctenus in unoquoque loco declinationum illarum gradibus: adeò ut e. g. hic & Norimbergæ nunc 6 gradus & ampliùs in occasum declinet acus magnetica, quæ ante paucos annos gradus solum 5 declinare deprehensa est, olim autem 8 gradus in ortum, & antiquioribus adhuc temporibus 13 in eandem plagam deviaverat.

IX. *An ergo Magnetes quoq; & Acūs magnetica suos polos, uti terra nostra, habent, quod superius innuere visus es?*



Habent utique, eosque sibi è diametro oppositos, alterum in septentrionem, alterum in austrum converti solitos, si liberè pendeant, aut suprà naviculam natent. Sed hæc est differentia inter polorum terræ (quæ vastus aliquis quasi magnes est) & inter magnetum acuumque magneticarum directionem. Terræ poli *b* & *a* diriguntur in polos mundi *B* & *A*, (Fig. XVIII. n. i.) h. e. borealem & australem lege constantissimâ; Magnetis autem poli, qui intra terram eundem positum habent, extra eam invertuntur,

tur, ita ut polus a (Fig. XVIII. n. 2.) qui intra terram australem plagam respexerat, extra eam respiciat borealem, & contrà; neque verò ad polos Cœli B & A, sed ad polos terræ b & a convertantur, & quidem cum aliqua inclinatione, uti quæst. antecedente jam dictum est: Agnoscuntur autem illi duo poli in magnetibus ipsis facillimè ex adhærentia scobis ferreæ, quæ in partibus intermediis aut nulla est aut exigua; in acubus verò chalybeis ipsa puncta extrema sunt earum poli, & ordinariè quidem liliū vel




Fig. 15.

sagitta septentrionem respicit, in alia forma lineæ rectæ, transversâ lineolâ in austrum conversâ. Vid. Fig. XV.

X. Quærere hîc diversa lubet; & primum quidem unde nobis innotescat, duo in terra puncta duobus cœli polis immutabiliter respondere?

Cœli polos ipsa stellarum fixarum diurna circumvolutio nobis ostendit, quæ sub Æquatore CB amplissimos describit circulos, in septentrione gradatim angustiores, ita ut stella p polaris inde dicta minutissimum describat 24 horis circellum, cujus adeò centrum B ipse polus borealis est. Quod verò certum terræ punctum b isti polo perpetuò ab omnibus retrò seculis immutabiliter respondeat, ex eo manifestum est, quod stellæ fixæ in eodem horizonte, v. g. nostro, semper

semper in iisdem ejus punctis oriantur & occidant, quod fieri nequaquam posset, si punctum terræ *b* à puncto Cœli *B*, tantillum vel in ortum, vel in occasum, aut quocunque tandem vacillaret.

XI. *Quid est verò, quod terram nullo fulcro firmatum, sed in æthere liberè pendulam, ita circa lineam *BA*, tanquam axem ferreum defixam sustentat?*

Nihil aliud hîc concipere possumus, quàm influxum quendam materialem quidem, sed invisibilem & subtilissimum, qui ex utroque mundi polo recta versus terram & per ejus interiora, viis quidem diversis (ne se mutuò impédiant) ultro citroque fluat, & hoc suo fluxu directo eam in eodem, fixoque positu fervet; non aliter ac canales lignei, in flumen aliquod etiam transversim projecti, ab ipso fluminis, tum ad canalium latera, tum per medias ipsorum cavitates, provoluti directione in eam plagam constantissimè diriguntur, in quam fluminis decursus, à sinuoso litorum tractu per ambages determinatur. Ubi hoc insuper supponendum venit (nam in hoc negotio vel maximè ex hypothefibus agendum est) utrumque hunc influxum, ex oppositis Cœli gyris aut vorticibus in hunc nostrum intermedium expulsum & quasi explosum, particularum suarum dissimilitudinem potius aliquam, quàm similitudinem omnimodam arguere; ob quam fiat, ut in laxioribus terræ poris utrique quidem admittantur ac

G g

sibi

sibi mutuò cedant, in angustioribus autem lapidum magneticorum poris, alias vias influxus Borealis ab ipso mundi initio sibi formaverit, suarum particularum figuræ peculiari sic accomodaverit, ut neuter in alterius poros subintrare aut penetrare valeat: id quod ita generatim, (prout sc. generalia phænomena postulant) supposuisse sufficiet, etiamsi diversitatem illam figuræ in utrisque particulis præcisè determinare cum Cartesio non ausimus.

XII. *Annon autem hi duo adversi sibi invicem influxus magnetici, in occurso suo prope vel intra terram se mutuo sistent ac impediunt?*

Possunt equidem in aëre patulo sibi mutuò obstare & impedimento esse, ut e. g. borealis à B per *b* & *a* elapsus ab occurrente A a retroPELLATUR, & cum directè retrogredi propter insequentes ex B continuè novas quasi undas non valeat, per ambages circa terram ab *a* ad *b* difleat, ibique pristinos poros denuò ingreditur: Quemadmodum vicissim, ubi influxus A *a* intra terram ad *b* usque penetraverit, ibi à boreali B *b* repulsus per ambages similes à *b* ad *a* circumfleat & per aptatos sibi dudum poros denuò ingreditur.

XIII. *Annon hæc πλασματώδες nimis, si ve fictitium videbitur?*

Possset fortasse tale videri, nisi natura ipsa reali quodam exemplo prolusisset. Constat enim

enim manifestò experimento, si magnes aliquis intra spissioris




chartæ foramen, ejus figuræ studiò aptatum, ita locetur, ut ejus dimidium superius supra chartam emineat, inferius autem infra eandem deliteat, polis utrisque B & A (Fig. XVII.) interim in ipso chartæ quasi horizonte jacentibus; mox autem scobs ferrea circa magnetem undique dispersa, à desuper concutiente chartam digito, aliquantulum agitetur: hæc ipsa ultrò in ejusmodi flexûs laterales à polis undique disposita cernitur, ut manifestum sit materiæ magneticæ fluxum à B per A ita rectà transmitti, ut in exitu prope A flexu factò & sinistrorsum & dextrorsum &c. versus B recurrat, ibique simili circumcirca flexu per polum B iterum subingredi necessariò judicetur.

XIV. *Positâ igitur nunc tali Circulatione utriusq; influxus magnetici, quid inde porrò consequetur?*

Primò id consequitur: Magnetem, qui intra terram situm b a (Fig. 18. n. 2.) habuerat, ut nimirum polus ejus b corresponderet polo terræ septentrionali, & alter a polo austruli A, extra terram in aërem liberum delatum, illum suum positum inversum habiturum esse; quia borealis influxus

Gg 2

BA



B A post egres-
sum ex A, vi
hypotheseos, in
contraria fle-
ctitur, adeo-
que, cum per
polum magne-
tis *a* subingre-
di non valeat,
pendulum ma-
gnetem neces-
sariò invertat,
ut polus *b* ad-
fuetos in terra

poros sibi obvertat. *Secundò* manifestissima hinc
habetur ratio, cur magnes in aëre libratus sub
æquatore terræ, suis polis *a* & *b* ad polos terræ
B & A neutrumque inclinaret; trans æquatorem au-
tem in locis utrique terræ polo propioribus ad
hos ipsos terræ polos B A inclinaret: Siquidem
circumflexio influxûs magnetici utrobique id
evidenter postulat. *Tertiò* Directio magnetis
ad polos terræ potius quàm ad polos cœli hinc
clarissimè dispalescit; quia ex istis influxus
magneticus dirigens in magnetem immediatè,
ex cœli polis mediatè tantum profluit.

XV. At enim verò, non tendit hæc directio ubiq; terrarum præcisè ad illos terræ polos, sed ab istis variè declinat in diversis locis, & in eodem loco diversis temporibus; unde hæc igitur declinatio?

Hæc variatio novissimis demum temporibus animadversa Cartesio visa est à vicinia ferri-fodinarum provenire; quemadmodum certè experientia docet, magnetem & acûs magneticas à consueta sua declinante etiam directione per ferramenta propiùs posita ulteriùs etiam deflecti: ut necessum sit in usu magnetis, omne ferrum ex vicinia sollicitè amovere, nisi decipi & in errorem induci velimus. Sed huic opinioni Cartesii obstare videtur aliqua in ista variatione regularitas; cùm e. g. in eodem loco, ubi magnes olim Schoneri ævo 13 gradus in ortum declinaverat, progressu temporis ad octavum tantum gradum in orientem processisse, novissimis autem his nostris temporibus ipsam lineam Meridianam supergressus, in occasum magis magisque declinare deprehenditur, singulis ferè annis uno gradu ampliùs.

XVI. Quam igitur aliam causam mirabili huic magneticæ directionis varietati assignabimus?

Certi quiddam circa novum hunc & antehac ignotum effectum polliceri nondum habemus. Ex collecta tamen undique hujus variationis historia, Vir ingeniosissimus Edmundus

Halley Anglus collegit, utrumque influxum magneticum è coelis per tractûs terræ polares ordinarios B & A ingressum & progressum in exitu suo non per eosdem tractûs præcisè boreales & australes effundi, sed in binos quasi ramos divisum ad tractûs duos vero polo vicinos deviare; nempe polum magneticum primum *Borealem Europæum* sub meridiano quodam Anglicano, non nisi 7 grad. à polo terræ Arctico, secundum *Borealem Americanum* sub California mediæ meridiano, ab eodem arctico 15 grad. remotum; Tertium *Americanum australem*, à polo Antartico 16 gr. distantem sub meridiano 20 ferè grad. à freto Magellanico occasum versus statuendo; & quartum denique *Australem Asiaticum*, à polo Antartico sub insulæ Celebes & novæ Hollandiæ meridiano gradûs circiter 20 ponendo; ita sc. phænomenis omnibus hujus variationis abunde, uti credit, satisfacturus. Scilicet, uti flumina ab obstaculis alveorum suorum variè deflectuntur; ita mutui occursum influxuum magneticorum se mutuò quoque ad latera deflectere possunt, ut in duos ramos uterque divisi ad latera exitum quærant: Et, sicut illæ semel coeptæ fluminum deflexiones, quotannis ob variantem fluctuum allisionem; ita hîc etiam gradatim influxuum magneticorum exitus alio alioque terræ loco contingere acûsque adeò magneticas ad se diversimodè convertere potest.

XVII. *Quid porrò nunc de Attractiva,
quam vocamus, virtute dicendum
erit ?*

Illam veram & propriè dictam attractionem non esse (quos enim funiculos & quæ ligamenta fingemus, quibus mediantibus aut magnes fer- rum, aut ferrum magnetem ad se trahere con- cipiatur, ipsum præsertim trahens immotum subsistens) sed pulsionem potius aut compulsio- nem externi aëris, sequenti modo concipien- dam: Duo magnetes A & B (Fig. XIX. num. 1.)

numer 1.





Fig. 19.



num. 2.

quamdiu nota- biliter, alter ex- tra alterius sphæ- ram, constituti sunt, neuter ad alterum accedit; ubi verò ad invi- cem propius ad- moti in unam sphæram aut vorticem coale- scunt (uti num. 2.) mutuò transmissa ab uno ad alterum affluvia aërem intermedium dispel- lunt, ejusque elaterium debilitant: quo facto externus ad D & E, integro adhuc elaterio u- trumque magnetem A & B ad invicem protru- dunt, si utrique librati fuerint, aut unum sal- tem ad alterum, si alter fixus & immotus deti- neatur.

XVIII. *Memini hanc circumpulsionem jam alibi evidenti quodam experimento illustratam fuisse.*

Rectè meministi : Superiori enim Cap. III. quæst. XII. de virtute electrica diversorum corporum agentes experimento quodam docuimus, quod halitus è corporibus istis, probè prius adfricando calefactis, emissi versus vicina corporacula leviora, aërem intermedium dispellant ejusque adeò vim elasticam debilitent ; quo facto aëris circumstantis integrum adhuc elaterium res illas leviculas ad locum aëris debilitati, atque adeò ad corpus electricum compellant. Quæ ratio ad magnetica effluvia, etiam citra præcedentem adfrictionem copiosè inter magnetem & corpus quasi adtrahendum ultrò citroque fluentia, facillimè accommodari potest.

XIX. *Quid vulgò hic docere soliti sunt hætenus?*

Alii ad formam magnetis substantialem confugerunt, quam tamen in quo consistat, & modum quo enarrata producat & conficiat, edocere nullo modo potuerunt : alii ad similitudinem quandam naturæ inter ferrum & magnetem, aut consensum quandam inter hæc, aut inter polos terræ coelique ; quæ tamen vel similitudo vel qui consensus, in quo consistat, & quo modo hunc & illum effectum causetur, evidentiùs exponendum fuisset : alii porrò vitæ quiddam analogum in magnete agnoscendum putâ-

putârunt; cujus tamen rationem & operandi modum explicare debuissent: alii denique sub variis verticitatis, χαλυβοδείξεως, virtutis attractivæ, directivæ &c. nominibus occultari gaudebant, nihil adeò rei, quam nominabant, declarare satagentes: eo ritu sc. quo ad lapidum generationem explicandam nonnulli *spiritum lapidificum* nescio quem accersunt & ad generationem metallorum *principium plasticum* nescio quod; nihil adeò rei veritati adversantes, rei verò interim veritatem parum etiam demonstrantes.

XX. Quid ergo speciosius & magis reale circa has generationes dici potest?

Per principium illud plasticum 1.) præcipuè intelligere possumus *ignem* sive *calorem subterraneum*, quem multum in terræ visceribus absconditum esse experientia testatur. Hic verò effectum talem producere non valet nisi pluribus præsuppositis, quæ ex hypothese Renati des Cartes omnium, credo simplicissima, sunt sequentia: Quòd nimirum 2.) Massæ metallicæ variorum generum in interiorè quasi nucleo, ad quem omnis denegatus est hominibus accessus, ingenti copiâ ex primæva creatione repositæ delitecant; 3.) Ibidem etiam succi quidam acres & salini reperiantur, qui instar aquarum fortium subinde particulas quasdam exiles abra-
dant quasi & separent ab illis massis; quæ postea 4.) particulis mercurialibus & oleagineis, in illa terræ profunditate pariter ob fluiditatem suam

obviis, involutæ, à Calore subterraneo unâ cum implicitis etiam multis terrestribus minutiis, per hiantes ubique terræ rimulas, ad superiora terræ, sub forma halitûs alicujus sensim altius altiusque evehantur; deinceps autem s.) dum vis caloris paulatim imminuitur, & partes oleagineæ mercurialesque ab imminuto jam calore longiùs adhuc protruduntur, proprio pondere inter se & cum crassioribus ac ponderosioribus in istis rimis ac meatibus terræ, quos Venas idèò metallicas appellamus, coalescunt, & glebas sive mineras metallicas constituunt.

XXI. *Num fortè ex hac hypothesi Cartesiana aliquid lucis antiquioribus hypotheseis obscurioribus affundi potest?*

Aliquid equidem lucis illæ ex hac mutuari posse videntur. Aristoteles enim exhalationes quasdam subterraneas à calore suscitatas, ut metallorum generandorum materiam concepit, quæ postmodum à frigore superioris terræ concrecant. Chymici verò ad generationem metallorum sua principia hypostatica, Sal, Sulphur & Mercurium, ut materiam quidem requirunt; quæ in recentiore quidem Cartesii hypothese omnia requiruntur, tametsi non ut materia, sed potiùs ut causæ adjuvantes; salia sc. tanquam causæ rodentes & separantes minutias metallicas, olea sive sulphur & particulæ mercuriales, ut vehicula: calor subterraneus ut causa illas in sublime subvehens, & frigus tandem sive decrementum caloris, ut causa particulas illas metallicas

tallicas colligens & in glebas concrefcere faciens.

**XXII. *An huic hypothefi fpecies aliqua
feu probabilitas aliunde conciliari
potef?***

Haut exigua quidem ex analogia meteororum aqueorum in aëre gigni folitorum. Horum caufa efficiens principalis eft 1.) Calor tum Solaris, tum fubterraneus, etiam in hyeme media vapores ex oceanis & aquofis terris in fublimia attollens vel expellens: 2.) Cùm tamen & particulas terreftrès copiofas in aërem fublimem unà attolli copiofus ille limus, qui cum pluviiis delabatur & in vafis mundis excipitur, abundè testatur, hoc fieri mediantibus particulis aqueis flexilibus & pulvifculos terreos implicantibus ac circumplectentibus. Qui tamen 3.) in altiore & paulatim frigidiorè aëre, ab aquofis, ad ulteriorem expulfionem aptioribus, deferti collectiones illas terreo-falinas, fulphureas &c. componunt, ex quibus meteora, quæ vocamus, ignita gignuntur, aquofioribus interim in nubes, nebulas, nives, pruinas &c. crefcentibus &c. quorum applicatio ad fuperiora non erit difficilis.

XXIII. *Sed nimis magna videtur illa maffarum metallicarum profunditas, ex qua ponderofè illi halitûs metallici ad cruftam terræ fuperiorem elevari deberent.*

Verum equidem eft, vapores cum implicatis

tis particulis salinis sulphureis &c. vix ad unum alterumque milliare in aërem attolli; cùm ingens contrà profunditas massarum metallicarum primævarum supponenda videatur. Sed facilis est responsio: non opus esse, ut immediatè statim ab imis quasi fontibus, ad summam terræ crustam eleventur halitûs illi metallici, sed fieri id gradatim posse, ut aliquousque sublatis & concreti, ibi temporis progressu à similibus succis salinis denuò arrosi, à calore subterraneo etiam ibi præfente, mediantibus halitibus mercurialibus ad altiora loca, & ab his ulterius ad sublimiora gradatim ac temporum lapsu ad supremam terræ superficiem evehantur. Verbo: Hypothesis hæc est, quæ, si dabitur melior imposterum & comprehensibilior cum ea se permutari facillimè patietur.

C A P. V.

De

**Maribus, Fluminibus, ac Fontibus,
eorumque præcipuis affectionibus.**

I. *Cùm ex fontibus oriantur flumina, & hæc in maria decurrant, illorum origo meritò ante omnia inquirenda erit?*

Ita est; & in hac quæstione ritè & sufficienter solvenda præcipuè attendendum erit ad hæc duo: quòd (1) plerorumque fluminum fluxus perpetuus sit, nocte dieq; continuans; (2) tam innu-

innumerabilis fluminum multitudo & quorundam, imò plurimorum, magnitudo, ut impossibile videatur aut immensam illam aquarum copiam aliunde quàm ex ipsis maribus & oceanis originaliter provenire, aut maria & Oceanos non exundare à tanta ingentium fluminum nocte dieque in hos exoneratorum multitudine, nisi flumina ex maribus vicissim, mediantibus fontibus promanarent. Quod uti prudenter animadvertit Salomo in Ecclesiaste suo Cap. I. v. 7. *Omnia flumina, inquit, intrant in mare, & mare non redundat; ad locum unde exeunt flumina, revertuntur, ut iterum fluant; ita de modo solum huius circulationis disceptatio est inter Naturæ scrutatores.*

II. *Quænam igitur fuerunt hædenus opiniones de modo fontium ex mari prodeuntium, ac deinceps flumina, quæ in maria effunduntur, constituentium?*

Aristoteles olim ex aëris vaporosi in cavernis montium concretionem ac destillationem fontes oriri credidit, Lib. I. Meteor. cap. XIII. *Cartesius* nullo aut exiguo discrimine ex aquarum subterranearum evaporatione eos derivavit, Princip. Phil. Part. IV. num. LXIV. & seqq. Consentiente etiam *Job. Claubergio* Disp. Phys. XXXIV. *Isaacus Vossius* ab aquis pluvialibus & liquescentibus nivibus cum antiquis quibusdam (de quibus *Aristot.* videri potest alleg. loc. & *Seneca* Lib. III. Nat. quæst. capp. 10. primis, videri possunt)

possunt) eos deduxit, Lib. de Nili & aliorum fluminum Orig. *Athanas. Kircherus* de Mundo Subterraneo Lib. V. Cap. II. ab ipsis aquis marinis per terræ rimas ad montium quoque vertices, interventu præsertim cujusdam pressiois à fluxu & refluxu marium perpetuò dependentis, ad fontium labra sublati, eos scaturire existimavit &c.

III. *Quid sentiendum videtur de variis his variorum Autorum opinionibus?*

Equidem aërem vaporosum, aut ipsos vapores, per montium cavernas à calore subterraneo sublato posse ad cavernarum parietes frigidiores coalescere & in guttulas concreescere, quæ postea destillando confluentes, possint exigua rivulorum filamina constituere, & plures ejusmodi parvuli fluores concursu suo rivulum exiguum, horumque porrò plures collecti fonticulum alicubi per terræ fissuram erumpentem componere, ad mentem sc. Aristotelis & Cartesii, vel solæ Destillationes Chymicæ abunde docent. Verum hæ ipsæ quoque satis ostendunt, nimis tardam esse hanc stillatitiam aquarum collectionem, innumerabilibus licet terræ cavernis factam, quàm ut perpetuo nocte dieque fluxui fontium queat sufficere. Neque marinarum aquarum, sub antra montium, à maribus sæpe remotissimorum, sese insinuantium & alternis marium incrementis aliquousque sublevatarum hypothesis rem hanc videtur conficere; maximè propter insuperabilem hanc difficultatem, quod aquæ

aquæ marinæ falsedinem suam, tametsi per terræ poros multo artificio colatæ, nunquam ita deponant, ut potabiles evadant & fontanarum dulcedinem acquirant.

IV. *Sic igitur antiquorum à Vossio revocata hypothesis ceteris palmam præripiet?*

Sic omnino videtur. In hac enim (1) sufficiens vaporum copia non ex Oceanis tantum longè lateque patentissimis, sed ex fluminibus quoque, amnibus & rivis, nec non ex terris passim udosis, nocte dieque sublevata, ingentem vim nubium, nebularum, pluviarum, nivium procreat, quæ in terras & montium declivia relapsæ per terræ poros aut statim, magnam saltem partem, sese insinuant, aut sub nivis forma lentè solutæ successivè absorbentur, & ad solidius & argillosum solum delapsæ, per hujus declivia tandem prolabuntur, & qua patet elabendi via, fontem constituunt, tamdiu scaturientem, quamdiu materia lentè soluta, aut receptaculum aquarum amplius novas undas suppeditaverit; ubi verò hic promus-condus defecerit (in ficcitate v. g. diuturna) fluere prorsus desinentem. (2) Verò in hac sola hypothesis ratio habetur evidens dulcedinis aquarum fontanarum: quia sc. in aquarum marinarum evaporatione portiones dulces tantum in sublimem aërem expelluntur, salæ verò crassiores & ponderosiores altius elevari se haut patiuntur.

V. *Hac*

V. *Hac occasione haut incongruè tangetur illa controversia: Utrum salinae portiones aquis marinis concretae fuerint, an ha primitus dulces falsedinem progressu demum temporis acquisiverint?*

Aristoteles equidem maris falsedinem, vel ab adustis terræ fumis cum aqua pluviali in Oceanum delapsis, vel à Solis ardore marinas aquas nimium excoquente falsedinem illam accersere conatus est, II. Meteor. cap. III. nullâ tamen veri specie; quandoquidem aquæ pluviales unâ cum adustis illis ex hypothesi fumis, in lacus quoque & flumina delabuntur, nec ea tamen falsedine imbuunt, ne ipsæ quidem aliqua imbutæ; & idem ardor solis, quia marium superficiem, etiam lacuum fluminumque summas aquas adurunt, nulla tamen in his falsedine subsequente; id quod Viri Doctissimi, *Varenius, Gassendus, Hamelius* pridem animadverterunt. Credibilior videri possit *Gassendi* aliorumque opinio, quæ mari primitus dulci, è solutis successivè salium mineris subterraneis accersit: Omnium verò credibilissima, quæ falsedinem maribus congenitam esse existimat.

VI. *Velim etiam de thermis sive fontibus calidis, aliisque medicatis pauca mihi dicas.*

Quod scaturigines calidas attinet, earum ingentem numerum *Athanas. Kircherus* Lib. V. M. S.

M. S. Sect. III. enarrat vel per solam Europam; & plurimas per solam Germaniam nostram reperiundas p. 262 & seq. Quoad alios fontes medicatos autem nominatim *Acidulas*, tum eo ipso loco, tum Sect. II. antec. fusè agitur. Et vim thermarum aliarumque aquarum medicam Cap. II. Sect. III. p. 270. pulchrè deducit Vir laudatus, à mineris subterraneis, salinis, sulphureis, bituminosis, metallicis, nitrosis, aluminosis, vitriolicis &c. quarum particulas quasdam solutas & abrasas præterfluentes fontium aquæ imbibant. Thermarum autem fervidissimum sæpe calorem flammarum subterranearum, juxta canales aquiferos alicubi, aut infra illos (propius vel remotius,) ardentium, vaporibus, cap. VI. Sect. II. adscribit, eodem modo per terræ poros angustiores ad canales istos hydrogogos penetrantibus, quo ignis culinarii halitûs tenues per ollarum ac lebetum poros aquas in his contentas validissimè calefaciunt. Neque tamen penitus negaverim, ex admixtis diversorum corporum halitibus vel etiam portionibus aquas alicubi posse effervesce, cujus evidens exemplum calx viva frigidis aquis infusa præbet. Cæterum de aquarum nitrosarum, aluminosarum, atramentosarum &c. virtutibus medicamentosis specialibus historia succincta videri potest apud Hamelium Lib. I. de Meteoris cap. II. edit. Paris. p. 19. sequ.

**VII. Jam ad palmarium aquarum marinarum
Phænomenon, Affluxum & Refluxum, delati,
hujus compendiosam historiam nobis
enarrari cupimus.**

Illa quidem brevissimis in sequentibus consistit: I. in locis maritimis ipsemet Oceanus, & in vicinis adflumina in ipsum effundi solita, hæc ipsa singulis 24 præterpropter horis bis exundant in litoribus planis, & in terras latius sese insinuant, intra alveos altiores autem assurgunt & intumescunt, (id quod *Affluxum*, die *Flut* appellamus;) ac bis iterum retrocedunt terrasque inundatas deferunt, aut subsidunt ac detumescunt, (id quod *Refluxum*, die *Ebbe* nuncupare solemus.

**VIII. Quibus autem diei horis contingunt
hæc phænomena?**

Non iisdem ~~per~~ singulis, sed (1) diversis eodem loco, & (2) aliis aliisque etiam in diversis locis, sed hac tamen notabili circumstantiâ in casu priore, quod cum uno die in certo quodam loco coepit affluxus vel aquarum incrementum horâ v. g. sextâ antemeridianâ, & post 6 circiter horas initium capit refluxus, iteratisque vice alterâ post intervalla ferè eadem utrisque, postero die novus affluxus contingat 4^{ta}tis unius horæ tardiùs, eodemque modo insequens refluxus 4^{ta}tis tardiùs quam pridianus &c. & hac pariter notabili circumstantiâ in casu posteriore,

teriore, quòd priùs incipiat tum affluxus tum refluxus in litoribus orientalioribus, quàm in occidentalioribus.

IX. *Numquid fortè ex his circumstantiis colligi potest, quod ad phaenomenorum causas investigandas conducat?*

Illud cum primis colligi omni-jure videtur, quòd, cùm non solùm oriente Lunâ in aliquo horizonte maritimo incipiat maris affluxus, ac deinceps incrementa gradatim majora capiat, quantò propiùs illa ad meridianum attollitur; deinceps autem cùm hæc à meridiano versus occasum declinare incipit, aquarum tumor unà remittere & à litoribus versus maria refruere exorditur; maximè verò ex eo, quòd, sicut Luna singulis diebus $\frac{4}{5}$ horæ partibus tardiùs oritur, initia affluxuum & refluxuum eodem intervallo $\frac{4}{5}$ tarum tardiùs continguntur: ex hisce inquam circumstantiis speciosissimè concludi credimus: Lunam esse causam aliquam effectuum horum mirabilium, & fortè præcipuam; tametsi, quo modo hos producat, nondum ita sit obvium.

X. *Quenam verò porro sunt circumstantiæ ad præsentis rei historiam pertinentes?*

Illa II. communiter commemoratur, quòd affluxuum incrementa singulis mensibus majora sint circa novilunia & plenilunia, quàm circa quadraturas; & quòd III. nunquam anno toto

majora sint ; quàm cùm Luna nova fit aut plena in Æquatore vel prope ipsum ; h. e. in noviluniis & pleniluniis medio circiter Martio & Septembri contingentibus. Quæ motuum Oceani cum motu quoq; ☽ menstruo annuoq; connexio, si experimentis pluribus (qualia in locis maritimis accuratè ac circumspèctè institui exoptamus) confirmata fuerit ; à fortiori concluditur : Lunam hujus effectûs causam potiore esse agnoscendam.

XI. *Queritur ergo nunc, quo modo ☽ hos effectûs producat ?*

Cùm in Luna considerari mereantur, (1) ejus Lumen quod à Sole habet ; (2) ejus magnitudo, quæ diametri ratione præterpropter subquadrupla est diametri terræ , adeoque 400 circiter mill. germ. ratione superficiei subsedecupla ferè superficiei terræ ; ratione corporis denique plus quàm subquadragecupla globi terreni ; (3) Motus ejus aut diurnus ab ortu in occasum 2½ ferme horarum , aut menstruus 29 dierum cum dimidio circiter ; (4) Vicinia ejus respectu telluris absolutè quidem exigua , cùm quinquagies millenis miliaribus germanicis à terra remota judicetur , aliarum tamen stellarum intuitu satis notabilis &c.

XII. *Anne igitur à lumine Lunæ hi effectûs in Oceanis nostris deducendi videntur ?*


Ita quidem credidit *Atbanasius Kircherus*, persuadens sibi , uti marinæ aquæ nostræ multâ
false-

falsedine imbutæ sunt, sic aquas Lunares, quas supponit, alius generis particulis salinis scatere, quæ cum radiis Solis ex illis Oceanis versus nostros reflexis unà defluentes & cum horum falsedine commixtæ, hujusmodi ebullitionem in aquis causentur, qualis in chemicorum officinis ex commixtione diversi generis salium, frequenter oboriri deprehenditur. Vid. Mund. Subterr. Vol. I. Lib. III. Sect. II. Cap. II.

XIII. *Qui verò, hac hypothese stante, æquè sensibilis aquarum marinarum emotio continget in luna nova (cùm facies D nobis obversa lumine maximè destituitur) ac in plena, cùm totâ illa facie refulget?*

Quærit huic difficultati remedium Kircherus c. l. ex eo, quòd in Novilunio mare concitetur lumine Solis sed effluviis Lunaribus, in ejus atmosphæra diffusis tincto; in plenilunio verò lumine suo iisdem effluviis copiosè imbuto; ideoque tribus ante ac totidem post novilunia ac plenilunia diebus fluxus & refluxus marium esse notabiliores, circa quadraturas autem valdè exiguos. Sed enim, positis his & concessis maxima restat adhuc difficultas, quo pacto IVtæ, ac notabiliori hujus historiæ circumstantiæ satisfiat: quòd nimirum affluxûs & refluxûs marium infra & suprâ terram in locis oppositis semper unà contingant?

XIV. *Quenam igitur alia hypothesis huic circumstantiæ melius satisfaciet?*



Vix alia reperietur, Cartesianâ speciosior & ingeniosior, & Part. IV. Princip. num. XLIX & seqq. proposita: in sequentibus præcipuè consistens: (1) E F G H (Fig. XX.) est terra 1, 2, 3, 4 autem superficies maris, à quo majoris perspicuitatis ergo totam terram ambiri cingique supponitur, 5, 6, 7, 8 denique aër supra maria protensus. (2) Concipitur circa totum hoc systema elementare circumfusus vortex æthereus exiguus, qui Lunam circa terram menstruo motu circumvehat, ac terram ipsam una circa suum centrum convolvat: Quod si ergo (3) nulla in hoc vortice Luna esset, punctum T, quod est centrum terræ, foret in puncto M, quod est vorticis centrum; Sed Lunâ L existente versus B, hoc

hoc centrum T debet esse inter M & D : quia, nisi punctum T aliquantò magis distaret à B quàm à D, Lunæ præsentia impediret, ne materia cœlestis tam liberè fluere posset inter B & T, quàm inter T ac D : cumque locus terræ in isto vortice non terminetur, nisi ab æqualitate virium materiæ cœlestis eam circumfluentis; evidens est, ipsam idcirco nonnihil accedere debere versus D : atque eodem modo, cùm D erit in C, terræ centrum esse debebit inter M & A; sicq; semper terra nonnihil à Luna recedet &c.

XV. Admissâ igitur hac hypothesi, quomodo superius enarrata circumstantiæ & phenomena exinde consequuntur?

Quoniam hoc pacto, ex eo, quòd Luna sit versus B, non modo spatium per quod materia cœlestis fluit inter B & T, seu potiùs inter L & F sed etiam illud, per quod fluit inter T & D, vel potiùs inter D & H redditur angustius; inde sequitur, istam materiam cœlestem utrobique celerius fluere, atque ideo magis premere, tum superficiem aëris inter 6 & 8, tum superficiem aquæ in 2 & 4, quam si Luna non esset in vorticis diametro B D; cumque corpora aëris & aquæ sint fluida, & facilè pressioni isti obsequantur, ipsa minus alta esse debere supra partes terræ F & H, quàm si Luna esset extra hanc diametrum B D; econtrà verò esse altiora versus G & E, nempe littoribus à D perpendiculo remotioribus : quo pacto saltem quarta circumstantia, cur sc. in oppositis terræ locis incre-

H h 4 menta

menta hæc aquarum in litoribus maxima simul contingant, rationem suam haberet satis speciosam.

XVI. *Quomodo verò diurnis affluxuum & refluxuum vicissitudinibus ex hac hypothese satisfieri potest?*

Quia pars terræ, quæ nunc est in F, è regione puncti B vel L ubi mare (sub Dnæ sc. perpendicularo) est quàm minimè altum, post sex horas erit in G, è regione puncti C, ubi mare est altissimum, & post sex alias horas in H, è regione puncti D, atque ita consequenter: Vel potius (quia Luna etiam interim nonnihil progreditur à B versus C, utpote quæ mensis spatio circum A B C D percurrit;) pars terræ quæ nunc est in F, è regione corporis Lunæ, post 6 horas cum 12 minutis præterpropter, erit ultra punctum G, in ea diametro vorticis A B C D, quæ illam ejusdem vorticis diametrum, in quo tunc Luna erit, ad angulos rectos interfecat; tuncque aqua erit ibi altissima (in medio sc. mari, consequenter; à litoribus eò relapsa;) & post sex alias horas cum duodecim minutis erit ultra punctum H, in loco ubi aqua erit (in mari medio puta) quàm minimè alta &c. Unde clarè intelligitur, aquam maris, singulis duodecim horis cum 24 minutis, in uno & eodem loco fluere ac refruere debere.

XVII. *Sed*

XVII. *Sed cur in Noviluniis & pleniluniis æstus maris sunt majores, quàm intermediis temporibus?*

Notandum est, hunc vorticem A B C D non esse accuratè rotundum, sed eam ejus diametrum, in qua Luna versatur, cùm est nova vel plena, breviorē esse, illā quæ ipsam secatur ad angulos rectos, uti superiùs est suppositum; unde sequitur, fluxûs & refluxûs maris debere esse majores, cùm Luna nova est vel plena, quàm in temporibus intermediis.

XVIII. *At enim verò hanc partem hypotheseos illa maximè difficultas urget, quòd luna (testibus Ephemeridibus) in noviluniis & pleniluniis non semper sit perigæa?*

Hoc equidem cum multis aliis objicit Hamelius pag. 432. edit. Norimbergensis, huic hypothesei Cartesianæ, qui paucis antè lineis inspicari se non posse, fatetur, nihil ferè ingeniosius excogitari potuisse; sed addit statim: Verùm huic difficultati nuper satisfactum fuit, ab ingenioso & pererudito juvene: Qui quis fuerit, & quomodo satisfecerit, utinam adjectum fuisset à Viro laudatissimo. Subjungit equidem id, quod dudum suspicatus fui, non omnino constare, quòd maximi æstûs semper & præcisè contingant in pleniluniis ac noviluniis: sed tertio die à novilunio, & decimo octavo die Lunæ maximos istos æstûs plerumque accidere, additque hæc accuratiores & varias postulare observationes.

XIX. *Annon suppleri posset aliunde, quo tollatur è medio hoc dubium?*

Illud dici omnino posse videtur pro defendenda Cartesiana hypothefi, necquicquam obftante allato dubio: Nunquam dixiffe Cartefium, maximos fluxûs & refluxûs fieri tunc, cum Luna eft in perigeo, fed cum ea eft in breviorẽ fuæ ellipseos diametro. Nempe in ſpatio BT brevioris Diametri materia ætherea utique compreffior fluit, quàm in ſpatio CT longioris diametri, ſi maximè Luna nulla in hoc cœlo eſſet. Quod ſi verò Lunæ corpus nunc in illo nunc in hoc poſitum concipiatur, ſive propius à terra, ſive remotius, utrobique illud æquale ſpatium occupat & æquale impedimentum ætheris fluori affert. Ergo, adhuc manet ætheris fluxus in diametro breviorẽ coarctatior præſente lunâ, quàm in diametro longiorẽ, eadem Lunâ præſente: Ergo ibi adhuc magis premetur aër, & aqua ſubjecta mediante aëre quàm hîc: Ergo adhuc ibi major erit & copioſior affluxus, quàm hic.

XX. *Putaveram autem ad illud ſolùm ſpatium reſpectum haberi, quod eſt inter Lunam & terram, ideoq; neceſſariò, ſi ſpatium hoc in Noviluniis & pleniluniis ſemper eſſet anguſtius quàm in quadraturis, ibi ſemper D deberet eſſe perigæa, hîc Apogæa?*


Hæc conſequentia procul dubio procederet contra Cartefium, ſi prius illud quod ſupponitur,

tur, esset Cartesi assertum, veluti non est. Sed hoc tantum voluit, totum spatium arctius ex hypothesi Lunari in BT, quam in CT, arctius adhuc manere præsente Lunæ vasto corpore, quam hoc alterum eodem præsente; ideoque ætherem tam infra quam supra Lunam (sive in perigæo illa sive in Apogæo fuerit) pressius fluere debere, quam in spatio CT, in utroque pariter casu. Profectò incredibile mihi semper fuit, sublime, quo fuit Cartesius vel ipsâ judice invidiâ, ingenium, tam obviam ex illa suppositione absurditatem (quam præsens quæstio habet) si ipsius quoque fuisset, non prævidisse.

XXI. *Unde verò hoc saltem novit Cartesius, quod Luna nova & plena semper occupet minorem vorticis diametrum?*

Non dicit equidem, unde hoc noverit, Cartesius; meo verò judicio id hinc nosse potuit. Cum vortex D parvulus *abcd*, in figura adjecta (XXI.) unâ cum terra intra Magnum Solis vorticem ab A ad B, spatio $27\frac{1}{2}$ dierum, sive mensis periodici intervallo, minimum 26 gradus provehatur, dum interim terricolis Sol videtur totidem gradibus à C ad D processisse; fit hac circumductione vorticis lunaris orbiculari, ut diameter brevior *bd* in A erectior in via sensim dextrorsum obliquetur, ut in statione secunda B situm habeat *bd*, à priore erecto & parallelo positu *bd*, dextrorsum emotum angulo dTd, æquali angulo CSD, adeoque, cum

cùm D in suo vortice finito mense periodico, existeret in pristino situ db , ac decurrendos adhuc haberet 26 circiter gradûs à d ad d , finito sic mense synodico demum ad lineam syzygiæ in breviori sui vorticis diametro perveniebat.



**XXII. Cur verò in Æquinoctiis omnium
maximi, anno toto, contingunt
affluxûs?**

Hujus quæſiti rationem aliàs à poſitu Lunæ ſupra Æquatorem, adeoque ſupra majorem copiam aquarum, quàm prope Tropicos exiſtentis, cum Honorato Fabri deducere ſoliti fuimus, ex Tract. VI. p. 362. Sed nunc etiam illa fortè ſpernenda non eſt, quam dedit, ex hypotheſi Carteſiana, *Pierre Sylvain Regis* dans ſon ſyſtème de Philoſophie, Tom. IV. pag. edit, Lugdun. 236. Nimirum: cùm Terra in Æquinoctiis, reperiatur in principio $V \& \sphericalangle$, quemadmodum Axis ejus eum habet poſitum ad Solem, ut nec inclinet ad eum, nec ab eo declinet; ita planum eclipticæ cœleſtis reſpondet directè Æquatori terreſtri: Et, quia Vortex Solis in hoc plano fortiùs agit, quàm in ulla alia ſui parte, idcò neceſſum eſt etiam Æquatorem terreſtrem magis premi in Æquinoctiis, quàm ullo alio tempore totius anni; qua de cauſa, cùm linea conjunctionis & oppoſitionis tum ſit brevior, neceſſum eſt, Lunam in eam poſitam cauſari affluxûs marium multò majores.

**XXIII. Sed nova difficultas objicitur à
Varenio in Geographia generali
p. 173. & 179.**

Novi illam quoque difficultatem in eo conſiſtentem, quod in Carteſii diagrammate mare ſub D in F repræſentetur in maxima detumeſcentia,

scientia, cum è contrario, Lunâ in meridiano existente aquam accrescere constet, inde verò recedente decreseat. Sed hæc difficultas nihil habet momenti: Crescit enim aqua cum accessu Lunæ ad meridianum, sed in litoribus, id quod experientia testatur; ex quo ultrò sequitur eodem tempore illam detumescere in mari medio sub Luna, propter compressiorem ætheris in illo cœli loco fluxum, & consequentem inde maiorem aëris & aquæ in mari subiecto pressionem: quemadmodum ad oculum apparebit, in patina aquæ ferè plena, si ligneus Orbis huius medio impositus digito tantillum deprimatur, aquam ipsi subiectam etiam deprimi, & hoc ipso versus patinæ margines, tanquam litora, assurgere.

XXIV. *Unum adhuc quæram, de causa aquam in glaciem convertente?*

Superiùs in Part. Special. Sect. Prior. Cap. IV. quæst. III. ex phænomenis deduximus aquearum particularum figuram teretem & quasi vermicularem, cum earum glabritie seu lubricitate & flexilitate conjunctam; indeque quæst. IV. conclusimus naturam aquæ involvere compositionem aliquam ex modo dictis particulis, quæ passivè tantùm se habent, & ex alia quadam subtiliore & respectivè actuosiore materia, quam ignem dicas blandum, aut calorem, aut ætherem, mihi perinde fuerit; à qua videlicet illæ particulæ in suo fluore, in sua flexilitate motuq; intestino perpetuo servantur. Quamdiu ergo hæ

hæ caloris aut ignis aut ætheris particulæ in sufficienti copia adfuerint, tamdiu aqua in sua fluiditate perseverat. Quia verò caloris natura in perpetuo fluxu sit, æris præsertim pressione illum accelerante, si ex Sole, tanquam ejus fonte præcipuo, diebus hyemalibus brevioribus, propter radiorum insuper obliquitatem & paucitatem, tantundem aquis refundi caloris non possit, quantum ipsis nocte dieque demitur, ille tandem caloris defectus causatur flexilitatis in particulis singulis, agitationis ad fluorem requisitæ, in universis defectum; ut illæ tandem rigidæ evadant ac torpidæ, super invicem non quiescant tantum, sed massam particularum rigescentium in amplius spatium exporrectam constituent, quam *glaciem* vocamus, suæ raritatis, & hanc consequentis levitatis, aliqualis item pelluciditatis, aliarumque affectionum causas facile ex dictis suppeditaturam.

XXV. *Da, quæso, paucis hæc rationes?*

Primò pelluciditatis aliqualis, ex pristina, quæ aquæ inerat, reliquæ facile concipiuntur; quia particulæ rigescentes, etsi confusiùs inter se dispositæ, ampliores tamen poros, quàm priùs, efficiunt, per quos materia luminis aliquatenus transmeare ad oculum possit. *Secundò* ex hoc ipso quod modo diximus, ejus raritas abunde patet, quia hæc in sola pororum vel interstitiorum laxitate consistit. *Tertiò* denique levitas glaciei (quam effectus ipse demonstrat, dum ingentes licet massæ glaciales aquis tamen adhuc fluen-

fluentibus innatant) ex ipsa illa raritate promanat ; quia nimirum ætheris , graviora versus centrum terræ compellentis , impulsûs , in partes solidas poris interjectas tantò pauciores impingunt , quantò ampliora sunt pororum interstitia , in quibus vani quasi sunt & irriti.

CAP. IV.

De

Ventis aliisque Meteoris aëreis.

I. *Quid venti nomine generalissimè venire solet ?*

VEentus generalissimè dicitur omnis aëris flatus sive notabilis commotio ab uno loco ad alium in directum facta ; qualis equidem statuta & perpetua sub æquatore , & prope ipsum , ab oriente in occidentem noctesque diesque adeò sensibilibiter spirat , ut navigantibus ex Europa in Indiam Asiaticam validè obnitatur , cursumque navigiorum retardet , ex India verò versus Europam tendentium motum multum acceleret. Cujus quidem flatûs orientalis perpetui causa partim esse videtur illa pressio aëris occasione ☽ , motu diurno ab oriente in occasum perpetuò tendentis , aut terræ contrà motu suo diurno in oppositum , aërem suum corpori lunari successivè obvertentis , partim , & fortasse maximè , Solis occursum & calefactio , indeque dependens rarefactio aëris vaporosi ; quâ fit , ut quævis
aëris

aëris portio, sub ipso Sole maximè rarefacta è sublimi ad humiliores, & ex noctis præcedentis frigore contractiores partes occidentales potius, quàm ad orientales, ex paulo antecedente meridie adhuc calentes & eleviores, profluat, eoque pacto unà cum Sole, aut quodammodo ante Solem constanter in occasum provehatur.

II. *Quid verò de aliis ventis non ita statis & ordinariis, sed valde irregularibus, quales in nostris oris per vices spirant, sentiendum est?*

Horum materiam jampridem agnovit Aristoteles exhalationem è terris, sed siccam magis, ex eo capite, quòd ventorum omnium natura sit exsiccare, tametsi unorum magis quam aliorum. Quia verò hæc exiccatio potest fieri per motum etiam humidiorum exhalationum, majorem humiditatem ex aliis corporibus expellentium & unà secum avehentium; ideò vaporosas magis quàm fumidas exhalationes materiam ventis præbere recentiores cum Cartesio statuunt; & quæstio præcipua est circa ventorum formam, quàm in impetu quodam & rapido motu illarum exhalationum versus certam plagam directo consistere nimis apertum est: ut quæstio tota tandem in hoc reciderit, ut causa illius impetûs in vaporibus lentissimè & insensibiliter sublevatis concitati, indicari ac declarari postulet.

Ii

III. Quam-

III. *Quamnam igitur causam illius impetûs antehac agnoverunt Aristotelici?*

Geminam illi causam ordinariè assignârunt: (1) Reflexionem ascendentium exhalationum à nubibus, non perpendicularem, propter continuam successionem novarum exhalationum, sed obliquam, prout experientia testatur: (2) Frigus aëris superioris. Neutra tamen videtur satisfacere. Nam (1) nunquam fit motus corporis alicujus reflexus major aut impetuosior, quàm fuit incidens, sed potiùs ordinariè (ipsâ ratione id postulante,) debilior: (2) cùm natura frigoris in quiete vel motûs defectu posita sit, quo pacto id quod lentissimè sursum movetur, à frigore majorem impetum deorsum concipiet? Et quamvis cum specie quadam regeri posse videatur, motum illum sursum lentum quidem esse, propter gravitatis nisum perpetuò resistentem, ubi verò reflexio semel cœperit, motum illum deinceps cum perpetua quadam acceleratione conjunctum esse; quod experimentis modernis pluribus constat; non potest tamen hæc exceptio omnem tollere difficultatem, quandoquidem hoc pacto ventorum acceleratus impetus è summo deorsum perpendiculariter sentiri deberet; id quod est contra manifestam experientiam.

IV. *Quamnam verò causam allegant impetûs illius recentiores Philosophi?*

Eam ipsam, quam jam olim dederat Vitruvius, Lib. I. Cap. VI. ventum definiens *aëris fluen-*

fluentem undam, cum incerta motus redundantia, & postmodum Æoli pilarum ærearum, cavarum exemplo rem declarans, illas habere, dicens, punctum angustissimum quo aquæ insunduntur, collocariq; ad ignem, & antequam calefiant, non habere ullum spiritum, simul ac autem fervere cœperint, efficere ad ignem vehementem flatum: ita scire. & judicare licere e parvulo brevissimoq; spectaculo, de magnis Cœli ventorumq; naturæ rationibus. Hunc artificialis venti per Æoli pilas geniti conceptum, suum fecit & egregiè interpolavit Cartesius de Meteoris Cap. IV. & ad ventos naturaliter gignendos distinctius applicavit.

V. Ubi verò hîc globi cavititas? ubi ignis aquam ferverefaciens? ubi deniq; foramen, per cujus angustiam calefactus vapor impetum acquirat?

Similitudo hîc quæritur, non identitas: Et (1) quidem non pilæ hîc aut globi rotunditas, sed hemisphærica tamen, aut rectiùs fornicis depressi cavitatis habetur, in aëre supra maria, lacûs, flumina; ipsas etiam terras udas & humentes expansa: (2) non igne quidem subtus flammante vapores attolluntur & allevantur in in aërem sublimen; at Solis calor desuper aquarum & udæ terræ superficiem urgens, calor item subterraneus ex imis terræ visceribus exhalans, imò qualiscunque tepor, pro immensa exhalationum copia nocte dieque evocanda sufficit, quin & nives, tum condensatiores hîc in terris, tum tenuiores multo ac nebulis jam solutiori-

lutioribus similes in nubibus, aptiorem etiam vaporibus, leni admodum calore sursum expellendis materiam abundantem præbent: (3) Nul- lum quidem foramen studio paratum in cujus angustia lente primum & plerumque insensibi- liter fluens exhalatio impetum acquirat & ac- celerationem, locum hîc invenit; at casualis nubium inter se, aut cum vicinis montibus concursus; vel venti jam alibi actualiter fluen- tis &c. ejusmodi angustias formare postest; quin etiam perforatæ aut pertusæ alicubi mon- tium cavernæ blandos aut impetuosos in aërem ventos exspirant, cujus exempla notabiliora nobis enarrat *Athanas. Kircherus* in *Mundo Sub- terr.* speciatim de monte *Æolio Cæsiorum* Tom. I. p. 115. & seqq.

VI. *Annon alii quoq; generandorum vento- rum modi, præter modo declaratum, concipi possunt?*

Videtur generaliter quæcunque causa, quæ aëris æquilibrium notabiliter mutat, occasionem aliquam flatibus leniter saltem fluentibus præ- bere posse; ita ut, alicubi aëre sensibilibiter calefa- cto & rarefacto, ex aliis vicinis regionibus frigi- dior & condensatior, atque adeò gravior, eò ruat & fluxu suo venti formam induat. Certè hoc superadditamento accedente ventus ille ge- neralis intra zonam torridam versus occasum perpetuo fluens multò speciosius deducitur, si concipiamus, Solem supra zonam torridam per- petuò incedentem aëremque cui imminet valdè
rare-

rarefacientem, occasionem aëri frigidiori utriusque zonæ temperatæ præbere, ut utrinque affluens solem versus occidentem jugiter antegressum à tergo sequatur, adeoque junctim cum causa quæst. I. declarata ad effectum adeò constantem concurrat. Conf. Honor. Fabri Phys. Tract. VI. Lib. IV. Prop. XIII. & sequentes plures. Ex quo principio plura ventorum phænomena non inscitè deducit Cartesius in Meteoris.

VII. *Quenam verò sunt præcipue ventorum qualitates & conditiones?*

Variantissimæ illæ sunt, & in aliis regionibus aliæ. In nostris hisce mediæ Germaniæ oris, has observamus longâ experientiâ ventorum diversitates, ut e. g. *occidentales* humidi sint plerumq; & frigidiusculi, pluviosi aut nivosi, pro diversa anni tempestate; quia sc. ex mari patente Atlantico, nec admodum remoto spirantes, magnam vaporum crassiorum vim in regiones nostras advehunt: *Boreales* ordinariè valdè frigidi & sereni, propter nives in Septentrione liquefcentes & vapores instar lamellarum glacialium magnâ copiâ versus nos transvectos, qui vapores aquosos ab oriente spiraturos in transversum rapiunt: *Orientales* generaliter sereni, quia vaporibus ex occidente venturis è diametro occurrunt; propter hanc ipsam serenitatem autem æstivo tempore sæpe calidissimi, hyberno sæpiùs intensè frigidi; quòd ibi ob dierum longitudinem Solis æstus continuus calorem & siccitatem inducat, hîc autem, liquefcentibus præsertim

in Montibus Carpathiis, Bohæmicis &c. longefcente die nivibus, glaciales evadant hi venti & borealibus similes: *Australes* denique calidiores & quodammodo humidi; quòd è regionibus calidioribus & arenosis Africæ calorem aëris ibi insignem ad nostras has oras transvehant, insimulque vaporum aquosorum copiam aliquam ex interjecto mari mediterraneo, non adeo amplo, secum deportent.

VIII. *Suntne constantes hæ ventorum nostratium qualitates?*

Ut plurimum saltem ita habere illas diuturnâ experientiâ deprehendimus; simul id, quòd notatu dignissimum judicamus, hîc adnotantes: Ventos ex diversis plagis successione quadam circulari spirare; ita ut e. g. cùm ventus occidentalis per aliquot dies spiraverit, huic succedat Zephyroboreas; intervallo vel plurium, vel etiam pauciorum dierum, aut nonnunquam horarum, illum excipiat ipse Boreas, hunc porrò incertâ rursus intercapedine, Euroboreas, Eurus ipse, dein Euronotus, Notus vel Auster ipse, Notozephyrus, & tandem Zephyrus iterum vel occidentalis &c. mox eundem circulum de novo eodem ordine coepturos, rarissimè retrò, aut saltem non adeò longè successione viam inituros &c. Quæ res ut absconditam adhuc causam habet; ita negari non potest, aliquando cum vento occidentali Serenitatem gratissimam conjungi, sed stante veriùs & post diuturnos flatûs tandem quiescente; ex opposito verò Boream non-

nonnunquam vel Eurum (aliàs naturâ serenos) pluvias nobis advehere, sed eo maximè casu, quo diuturnis ex occidente pluviis vel orientalis superveniens, nubes pluviosas, horizontem nostrum jam transgressas, retro ducat, vel borealis iisdem pluviis, non ad nostrum, sed ad remotiorem aliquem in Boream horizontem transmissis superveniens eas ad nos oblique deportet. Observavimus autem extraordinarias ejusmodi pluvias vix unum alterumque diem durare, & mox serenitatem ordinariam subsequi; id quod has nostras conjecturas insuper confirmat.

IX. Hæc de ventis sufficiant pro modulo præsentis compendii. Velim nunc etiam de cæteris meteoris aëreis aliquid subjungas?

Illa sunt *ros, pruina, nebula, nubes* &c. eandem materiam cum ventis agnoscentes, formis autem specificis gaudentes non adeò longè ab invicem discrepantibus, sed vel accedentariâ quasi differentiâ tantùm, vel graduum varietate differentibus; tametsi interim diversas ipsis essentias communiter tribuamus.

X. Quid igitur Ros esse dicendus est?

Nihil aliud quàm vapor aliquis ex terra humente æstivo tempore in aërem sublatus, qui splendente adhuc aëremque calefaciente Sole in eo sub forma vaporis volitat, vix autem sub horizontem illo lapso, & calore aëris tantillum remittente recidit in terram, plantas,

& gramina, ibique coalescens in minutas guttulas confluit. Unde fit ut, præfente adhuc fole, ficco pede per gramina inambulemus, mox autem cum vix defuit conſpici, incipiant calcei à graminibus humectari, cum verò æſtivæ noctes calorem diu ſervent, ideò ſub noctium initia non ita denſus cadit ros, uti verſus auroram, cùm aër frigidior evadit, ac interea temporis copioſiores, etiam è ſublimi aëre lentè deſcendentes; cum prioribus terræ vicinioribus conjungit in guttulas multum grandefcentes ac margaritarum inſtar evidentiùs conſpicias.

XI. *Quid Verò Pruina à rore differt?*

Non alia eſt differentia, quàm quòd eadem vaporum particulæ in aëre autumnali vel hyemali obrigeſcentes, amiſſâ flexilitate ſuâ, non in guttulas confluant, ſed in lamellas tenues glaciales concreſcant, quarum plurimarum collectio nivofam illam ſubſtantiam conſtituit, quàm *Pruinam* appellamus.

XII. *Quid Nebulam eſſe dicis?*

Nebula pariter nihil aliud eſt, quàm vapor aliquis jam condenſatior in aëre pendulus craſſitie & opticâ conſtipatione ſuarum partium viſum & proſpectum impediens. Eſtque *vel rorida*, & guttulis minutis conſtans, quæ ſi majores ſint & ponderoſiores, in terram decidunt & radiis orti Solis deprimuntur ac diſpelluntur ſerenitatem adeò poſt ſe trahentes; ſi ſubtiliores & minutiores, ut ſingulæ non ſuſtentari ſolum

lùm ab aëre, sed elevari etiam altiùs possint, in
nubes roridas sylvarum fastigiis montiumque
cacuminibus tantisper impendentes degene-
rant, paulò post autem in tenues pluvias resol-
vuntur terramque petunt: *vel pruinosa* & sic-
cior, quæ, si multis mineralium exhalationibus
gravida sit, noxia plantis & animalibus & quo-
dammodo venenata evadit.

XIII. *Quid deniq; Nubes est?*

Nihil aliud quàm tenerior nebula; id quod
ex eo manifestum est, quòd in aëre sublimi non
solùm pendeat; sed sæpe diu à ventis ultrò ci-
troque agitetur, ut in aëre, tametsi multùm
subtiliore, at minus raro & ponderosiore, eam
natare necessum sit; eodem sc. modo, quo li-
gnum, aqueo fluore multò crassius, at insimul
multò porosius laxiorisque texturæ, illi super-
natat. De tenuitate & maxima raritate nu-
bium (etiamsi eminus per opticam quandam
constipationem satis crassæ appareant) eviden-
tissimum habui ante plures annos experi-
mentum, cùm ad sylvam vicinam exspatiatus,
ex intervallo 100 circiter passuum nubeculam
quandam parvulam ac solitariam ipsi humo in-
cumbentem conspicerem, scrutaturus autem
causam apparentis adeo solitariae nubeculæ, ad
locum illum accederem, cùmque penitus ad
illum accessissem, lacunam aliquam, cui incubu-
erat, reperirem, ipsam autem nubem interea
penitus inconspicuum & ex oculis evanuisse de-
prehenderem. Tentaturus autem, num fortè

reverà (quod credibile tamen vix erat) dissipata fuisset, retrò meavi ad locum, ex quo primùm eam conspexeram, indeque illam eadem iterum crassitudine spectabam, quâ priùs, in via nonnunquam retrospectanti densescere sensim manifestè deprehensam.

XIV. *Quo pacto verò ex nubibus, nix, pluvia, grando &c. generantur?*

Nubem nihil aliud esse quàm tenuem nebulam, quæst. anteced. dictum est. Quod si nebula illa roscida sit, ex guttulis minimis, in aëre diu sustentari, deficiente quippe sensim calore, non valentibus conflata, hæ confluentes & pondere auctæ, tenuem pluviam componunt, qualem post nebularum roridarum sive aquosarum sublationem haut longè post decidere superiùs diximus. Sin pruinosa illa fuerit, nubes illas steriliores & candicantes componit, quas instar nivis candidissimas, in colles grandes congestas media sæpe æstate in aëre pendulas intuemur, ac diu satis ab una sæpe parte aëris ad alias ventorum impulsu transferri cernimus; procul dubio tenuium filamentorum reticulis (qualia nonnunquam hîc prope terram quoque gigni experimur ex halitibus autumnalibus pruinosis & quodammodo viscidis, *Fila Maria* vulgo dicta, & pro telis sive filis araneorum quibusdam, sed falsò, habita) quodammodo colligatis. Quod si ergo contingat tales à calore Solis desuper, & ab eo, qui è terris assurgit, infernè urgeri & liquefcere, capilla-

mentis

mentis istis & ligamentis glaciecularum tenuissimis resolutis; in flocculos primùm parvulos, mox horum plurium concursu in floccos majores, coeunt, qui pondere jam aucti descendunt in terras, & *nives* copiosas congerunt, si satis frigidus fuerit inferior aër; sin minus, inter decidendum penitus liquefacti, *pluviam* generant.

XV. *Ita distindè satis capio, quomodo nubes nivosa in nives, vel his mediantibus, in pluvias degenerent; sed de grandinis etiam formatione nunc informari cupio?*

Grandinis minutiora grana ita generari concipio, ut flocci nivales grandiores, inter decidendum in aëre paulò calidiore liquefcere incipiant (unde colliquefactis extremitatibus inæqualiter prominentibus, liquidior jam forinsecus massa nivosa à circumprimente aëre in rotunditatem aliqualem formatur) in progressu ulteriore per aërem gradatim calidiorem, in guttas tandem pluviales plenariè resolvendi. Verùm si fortè contingat, globosis illis & semiliquidis massulis in via obvia obviare ventum aliquem frigidiorẽ, illæ à frigore illo, glaciali crustâ superinductæ, quod superest interiùs nivis, circa centrum ordinariè adhuc collectæ, globulos illos extus solidiores componunt, qui illapsu suo in tecta aliaque duriora corpora strepitum aliquem causantur auribus notabiliter perceptibilem.

XVI. *Quo*

XVI. *Quo pacto verò grandiores illi grandinum glomeres in aëre formari poterunt, qui sæpius ova columbina & gallinacea adæquant aut excellunt?*

Hujus equidem rei experimentum habui luculentum ante hos annos, ni fallor, plusquam viginti, cum hîc Altdorffl caderet ingens grando, quæ fruges maturitati proximas miserandâ strage universas, circa hoc oppidum, ita prosternebat, ut solo æquata tristi oculo spectabantur omnia. Observare ibi distinctè licuit, glomeres illos glaciales ex pluribus granis aut floccis nivium penitus congelatis compactos fuisse, qui tamen nec singuli, neque conjuncti rotundam satis figuram nacti fuerant, sed irregularioris figuræ, partes sui componentes distinctè dignoscendas exhibebant: ut clarissimè appareret, illas grandiores massas glaciales, ex diversis magnis floccis inter decidendum liquefactis, inter liquescendum congelatis, & inter congelandum in se invicem collapsis, interventu frigoris cohæsisse & coaluisse, auctasque adeò pondere & lapsûs altioris acceleratione miserandam illam cladem edidisse. Cui hypothese confirmandæ illud maximè facit, quòd ex notabili adhuc distantia imminens nobis illa tempestas ingentem adeò strepitum lapsuris in agros nostros lapidibus præmitteret, ut præ illo campanarum sonitum in turri primaria (à qua vix 30 passibus tunc aberant ædes nostræ) audire non possemus; qui quidem strepitus aliunde quàm ex illorum saxo-

faxorum glacialium innumerabilium collifione potuerat oriri.

XVII. *Numquid alia adhuc circa grandinem notabilia supersunt?*

Essent equidem quæ vel apud Cartesium in Meteoris cap. VI. num. IV. V. & VI. circa grandinum variationes annotantur, (tametsi illius speciei, quam præced. num. declaravimus, ne meminerit quidem) vel ap. Honoratum Fabri Tract. VI. Lib. III. Prop. 222. per numeros plures; vel apud Hamelium Tom. Priore p. 456. aliosque; possentque, ut species quædam grandinis nivossæ subtilioris, nives illæ stellatæ seu sexangulæ & multangulæ, de quibus prolixius agit Cartesius cit. I. & Erasm. Bartholinus in Quæst. II. de Naturæ mirabilibus &c. Sed hæc, tanquam particularia magis in compendio præfenti deducere velle, proposito nostro foret contrarium, ideoque Parti speciali Physicæ electivæ vel hypotheticæ sunt reservanda.

CAP. VII.

De

**Meteoris aëreis emphaticis,
& speciatim de Iride.**

I. *Quid intelligis per meteora emphatica?*

Illa maximè sic dicuntur, quæ, licet subjectum quoddam corporeum & reale supponant, præcipuè tamen omnem suam rationem in ἐμφάσις qua-

quadam vel apparentia colorationis cujusdam positam habent: prout e. g. Iris sive arcus coelestis est apparentia quædam diversicolor, in figuram arcus circulearem elegantissimè disposita; pro subjecto supponens nubem aliquam roridam, aut rectius aërem roridum, quem aut antecessit alicubi pluvia aut mox consequitur.

II. *Quenam igitur sunt requisita ad exhibendam admirabilem hanc apparentiam necessaria?*


Primum est, uti modo dictum, aër roridus, i. e. guttulis innumeris desuper lentè rorantibus confertus: *Secundum*, Sol ex opposito illius aëris roridi splendens illumque sine impedimento illustrans: *Tertium*, oculus inter utrumque sic in medio locatus, ut Solem lucentem à tergo, aëris rorantes guttulas directè ante se defluentes, & à Sole illuminatas, habeat, ita quidem, ut à centro Solis, per ipsum oculi centrum, linea rectaeducta in Iridis centrum sive medium excurrat, si planum aëris guttosi directius ante Solem & oculum positum sit. His enim tribus requisitis unicè positis, Iridis etiam phænomenon poni, vel artificiales, quas vocamus, Irides, quibus ars, naturam feliciter imitata, naturales istos sive coelestes rariores arcus, Sole lucente quasi ad lubitum æmulatur; abunde testantur.

III. *Quæ-*

III. Quenam verò præcipuè in hoc admirabili phænomeno attendenda veniunt?

(1) Figura arcuata (Fig. XXII.) quòd nimirum non tota planities circularis, vel etiam ipsius nubis aut aëris roridi irregularis, superficies undiquaque coloribus depicta cernitur, sed arcûs solum determinatæ latitudinis, Solis diametrum quamproximè adæquans variegatus spectatur. (2) Ipsa illorum colorum varietas, quippe qui quasi mille numerari possent, si singulos transitionum gradûs (alle Schattierungen so zu reden) superstitiosè quis numerare vellet; ad tres tamen vel quatuor, aut quinque, aut sex generatiores species revocari à diversis solent. (3) Colorum illorum idem semper & invariabilis ordo, ut nimirum in Iride primaria, summus puniceus sive ruber, sequentes ordine flavus, viridis ac cœruleus, sint, cum interjectis passim affinis, purpureo, violaceo &c.

Figura. 22.



IV. Cum

IV. *Cùm mentio facta modò sit Iridis primaria, hæc utiq; præsupponet aliquam etiam secundariam?*

Rectè conjicis ; non equidem, quasi semper utræque simul compareant, sed quòd sæpe, frequentius autem primaria sola. Cæterum cùm de utrisque deinceps specialiora quædam separatim dicenda veniant, hoc interim per comparisonem utriusque generatim moneri potest ; quòd (1) primaria minoris sit amplitudinis quàm secundaria ; (2) hæc eosdem quidem cum illa habeat colores, sed obscuriores ac minùs vivaces, ac præterea (quod apprimè notandum) inverso ordine locatos, ut puniceum in imo habeat, reliqui deinceps fursum versus sequerentur ; (3) quòd primaria quidem sæpe sine secundaria, hæc autem sine illa nunquam sit, præsertim quoad partes verticales & superiores. Cujus rei causa dari facile potest.

V. *Expone quæso causam illam?*

Cùm certum sit iridum pingendarum subiectum esse guttulas in aëre pendulas aut ex nube rorida lentè defluentes ; hæc autem nunc altior, nunc humilior esse possit 42 circiter gradibus (sub qua altitudine præterpropter cernitur iris primaria, uti secundaria sub altitudine 52) frequenter quidem fieri potest, ut nubis altitudo 52dum gradum non attingat, & tamen ad 42dum elevetur, & sic non
secun-

secundaria, sed primaria tantum, exhibeatur. Contrarium autem, ut nimirum altitudo nobis ac derorantium guttularum 52dum gr. nec tamen etiam 42dum attingat, fieri haut potest; cum guttulæ à summo ad ima descendant, ideoque, cum superior ac secundaria iris repræsentatur, multò magis inferior & primaria exhiberi debet. (Vid. Fig. XXIII.)




Fig. 23.

VI. Ut igitur superius enarratas præcipuas circumstantias singulas seorsim examinemus, quero primum quid in illis guttulis rorantibus colores producat?

Respondeo generatim: illos colores produci à radiis solaribus in guttulas incidentibus & in iis variè refractis & reflexis; quandoquidem

K k

aliun-



aliunde certum est colorem nihil aliud esse quàm lumen aut reflectendo, aut refringendo, aut utraque ratione modificatum. Quod ut distinctius oculis ostenderet Cartesius, paravit guttam quandam magnam vitream (vid. Fig. XXIV.) aquâ limpida repletam, eamque ex funiculo quodam ita suspensam, ut (fortè circa rotulam aliquam) sursum elevari altius, aut humiliùs demitti posset, ipse oculo suo in E constitutus, & Solem S à tergo habens &c. quibus positis, & guttâ BDC sub angulo DEM 42 circiter graduum, (1) observavit in parte guttæ D splendide rubens punctum aliquod physicum valdè illustre: Simulac autem hunc angulum, altius adducto globo, paulò magis dilatabat, ruborem omnem, omnemque etiam alium Colorem


lorem evanescere videbat ; sin illum tantillum contraheret , gradatim deorsum primò flavum, deinde viridem , porrò caruleum notabat , usque ad certum terminum , infra quem nulli amplius colores apparebant ; (2) Hoc etiam animadvertit , si pilam sive guttam BDC magis demissam , à linea EM versus sinistram F, aut versus dextram G, lateraliter emovisset , donec eosdem angulos cum linea EM constitueret , quos in prioribus locis in perpendiculari linea DM constitueret ; eosdem tunc ordine colores successivè aparuisse , qui apparuerant in casu priore , extra verò , vel infra illos angulos nullos fuisse conspectos &c.

VII. *Quid inde Verò concludi poterat ?*

Hoc inde inferre in proclivi erat : Id quod in hacm ajore gutta factum fuerat , in minutulis aëreis guttulis quoque fieri ; h. e. tametsi amplum aëris spatium ejusmodi guttulis derorantibus refertum à Sole illuminatur in tali casu ; non tamen à singulis omnibusque guttulis ejusmodi colores ad oculum reflecti , sed ab iis tantum , quæ cum linea EM sub iisdem angulis circumcirca dispositæ essent , 42 nempe circiter graduum & paulò minorum ; à reliquis autem sive interioribus , sive exterioribus guttis reflexos radios non ad eundem oculum E , sed ad altiùs humiliusve positos oculos tendere , ipsi adeò oculo E nullos colores exhibentes. Ex quo tres cumprimis superiùs enarratarum circumstantiarum elucebant : (1) cur Figura
K k 2 iridos

iridos circularis esset, & (2) Arcûs dimidium circiter gradum latos varieque coloratos exhiberet; (3) denique amplitudinem radii 42 graduum quàmproximè haberet.

VIII. *Ita ingeniosè admodum Cartesius puncti rubri ac cæterorum colorum deorsum sequentium originem in iride primaria detexit; num similia fundamenta circa secundariam habuit?*



Idem utique guttæ majoris experimentum illum ad veros hujus quoque causas deduxit. Nimirum, posteaquam elevando guttam suam majorem ultra altitudinem 42 colores omnes evanuisse notasset, ulteriùs eam gradatim elevando nullos ampliùs obvios habuit, donec 52dum gradum attigisset; (Vid. Fig. XXV.) quo casu

casu subito notavit in loco guttæ superiore K
 rursum apparere punctum rubrum sive puni-
 ceum; deinceps autem, cum paulatim eveheret
 guttam, eodem loco punctum flavum, dein
 viride, porro cæruleum comparebat, donec
 suprà gradum altitudinis 52do notabiliter altio-
 rem omnes iterum colores evanescerent. Ex
 quo rursum intulit; (1) in illis igitur minori-
 bus in aëre guttulis à quibuseductæ ad ocu-
 lum lineæ cum lineæ à Sole per oculum ducta
 undiquaque angulos facerent 52. gradibus æqua-
 les, aut paulò majores, illos quoque colores or-
 dine inverso sese excipere debuisse, infra vel
 suprà illos autem deficere & abesse: (2) Quem-
 admodum primariam iridem gigni credebat per
 radios AB (Vid. Fig. quæst. VI:) in supernam
 guttæ cujusque partem illapsos, in B refractos
 ad C, à C ad D reflexos & in D iterum versus
 Oculum E refractos; ita secundariam generari
 inferebat, per radios FG in partes guttarum
 inferiores illapsos, à G verò ad H refractos, ab
 H versus I reflexos, ab I denuò ad K secunda
 vice reflexos, & ex K denique secunda refra-
 ctione mediante ad oculum E transmissos. Unde
 (3) ratio patebat obscuritatis majoris in coloribus
 Iridos secundariæ, quàm in illis primariæ; quia
 nimirum in ista, radii per guttas ad oculum
 transmittendi, duas refractiones, & duas etiam
 reflexiones subire cogebantur, cum in hac non
 nisi unam reflexionem cum duabus refractioni-
 bus patiantur, & quævis interim tum refractione
 tum reflexio cum notabili luminis debilitatione
 conjuncta sit.

IX. *Fortassis hoc, quod num. 2. quæst. præced. supposuit Cartesius, merè-arbitrarium erat suppositum?*

Minimè verò gentium : Sed postquam primum nonnisi conjecturæ fuissent, tentatis quæ conjecturas istas necessario consequerentur, ita horum eventu confirmabantur, ut in ipsam apertam veritatem abirent. Sic enim testatur Cartesius in Meteoris cap. VIII. num. III. (idque post illum alii verum esse experti sunt) simul ac corpus aliquod opacum alicui linearum AB, BC, CD vel DE (Fig. XXIV.) opposuisset, rubicundum colorem in D statim evanuisse ; & licet totam pilam vitream, exceptis duobus punctis B & D, obnuberet & corpora obscura ubique circumponeret, dummodo nihil actionem radiorum ABCD impediret, lucide tamen illum refulsisse : idemque cum radiis FG (Fig. XXV.) ejusque parallelis feliciter tentavit, partibus sc. pilæ circa G obtectis evanuisse colorem rubrum, duobus autem punctis G & K solis apertis, ac tectis cæteris omnibus, illum satis vividum reluxisse, expertus est.

X. *Unum est, quod ad plenam ingeniosissimæ hujus deductionis fidem, scire adhuc desidero, genuinam sc. causam variantium enarrato modo colorum?*

Equidem cum similes colores, similique ordine dispositos, per prisma triangulare vitreum, per calices vitreos aut alia pocula cylindrica quoque, per fenestrarum orbes etiam in chartas
albas

albas projiciantur; causæ hujus apparentiæ investigatione generalior est, quam ut Iridem solam spectet, ideoque ad opticam magis quàm ad Physicam pertinet, profundioris adeo & magis Mathematicæ indaginis. Hoc interim generatim hîc dixisse sufficere debet, quòd in casu altitudinis guttarum 42. circiter grad. radii solares AB in guttas incidentes, multò plures & confertiores ex loco D ad oculum E refrigantur, quàm in casibus sequentibus altitudinis gradatim minoris, & verò colorum gradûs in illa ipsa radio- rum gradatim minùs confertorum aut magis distractorum varietate repositi sint: quæ res subtilior est & explicatu difficilior, quàm quæ loco præsentis sufficienter declarari queat; fusius interim à nobis exposita in Admirandis Iridos anno superiore 99 Norimbergæ excusis, hîc Altdorffi autem publica solennique Disp. ventilatis, à pag. 111. usque ad pag. 181.

XI. Quænam supersunt alia phænomena vel meteora emphatica?


Est inprimis *Area* sive *Halo* communiter dicta, Iridi similis quodammodo, sed in plurimis etiam dissimilis. Nam (1) ejus arcus sæpius complet circulum integrum, cum Iris non nisi semicirculum exhibeat oculo in planitie constituto. (2) Distantia peripheriæ à centro in halone est dimidia tantum præterpropter illius in Iride. (3) Halo spectatur circa Solem vel Lunam, Iris autem ex opposito Solis vel Lunæ; ita ut in hoc posteriore casu oculus Solem vel Lunam (nam dantur etiam Irides Lunares)

à tergo habeat, Iridem ante se; In priore casu autem & halo ipsa, & fidus circa halonem ante oculum statuntur: (4) Iridis generatio fit in aëre pluvioso vel roscido; halonis autem emphasis in aëre pruinoso magis depingitur: unde Irides æstivo, Halones autumno magis repræsentari solent. (5) Irides solares multicolores ordinariè & nonnullæ etiam Lunares rarius, observantur: Halones autem circa ☉ & ☾ plerumque candidulæ & albicantes, rariùs autem coloratæ conspiciuntur.

XII. *Quis igitur est hujusmodi arearum circa Solem & Lunam generandarummodus?*

Ejum Cartesius nobis cum aliqua veri specie exposuit, sequentibus suppositis nitentem, quæ nostris potiùs quam ipsius verbis ita clariùs, credo, exprimemus: (1) Materiam sive subiectum hujus emphaseos non esse roridas in aëre defluentes guttulas, ut in Iride; sed lamellas potiùs pruinosas glaciales, quodammodo saltem pellucidas, & figura lenticulari in medio plus minus tumentes & valde pusillas tenuesque, ut in aëre faciliùs pendere & sic phænomenon in aëris partibus aliis aliisque successivè (prout sc. Sol ipse aut ☾ supra aërem successivè progreditur) exhibere possit: (2) In totum hunc aërem ejusmodi particulis lenticularibus undique refertum, interque Solem aut Lunam ABC (Fig. XXVI.) & oculum D interjectum, radios dictorum luminarium incidere, sed non omnes ejusmodi radios in lenticulas aëris glaciales illapsos, post geminam refractionem, præ-

cisè



cisè ad oculum D pervenire; verùm aliquos in-
 teriùs cadentes (e.g. DE) post duas refractiones
 infra oculum D, alios exteriùs in H incidentes,
 ut CH, post geminas suas refractiones supra
 eundem prætergredi; solos autem intermedios
 AF & DG in lamellas vel lenticulas F & G, sub
 certo angulo (21 plus minus graduum) refra-
 ctos bis radios ad eundem oculum D, cum cate-
 ris

K k 5

ris inter F & G mediis, præcisè transmittere, totidemque puncta candicantia, in orbem undiquaque disposita, circulumque adeò candicantem exhibere. Quod si verò 3.) lenticulæ illæ glaciales sint penitus pellucidæ, illas operadiorum bis refractorum non tam alborem aliquem, quàm varios alios Iridis colores exhibere posse; prout sc. radii inter F & G medii à centro coronæ vel propiùs ultra F, vel remotiùs citra G ceciderint.


XIII. *Num alia etiam superant emphatica meteora ad causas suas reducenda?*

Duo cum primis restant, *Parhelii* nempe cum *Paraselenis*, & *Virgæ*. De illis primùm, de his posteriùs agemus: Et Parhelii quidem ac Paraselenæ nihil aliud sunt, quàm veri Solis & veræ Lunæ imagines spurix, juxta Solem aut juxta Lunam spectatæ, nunc plures, nunc pauciores; quarum notabiliores circumstantiæ sunt sequentes: 1.) non accuratam habent, uti Sol aut Luna ipsa, rotunditatem, sed ambitum lacerum & quadrangulo irregulari quodammodo similem, luminisque insuper sunt minus vivacis; 2.) Non suprà & infrà Solem vel Lunam verticaliter, sed à latere tantùm, dextrorsum aut sinistrorsum, vel etiam utrinque, horizontaliter posita reperiuntur, unde etiam *Neben-Sonne* & *Neben-Monde* appellantur; ac 3.) plerumque cum halone una alteraque junctim apparere solent, & quidem in ipsis halonum decussatim per invicem transeuntium intersectionibus: quarum equidem circumstantiarum exempla duo, ex

Viro-

Virorum fide dignorum relationibus (mihi enim hoc phænomenon spectare nunquam obtigit) hîc exhibebo, alterum Parheliorum, alterum Paraselenarum. Prius exemplum Parheli-

orum quatuor, qui visi sunt Romæ Anno 1629. d. 29 Martii horâ 2. ac tertia pomeridianâ, describit nobis prolixè Cartes. de Meteor. cap. X. cujus descriptionis tenor, cit. l. pluribus legendus, ex adjecto Schematismo XXVII. cognosci potest.



*Observatio
Romæ facta
d. 29 mart.
1. M. D. CXXIX*

Poste.

Posterius exemplum Paraselenarum , exhibuit nobis Observatio Lipsiensis anno 1684 d. 24 Jan. cujus Schematismum dedimus ad p. 220 Phys. Conciliatricis Tab. V. nunc hoc etiam loco inferendum, Fig. XXVIII.




Lipsie Observ:
d. 24 Janu. 1684.

XIV. *Quem generationis modum hîc habemus omnium probabilissimum?*

Hîc etiam, ut in superioribus, ingenium suum ostendit Cartesius, sed minus feliciter, ut existimo: nimis enim quæsitæ, & artificialiter conficta, videtur ejus hypothesis, quâ supponit 1.) Nubem ambitu rotundam & quidem 2.) per duos ventos contrarios, alterum borealem, australem alterum; quorum hic à sinistris e. g. ille à dextris, nubem ambientes, ita in rotunditatem eam detornarent, unâ verò australis

lis ambitum illum rotundum nivosa nubis calore suo liquefaceret, borealis econtra liquefactum congelaret; ita formato annulo glaciali ab interiore rariore nubis nive sustentato. Sed hæc nubis rotundæ formatio nimis artificialis, & Naturæ, citra consilium operanti, minus congrua videtur: ut & Honorati Fabri polyedra nubes. Quare hypothesis Gassendi planior multò & minùs quæsitæ videtur, quæ Parhelios & Paraselenes nihil aliud esse supponit; quàm coronarum sive halonum plurium intersectiones, ob geminatam lucem præ cæteris halonum partibus conspicuas; dummodo halonis illius sive circuli grandioris horizonti paralleli, qui plerumque huic negotio sese ingerit, alia planior ratio dari posset, quàm per nubem rotundam Cartesii.

XV. Quid deniq; Virgarum nomine inter emphatica meteora intelligitur?



Duplex datur virgarum nomenclatura. Una denotat eam radiosam luminis Solaris figuram, quam

quam radii Solis ex ejus quasi centro per nubis inæqualiter spissæ, roscidæque vel aquosæ, partes rariores transmissi, instar virgarum in scopis latius gradatim diducunt; (vid. Fig. XXX.) quarum linearum quasi haustris quibusdam Solem aquas ex terris udosis sursum ad se trahere vulgus credit (die Sonne ziehet Wasser dicendo) & postridie pluvias ex haustis ita aquis præ-

Fig. 29.



sagit. Altera virgarum nomenclatura notat seriem linearum diversimodè coloratarum, non ex Sole radioso excursu, sed juxta Solem parallelo ductu variè, ut in iride coloratarum: (Vid. Fig. XXIX.) Cujusmodi quidem virgas nihil aliud esse, quam portionem halonis mutilæ à Solis latere spectatam existimamus.

CAP. VIII.

De

Meteoris ignitis, ad quæ Terræ-motûs etiam referuntur.

I. Cur Terræ-motûs inter meteora censes?

SI vim vocis Μετέωρον, i. e. *sublime* & supra terram in aëre genitum corpus, respicias, terræ motus, qui infra terram gignitur, meteorum appel-

appellari nequaquam potest: Verum si naturam ejus & convenientiam cum aliis corporibus aut massis in aëre sublimi accensis consideres istud nomen ipsi ex parte rei accomodari posse nulli dubitamus.

II. *Quenam est illa terræ motuum & meteororum ignitorum convenientia?*

In eo hæc consistit, quod utrumque ex halitu sicco & inflammabili generetur, dum actu ipso sc. illa accenditur, hac ipsa accensione simul impetum acquirens, aut si viscidior fuerit, in ipso loco accensionis deflagrans. Nec inveniri quidquam potest, quod huic terræ-motuum contingenti similis sit, quàm cuniculi subterranei, die Minen vulgo dicti, qui cum Aristotelis ævo, una cum pulvere pyrio, res ignota penitus essent, illam veram & genuinam causam hariolari non potuisse mirum esse haut debeat; tametsi materiam exhalationem siccam esse, qualem etiam in meteoris ignitis agnovit, ipsi jam suboluerit.

III. *Fiat applicatio quædam paulò distinctior Cuniculorum bellicorum?*

Quemadmodum Cuniculi (1) cavitatem aliquam & quasi cellam subterraneam supponunt, in qua (2) pulvis pyrius artefactus ex nitro, sulphure, & carbonibus minutissimè contusis &c. (3) ex improvviso aut destinato consilio accensus, in halitum copiosum subito expanditur, qui spatium sufficiens in ejusmodi cella angustiore

stio & humiliore, insuperque undique fere obturata, non reperiens, impetum suum in hujus parietes & superimpendentem quasi terræ fornicem incredibili violentiâ exserit, ac sæpe incumbencia corpora ponderosissima loco movet & in altum projicit &c. Ita terræ-motûs sub terris cavernosis, ubi magna halituum inflammabilium copia collecta & ex improvise accensa fuerit, pari expansionis subitanæ violentiâ, similes strages, fragores, rupturas &c. causari probabile est.

IV. At enim verò, cùm pulveris pyrii accensio in cuniculis ordinariè humano consilio fiat, simile quiddam de cuniculis istis naturalibus supponere haut licet?

Ut non dicam, in istis artificialibus haut rarò ex improvise fortuitoque accensionem fieri, fortuitæ saltem in his naturalibus accensiones quo pacto possint contingere, non adeò difficile est hariolari. Habemus certè in Chemicorum officinis exempla plurima liquorum plurium sensibilibus frigidorum, qui permixti sibi & inter se confusi, subitaneum sæpe fervorem & ignescentiam causantur, ut exortus inde calor manibus vasa mixturam recipientia prensantibus ferendo non sit, in quibusdam casibus autem fumos adeò rubentes rutilosque in aère excitent, quos in tenebris candere & ignem flammantem exhibituros credibile sit. Peculiarem autem accensionis fortuitæ modum suppetavit

ditavit ante plures annos turris Limericensis in Hibernia, cujus collapsa saxa mutuo allisu ignem accenderunt, à quo pulvis pyrius in profunditate turris absconditus, insperato accensus magnam urbis civiumque stragem edidit; testibus novellis Londino perscriptis d. 8. Martii st. n. 1694.

V. *Multæ verò sunt harum accensionum subterranearum varietates & multum diversa contingentia?*

Ita est omnino ut dicis; & hinc etiam sunt illæ variæ terræ-motuum denominationes apud Aristotelem, Senecam, Plinium, aliosque, ut alius *Tremor*, alius *Inclinatio*, *Succussor*, *Ruptor*, *Projector*, *Subversor*, *Mugitor* dicatur; prout sc. accensionis subterraneæ effectus accidentaliter variant, pro varietate materiæ inflammabilis, paucioris aut copiosioris, profundius altiusve positæ, in amplioribus cavernis subterraneis collectæ, aut per angustiores plures, arctis meatibus & anastomosibus quasi communicantes, longè lateque dispersæ &c. è quibus varietatibus innumeris, effectuum etiam inenarrabilis varietas promanat; ut e. g. aliquando brevissimè durent, uno singulari, vel paucioribus interruptis pulsibus finiti: nonnunquam in dies, in menses, in annos, per intervalla tamen continuati &c.

VI. *Quid per illa subterranearum accensio- num contingentia intelligis?*

Comprehendo hac voce generatim eam ipsam effectuum varietatem, quam quæst. præced. obiter attigi. Deinde verò specialius quædam singularia & præ cæteris memorabilia facta, qualia sunt e. g. Montium disruptorum evomitiones flammaram horrendæ, quales in *Ætna* & *Vesuvio* suis oculis ætate suâ inspexit, & in *Mundo Subterraneo* nobis descripsit ac depinxit *Athanas. Kircherus*; Lacuum, fluviorum & fontium exortûs, ubi horum antea nihil extiterat; urbium montiumque subitanæ absorptiones, qualem de *Euphemia* *Calabriæ* urbe narrat cit. l. idem *Kircherus* oculatus testis in *Præf. cap. II.* [*Conf. p. 77. & 357. Tom. I.*] Econtrà fluminum, fontium & lacuum evanescentia, ubi priùs fuissent; & quæ sunt hujus generis alia miranda accidentia, quæ fufius enaravimus & ad causas suas naturales reduximus antehac in peculiari *Disp. de Terræmotibus*; ad quam *Lectores* nostros remittimus.

VII. *Num similis fortè est tonitruum in nu- bibus, quæ subterraneorum illorum ratio?*

Ita quidem olim *Aristoteli* aliisque veterum visum fuit; neque deesse ibi materiam inflammabilem, fulgurum, fulminumque phænomena satis evincunt. Verum, ut exhalationes istas nubium cavitatibus ita includi supponamus; ut
vel

vel intrinseco quodam impetu, vel accensione intercedente, nubium latera intus pulsant, aut resistentia fortiùs, tandem perrumpant, eâque rupturâ fragores istos ingentes & sonitûs horrendos edant &c. id verò quî conciliem cum laxâ raraque nubium substantia, quam suprà cap. VI. quæst. XIII. proprio experimento confirmavi, hætenus non reperio. Nec enim cavitatem in nubibus concipere possum, quæ nihil aliud sunt quam nebulosæ quædam congeries vaporum & exhalationum tenuissimarum; multò minùs illorum aliquam cohærentiam, à qua resistentia quædam dependere valeat, quæ has, etiam accensas, impediat, quo minus inter illos liberè quaquaversum dispelli & avolare potiùs possint, quàm perrumpendo fragorem aliquem excitare.

VIII. *Quidni ergo per solam accensionem
materie vel exhalationum inflammabilium
tonitrua excitari cum Honorato
Fabri credimus?*

Ita certè non alios solùm pulveres fulminantes, sed communem etiam pulverem pyrium, etsi vasis aut tormentis non inclusos, sed in aëre aperto accumulatos, ubi accenduntur, ingentes fragores edere compertum est; aërem sc. subitanè suâ displosione violenter dilatantes, quâ violentiâ mox cessante, is elasticâ suâ virtute subitò restituatur, non sine multis oscillationibus ac librationibus, in quibus moti aëris reciprocationibus natura soni præcipuè

consistat. Unde etiam ratio petenda videtur, cur tonitruum non sit unicus tantum & subitaneus, sed continuatus & undulabundus quidam fragor sonitusque; quas undulationes, multiplex etiam reflexio ex vicinis montibus, sylvis &c. multum augere ac diutius continuare potest. Vid. quæ suprà Sect. III. cap. IX. quæst. VI. Part. Gen. allegavimus aucti Soni exempla. Hæc utique omnia magnam habent veri speciem: sed hoc tamen animadversione dignum est, quod nunquam tonitrua sereno undiq; cælo, nisi forte è longinquo audiantur; sed nubibus obductus aër ordinariè tonet, ut nubes ad hunc effectum aliquid conferre saltem probabile videatur.

IX. *Quid igitur conferre tandem nubes possunt?*

Non conferunt solum nubes aliquid, ex mente Cartesii, sed rem ferè totam solæ faciunt. Sic enim ille de Meteoris cap. VII. n. V. non dubitare se, ait, quin tonitrua, fulmina &c. ex eo oriantur, quod, cum plures nubes, tabulatorum instar, unæ aliis superstratæ sint, interdum contingat, superiores magno impetu inferiores delabi: Ut, si duabus nubibus ex nive rara maximeque expansa compositis, aër calidior tam circa superiorem, quàm circa inferiorem, feratur; manifestè liquet, calorem hujus aëris illam paulatim condensare & ponderosiores reddere posse; adeò ex ejus partibus, quæ altissimæ sunt, primæ descendentes, alias quæ ipsis in via occurrunt, deturbent & se-

& secum rapiant, atque ita omnes simul magno fragore sonituque in nubem inferiorem ruant. Eodem modo, quo in Alpibus olim circa mensem Majum se vidisse meminerit, vi Solis calefactâ nive & ponderosiori redditâ, minimùm aëris motum subitò magnas illius moles devolvissè, quæ in vallibus resonantes, fatis benè tonitruui sonitum imitabantur.

X. Quid de hac antiqua hypothesi, quam Cartesius pulchrè interpolavit, censendum putas?

Antiquam dixi hanc hypothesin, quia Seneca Lib. II. Quæst. N. cap. XXXIII. hujus collisionis nubium mentionem facit, & Anaxagoras apud Laërtium, Stoici item apud Stobæum eam probârunt. Nullibi tamen speciosius illa quàm apud Cartesium exponitur. Et certè audimus sub vernum tempus haut rarò decidentes extectis nostris condensatas & semiliquescentes nives fragores in subjacentibus excitare tonitru non dissimiles. Nec est, quod quis hîc objiciat illam, quam nos suprâ qu. VII. objecimus, nubium tenuitatem: Nam 1.) nubes è sublimi lapsura supponitur jam multò condensatior, quàm ea quæ in aëre adhuc suspensa natat; 2.) ad sonitum ejusmodi obtusum qualis est tonitru, non requiri magnam densitatem, multò minus soliditatem aut duritiem corporum ad se invicem allisorum, linteaminum expansorum subitanea per aërem nudum excussio docet; ac 3.) aquarum in cataractis delapsus in alias sub-

L 1 3

jectas,

jectas, ingentes strepitus ac susurros excitat; & 4.) tormentorum tonitrua, naturalium æmula, non nisi latam quandam ac celerem aëris ab halitu pulveris pyrii factam dislosionem supponit. Quibus 5.) accedit manifesta quædam in aëre tonante desuper facta undulatio; & 6.) immediatè tonitruui plerumque succedens pluvia, quæ aliunde vix rectius quàm ab excussione floccorum plurium ex nube percussa turmatim deturbatorum, deducetur.

XI. Num verò specialiorum etiam Phenomenorum circumstantiis satisfacere potest hæc suppositio?

Plerisque omnibus, ut opinor. Nam quòd e.g. hieme rariùs quàm æstate tonet, ratio in promptu est, quia tum non tam facile calor sufficiens nubibus dissolvendis ad superiores usque pertingit: quòd item tempore vehementis æstus, quando vento Septentrionali, qui diu non duraverit, calor humens & veluti suffocans denuò succedit, tonitru postea sequi soleat; hoc enim testatur, ventum illum Septentrionalem, ad terram accedendo, calorem inde in illam regionem aëris egisse, in qua nubes sublimiores formantur, ipsumque etiam ventum postea è vicinia terræ fuisse expulsam ad illam regionem aëris, in qua sunt nubes inferiores; nempe à vaporibus tepidis qui è terra calente egredientes, aërem infimum dilatârunt. Unde fit, ut non modò superiores nubes condensari debeant & delabi, sed etiam inferiores adeò raræ atque exten-

extensæ remanere, aërisque subjecti dilatatione ita sursum protrudi, ut alias in se cadentes excipiant, ibique sistant, & sæpe etiam, ne quid omnino ex iis ad terram usque descendat, impedian.

XII. *Sed cur fragor ille tantus est, Unde oriuntur omnes ejus differentia?*

Dicit Cartesius notandum esse, illum strepitum, qui supra nos ita excitatur, melius exaudiri debere, ob aëris circumquaque positi resonantiam, majoremque esse pro copia decidens nivis, quam cum ingentes licet nivium moles è montibus in valles delabuntur. Notandum etiam ex hoc solo, quod partes nubium superiorum vel omnes simul decident, vel una post aliam vel tardius vel celerius; vel quod inferiores majores aut minores crassiores aut tenuiores sint, & magis aut minus obnitantur &c. facillimè omnes diversos tonitruum sonos effici posse.

XIII. *Quandoquidem verò cum tonitru plerumq; conjuncta esse solent fulgetra, turbines, fulmina &c. quo pacto horum omnium varietates ex illo lapsu nubium consequuntur?*

Differentias has ex supposito quidem lapsu nubium superiorum in inferiores deducit Cartesius, sed insimul supposita diversâ naturâ exhalationum, quæ in spatio, quod duas nubes

interiacet, reperiuntur. E. g. si de fulgetris quæstio sit, & cur interdum fulguret absque tonitru, aliquando contrà tonet absque fulgure? Respondet Cartesius: Si magnus æstus & siccitas præcesserit, atque ita illud spatium inter duas nubes, exhalationes copiosas, maximè subtiles & ad concipiendam flammam aptas contineat; superior nubes ferè tam exigua esse nequit, nec tam lentè descendere, quin impulsio aëre inter se & inferiorem medio, fulgur aliquod elidat, i. e. flammam levem eodem momento enascentem. Atque ita tum hujusmodi fulgura cernere possumus, nullo omnino tonitru murmure exaudito, interdum etiam nubibus non ita densis, ut conspici possint: Contrà verò, si nullæ in aëre exhalationes inflammationi idoneæ adsint, boatum quendam tonitru audire possumus, nulla corruscatione apparente. Quibus hoc unum nos addimus: sæpe nos fulgura videre, præsertim sub noctem circa horizontem, (wann sich der Himmel abfühlt / uti loquimur) nullo audito tonitru; non quòd nullum sit, sed quòd longius à nobis quàm ut audiri possit, fulgure interim ex maxima etiam distantia, præsertim in tenebris, ad oculos usque penetrante.

XIV. *Quo pacto verò turbines & fulmina, hac hypothesis stante, deducuntur?*

Si non pars aliqua nubis amplioris, sed tota simul satis velociter decidat. Tunc enim ejus extremi-



Fig. 31. num. 1.




Fig. 30. num. 2.

tremitates C ac D (Fig. XXXI. n. 1. & Fig. XXX. n. 2.) paulo celerius quàm ejusdem medium descendunt; quia, cùm aër illis subjectus minus itineris conficiendum habeat, ut inde egrediatur, quàm ille qui medio subjicitur, facilius iis locum cedit; & his ita nubem citius contingentibus, multùm aëris versus medium includunt, ut hîc videtur in E; statimque postea hic aër magnâ vi pressus, & expulsus ab eodem nubis superioris medio, quod pergit descendere, viam necessariò sibi facit, vel perrumpendo nubem inferiorem, ut videmus ad F, vel aliquam ex ejus extremitatibus divellendo, ut ad G. Atque ita, aperta hac nube, magno impetu in terram ruit, unde statim rursus ascendit, se celerrimè circumagendo; quoniam alius aër aut alia corpora occurrentia impediunt, ne secundum rectam lineam moveri pergat æquè velociter ac agitatio ejus requirit; quo fit ut turbinem componat. Et quidem hic turbo sine fulmine & fulgure esse potest, si nullæ sint prorsus in isto aëre exhalationes, ad concipiendam flammam idoneæ.

XV. *Fulminum igitur diversorum etiam ratio facile nunc dabitur?*

Hæc utique generalis; si satis multæ sint exhalationes inflammabiles inter utramque nubem, quæ omnes in unum cumulum coeunt & magno impetu simul cum turbine in terram ruentes, incenduntur. Potestque hoc fulmen interdum hominum corpora non lædendo ipsorum vestimenta comburere, pilosque ad cutem depascere; cum nempe exhalationes quibus constat, quæque sulphur solent redolere, non aliam quam oleorum naturam participant, adeò ut levem tantum flammam nutrant, quæ non nisi corporibus combustionem magis idoneis adhæret: Ut econtra, interdum ossa carnibus integris confringere, vel vaginâ illas gladium liquefacere potest, si hæ exhalationes maximè subtiles & penetrantes, solam salis volatilis, aut aquæ fortis, naturam habeant; tum enim sine injuria cedentia corpora præterlapsa, quicquid resistit comminuit ac diffringit; sicut & aqua fortis, durissima metallorum corpora resolvens, vix quicquam agit in ceram.

XVI. *Quid de lapide seu cuneo fulminari sentiendum videtur?*

Cartesius equidem existimat l. c. num. X. fulmen interdum in lapidem durissimum, omnia obvia rumpentem ac disjicientem, converti posse, si penetrantibus istis exhalationibus, multæ aliæ pingues & sulphureæ immisceantur; præ-

præsertim si crassiores etiam adsint, similes ei terræ, quæ in fundis vasorum in quibus collecta est aqua pluvia subsidit: provocatque ad experientiam aliquam, quâ, si hujus terræ, itemque nitri & sulphuris certas partes simul misceamus, misturamque illam incendamus, illam momento temporis in lapidem quendam concreescere discamus. Verùm, quicquid sit de hoc experimento, lapis hîc seu cuneus fulminaris mihi semper suspectus fuit.

XVII. Propter quas rationes autem eum suspectum habes?

Primò ideò, quòd cùm generatio ejus debeat esse momentanea, (successivè enim ex materia sensim compacta, quæ subsistere in aëre ob gravitatem non posset, concreescere haut valeret,) intra momentum autem tantam soliditatem ac duritiem, quanta his cuneis vulgò attribuitur, aut in illis qui pro talibus ostentantur, deprehenditur, produci sit penitus incredibile. *Secundò* quod plura quidem genera talium cuneorum, aliorum pellucidorum, ac diversi coloris, aliorum opacorum, passim quidem ostendantur & in certis familiis hæreditario transferantur, sed sine certo fundamento, à quo & quo loco, quibusve circumstantiis inventi sint, ex quibus indubie constare potuerit illos cum fulmine ex aëre decidisse: ut meritò videantur ejusmodi cunei fulminares tralatitii, eodem censu habendi, quo patellæ aureæ Iridum, quas nihil aliud esse quàm rude genus

num.

nummorum antiquitus cusorum, ferè evictum est, atque adeò ratione originis ex iridibus merum figmentum. Maximè quòd *tertiò* nunquam, in urbibus etiam spatiosissimis (quales sunt, Londinum & Lutetia Parisiorum, ad quod posterius exemplum Rohaltius provocat) delapsus in vicos aut plateas ejusmodi cuneus casu observatus; nec etiam *quartò* in iis locis, quæ fulmine percussa fuerant, studiosè quæsitus licet reperiri potuerit. Quibus *quintò* illud quoque accedit, quòd explosus ita ex alto, adeoque cum maxima acceleratione, lapis lineâ rectâ ferire & per-rumpere deberet; cum è contrario ipse observa-verim in duabus quercubus percussis, fulmen unam à fastigio ad radicem usque, duorum digi-torum latitudine, spiratim, alteram verò directo quidem sed incurvato, ductu, (prout sc. ipsa quercus notabiliter incurvata erat) decorticasse.

XVIII. *Quo pacto igitur fulmen absq; hujusmodi cuneo solido & duro arborum ramos de-cutere, integras etiam arbores diffringere, ædium tecta lapidea comminuere, mu-ros & saxa disjungere aut te-rebrare &c. poterit?*

Hæc omnia halitum etiam accensum præ-stare posse, facile concipiet, qui vim accensi pulveris pyrii, in explodendis globis tormenta-riis, in posternendis, etiam sine tali globo, ædi-bus aut suffossis turribus, in findendis quercu-bus terebratis robustissimis &c. consideraverit, ac præterea ad seqq. attenderit: Quòd (1) suphu-reus

reus ejusmodi halitus in putridum aliquem ex pluviis frequentissimis inter bifidos ramos hiatum sese insinuans corticem motu suo vel vorticofo, vel incurvo, (quem arboris incurva figura aut antecedens turbo determinavit) dicto modo deglubere possit : quòd (2) ramos decutere, vel integras arbores infringere valeat, si contingat fulmineum halitum vel perpendiculariùs in extremitates frondosas ramorum vel obliquiùs in summitatem alicujus arboris illabi, & sic ramo vel stipite, tanquam vecte, in arboris perniciem abuti : quòd (3) similiter inter tegularum quasi squamas, vel saxorum juncturas & fissuras se insinuans, ea dimovere ac disjicere possit : quòd (4) ipsa saxa solida, aut hominum animaliumque crania in acumen explosus halitus perterebrare, aut carnes etiam perforare possit, quòd denique (5) sine tali læsione aut laceratione, homines percussos humi prosternere tanquam exanimas, aut reverà, suffocando magis, quàm percutiendo exanimare queat.

XIX. Illud tamen maximè dubium me adhuc habet, qui possit accensus inter nubes, & ab istis dicto modo explosus halitus vim istam suam stupendam ita collectam servare, ut in tam longa via, à nubibus usq; ad terram non distrahatur ac debilitetur?

Hoc ipsum est, quod Gassendum Animadvers. in Diog. Laërt. p. 1019. in fine & sequ. initio, aliosque Viros Doctissimos adegit, ut per accensionem materiæ inflammabilis inter
nubes

nubes collectæ & compressæ, gigni subitò cre-
dant *συννογαι* (quas vocat Epicurus) sive *glome-
res* fulmineos extus crustâ viscidâ & bituminosâ
ardente tumentes, intus autem nitrosam, sul-
phureamque materiam concludentes; qui ex
nubibus ejecti & ad terram usque explosi, ibi
demum (flammâ interim per crustam exterior-
rem ad mixturam interiorum sulphureo-
nitrosam penetrante) rumpantur, & in vicinia
nostra fragores istos horrendos edant, corpo-
raque tacta collectis adhuc viribus multiplici ad-
eò strage afficiant: eodem ferè modo, quo an-
te hac globi metallici cavi, intus materiâ subitò
inflammabili referti, orificium autem viscidâ
& bituminosâ materiâ obturantes, (quos *gra-
natos* tum dicebant, nunc autem ingenti mole
auctos, *Bombos*, *Bomben* appellant) ex morta-
riis explosi non statim disrumpuntur. Sed con-
ceptum in materia viscida exteriori ignem ad
interiora paulatim transmittunt, ut interea ad
locum destinatum delati, ibi tandem displodan-
tur, & collectis adhuc viribus accensæ mixtu-
ræ sulphureo-nitrosæ tantas strages in vicinis
corporibus edant.

XX. *An verò suppositorum horum glome-
rum fulmineorum exempla vel indicia qua-
dam habemus?*

Ad hoc quæsitum dicendum est: Utique
non deesse exempla cœlitus delapsorum visibi-
liter glomerum igneorum, etsi sine noxâ; po-
steaquam sc. jam in aëre à nobis remotiore (quod
sæpe

sæpe fit procul dubio) displosi fuerant; & Gassendum c. l. p. 1021. supponere tanquam rem notoriam & vulgo mirabilem, quòd ignis è cœlo demissus &, vel fenestrâ, vel effracto tecto ædificium ingressus, huc illuc veluti dissiliat, & hîc tabulatum v. c. perforet, illic lapidem è pariete moveat, alibi per scalam elapsus aliquid ejiciat &c. cujus certè consimile prorsus exemplum habuimus in eo fulmine, quod arcem oppidi nostri percussit, in tecti parte occidentali, ad fenestram borealem mediæ contignationis, ad scalam ejusdem interiorum, ad ingressum ædium infimum in parte orientali &c. quòd nim. ex mente Gassendi, (p. 1021) non unum esset & simplex fulmen, variè impactum ac resiliens, illaque omnia peragens: verùm aggeries plurium, propter complures glomeres coacervatos, quorum unum crepuerit ad tectum, alterum tabulatum perforet &c. aliud alia sine noxa contingat, quòd fortè paulò longiùs ab istis in aëre paulò altiore crepuerit &c. &c.

XXI. Quo pacto verò tam subitanea illorum glomerum fulmineorum generatio concipi potest?

Ad hunc conceptum formandum plurimùm facere credo experimentum casu olim mihi oblatum, circa stricturas candelarum sebacearum aquosiorum, quas accensæ illæ & ardentes continuè explodunt. Incessebat me aliquando lubido stricturas istas, qualem figuram haberent, ope

ope microscopii lustrandi. Excepi ergo earum plurimæ chartâ nigrâ, ut earum figura tantò appareret distinctior. Vidi autem non sine voluptate, stricturas istas omnes accuratè rotundâ sive globosâ figurâ esse præditas: Et cùm conjectare facilè possem, illam rotunditatem ex eo provenire, quòd explosione illâ flatus quispian in materiam sebi viscidam intromissus occasionem aëri undiquaque prementi dedisset, rotunditatem eodem modo conciliandi stricturis istis, quo massa quædam vitri liquefacti, immisso flatu, ab aëre circumprimente in sphæram cavam in momento formatur; suspicatus statim fui, globulos illos sebaceos intus cavos esse: id quod etiam ipso facto apprehendi, cùm ejusmodi globulum sebaceum sub microscopio intuendum in solis radiis locarem. Vix enim hoc factum erat, cùm ecce, liquefactâ superiore globuli parte & à calore absumtâ, interiorem ejus cavitatem distinctè satis animadverterem.

CAP. IX.

De

Reliquis Meteoris ignitis.

I. *Quænam intelligis hîc per reliqua Meteora ignita?*

EA intelligo, quæ noctu maximè in sublimi conspiciuntur, nativâ quadam luce prædita, sive ea calida sit & urens unâ, sive tantum-lucens, ustorîâ virtute, & calore sensibili, destituta;

ta ; qualia plurima sunt , sub nominibus ignium fatuorum , lambentium &c. Item Stellarum cadentium , Draconum volantium , Caprarum saltantium , Glypeorum ardentium , Trabium , Columnarum , & similibus venire solita , quæ maximam partem ab hominum vulgo , excogitata sunt , & à qualicunque figurarum similitudine petita.

II. *Velim hæc nomina singula mihi explices , sed ita , ut ipsius rei naturam simul declares ; facto quidem ab ignibus fatuis initio.*

Fatuus ignis vel inde dicitur , quòd irregulari & inordinato motu , instar fatuorum , per aërem discurrant ; vel , (quod credibilius) flammam in tenebris nocturnis oculis ingerant , sed fatuam eo sensu , quo urticæ quandam speciem fatuam appellamus , quæ formâ externâ quidem urticæ , propriè ab urendo sic dictæ , similis quidem est , at urendi virtute , & spiculis istis è foliis prominentibus , quibus pungere contactam cutem , & pungendo succum quendam dolorificum in subtile vulnusculum intromittere creduntur , careat. Quam equidem carentiam ea experimenta probant , quæ tales ignes hominum vestimentis , animalium pilis , aliisque corporibus aliàs facillimè adurendis sine noxa adhæsisse testantur.

III. *Quenam est materia talium ignium fatuorum , & unde sunt eorum inordinatûs motûs ?*

Materiam esse exhalationes valdè tenues , iis analogas , quæ ex piscibus & lignis putridis exhalant

halant & luculam quandam in tenebris oculis ingerunt. Vagabundus autem & errabundus eorum motus (à quo vulgò *Irwische* & *Irrelichter* dicuntur) ab aëris fluctuatione quadam dependet procul dubio; qualem arguunt de die rerum levicularum, ut plumarum, bullarum saponariarum, & similium variæ sursum, deorsum, quaquâversum observabiles cursitationes, aëris, etiam cum tranquillissimus videtur, fluctuantis inconstantiam arguentes.

IV. Ergo plebejorum hominum opinio, quæ hos ignes pro spectris habet, & Viatores ad præcipitia vel aquarum pericula seducere tradit, parum habebit fundamenti?

Parum utique, meo quidem judicio. Quod enim tenues hæ flammulæ, in aëre graviore quasi natantes, ad præcipitia nonnunquam, & ad aquas frequentius devehantur; illud quidem omnino per accidens & casu quidem fieri videtur, quatenus nimirum ab aëre nunquam prorsus tranquillo, pro datâ vel à ventulorum flatibus, vel hominum animaliumque motibus occasione, huc illuc, incerto motu devehantur: hoc autem ex ordinaria magis causa quadam, ob quam aër de die quodammodo calefactus, receptum calorem super terra sicca diutiùs servat, quàm super aquas, ibique adeò rarefactior & altior, ad hunc frigidior & condensatior, humilioremque descendit, & errabundas

bundas istas luculas unà secum eò defert. Neque verò infontes hæ luculæ viatores seducunt, sed horum erroneum iudicium, quod illas, pro candelis ardentibus & facibus in pagis & arcibus editioribus habitas, incautè sequitur.

V. *Sed fugere feruntur cordatiùs insectantes, timidiore autem & fugientes insequi?*

Ita quidem feruntur, imò reipsâ fortasse ita sequuntur alios, & alios fugiunt; sed absque proposito & ex causa merè-naturali. Nam qui audaciùs ipsis, præsertim cum impetu quodam, obviant, illi aërem ante se, & istas luculas in ipso pendulas necessariò propellunt, ut fugere videantur; uui verò timidè fugientes, illos à tergo relinquunt, ii, dum aërem ante se fugiendo protrudunt, alterum posticum, per circulationem quandam, sese insequi faciunt, & flammulas errabundas ipsimet unà cum aëre in se concitant.

VI. *Annon autem credibile est, aliquando saltem malos genios in perniciem mortalium hos ignes dirigere?*

Fromondus certè Lib. II. Meteorolog. cap. II. ed. Londin. p. 44. manifesto se exemplo cujusdam affinis sui, sæpè id sibi denarrantis, ostendisse putat, quem nocte redeuntem oppido Viseto Haccuriam, natalem Fromondo locum, æquali distantia inter Leodium & Mosæ-Trajectum jacentem, medio campo circumvolave-

rint subito tres quatuorve ejusmodi faces fatuæ: ipsum verò perterritum abjecisse se illicò in terram, & permanfisse quidem illas ac uno alteroque passu ab eo distantes, fixas & immobiles circumluxisse. Cùm diutiùs terræ inhæreret & invocaret DEI opem, illas inde absiliisse dimidio ampliùs milliari, cùm exurrexisset, quasiliber vidisse illas transvolâsse Mosam; sed ecce, vix duos aut tres passus ipso conficiente, revolâsse derepentè & cinxisse ut priùs: ibi ipsum majori terrore in terram recidere, & pertinaci procubitu tamdiu fatigare, donec rursus sine reditu diffugerent. Non equidem absolutè negaverim id quod quæstio proposuit; utrum verò præsens narratio affirmativam, (quod putat Fromondus) evincat, ego valdè dubitaverim, utpote hominis timidissimi & consternatissimi testimonio tota nixa, qui distantiam loci ad quem avolârunt illæ faces, & unde deinde redierint, æstimare præ consternatione vix potuerit, præsertim in tenebris, quæ paucorum passuum distantiam sæpe ut ingens intervallum, & contrà exhibent; credoque circumstantias cæteras omnes, secundum hæcenus dicta, naturaliter contingere potuisse.

VII. *An illi ignes, qui Castoris, Pollucis & Helenæ nominibus vocari solent, inter fatuos numerari possunt?*

Vix alia quàm loci differentia reperietur; ut ignes fatui dicantur, qui super terram & loca uliginosa, circa paludes, cœmeteria, patibula

bula &c. ex halitibus quodammodo viscidis generantur : super maria autem (quæ multum etiam uliginis habent) simili modo geniti, novis istis nominibus à nautarum gentilium superstitione quondam appellati fuerunt ; quâ sibi persuaserant geminatos ejusmodi ignes (quos hodie Hispani & Galli simili ferè superstitione, *S. Helmi aut S. Telmi*, Itali verò *S. Petri & Nicolai ignes* nominant) faustos esse navigantibus, & Piratas suâ præsentia profligare ; unicum autem, mali ominis indicem crediderant ac tempestates minari, ideò *Helenam* appellatum, ideò fortè, quòd Helena à Paride rapta calamitosæ obsidionis Trojanæ occasio fuisset. Hinc orta procul dubio consuetudo effigies Castoris & Pollucis pro insigni in prora navis figendi ; cujus exemplum habemus Actor. 28. v. 11.

VIII. *Quid ignem lambentem vocamus, & quomodo is à præcedentibus differt ?*

Fortasse ne hîc quidem essentialis differentia reperitur ; quandoquidem ne hi quidem urunt, adeoque fatui sunt, & lambentes ideò dicuntur, quòd crinitis animalium partibus, imò & vestimentis aliisque rebus, citra adustionem ullam adhærere solent ; id quod de ignibus fatuis, de Castore item & Polluce, malis & antennis velisque navium adhærere solitis, similiter asseritur. Speciatim autem hi lambentes ignes ideò sic dicuntur ; quòd eorum materia ex equis aliisque jumentis calidioribus &

fudantibus exhalans ipforum auribus, pilis, ac
jubis immediatè adhærens, ejusmodi luculam,
calore & vi ustivâ destitutam, instar ligni pu-
tridi, vel putridarum squamarum, quorundam
piscium, exhalent: ut in eam ferè sententiam
deveniam, nullam omnino in his ignibus, aut
rectius Noctilucis, accensionem vel inflamma-
tionem intervenire; sed rem omnem eo modo
peragi, ut in Noctilucis seu Phosphoris artifi-
cialibus.

IX. *Quid intelligis per has Noctilucas seu Phosphoros artificiales?*

Intelligo artefacta quædam chymix ope pa-
rata, vel sub forma liquoris alicujus vel sub for-
ma sicca, quæ leviter commota vel adfricta lu-
cem de se spargunt aut momentaneam vel pa-
rum durantem; aut durabiliorem, citra calo-
rem tamen vel adustionem plerumque operan-
tem. In forma liquida asservantur ordinariè in
lagenulis vitreis vel undiquaque pellucidis, in
quibus concussus aut agitato tantisper liquor,
in tenebris totam earum cavitatem candidulâ
luce replet, sed subito, ubi agitatio cessaverit,
iterum evanida; vel undiquaque obscuro quo-
dam pigmento opacatis, nisi quòd erasis pul-
chrè literis & scripturis pelluceant, & agitato
liquore dictas scripturas in tenebris distinctissi-
mè legibiles exhibeant. In forma sicca, instar
massularum cretacearum diversi communiter
glauco, griseo, coloris, in ejusmodi liquore
asservantur quidem, sed exemptæ illæ supra
char-

chartas describunt instar cretæ literas flamman-
tes quasi & lucidissimas, aliquandiu etiam dura-
biles & unâ cum charta de loco in locum trans-
portandas.

X. *Unde parantur hi phosphori sive hæ
noctiluce?*

Occultatum diu fuit hujus artefacti mira-
bilis fons & origo Kunckelio & Krafftio cum-
primis ejus præparationem inter arcana servan-
tibus. Sed Boylius Anglus Chymicorum ex-
cellentissimus, monstratis sibi à Krafftio Nocti-
lucâ tum consistente sive siccâ, tum liquidâ, (de
bus Dn. Kirchmayerus Prof. quondam Witte-
berg. peculiarem disputationem habuit) post re-
petita frustraneorum tentaminum tædia, confe-
cit tandem *Noctilucam* à prioribus istis differen-
tem, *Aëream* dictam, ejusq; descriptionem & præ-
parationem fideliter anno 1680 Anglico idio-
mate in lucem edidit, materiam ex quâ indi-
cans Urinam humanam putrefactam, ad consi-
stentiam spissioris Sirupi inspissatam &c. Vid.
Act. Lips. ad ann. 1682. p. 53. & 54. & conf. e-
jusd. anni p. 282. seqq. Inprimis ad ann. 1684.
p. 246. quâ Krafftiani sive Kunckeliani compo-
sitio prolixè docetur. Talis autem liquor na-
turaliter dudum paratus reperitur in ventre
lampyridum per maculam candicantem qua-
dratam effulgens, quem binis quasi sacculis in-
clusum, ultrò citroque commeare observavi
per microscopium in tenebris.

XI. *Sed quorsum hæc de Noctilucis hoc loco?*

Ut innuam, quandoquidem hæ noctilucæ ex urina parantur, animalium sudor autem cum urina magnam cognationem habet (utrumque enim feri quoddam excrementitii genus est) originem ignium lambentium ex equorum aliorumque jumentorum sudoribus facile conjectandam esse: maximè, quòd Acta Lipsiensia ad ann. 1682. è collectionibus Anglicis D. Slare excerpta p. 285. referant, D. Croon suum corpus indusio recenti & calefacto fricando, utrumque lucere facere; & Nobilem quendam Bristolensem unà cum filio narraffe, quòd tibialia sua, post diuturnam deambulationem, frequentius luceant, in tenebris puta, quod utrobique procul dubio subintelligendum est. NB. M. Keuffelin Tubingensis studiosus, cum se sub noctem in tenebris exueret, sæpe totus quasi collucebat; narrante mihi ejus contubernali oculato teste M. Phil. Joseph Jenischio.

XII. *Nunc igitur ad alia meteora verè-ignita & flammantia transire licebit?*

Licebit utique, si tribus adhuc verbis meminimus phænomenorum quorundam instar lucularum lambentium sine vera flamma & igne centium, quibus Spirituum lucentium generale nomen imposuit Fromondus, quod *patere* ait, *in equis & felibus, quos, si adverso pilo vehementer frices, scintillas (nec puto ardentes) excuties: pari*
ratione

ratione si saccharum in densis tenebris cultrum confrices, flammæ perpetuas, vix irritò ullo ictu, emicantes videbis. Quibus exemplis meritò nos ad-
 jicimus lucentem nonnunquam (æstivis præsertim noctibus, quarum unâ insperato mihi, cùm ante hos annos 40 circiter Amstelodamo Hamburgum navigarem, oblatum est hoc phænomenon) vastam oceani superficiem. Quorum omnium rationes à spirituofo quodam halitu, per affrictionem aut concussionem, vel etiam compressionem aliquam elicitò, peti non repugnabo (veluti Boylium alicubi narrare memini se possidere adamantem vilioris generis, qui pressus in tenebris nocturnis cuspide ferreâ, lucis scintillas emittat;) putârim tamen, etiam solo pilorum rigidorum & fluctuum marinorum motu & collisione aërem, aut ætherem potiùs in aëre, ita concitari in motum aliquem rectilineum posse, qui oculo lucis aliquem sensum in tenebris incutiat.

XIII. *Quinam igitur sunt illi ignes, non lucentes tantum, sed verè-ardentes in aëre sublimiore nasci soliti?*

Est principaliter *Drato volans*, dein *Lancea* & *Clypeus ardens*, *Stella* porrò *cadens*, *Stipula ardentes*, *Capra ardentes*, *Trabs* item & *columna* seu *pyramis* &c. quæ pleraque omnia essentialiter convenire, solaque figurâ aut motûs varietate accidentariâ differre videntur, nonnunquam etiam copiâ & multitudine exhalationis inflammabilis; ubi cum primis memorabilis est *Fax* seu *Lampas volans*, magnum meteoron, quod in

Italia, d. 31. Martii 1676 post occasum Solis in diversis & satis diffitis locis, & Epistolicâ Dissertatione à Petro M. Kavina secundum - editâ prolixè descripta, Faventiâque ad nos transmissa fuit.

**XIV. Quenam fuerunt magni illius meteoris
sive Draconis volantis præcipuæ cir-
cumstantiæ?**

Faventina observatio sequentes enarrat: Silente Lunâ, obscuro, sed sereno cœlo, prætereuntium oculos improvisus, tanquam diei splendor inopinatâ luce percelluit. Erectis ad insolitum jubar luminibus, sese obtulit à parte Orientis æstivi Fax, seu Lampas ardens, Lunæ totali seu *πενσελήνω* apparenter similis, quæ motu progressivo in meridianum assurgens post se caudam trahebat trium ferè similium diametro- rum, radios undiq; sibilo ceu quodam, ut ajunt, evibrans, & in occidentem hybernium conversa, in multam à meridiano elongationem progres- sa, & in nubem quandam illisa cum magno so- nitu evanuit. Visum est Phænomenon etiam Romæ, Florentiæ, Venetiis, aliisque quam- plurimis Italiæ Civitatibus, imò in Germania inferiore, Trevirensibus visam hanc lampadem, nisi (quod aliqui volunt) diversam ab ea phæno- menon eodem tempore circiter apparuisse cre- dibile sit: Duratio statuitur unius alteriusque minuti: Sonitus vel fragor tormenti explosio- nem exæquasse censetur, aut terræ motum imi- tatus, cum manifesto fenestrarum tremore.

Ex

Ex dictis id patet, satis altum in aëre fuisse phænomenon, quòd in tam diffitis locis videri potuerit.

XV. Quid tandem de residuis, quæ quæst. XIII. enumeravimus, ignitis meteoris statuendum est?

Quemadmodum descriptum quæst. præced. magnum phænomenon draconibus volantibus, propter motum transversum per maximam Horizontis partem & caudam satis longam sibilumque in aëre productum, (cujus utriusque ratio a flammæ motu celeri & aëris aliqua resistantia facile petitur) annumerari jure potest; illa sonitus aut fragor ingens, cum terræ motu aut tormentorum tonitru comparandus, illud glomeribus fulmineis, de quibus quæst. XIX. & sequ. Cap. VIII. egimus, accensere suadet: prout cætera quoque meteora ignita ceu diximus in alleg. quæstione, omnia eandem generatim materiam, inflammabilem puta, habere supponuntur, speciatim autem ab hujus materiæ varia tenuitate & crassitie, lentore aut simultanea simul & explosiva accensione, deflagratione item vel in eodem loco lente facta, vel motum aliquem sive obliquè deorsum, sive in transversum accensæ materiæ inferente, aut dislosionem tandem subitanæam superinducente &c. formarum suarum diversitatem petere; copiâ quoque vel multitudine, magnitudine seu majori minorive expansione, variante denique externâ etiam figurâ non exclusâ.

Quæ

Quarum omnium quidem multiplicem analogiam in arte Pyrobolica abunde reperimus.

XVI. *Optarim hæc ad enumeratas supra species paulò distinctius applicari.*

Ita *Lanceam ardentem* vocari puto, cum materia accensa viscidior simul tota ardens in gracilem quandam longitudinem exporrecta lentè eodem loco deflagrat; *Clypeum ardentem* contra, cum in latam quandam rotunditatem expansa est: *Stellam cadentem* dici, cum materia inflammabilis tenuior & paucior in parvum glomerem collecta, & inopinatò in aëre accensa impetum simul acquirit & in transversum vel obliquè deorsum ruit, brevi interim ob materiæ tenuitatem consumpta; aut, si quis fortè malit, longus aliquis halituum tenuium tractus deorsum quodammodo æquabiliter exporrectus, in quo oborta sub principium flamma per totam exporrectæ illius longitudinem celeri motu quasi decurrens, materiæ tenuitatem subito depascit. Quod si verò materia tenuis longè lateq; dispersa & in massulas quasdam paulò densiores, per intervalla tenuissimo halitu solùm expleta, sparsim distributa supponatur; concepta in una massularum flamma, per halitum interjectum tenuissimum invisibiliter quasi transfilire in massulam priori similem densiorem, inibique novam flammam visibiliorem excitare, inde porrò in aliam, inordinatè subfilire valet &c. nomenq; adeò vel *Stipularum ardentium*, vel *caprarum saltantium* &c. mereri: Neque *Trabis* nomenclatura

ra aliunde petenda videtur , quàm ex materiæ
inflammatae transverso positu & notabili magni-
tudine; neque *columnæ*, nisi ex erecta in altum
magna ejusmodi accensa massâ; neque *pyramidis*
denique nomen aliunde, quàm ex ejusmodi co-
lumnæ infrà latiore, supernè verò in cu-
spidem quandam abeunte fi-
gura &c.



PHY.

PHYSICÆ
MODERNÆ SANIORIS
PARTIS SPECIALIS-
SIMÆ
SECTIO POSTERIOR
De
Corporibus partialibus
animatis.

CAPVT I.

Prolegomena quædam huic doctri-
næ præmittens.

I. *Quid animatorum corporum nomine
intelligitur?*



Lim equidem animata corpora, seu
ψυχὰς, *Animam*, habentia, non alia
dicebantur, quàm quæ motu locali
manifestato, & principii cuiusdam
intrinseci interventu peractò, con-
spicua, insuperque sensu aliquo, seu aptitudine
varia aut luminis, aut sonorum, odorum, sa-
porum, caloris item aut frigoris, aliarumve
tactilium qualitatuum impressiones percipiendi
præ-

prædita deprehendebantur : Plantas verò eodem loco hærentes, & vero sensu destitutas, animatas expressè negabant Epicurei & Stoici, testibus *Themistio* in II. de an. & *Plutarcho* V. de Plac. Philos. c. 26. ubi utrique referuntur asseruisse, τὰ Φυτὰ οὐκ ἐμψυχα εἶναι - sed αὐτομάτως γεγενῆσθαι, & Ἀπὸ ψυχῆς, i. e. *Plantas animatas non esse -- sed sponte quadam naturæ nasci, non animæ interventu.* Cui Epicureorum sententiæ calculum etiam adjecit *Galenus*, Φύσεως appellatione congruentissima τὰ Φυτὰ, h. e. *nascentia*, live Plantas contentas esse jubens; haut exiguum autem ipsi speciem conciliavit *Gassendus* Animadvers. in X. Lib. Diog. Laërt. p. m. 502. in primis autem S. Scripturæ autoritas pondus ei momentumq; addit, quæ, cum in ipso Genes. principio cap. I. vers. 20. hæc enarrâset; *Et dixit DEVS : Producant aquæ reptile animæ viventis, & volatile &c.* & paulo post vers. 24. *Dixit quoq; DEVS : Producat terra animam viventem in genere suo, jumenta & reptilia & bestias terræ &c.* de plantis postmodum à terra producendis longe aliter loquitur vers. 11. *Germinet terra*, ait ei DEVS, *herbam virentem & facientem semen, & lignum pomiferum, faciens fructum &c.* Conf. vers. 12; item cap. II. vers. 7. cap. IX. vers. 2, 3; nec non Levit. XVII. vers. 11. & 14, similiaque loca, in quibus anima carni solum attribuitur & in sanguine esse dicitur.

II. *Anne verò alii alium animati corporis conceptum formarunt?*

Aristotelem, ut ex ejus de anima libris, præsertim Lib. II. cap. II. patet, latius extendisse Animæ vocabulum, & plantas etiam inter viventia vel animata corpora censuisse, notorium, ejusque Scholas ipsum, more suo, *κατὰ φύσιν* sequutas esse, ex omnibus compendiis Physicis apertissimum est. *Anaxagoras* autem, *Empedocles*, *Plato*, *Democritus*, alique vetustiorum Philosophorum, ulterius etiam progressi appetitum quoque & sensum quendam plantis attribuerunt, paucis quibusdam ex recentioribus post *Campanellam* eidem opinioni adstipulantibus.

III. *Quid igitur nobis agendum erit in hac sententiarum diversitate?*

Tametsi optaremus priorem opinionem constanter ubique obtinuisse; posteriorem tamen, quæ ex tot retro Seculis ubique recepta fuit, quia non tam rerum veritatem quam vocum acceptionem magis minusve commodam quæstio concernit, retinendam esse consultum omnino reputamus; quandoquidem alias in protestate nostra positum non est, inveteratas vocabulorum acceptiones pro arbitrio nostro immutare, neque prudenter satis ejusmodi ausus suscipitur, ex quo non nisi nova dissidia & inutiles altercationes expectari possunt. Id potius cautè agendum est, ut recepti dudum
termini

termini eo modo limitentur ac circumscribantur, ut metuenda ex iis incommoditas quantum pote præcaveatur. Scilicet concedatur, plantis etiam, non minus ac animalibus & homini animam aliquam inesse, vitamque competere, sed ita, ut idem licet nomen, res tamen in singulis prorsus diversas significet.

IV. Expone mihi, rogo, saltem obiter interim & superficialiè illas vocis animæ diversas significationes?

Est (1) in plantis vis aliqua ex effectibus ipsis cognita, quâ quævis earum ex suo semine terræ commisso exiguâ primùm magnitudine propullulat, deinceps sensim grandescit, & cum ad certam definitamque staturam adoleverit, plura iterum semina, illi uni, ex quo quæque pronata primùm fuit, simillima progenerat. Hanc vim sive actuosum hoc in plantis principium, *Animam vegetativam* sive vitalem vocamus, vivereque adeò ea omnia dicimus, in quibus ejusmodi germinationem ope succi nutritii factam, & hanc consequentem indies ulteriorem augmentationem, tandemque succedentem seminum elaborationem, observamus. Quandoquidem verò similem virtutem, eamque perfectiorem quodam modo operantem, etiam in animalibus brutis, atque adeò in homine quoque præter illam autem, aliud insuper principium actuosum, quo plantæ destituuntur, in utrisque deprehendimus, cujus interventu per paria organa sensoria externorum impressiones

percipiunt, & per alia organa motricia vel partes suorum corporum, vel tota etiam, loco moveant &c. hoc etiam principium eodem *Anima*, sed cum addito, *sensitiva* aut *locomotiva* nomine dignamur: Tandemque (3) novum quoque principium intelligens, sciens, cogitans &c. intra nos ipsos observamus, quod *animam* pariter, sed *humanam*, *intelligentem* & *rationalem* appellamus; vel his ipsis ad generale *Animæ* nomen additis accessionibus satis moniti, ne tria ista principia ejusdem ordinis, dignitatis, & naturæ, præcipiti iudicio æstimemus, sed hoc cautè suspendamus, donec in singulorum condiciones accuratè inquisiverimus.

V. Quoniam igitur & plantas, & Animalia, & hominem, animata corpora vocamus; scire desidero, quanam sint illa essentialia requisita, quæ corpus animatum quæ tale constituunt?

Duo requiruntur ad hoc, ut corpus aliquod animatum dicatur: 1.) *Corpus organicum*, hoc est variis organis ad certum usum destinatis & præparatis instructum, qualia in corporibus humanis & animalium cæterorum innumera reperiuntur; in plantis autem, præter radices, caules, ramos, folia, flores, jam olim obvia, plura hoc ævo ab oculatioribus earum anatomicis detecta sunt, suo loco distinctiùs enarranda. 2.) *Anima* quæ organorum istorum aptitudinem ad munia vitalia obeunda actuat & in actum deducit;

ducit; quæque, si corpus sit (à quo definiendo hîc abstrahimus,) non est tamen organicum corpus, sed simile & ejusdem ubique conditionis, ut aqua, aër, ventus &c. Unde animati corporis analogiam rectius exhibere vix possumus, quam exemplo organi pneumatici Musici, in quo varia organa, ut fistulæ, claviculæ, aliaque mirè contexta reperiuntur, & ex varia materia parata; quæ tamen opus destinatum non exequuntur, nisi ventus ex follibus immissus ea actuet animetque.

VI. *Sed hoc pacto, si anima etiam corpus sit, animatum corpus ex duobus corporibus erit conflatum, & (quod Aristoteles in primis veritus est) duo sic corpora in eodem loco erunt?*

Primò nihil absurdi esse, ut compositum quoddam ex duobus corporibus componatur, præsertim si alterum organicum sit, alterum verò inorganicum, vel ipsum exemplum organi pneumatici musici ostendit: idemq; simul docet, si de loco communi sermo sit, ne hoc quidem inconueniens quicquam habere, ut duo corpora sint in eodem loco communi. Quod si de eodem loco proprio id neget Aristoteles, verè quidem id negat, cum unumquodque corpus suum locum proprium totum occupet, & hoc ipso alia omnia ab eodem excludat; sed absurdè assereret, flatum follium in organo pneumatico, cum fistulis eundem locum proprium occupare;

quandoquidem flatus follium , proprium suum locum intra cavitatem fistularum habet, fistularum autem locus proprius est, ex mente ipsius Aristotelis, aëris ambientis externi superficies: ut mirum sit tam celebri philosopho potuisse illam excidere consequentiam: *Ἐπεὶ γὰρ ἐστὶν ἡ ψυχὴ ἐν παντὶ τῷ αἰσθανομένῳ σώματι, ἀναγκαῖον ἐν τῷ αὐτῷ δύο εἶναι σώματα, εἰ σῶμα τι ἡ ψυχή.* Lib. I. de An. cap. VI. t. 72. h. e. *Nam, si anima est in universo corpore sentiente, necesse est in eodem esse duo corpora, si anima est corpus quoddam.* Quasi verò, si anima cum Democrito statuatur *σῶμα τι λεπτομερὲς*, h. e. *corpus quoddam ex subtilibus partibus constans*, illud locum habere non possit in subtilibus poris & cavitatibus partium amplioribus corporis sentientis, ipsæ verò partes ab ambiente alio, tanquam loco proprio concludi & ambiri?

VII. *Hoc pacto igitur etiam organum pneumaticum musicum dicendum videretur animatum corpus?*

Ne hæc quidem consequentia procedit. Etiam si enim organum musicum corpore gaudeat organico, & insuper follium flatu, tanquam corpore quodam tenui in fistularum cavitates ad varios sonos disponens actuansque, statim anima dicenda est; sed illud solum corpus tenue, quod organorum aptitudinem in animalibus & plantis peculiarem ad munia vitalia & animalia obeunda actuat, h. e. nutritio-

nem

nem & augmentationem successivam corporis, sui que similium generationem, sensationes item & locomotiones in actum deducit: quod in organo musico nec partium organicarum conditio, aliis planè usibus aptata, nec flatûs aërei crassities, admittit. Utrum verò aliqua illarum animarum, quas quæst. IV. enarravimus, & quænam ex illis, tale corpus subtile ac tenue sit, hîc nondum definimus, sed peculiari & separata corporum animatorum singulorum tractationi reservamus.

VIII. *Multa etiam alia circa has animas controvertuntur, quæ an inter hæc progomena decidenda sint, quæritur?*

Disputant e. g. de Origine harum animarum, an per traducem, an per educationem à materiæ potentia oriantur, an cœlitus inducantur, an denique creentur & per infinitam DEI potentiam emanent? Quærunt item, quomodo in suis corporibus existant, an totæ in toto corpore omnibusque hujus partibus reperiantur? An divisim potius unâ sui parte in uno corporis membro, alterâ in alio, dispersæ sint? An tres distinctæ homini sint concedendæ animæ & brutis binæ? An una ibi trium, hîc duarum functionibus obeundis sufficere queat? & quæ sunt aliæ hujus farinæ quæstiones; de quibus verbo hîc dicendum est: Frustraneas has omnes esse, & quasi fallacias plurium interrogationum; quibus unâ responsione satisfacere sit impossibile. Expectandum igitur esse,

nec singularum illarum animarum naturas & rationes inquisiverimus; & tunc de singulis separatim instituendas esse quæstiones illas, certiusque definiendas, quàm si confusiùs de omnibus collectim & promiscuè proponantur.

IX. Quo igitur ordine totum hoc de corporibus animatis negotium commodissimè tractabimus?

Distinguemus totam hanc Sectionem ultimam de Corporibus animatis partialibus in tres Articulos; quorum primus aget de *Homine*, corporum animatorum præcipuo omniumque nobilissimo, quod non solum vivit, nutritur, augefcit, & sui simile progenerat, adeoque non solum variis organis ad hæc munia subeunda aptis instructum corpus habet, sed animam etiam vegetantem illis functionibus præsentem: præterea verò varia porrò organa sensoria & locomotiva habeat, animamque adeò sensitivam quoque, sensationum harum & motuum localium præsidem: denique ratione quoque & animâ cogitante, voluntate &c. præditum, quæ ratione suâ & iudicio, voluntate item, & libero arbitrio suo, intimâ conscientia sibi cognito, prædictis functionibus sese subinde ingerat, at verò seorsim quoque sine illis organis innumeras omniumque nobilissimas operationes exerceat &c.

X. Quenam in secundo Articulo pertractabuntur?

Is considerabit secundum Animatorum genus

nus, quod organa nutritionis, accretionis & generationis, cum anima vegetante harum operationum directrice, communia cum homine habet, tametsi non eâdem in omnibus speciebus perfectione: communia item organa sensuum motuumque localium, diversis tamen imperfectionum gradibus in diversis speciebus sese exerentia, & ab anima quadam sentiente, & facultate quadam locomovente præditâ, ducta atque directâ: non communem tamen animam etiam cogitantem, intelligentem, volentem: utpote quam soli homini (inde *Animali rationali* dicto) propriam in progressu ostendemus, cætera adeò animata, sensu & locomotivâ facultate instructa, *Animalia* quidem æquè, sed cum addito *bruta* sive *irrationalia* cognominaturi.

XI. Quid deniq; tertius Articulus considerandum habebit?

Ea corpora animata, quæ *Planta* aliàs vocantur, solâ facultate nutrice, auctrice & generatrice, h. e. animâ vegetante gaudentes, organisq; ad eas functiones necessariis instructæ; sensu verò & mobilitate locali ab intrinseco principio immediatè dependente, omnino destitutæ &c. tertii articuli argumentum generale constituent; Specialem autem horum omnium & plenioram tractationem, Articuli singuli per capita plura, quantâ fieri poterit fidelitate ac dexteritate, deducunt.

SECTIONIS ULTIMÆ ARTICVLVS PRIMVS

De HOMINE.

I. *Quid est homo?*



Offit hæc quæstio frustranea & inanis videri; quandoquidem nihil notius est homini, quàm homo, siue seipsum siue alios intueatur. Attamen hæc hominum de homine cognitio externam potius figuram & proprietates in sensûs incurrentes, quàm internam naturam & essentiam concernit; ac præterea ipsa hæc ejus essentia, ab aliis diverso modo expressa, ab aliis sub controversiam ac disputationem vocatur; ut sub ipsum statim ingressum hujus operæ, necessum sit, aliquam dissonantium apparenter saltem sententiarum conciliationem tentare, & liticulæ inanitatem demonstrare.

II. *Quænam sunt illæ primùm sententiæ, quibus hominis essentia, natura, & definitio varie exponitur?*

Primum locum meritò obtinet definitio antiqua Porphyrii in Isagoge cap. III. quo hominem definit ζῷον λογικόν, h. e. *Animal Rationale*; cùm Aristoteles ipse in Topicis hac definitione Porphyrianâ (quæ sc. per proprium, non per diffe-

differentiam, facta sit) rectiorem putet aliam, quâ definitur homo ζῷον χερσαῖον, πεζὸν δίπεν, i. e. *animal terrestre, pedestre, bipes*. Cartesiani verò moderni, porphyrianam definitionem in eo culpantes, quòd animalitatem rationalitati, corpus adeò menti præponat, hanc aliam, tanquam meliorem commendant; quod *homo sit res sive substantia composita ex mente finita & corpore organico*, uti habet Anton. Le Grand Instit. Philos. Part. VIII. Artic. I. §. 8.

III. Quid sentiendum est de his diversis hominis definitionibus?

Non videtur esse tanti hæc lis, ut in ea tollenda, aut conciliandis enerratis diversis definitionibus multum operæ ponendum videatur; quandoquidem & hæ & omnes aliæ definitiones, nihil aliud sunt quam compendia quædam & quasi summariæ eorum, quæ de rei alicujus natura prolixius deinceps dicenda sunt; ut posteaquam hæc prolixè dicta exposita fuerint, tum demum istud dictorum compendium intelligi queat. Et quòd primam ac receptissimam hominis definitionem attinet, quâ *animal rationale* compendiosè dicitur, illâ certè audita nihil minus, quàm hominis essentia & natura intelligitur, sed auditur solùm compendium verborum, quæ fusius diducta illam hominis essentiam declarant. Nec eo sensu culpanda est, quo Vir olim nobis amicissimus hominem cum brutis in eandem caveam projici ferìò sæpe conquestus est; animalis voce id concipiens, quod vulgus

hominum ein Thier appellat; cū propriè Animal nihil aliud significet quàm corpus sensitivum seu sentiendi facultate præditum, quò deinceps ultra sensum nulla altiore facultate gaudet, atque ita brutum h. e. solo sensu gaudens, ratione verò carens, aut irrationale animal (germanicè ein Thier) meritò vocatur; vel ultra sensum etiam ratione gaudet, & cum ad-
dito *animal rationale* (nicht ein vernünftiges Thier sondern ein Körperliches mit Sinnen- und zugleich mit Vernunft- begabtes Wesen /) appellatur.

IV. *Hoc dubio sublato, quomodo alterum ab Aristotele motum tollitur?*

Illud putas, quòd τὸ Rationale in definitione Porphyriana non sit differentia specifica, sed proprium tantum? Hic verò dicerem ego: Cū definitio dicatur talis rei circumscriptio, quā ab omnibus aliis diversæ speciei accurate distingua-
tur, & verò per proprium (quòd speciei tum omni tum etiam soli, competit, velut homini τὸ rationale) distinctio illa pressimè obtinetur; ideò perinde nobis videtur, sive per proprii vocem unicam (nempe per τὸ rationale) homo ab omni-
bus aliis animalibus distinguatur; sive per differentia specificæ tres voces, *terrestre*, *pedestre*, & *bipes*, ita limitetur genus, *Animal*, ut hoc per istas tres differentias, seorsim sumtas tantum ge-
nericas, pluribus aliis quoque speciebus com-
petat, simul sumtis tamen ita arctissimè restri-
ctum, nulli alii animali, quàm soli homini competere queat. Perinde, inquam, fuerit;
maxi-

maximè quòd neutra definitio hominis essentiam (uti vulgò supponitur) explicet, sed paucis tantùm & restrictis vocibus nominet, deinceps singularum vocum reali explicatione demum prolixè declarandam. Inprimis autem Aristotelica definitio tribus istis limitibus ita circumscribit Animalis naturam, ut sub istis restrictionibus soli homini competat, neque tamen illius, quod nobilissimum omnium & principalissimum est in homine, vel verbulo mentionem injiciat: eo respectu Porphyrianâ multò pejor.

V. *Melior ergo fortasse Cartesianorum definitio est ipsâ Aristotelicâ?*

Tametsi non ita ad leges topicas ac disputatorias, de genere nempe proximo ac differentia specifica, exasciata est, hominis tamen essentialia, non exponit quidem (quod nulla facit definitio) sed nominat, & exponenda proponit multò melius; ut hinc saltem occasionem accipere commodissimè possimus duas hominis partes essentielles, Mentem, & corpus, quod inhabitat, organicum, ita quoad rem ipsam, & prolixè quidem explicandi, ut postmodum rem ita explicatam & perspectam illâ definitionis epitome comprehendere & effari commodè liceat. Duæ igitur cùm sint partes hominem & essentialiter & integraliter componentes, *Mens* five *Animus*, & *Corpus* humanum; Articulum hunc primum de Homine in duo Membra subdividemus, (missis interim omnibus, circa definitiones nominales litigiis) quorum primum in *Mentis*

tis humanæ naturam & realem essentiam inquirat; posterius autem Corporis humani fabricam, ejusque cum mente admirabilem unionem, ipsis mentis oculis exponat. Sit igitur

ARTICVLI PRIMI

De

HOMINE

MEMBRVM PRIMVM

De

Mente vel animo hominis.

CAPVT I.

De

Mentis humanæ existentia.

I. *Quid mentis, aut animi, aut animæ humanæ nomine intelligis?*

ITa voco actuosissimum illud in homine principium cogitativum, quod sui existentiam in unoquoque homine suis ipsius actionibus cuiusvis intimæ conscientia notissimis, immediatè, absque ullo externo argumento, abunde probat; cogitationibus innumeris nocte dieque sese prodens; ita ut nihil notius nobis & menti nostræ esse dicendum sit, quàm ipsa mens; utpote de qua intimè conscii sumus, quod varia percipiat & intelligat, plura subinde nosse velit

ac desideret, de multis dubitet, aliqua speret & optet, quædam desperet, circa nonnulla delibet ac ratiocinetur, alia neget, alia affirmet, his assentiatur, illis assensum subtrahat, alibi eum dubia suspendat, amet aliqua, quædam adverte-
tur, oderit &c.

II. *Hæc equidem omnia, quod operetur & præstet indesinenter anima nostra, certissimè cognoscimus; num æquè certè novimus, quid sit cogitare, velle, intelligere &c?*

Quod olim Augustinus de tempore dixit, si nemo ex me quærat, quid tempus sit? scio: si quærenti verbis explicare velim, nescio; idem de aliis quoque rebus naturâ simplicioribus dicendum esse, alibi, in Disp. de naturâ maxime familiarium obscura simplicitate, prolixè ostendimus. Quid enim cogitantibus nobis nocte dieque familiarius notiusque est quàm cogitare, intelligere, velle &c. & si tamen hæc explicare verbis alteri tento, ea magis sæpe implico quàm explico; fatentibus Hamelio de Mente humana p. 4. & Honor. Fabri cap. VII. de homine Def. 1. Scilicet, uti dantur axiomata quædam ex ipsis terminis notissima; sic res aliquæ, aut operationes vel actiones experienciâ intima nobis notiores & magis obviæ sunt, quàm ut verbis explicari indigeant; quamvis & alia ratio subsit difficultatis nonnullas res explicatiùs proponendi ac declarandi.

III. *Qua-*

III. *Quænam est illa alia ratio?*

Ea in hoc consistit, quòd, cùm assueti sumus corporeis maximè & materialibus rebus, quarum imagines vel ipsis oculis præsender ob-
 jicere, vel imaginationi saltem si absentes sint, quasi depictas exhibere, possumus, eâ deinde, quæ simili modo, h. e. imaginando percipere non valemus, non satis etiam nos percepisse credamus. Itaque sciendum omnino, & hoc præcipuè loco apprimè inculcandum est: Triplitem dari & probe distinguendum esse rerum cognoscendarum & percipiendarum modum. Quædam enim (1) sunt *sensibilia*, quæ vel visu, ut lumen & colores, vel auditu, ut soni, vel olfactu, ut odores, vel gustu, ut sapes, vel tactu denique, ut calor, frigus, durities, molities &c. percipiuntur: quædam (2) *imaginabilia*, quæ sive præsentia, sive absentia, imaginem sui tamen nobis objiciunt ac repræsentant; ut cùm parentum & amicorum absentium lineamenta, picturas quasi & simulacra, tanquam ante oculos posita, intuemur: quædam denique (3) sunt *intelligibilia* tantùm, quorum rationem & proprietates clarè satis quidem intelligimus, sed neque sentiendo videre, vel audire &c. nec imaginando, sub certa figurâ imagine vel simulacro nobis repræsentare valemus; prout e. g. virtutes & vitia, (temperantiam e. g. & injustitiam) quid sint, & in quo consistant, quæ item cujusque attributa sint & proprietates &c. clarissimè quidem & evidentissimè intelligimus, sensu

sensu autem ullo comprehendere, vel imaginando percipere, nullo modo valemus.

IV. *Quid hinc præcipuè animadvertendum vel observandum habemus?*

Duo cumprimis, insignem in sequentibus utilitatem habitura. *Primò* hoc, quòd, quæ vel sensu percipi, vel imaginando apprehendi possunt, illa magnitudinem, figuram, & extensionem aliquam habere & involvere necessum sit; quandoquidem nec sensus nec imaginatio quicquam apprehendit, sine certa quadam figura, consequenter extensionis alicujus terminatione: adeò, ut ne falsa quidem vel visio vel imaginatio, citra extensionis alicujus involu- tionem possibilis sit. E contrario verò ea, quæ tantum intelligibilia sunt, adeoque neque sub visum, neque sub imaginationem cadunt, nullam extensionem in ideis suis implicant, adeoque nec imaginem aliquam; prout certè, quid temperantia vel fortitudo sit aut dicatur, optimè intelligimus, etiamsi nec oculis videre has virtutes, nec imaginem aliquam earum, sive visui, sive imaginationi, exhibere possumus. Quòd enim pictores plerasque virtutes sub simulacris humanis repræsentant, nemo tam simplex erit, qui virtutes istas humanâ figurâ verè præditas sibi persuadeat: Ut hinc vel obiter concludere reciprocè detur, quia mentes nostras nec videre possumus, nec imaginari, eas quoque extensione destitui; id quòd tamen in sequentibus plenius confirmabitur.

V. Quod-

V. *Quodnam alterum est hoc loco cum-
primis notandum?*

Illud huc redit: Quòd, quemadmodum ineptissimus ille judicandus foret, qui non contentus lucem & colores vidisse, ac sonos audivisse, de imperfectione cognitionis suæ conquereretur, ideò, quòd sonum etiam visu, & lucem auditu percipere non valeret; ita non minus inepti sint ii, quibus eorum cognitio, quæ solo intellectu, etiam clarissime, cognoscuntur, manca & imperfecta videtur, nisi etiam imaginando percipiantur, vel sub ipsum sensum cadant: Quæ quidem querela multorum animos occupat, quando de ipso animo cogitantes, ejus conceptum vel ideam, aut naturam, obscuram sibi querunt, quòd non solum visum, sed imaginationis ipsius vim effugiat; cum tamen, si rectè attenderent, animam suam sibi multò notio-rem esse quàm corpus, agnitori forent.

CAP. II.

De

Animæ humanæ proprietatibus & operationibus, & primò quidem de rerum apprehensione simplici.

I. *Dixisti modò, animam humanam sibi multò notio-rem esse, quàm est ipsi suum corpus: Unde hoc nobis probabis?*

I D probat cuique sua propria conscientia. De corpore enim quisque suo, citra peculiarem in-
inqui-

inquisitionem anatomicam, nihil novimus, nisi externam ejus figuram, quòd caput, brachia, pedes habeat; quòd hæc variè movere, vel sigillatim, vel unà cum toto corpore, valeat; quòd cibo potuque conservari opus habeat; quòd denique oculis videat, auribus audiat, cæterisque sensibus plurimà percipiat: Et hæc ipsa non nisi confusissimè, cum distinctam eorum cognitionem, eamque in plerisque adhuc imperfectam, vix millesimus, imò vix centies millesimus quisque multà industrià & labore sibi acquirat. Anima verò nostra, seipsum inhabitans, non solum quæque de seipsa & de variis suis notitiis plurimà cognoscit, sed etiam de aliarum animarum cognitione & innumeris operationibus, inventis & effectis, loquelâ mediante, resciscit, eaque tam multa, quibus enarrandis, nec tempus, nec occasio, nec memoria suffecerit; uti progressus prolixè docebit.

II. *Quenam igitur sunt ea, quæ mens humana de seipsa cognovit?*

Ista primum generalius enarrabimus, deinceps successive specialius exponenda. Generalissime igitur duas invenit intra seipsam animæ potentias seu facultates operandi, alteram cognoscendi innumerabilia, quam *Intellectum* appellant eruditi, actibus cognoscendi inenarrabiliter variantibus indies, imò in singula momenta, sese exferentem; alteram cupiendi & volendi tantum non infinita, quam *Voluntatem* vulgò

vulgò nuncupamus, actibus iterum infinitè variantibus dies noctesque indefinenter fere actuosam.

III. *Enarra mihi primum Intellectûs Operationum & Actuum cognoscendi summas species?*

Ex his 1.) est *Simplex* rerum, ipsi separatim & figillatim objectarum citra omnem vel affirmationem vel negationem, *apprehensio*, quâ singularum conceptûs vel ideas anima intra seipsam format, de cœlo v. g. de stellis, de hominibus, de seipsa quoque, de cane, de equo, de terra, de auro &c. &c. cogitando: 2.) est *complexa* magis plurium ac diversarum ejusmodi idearum sive conceptuum inter se *comparatio*, quam *Judicium* de rerum vel conceptuum inter se comparatorum convenientia vel disconvenientia vocamus; ut cùm affirmamus e. g. Virtutem esse sectandam, vitium fugiendum; negamus contrà proximum esse lædendum, Aristotelem agnovisse mundi ac temporis exortum; dubitamus, utra Philosophia melior sit, Aristotelica, an Cartesiana? Nonnulla pro certis asserimus, quædam opinamur, alia credimus &c. 3.) Est unarum ejusmodi affirmationum vel negationum ex aliis certo ordine ac methodo inter se combinatis illatio, quam *Ratiocinationem*, demonstrationem vel deductionem &c. vocitamus plurimis subinde inventionibus foecundam; & 4.) denique diversæ *methodi*, quibus in istis suis sive ratiociniis sive inventionibus passim utitur humana ratio &c.

IV. Cum singula hæ generatim spectatæ intellectus operationes specialiore mereantur considerationem; age de simplici rerum apprehensione nonnulla separatim philosophabimur.

Ubi sub-ipsam principium statim observare dabitur; uti rerum ipsarum simplicium, & formarum in mentibus humanis conceptuum ac idearum, inenarrabilis est multitudo; sic in humana mente capacitatem apprehendi ab ipsa mente, res istas omnes earumque ideas apprehendendi tantum non infinitam. Spectemus e.g. facultatem hanc inexhaustam vel in infimo & rudissimo ruricularum ordine. Hic non solum jumentorum suorum, ut boum & equorum, sed aliorum quoque domesticorum animalium, ut ovium, porcorum, canum, felium, murium, avicularum; supellectilis porro rusticæ, ut aratorum, curruum, carrorum, plaustrorum, vomerum, flagellorum, falcium & furcarum tum scenariarum, frumentariarum &c. flabelorum five ventilabrorum, cribrorum varii generis &c. cognitionem habet; sed & partium in his singulis plurimarum, ut rotarum, axium, temonum, jugorum, clavorum, scalarum, canthorum, catenarum &c. &c. in curribus; vomerum, stivarum, rallarum, &c. in aratris; præsepium, septorum, clathrorum &c. in stabulis; arearum, quartarum, quas vocant, tabulatorum &c. pro frugibus, scenis &c. tritrandis & asservandis, in horreis; ipsarum etiam, ipsis propriarum

priarum, ope enarratorum instrumentorum peragendarum, functionum, veluti triturationis, fœnesectionis, frugisectionis, lignationis &c. &c. Quorum omnium, cùm ipsi pleniorẽ multò habeant cognitionem, rectioresque conceptûs, quàm quivis alius, alii vitæ generi assuefactus, præcipuè verò quàm docti & eruditi, quorum ordini tamen non pauci ex illorum juventute, temporis progressu & improbo labore tandem, fuere adnumerati; hoc interim, tanquàm confectarium præsentis contractissimæ licet considerationis meritò hîc inferimus: Humanam mentem aptam natam esse, si temporì assuefiat, ad altiora quæque apprehendenda, aliquo saltem modo.

V. Num igitur circa res alias, extra spheram suam, cognitionem aliquam habent simplices ruricolæ?

Imò innumerabiles, ac citrà peculiarem aliquam informationem. Quantam enim terminorum rerumque sub istis intellectarum farraginem vel in judiciis ac tribunalibus, vel invitè cognoscunt, vectigalium puta, tributorum, pœnarum, querelarum, accusationum, testimoniorum, appellationum, injuriarum &c. quot novos terminos eorumque significata ex militia didicerunt, circa militum ipsorum ordines & officia, salaria menstrua, circa armorum diversissima genera, turmarum, cohortium, legionum, exercituum, varietates? Quàm multos novos, nec ipsis proprios, sed plurimis aliis, in aliis vitæ

vitæ generibus , communes conceptus formant & addiscunt circa materialia & organa artificum manuariorum, sartorum, futorum, fabrorum ferrariorum, serariorum, lignariorum, restionum &c. quàm varia in tabernis institorum , in cauponis, in mercatibus, in contractibus, emptionum, venditionum, locationum, condictionum, nuptiarum, sponsaliorum &c. Quam varios denique, licet valdè rudes, in negotio præsertim religionis fidei, superstitionis &c. &c. Quis enim enarraret omnes res & rerum simplices apprehensiones ac notitias in rudi etiam imæ cavæ idiotarum grege? imò quis vel in uno solo hujus farinae homine omnem illam notitiarum & simplicium apprehensionum numerum inierit?

VI. *Quid igitur de huic imæ plebis ordini
maximè opposita eruditorum multitudine
dicendum erit?*

Quandoquidem illi ex professo mentis, ingenii & memoriæ culturam sibi propositam habent, tantò minus enarrabilis erit, etiam expertissimo mentis cultori, omnis illa rerum, terminorum, conceptuum, & apprehensionum varietas, quæ varia studiorum genera vel obiter percurrenti ubique occurrit. Cogitemus Theologos, Jureconsultos, Medicos, Philosophos, alios, horumque sectas, & in quaque secta materierum, argumentorum, rerum, terminorum, idearum, definitionum, & conceptuum incomprehensibilem varietatem; & judicemus inde rursus inæstimabilem mentis humanæ, hæc infinitè varia

apprehendere valentis , stupendam & prorsus imensam capacitatem.

VII. *Si in duobus extremis hominum ordinibus, rudissimo, & eruditissimo inenarrabilis rerum simpliciter apprehensarum & conceptarum farrago deprehenditur ; quid de cæteris intermediis ordinibus dicendum erit ?*

Cum hos ordines intermedios artificum manuariorum , sutorum , sartorum , automatariorum , mercantium sive negotiantium , militantium , nautarum & navigantium , pennâ & scribendo famam aut panem quæritantium , ipsorum etiam mendicantium & in otio vitam degentium , (si tamen possibile est hominem mentis compotem , vel etiam impotem , otiari omnino , & sine ullius rei apprehensione vivere posse) cum nemo uspiam hominum inquam , aut unquam enarrare potest varietatem illam artium mechanicarum , artificum , & opificum in tam diversa studia incumbentium ; in quavis autem arte , studiorum & negotiorum genere , multitudo pariter inenarrabilis occurrit rerum , conceptuum , ac terminorum &c. palam est , humanæ mentis capacitatem in apprehendenda solum & concipienda rerum inenarrabilium multitudine , si non infinitam , ineffabiliter magnam esse & infinitæ similem. Quod nondum tamen illud omne est , quod vel in hac infima & prima intellectus operatione considerari maximè meretur.

VIII. Quod-

VIII. *Quodnam ergo aliud restat mentis apprehensione & consideratione magis adhuc dignum?*

Est ipsa hujus capacitatis apprehendendi innumerabiliter innumera, ipso sole clarior apprehensio. Concipit enim mens hominis rustici, non solum suam vaccam & suum bovem in individuo, similiter vicini quoque vaccam & bovem in individuo, atque ita innumerabilia ejusdem generis vel speciei individua; sed etiam vaccæ & bovis generalissimum conceptum format, sub quo omnia particularia individua comprehenduntur. At enimverò talis vacca vel bos universalis nullibi datur, sed è similitudine naturæ in pluribus individuis, abstracto mentis conceptu formatur. Hæc autem conceptuum universalium formatio (præsertim cum ex duobus universalibus similibus, e. g. vaccæ & asini, quorum uterque sentiendi facultatem involvit, adhuc universalior, animalis sc. vel corporis sentientis idea, & sic porro, formatur) argumentum evidentissimum suppeditat, quòd anima rationalis, five mens humana, corpus esse vel materia non possit.

IX. *Quodnam est illud evidentissimum argumentum?*

Illud in sequentibus consistit: 1.) Ex principiis Physicis modernis & sanioribus certum est, omnem corporum & materiæ realem (si qua est) activitatem in particularum exilium

actuali motu consistere; prout e. g. ignis activitas particularum exilitatem & mobilitatem insignem præsupponit &c. 2.) Id quoque communi experienciâ notorium est, quemvis realem & actualem motum, individualement particularum materialium impetum vel agitationem involvere, nec à motu in genere vel in specie concepto, ipso facto quicquam unquam fuisse motum; neque vicissim à motu, impetu, vel agitatione materiæ actuali, reali & consequenter individuali, alium quàm individualement effectum unquam profluxisse. Quare, cùm 3.) conceptus mentis universales ab individuali particularum materialium agitatione provenire non possint, qui tamen ab intellectus operatione & activitate indubiè dependent; ineptum esset hanc intellectus activitatem, atque adeò ipsam animæ essentiam in materia velle reponere, quæ effectum universalem nunquam valet attingere. Sed hoc ex alia quadam mentis proprietate ulteriùs confirmatur.

X. Quenam est illa alia mentis proprietas?

Ea est, quòd non solum res innumerabiles in individuo percipit & cognoscit, & ex his innumerabilibus individualibus perceptionibus gradatim universaliores format & tandem universalissimas; sed quòd ipsas has suas perceptiones individuales, indeque formatas ideas universales, quadam cogitationum & perceptionum in seipsas reflexione, pariter percipit & cognoscit; & hanc ipsam cognitionem universalem

salium novâ reflexione animadvertit ; idque se animadvertisse porrò scit , & hoc etiam scire suum non ignorat &c. nullo adeò reflexionum fine determinabili : id quod quomodo ad motum aliquem materiale referri possit , rationi sanæ prorsus est incomprehensibile.

XI. *His igitur argumentis animæ rationalis immaterialitatem Lumen rationis confirmare potest ?*

Non his tantum , sed pluribus aliis deinceps gradatim videndis. Hoc loco unum adhuc allegabimus , ex eo desumptum , quòd anima nostra non solum res plurimas non-corporeas percipiat , concipiat , & intelligat , (quales e. g. sunt justitia , temperentia , avaritia , incivilitas &c. verbo virtutes & vitia omnia ,) sed ipsa quoque verè & indubiè spiritualia ; DEVM puta , ejusque omnipotentiam , sapientiam , æternitatem , infinitatam &c. attributa ex rationis lumine manifestissimè demonstrata : Cujusmodi quidem rerum spiritualium conceptus , quomodo in mente corporea & non-spirituali oriri formarique possint , nulla vis Rationis assequi potest.

CAP. III.

De

Simplicium conceptuum compositione vel sejunctione h. e. Intellectus operatione secunda.

O o 5

I. Quo-

I. *Quomodo uno verbo vocari solet hæc Intellectûs secunda operatio?*

VOcatur uno verbo *Judicium*; quod peragitur comparando inter se diversarum rerum conceptûs simplices, & judicando, num qua sit inter illos convenientia, nec ne? Quod si qua inter eos reperiatur, sequitur *judicium affirmativum*; E.g. cum mente concipio equum, & in ejus conceptu involvi deprehendo sensum multiplicem, quòd videre, audire &c. valeat; in conceptu autem universaliori Animalis reperiò eandem sentiendi potentiam; cognosco, hos duos conceptus in uno tertio, nempe in facultate sentiendi convenire, atque ita judico secundum axioma vulgare, *Quæ conveniunt in uno tertio, conveniunt inter se*, res ipsas illis duobus conceptibus involutas posse de se invicem affirmari aut prædicari; idque vel universaliter, generalius sc. de particulari, *omnis equus est animal*, aut indefinitè saltem, *Equus est animal*; vel particulariter, specialius nempe de Generali, *Quoddam animal est equus*; quia nimirum animalis conceptus laxior est, & plures aliorum quoque animalium conceptûs involvit.

II. *Quid si verò in duarum rerum conceptibus nihil commune reperiatur?*

Tunc sequitur in mente comparantis, *judicium negativum*. E.g. quia conceptus animalis essentialis sentiendi potentiam necessariò involvit, in idea lapidis autem, vel conceptu essen-

essentiali, multa quidem alia comprehenduntur, non verò facultas sentiendi, nec eorum quicquam quæ in essentiali conceptu animalis habentur; in partem negativam judicat anima rationalis: Nullum sc. lapidem esse animal, nec ullum animal esse lapidem.

III. *Sunt igitur hæc in hominum mentibus de rebus innumeris innumera quoque judicia?*

Nemo de hoc unquam dubitabit. Imò unius etiam mentis, uti rerum conceptûs, ita horum comparationes quoque sunt innumera-biles & consequenter judicia quoque innumera-bilia, aut facultas saltem indefinita, talia formandi; id quod rectè attendenti novum argumentum suppeditabit immaterialitatis mentis humanæ certissimum.

IV. *Quodnam est hoc novum argumentum?*

Nititur cum superioribuseodem quidem fundamento, negatione sc. possibilitatis operationes intellectûs per suppositam ejus materialitatem deducendi vel declarandi. Nimirum, si supponamus cum Epicuro, mentem humanam, sive intellectum, ex materia quadam constare, tenemur utique demonstrare aut verosimiliter saltem ex effectibus ejus conjicere, qualis sit illa materia, qualium & quantarum partium & minutiarum, quanta celeritate vel tarditate motarum &c. Hoc enim in moderna
Physi-

Physica in singulis corporum naturalium generibus præcipuè inquiritur, ut deinceps singulorum functiones, operationes & effectûs imaginabiliter deduci & minimùm verisimiliter declarari possint: quemadmodum e. g. ex observatis ignis variis effectibus, uſtione præſertim, aliorum corporum disſolutione, concrematione &c. confingitur hypotheſis, quòd ejus eſſentia vel forma, componatur ex particulis materialibus, ſubtiliſſimis, acutis, rigidis ac celerimè in omnes partes agitatiſſimis &c. Quibus poſitis, omnes ignis admirabiles effectûs ita deduci poſſunt, ut modus operandi ubique imaginationi diſtinctè ſiſti & quaſi ob oculos depingi poſſit. Et æſtimatur quidem ea hypotheſis melior, ex qua plures effectûs feliciter declarantur; illa denique peſſima & nulla prorſus, ex qua nullus rei declarandæ effectus imaginabiliter deduci poteſt.

V. Num ergo, ſi mens humana corporea ponatur, nihil ſimile fingi poteſt aut ſupponi, ex quo ejus effectûs & operationes diſtinctè & imaginabiliter deriventur?

Tenta, & videbis! Suppone cum Epicuro ejus minutias materiales eſſe rotundas & ſphæricas, inſimulque adeò volubiles; facileque ex hac ſuppoſitione imaginaberis mentem tuam ut fluxam & per declivia fluentem, inſtar aquæ; nullo modo verò illius rei vel præſentis vel abſentis perceptionem, ideam aut conceptum, præ-

præsertim universalem, multo minùs ideam rei non corporeæ, aut verè spiritualis, vel etiam reflexam quodammodo perceptionum & cogitationum tuarum perceptionem, & hujus etiam perceptionis iterum in se reflexam conscientiam &c. &c. Finge ejus particulas quadratas sive cubicas ideoque quietas magis & immotas; eoque pacto lapidem faciliùs, quàm mentem noctes atque dies actuosissimam, concipies. Pone quamcunque aliam earum figuram, exilitatem aut crassitiem: Finge celeres vel tardas: Comminiscere denique, suppone, quascunque, qualescunque, quantacunque celeritate motas &c. ac tenta, num ex his omnibus, aut qualibuscunque aliis suppositionibus, modum aliquem imaginabilem extorquere valeas formatæ alicujus affirmationis vel negationis, aut faciendi saltem initii in formando quodam judicio.

VI. *An igitur hinc statim sequitur, animam rationalem non esse materiata[m] & corpoream?*

Hoc utique sequitur, eam hypothésin, quæ supponit rem aliquam aut naturam esse materiata[m] vel corpoream aut ex particulis materialibus conflata[m]; & tamen, quicquid fingatur de ejusmodi particulis, ineptissimum perpetuò maneat ad illius naturæ minimam aut viliissimam proprietatem vel operationem imaginabiliter explicandam, aut ejus explicationis initium solum aliquod faciendum; illam, inquam, hypothésin, pessimam omnium, stultam esse ac stolidam,

risu

risu & explosione dignissimam, atque adeò procul dubio falsam, oppositamque necessariò veram.

VII. *Potesne igitur tu ex opposita hypothesis, mentis sc. incorporeæ, ejus operationes & effectûs imaginabiliter declarare?*

Non possum; neque vero etiam teneor, ut ille tenetur, qui eam materiata esse supponit; nec injustissimè solum hoc ab eo postulatur qui mentem incorpoream statuit, sed etiam ineptissimè. Quævis enim res ejusque proprietates, eo modo explicanda sunt, qui ipsius naturæ congruus est: ac *sensibilia* sic declaranda sunt, ut modus declarandi ipse quoque in sensum incurrat, *imaginabilia*, h. e. extensionem aliquam involventia, ita exponenda, ut si sensu non possint, imaginando saltem comprehendantur; *intelligibilia* denique intellectui distinctè repræsententur, licet neque sensui pateant, nec imaginem sui aliquam (cujusmodi non nisi materiata & corporea exhibere possunt) exhibeant. Quemadmodum igitur omnium risui se exponeret, qui, non contentus objectum aliquod visibile, ut lucem vel colorem, visu percepisse, id etiam audire posse desideret; aut sonum non audire solum sed videre quoque gestiret: sic pariter ineptus esset, qui rem incorpoream & merè-intelligibilem (cujusmodi sunt spiritualia) imaginabilem quoq; exoptaret ac certâ figurâ circumscriptam, (id quod nonnisi in extensa & materiata cadit:)

cadit:) dum interim is, qui rem aliquam, tanquam extensam, venditat, illam etiam, ut extensam & imaginabilem, tractare tenetur.

VIII. *Ampla igitur est hæc judicandi de rebus innumeris facultas; non caret tamen suis, hisq; pariter innumeris defectibus & imperfectionibus.*

Ita equidem, proh ! dolor, nimis verum est, ac dolendum ! pretiumque operæ omnino ut in horum defectuum causas inquiratur. Illæ verò non in ipsa judicandi facultate, (nisi quod infinita non est, & ideo essentialiter defectuosa) sed *primo* in præfestinata quadam animi præcipientia præcipuè sitæ sunt ; ut sc. (1) de rebus earumque connexionibus aut disconvenientiis judicia feramus, antequam res ipsas earumque convenientiam aut disconvenientiam satis consideratè perpendimus. Estque adeò rectè, à Viro quodam docto definita hæc præcipitatio, quod sit inconsideratum de re ignota nec satis perspecta iudicium ; sc. mens impetu quodam, aut perturbatione abrepta, rem, uti par est, non considerat. Unde præcedente in ideis sive conceptibus obscuritate & confusione, necessum est errorem consequi in iudicio. Fieri enim non potest, Hamelio iudice, ut rectè iudicem, attributum subjecto alicui convenire, si utrumque vel alterutrum confusâ tantum & obscurâ cognitione mihi innotescat ; si rem ipsam non attento animo, & citra omnem deliberationem, perpendam.

IX. *Quod*

IX. *Quodnam verò huic morbo remedium est quærendum?*

Hoc præcipuè, ut assensum nostrum suspendamus, dum rem ex omni velut parte contemplati, quasi ipsa veritatis voce coacti assentiamur: cum sc. rei evidentia persuasi tandem acquiescimus. Duo adeo involvit hoc remedium; quorum (1) est firmum animi propositum, non prius ferre de aliqua propositione iudicium, quam ejus subjectum & prædicatum clare distinctèque pernoverimus: (2) ut ne in hac iudicii nostri suspensione perpetuò hæreamus, in continuum quendam scepticismum prolapsi; sed terminos enunciationis ad affirmandum aut negandum propositæ, sollicitè scrutemur, sensuq; usitatissimo eos adhibeamus, aut si plures æqualiter usitatæ significationes occurrant, secundum utramque distinctè judicemus ita sc. omnem contradictionem & altercationem facile evitaturi. Exemplà utriusque habemus in Mathematicis, cum primis in Geometria & Arithmetica. Neque verò (3) ut in Mathematicis, ita in rebus agendis, & in illis, quæ ad bonos mores, aut prudentiam politicam vel œconomicam spectant, aut in rebus facti, vel fidei, similem evidentiam & omnimodam certitudinem requirere debemus; sed in his plerisque certitudine morali, probabilitate & verosimilitudine contenti ut simus, prudentia postulat. (Vid. du Hamel. Metaph. p. 502. & seqq.)

X. *Cum*

X. *Cum primam defectuum in facultate iudicandi causam supra præcipitantiam quandam animi esse dixerimus, utiq; alia quoq; supererit?*

Rectè infer; & ea quidem præcipitantiæ prioris causa præcipua, *Præjudicium* nempe, sive anticipatio quædam, non congenita illa quidem, qualis est primorum principiorum, sed acquisita sensuum iudicio immaturo, & ante plenum rationis usum imbibita. Quod equidem iudicium quantò immaturius est & inconsideratius, tantò robustius est & profundius radicum, tantò difficilius adeò eradicatu. Et hic animi morbus omnes plene disciplinas ac totam vitæ rationem conturbat, & nullam magis quàm Theologiam, quæ nostro iudicio in omnium aliarum sectarum religione, præterquam nostra, omnium item aliarum sectarum iudicio in nostra quoque, meris ferè præjudiciis incumbit, ab educatione quippe, consuetudine, societate cum aliis hominibus, authoritate eorum quos colimus, consensu plurium, ab ipsis denique vocabulis, ante sufficientem rerum notitiam, ab imperitissimis hominum sæpe inditis, mirum quantum roborata ac firmata.

XI. *Quid igitur? Num hunc animi morbum pro desperato planè habebimus?*

Si incurabilem penitus dicere nolimus, saltem vix in decies aut centies, imò millies millesimo eum unquam, uspiam plenè curatum

P p

esse,

esse, fateri ingenuè necessum erit. Nec aliud remedium superest, quàm ut ejusmodi anticipationes ex sensibus & præfestinata credulitate profectas, ad novum examen revocemus, & eas tantum comprobemus, quæ nihil habent dubitationis, quæque ex rebus clarè perceptis manant, constanter retineantur, reliquæ non tam confidenter affirmantur. Quod equidem paucis dici, at non nisi vim intellectui inferendo maximam, præstari potest. Imò, cùm judicia nostra à voluntate & libertate maximam partem dependeant, ut rem veram esse decernamus, quam vellemus esse veram, rejicere verò nolumus, quod diu probatum fuit; ut contradicendi libidine, aut contentionis studio abripiamur, aut pertinaciter inhæreamus opinionibus ne levitatis aut inconstantiae insimulemur; ut denique veritatem utilitate nostra metiamur: Ut vis etiam voluntati magna inferenda sit, si verè sincereque de rebus judicare velimus. Plura de facultate judicandi in Microcosmo nostro cap. II.

CAP. IV.

De

Ratiocinatione, sive tertia intellectûs Operatione.

I. *Quid hoc ratiocinationis vocabulo indigitamus?*

EAm intelligimus facultatem animæ, quâ, cùm ex ipsis rerum ideis immediatè judicare non

non potest, nec earum connexionem videre, novum iudicii genus format, ex aliis iudiciis jam antè latis de re præfenti iudicando, ac ideam quandam communem inveniando, ad quam illæ, quarum convenientia aut disconvenientia non ita nudè ante oculos ponitur, inter se conferri possint; verbo ex cognitis & perspectis in obscuriorum & incertiorum notitiam, nunc faciliùs ac unâ solùm alterave illatione mediante (ut, cùm ex eo, quòd Luna in eclipsi quadam sua cœlo sereno licet, è conspectu in umbra terræ evanuit, & alio certissimo iudicio, quòd lumen nullibi clariùs, quàm in obscuro loco cernatur, conclusimus Lunam luce nativâ præditam non esse, utpote quæ nunquam in umbra terræ potuisset evanescere) nunc operosiùs (ut in demonstrationibus geometricis profundioribus, veritatum jam antè demonstratarum sæpe triginta, quinquaginta &c. concatenatâ connexionem, conclusionem tandem novam, vix cogitatam priùs aut credibilem, deducuntibus) provehitur.

II. Numquid hæc etiam mentis facultas tam latè se expandit, quàm superiores reliquæ?

Imò ampliùs multò, ac tantùm non in immensum: Id quod vel solam mathesin suo solius exemplo iis ad oculum demonstrare posse constat, quibus non regulæ solùm arithmeticæ infallibiles plurimæ innotuerunt & praxi ipsâ qui eas in omni vitæ genere utiliter exercere nō-

runt, sed scripta & inventa tum vetera Euclidis, Archimedis, Apollonii, Pappi &c. tum recentiora Virorum ingeniosissimorum innumere-
rabilium, magnâ saltem ex parte vel superficiei-
tenus nota & comperta habent: ut taceam stu-
penda illa ratiocinia Algebrae & Analyseos spe-
ciosæ, quorum fiduciâ quodvis Problema aut
quæsitum possibile se soluturam Ratio humana
polliceri non dubitat.

III. *Quod si sola Mathesis exempla ratiocini-
orum profundissimorum verè inenarrabilia
suppeditat; quid de cæteris, in omni artium me-
chanicarum & liberalium, scientiarum, & qua-
liumcunque notitiarum genere, ratiociniis
& inventionibus, dicendum erit?*

Infinitatem scilicet aliquam in singulis ge-
neribus & speciebus nunquam plenè enumera-
bilibus, reperiri dicendum est. Tentemus rem
in uno mechanicarum solùm artium genere, &
summa solùm genera earum quæ vel urbis No-
ricæ pomæria concludunt, obiter lustrare co-
nati, certum fartoriæ, futoriæ, textoriæ, tor-
natoriæ, aliarumque artium mechanicarum &
opificiorum numerum inire vix poterimus,
quin alia plura opificia, nobis ignota & inusi-
tata, in aliis extimis regionibus simus reperturi,
e. g. artem fabricandi naves, artem metallifos-
soriæ, & metallorum effossorum ritè præpa-
randorum opificium &c. quæ opificia omnia &
singula sua peculiaria ratiocinia compendia,
confi-

consilia, inventa, novis aliis inventis subinde locupletanda complectuntur; ita ut e. g. Sutor, non solum in eodem loco diversis temporibus, sed eodem tempore in diversis locis alias aliasq; calceorum, crepidarum, ocrearum, peronum &c. formas ac modulos excogitet & inveniat, novo subinde consilio, proposito; novâ deliberatione, innumeris adeò mentis suæ ratiociniis intervenientibus. Ut nihil nunc dicam de funambulatorum, præstigiatorum, cursorum, pugilum, similibusque ludicris exercitiis, quibus homines otiosi aliis delectationem, sibi lucrum parare, & pro captando novis modis lucro, nova subinde inventa meditantur.

IV. *Quid si pro vilioribus hisce hominum idiotarum opificiis & manuariis artibus liberalium artium ac scientiarum encyclopædiam ante oculos nobis ponamus?*

Tantò plus ratiocinationis in scribendo, discendo, docendo, disputando, demonstrando, inveniando, meditando hîc ubique adhibendum est, quantò minor est manuum aliorumque organorum corporeorum hîc usus. Nec aliud quicquam ad infinitatem ratiociniorum humanorum aliquatenus concipiendam magis facere potest, quàm infinita scriptorum olim, & nunc typis excusorum multitudo, ratiocinia Theologorum, Jure-consultorum, Medicorum, Philosophorum, Philologorum, Rhetorum, Poëtarum, & hos inter disceptantium sine numero Sectarum, humanæ rationis & fa-

cultatis ratiocinandi effectuum non inenarrabilium solum, sed ne cogitando quidem assequendorum.

V. *Quid si consilia hominum, aulica, bellica, nautica, utilia, noxia, laudabilia, prava &c. considerare lubeat?*

Hic etiam in immensitatem aliquam nunquam exhaustiendam precipitabimur, eamque in innumerabilibus vitæ humanæ generibus infinite variam: De gerendo bello novo post ægrè obtentam pacem, & hac diutius conservanda, tam varia hoc ævo, occasione successione Gallorum in Regni Hispanici orbitate (quis hoc possibile fore unquam somniasset?) ultrò citroque agitantur consilia, quantâ varietate & multitudine unquam ullo ævo agitata fuerunt, universa Europâ in universali quodam motu existente; ut de particularibus magnatum, utilitatem cujusque & subiectarum sibi terrarum separatim concernentibus, innumeris licet modis pariter variantibus ne cogitare ferè liceat; multò minus de re nautica ulterius indies provehenda; de lucro in re mercatoria ampliore in singula momenta captando, de ambitione, non summum tantum, sed in hominum mediocris hætenus, imò in infimæ quoque plebis abjectiōre statu, gradatim altiùs altiusque quotidie evehenda, aliorum etiam de promovendis scientiarum artiumque augmentis, de religionis quibusque Sectariis connato quasi studio pro-

rogan-

rogandi sua pomaria, & præ cæteris laudando veræ pietatis studio &c. &c.

VI. *Quid verò tandem ex his humanæ mentis studiis, attentatis, consiliis, inventis, ratiociniis, judiciis, cogitatis, perceptionibus &c. in quolibet genere, tantum non infinitis, concludere nobis licebit?*

Illud (1.) quòd principium quoddam sit actuosissimum innumerabiliter innumerabilium, & summè admirandarum, in bonam & in malam partem, operationum, & multò plurium, multò excellentiorum, quàm ab ulla uspiam substantia corporea & materiali provenisse unquam constitit. Unde (2.) Ineptum esset, dubitare utrum hoc tam excellentium effectuum principium inter substantias sit recensendum, cùm accidentia non tam entia quædam quàm entium respectûs aliqui & habitudines, qualitates & conditiones quædam, dici mereantur. (3.) Manifestum & illud est, ex compendiaria solùm illa, quam hætenus dedimus, operationum intellectûs, enarratione nobis plures animæ humanæ proprietates & effecta, intimâ quidem rationis ipsius conscientia & experientia, innotuisse, quàm de corpore nostro, aut ullo alio, hætenus sensuali observatione potuimus indagare, mentemque adeò (quod suprà jam anticipavimus) quovis corpore nobis notiozem perfectiùsque perspectam esse.

VII. *At enim verò corporum naturas , moderna præsertim philosophiæ subsidio , paulatim ita magis magisque detegimus, ut eas imaginationi nostræ distinctè ante oculos quasi ponere queamus ; id quod de anima nostra dicere non possumus ?*

Verum est, ignis e. g. vulgaris naturam speciosissimè hodie poni in duorum generum portionibus , alteris incomprehensibiliter subtilissimis & rapidissimè agitatæ , quæ adeò solitariæ per laxitatem pororum in carnibus & fibris nostri corporis & aliorum , sine læsione ultro citroque commeant ; alteris crassioribus ac terreis , quæ cum rapido illo flumine subtiliorum abreptæ , in poris & fibris antea dictis , suâ figurâ , magnitudine , rigiditate , tanquam totidem aciculæ , cultelli & spicula , dolorem summum , easque strages edunt , quas experientia testatur &c. hanc ignis intimam naturam & conditionem , omnesque ejus inde consequentes effectûs clarissimè nobis imaginari possumus. Verùm, quantò minus hoc idem de mente nostra & ejus operationibus , aut simile saltem quippiam , præstari potest , (uti quidem supra cap. II. quæst. IX, & cap. III. quæst. IV. & V. à nobis evictum est) tanto magis ejus à materialitate remotio ac distantia dispalescit ; tantò injustiùs adeò & ineptiùs conqueremur , ejus essentiam nobis obscuram & ignotiorem esse corporis naturâ , quod illo corporeo , materiali & imaginabili (corporibus tantùm proprio) modo comprehendendi non possit : dum inter-

terim

terim ejus innumera attributa intellectus perspectissima habeat, quorum complexio totam ejus naturam clarissimè intelligibilem nobis sistat. Quin igitur ipsa sibi summo honori ducit, quòd cum DEO & creatore suo, potentiam cognoscendi, cogitandi, judicandi, innumera sciendi, æstimandi &c. communem, licet imperfectiore multò modo, absolutè tamen insignem, nec satis æstimabilem, habeat, tanquam vera & unica inter creaturas ejus imago; etiam in hoc ipso, quòd intelligibilis quidem ejus natura, æquè ac divina (cujus attributa innumera noster intellectus distinctissimè sibi; evidentissimè perspecta habet,) nullo modo verò imaginabilis, aut per materiæ qualescunque minutias explicabilis sit.

CAP. V.

De

Altera mentis humanæ facultate
generali, quam voluntatem
appellamus.

I. *Cùm duas superiùs agnoverimus mentis facultates intellectum & voluntatem, quid discriminis inter eas intercedit?*

Non sunt duæ distinctæ res, sed una & eadem mens est, quæ cum percipit, judicat, ratiocinatur, intelligere dicitur, & *intellectus* appellatur; cum percepta & cognita vult & appetit, vel fugit & averfatur, velle dicitur, & *voluntas*, cui utrum-

Pp 5

que

que & velle & nolle &c. attribuitur. De qua voluntate in Philosophia Morali plurima, ut in Philosophia Rationali, sive Logica, de Intellectu consideranda veniunt. Nobis in præsentì, quid voluntatis *Libertas* sive *Liberum arbitrium* importet, præcipuè docendum est.

II. *Quid hoc loco præcipuè libertatis nomine intelligimus?*

Illà maximè voluntatis indifferentia hoc nomine intelligitur, quæ contradictionis vel exercitii vulgò dicitur, quâ sc. possumus agere quippiam aut non agere, vel actionem suspendere; ita ut ad agendum à nulla causa externa determinetur, sed ipsa seipsam liberè determinet: quo ipso patet, quia mens seipsam determinat, eam à voluntate sua, quâ seipsam determinat, & ab intellectu suo qui plerumque determinatur, realiter non differre.

III. *Ego verò credideram, intellectum à sensibus ut plurimum, & voluntatem à corporis insuper commercio, appetitu & affectibus, ab externis item persuasionibus, mentemq. adeo ab eo, cui unita est, corpore & organis corporeis nec non ab aliis circa se, innumeris modis regi & ad actiones suas determinari?*

Non possumus hoc inficiari, & ea ipsa, quâ mirè gaudet anima nostra, corporis sui unione sese valdè constrictam, in perceptionibus suis, in judiciis & ratiociniis tantum non totam ab ea depen-

dependentem, in actionibus suis moralibus passim valdè impeditam & oneratam quasi sentit, ubi penitiùs paulò rationis trutinâ rem perpendit; id quod non solum cum Platone sapientiores inter gentiles Philosophos, sed etiam Apostolus Paulus in Epist. ad Rom. cap. VII. non sine gemitu & suspirio agnoverunt. At enimverò, id probè ac præcipuè hoc loco attendendum est, illam mentis nostræ, à corpore suo & aliis extra se, dependentiam, non esse ipsius naturæ & essentialitæ ex necessitate quadam convenientem, sed à sola divina voluntate, quæ mirabilem hanc substantiam, quam hominem dicimus, tanquam sui imaginem, inter cæteras suas creaturas, extare voluit, ita tamen ut omnis hæc dependentia mentis à rebus corporeis, nec semper ipsi, nec per se & essentialiter, sed per accidens tantùm competat.

IV. *Hoc verò præcipuè nunc ostendendum erit, ut constet, mentem humanam per se saltem, & in quibusdam duntaxat suis operationibus à materia independentem esse?*

Ita sanè res habet. Quicquid enim vel semel agit & operatur aliquid, ad quod à nullo organo determinatur, nec ab ulla alia materia; id essentialiter, per se, & naturâ suâ à materia dependens non est: si enim essentialiter & per se tale esset, semper tale esset, per *καὶ ὡν ἐννοία*. Ut igitur ejusmodi casus eligamus, in quibus nulla vel necessitas, vel utilitas, vel jucunditas, suspecta esse possit,

possit, quòd mentem nostram commoverit : Age ponamus casum, quo sub deliberationem quis vocet, studere ne velit nec ne? an aliud potius agere? expatiari v. g. saltare, ludere, amicum invisere, gladio exercitii gratiâ decertare? &c. experimur certè & ipsâ conscientia nostrâ teste novimus, etiamsi inter deliberandum voluntas nostra nunc in hanc, nunc in illam partem flecti videatur, sæpe tamen incertam ac hærentem ad unam tandem sese determinare ex mero arbitrio & beneplacito, ita ut libertatem interim relictam nobis certissimè noverimus, mutandi sententiam, etiam eo ipso, cum jam determinavimus nos, quando & quoties lubuerit.

V. Placeat, quæso, aliud insuper exemplum subjicere!

Cùm in præcedenti deliberatione anima nostra seipsam pro lubitu suo determinavit ad studendum, nova quæstio exoritur de studii genere; in qua vel variis in consilium adductis rationibus, vel etiam repentino decreto citra ullam ferè rationem, hunc aut illum librum arripimus, probè gnari ac intimè nobis conscii, potuisse nos eligere alium, & posse etiamnum jam electo alium substituere, ex voluntate forsan Amici, quam tamen non cogere nos vel necessitare, perspectissimum habemus ac intimè notissimum. Et est profecto hoc adeò necessarium ut quisque intra seipsum id confiteatur, nisi velimus omnem rationem moralitatis, omnem malitiam aut bonitatem actionum nostrarum, omne vitium

tium omnemque virtutem, è medio tollere, imò discrimen omne inter hominem & bruta animantia absurdè negare.

VI. *Cum omne trinum perfectum dicatur, etiam tertium adhuc superaddi exemplum velim!*

Sit animus tyronem aliquem Logicæ in formis syllogisticis informare, & e. g. Syllogismum aliquem in primæ figuræ modo Celarent formare; quod ipsum jam exemplum erit omnimodæ libertatis in voluntate nostra: quid enim quæso aliud quam ipsa, eam determinaret, ad syllogismum in modo Celarent potius, quàm in Barbara concinnandi? Electâ igitur, iterum liberrimè, ex innumeris propositionibus universalibus negantibus, hac: *Nullus lapis ascendit naturaliter*; merè-arbitraria iterum mihi rursus obviat subsumtio in minore, vel adamantis vel jaspidis, vel filicis &c. circa quam nulla etiam ratio vel fingi posset, quæ mentem ad unum potius quàm ad alterum determinaret, nisi stans pro ratione voluntas. At enim-verò positis ex arbitrio his duabus præmissis: *Nullus lapis naturaliter ascendit; sed omnis flix est lapis*; jam determinatus est intellectus ab ipsa rerum veritate, ad inferendam hanc conclusionem: *Ergo nullus flix ascendit naturaliter*; siquidem id, quod consequentiæ necessitas requirit, inferre velit. Voluntas autem liberum adhuc habet oppositum, reclamante licet conscientiâ, inferendi, nempe *omnis flix ascendit naturaliter*,
aut

aut aliud quiddam ; si fortè tentandi tyronis iudicium , propositum habeat.

VII. *Quid igitur tandem ex hætenus prolixè dictis concludemus?*

Illud primo certum habemus , quod anima nostra rationalis nequaquam sit corporea vel materiata ; id quod ex conceptuum universalitate , & hujus universalitatis reflexa cognitione &c. &c. cap. II. num. 8. 9. 10 ; ex conceptibus rerum immaterialium , ibid. num. 11. ex impossibilitate iudicii alicujus affirmativi aut negativi deducendi , suppositâ mentis materialitate , Cap. III. num. 4. & 5. ex infinitate ratiociniorum , artium ac scientiarum ab humana mente inventarum , consiliorum , aliorumque innarrabilium cogitatorum &c. Cap. IV. num. 6 & 7, conclusimus.

VIII. *At enim verò, tametsi materiata non sit & corporea mens humana, posset tamen materialis esse, velut albedo chartæ aut parietis, non est quidem corpus, à corpore tamen aut materia essentialiter dependet?*

Hæc est Scholasticorum superflua subtilitas, cui obtundendæ, duo jam in superioribus præmissa fuerunt : 1.) quòd essentialis hæc dependentia sit materiæ modis & accidentibus propria, quæ ab aliqua materia in esse, fieri, & operari vel ideò necessariò dependent, quia materiæ modi & accidentia sunt ; id quod de mente huma-

humana, nobilissimo actionum & operationum admirandarum principio vel cogitare ineptum concludimus cap. IV. n. 6. 2.) Dependendam aliquam à suo, cui unita divinitus est, aliisque corporibus, lubentes agnovimus, sed accidentalem ipsi, nec in casibus innumeris & semper necessariam; id quod cap. hoc V. num. 4, 5, & 6 ad oculum demonstratum fuit: ut mentem humanam nec materiataam esse, nec materiale nunc certum sit.

CAP. VL

De

Animæ Humanæ Natura & Substantia.

I. *Nunc igitur tandem confidenter dicere poterimus qualis natura aut substantia sit hominis anima?*

QUoniam substantiam eam esse, h. e. rem per se existentem, non accidens aliquod merum, cujus natura in esse, fieri & operari suo dependeret ab aliquo substantiali subjecto, docent innumerabiles, exque nobilissimæ operationes, quas per antecedd. capp. fusius enarravimus, quarumque scaturiginem & principium se esse ipsa novit; maximè quòd brutorum & plantarum animas veras substantias, corporeas tamen, esse infra constabit; & verò de humana nostra anima, sive de mente humana, in quæstionibus duabus

duabus ultimis cap. præced. ex fundamentis indubiiis illatum sit, eam neque corpoream aut materiata, (seu ex particulis materialibus sive atomis conflata) neque etiam materialem, (h. e. à materia ullo modo, vel in fieri, vel in esse, vel in operationibus suis, essentialiter quidem, dependentem esse : sequitur, si Scholarum terminis rem eloqui velimus, eam esse substantiam immaterialem, immateriatam & incorpoream, verbo talem, quam in strictissima vocis significatione *spiritum* appellamus.

II. *Sed hi termini Scholastici, non tam quid anima hominis sit, quam quid non sit, declarant ?*

Ita profectò est, non possumus diffiteri. Nam incorporeum esse est nullo constare corpore, ne subtili quidem, quale aër est; immateriatum esse, est nullam materiam in natura sua involvere, nullis atomis vel corpusculis conflatum esse, aut abstractius nullam extensionem habere, nec in longum, nec in latum, nec in altum exporrigi &c. immateriale deniq; esse omnem etiam necessariam & essentialem à materia dependentiam excludere. Utut verò hæc ita se habeant, nec ejusmodi terminis negativis res ipsa directè declaretur, non est tamen inutilis prorsus talis rerum indirectus & è transverso quasi institutus intuitus : præsertim si directæ quoque rei explicatio tandem accesserit.

III. Quando igitur anima rationalis voce quoq; positivâ Spiritûs strictè acceptâ indicatur; quid Spiritûs nomine positivè intelligendum venit?

Nihil aliud quàm substantia cogitans sive cogitandi facultate prædita. Cogitationis verò nomine id omne intelligitur, quod superioribus V. membri hujus I. capitibus prolixè expositum fuit sub nominibus operationum tam intellectûs quam voluntatis. Verum, cùm Divinum etiam Numen sit substantia perfectissimè cogitans, & præterea Rationalis anima nostra ex Summi Numinis Beneplacito mirabile quoddam cum corpore suo commercium exercet; ideò distinctionis ergo ita definiri, aut, si mavis, describi potest, quòd sit *substantia cogitans finita, & cum corpore quodam organico* (quod humanum dicimus) *accidentaliter unita.*

IV. Cur dicis accidentaliter unitam?

Eadem ratione hoc dico, qua suprà quæst. I. dixi, eam à corpore quidem in casibus innumeris dependentem esse, non tamen essentialiter & perpetuo in quovis casu, (id quod cap. V. quæst. III. IV. V. & VI. evidentissimè demonstravimus) sed accidentariò, quamdiu Summo Numini placuerit, h. e. quamdiu corpus ita dispositum fuerit, ut mutuum illud commercium inter ipsum & mentem ipsi arbitrariè unitam exerceri continuariq; possit; prout infra pluribus audiemus.

V. *Quid ex his nunc porrò concluditur?*

Rationalem nostram animam, quoniam incorporea est & immaterialis, inextensa, nec partes extra partes habens &c. non esse divisibilem aut in partes discerptibilem, neque adeò Naturæ viribus dissolubilem: quandoquidem, quicquid Natura dividit, & ratione & experiētiâ teste, partium secretionē tantum ac separationē dividit. Imò indivisibilis absolutè manet; quia quod partibus destituitur, in partes etiam resolvi non potest, ne quidem per DEI absolutam potentiam.

VI. *Ergone summæ necessitatis existentiam habet & aeternum duraturam?*

Abfit, ut hoc absolutè statuamus. Quemadmodum enim finitæ est naturæ; ita nec aliam quàm finitam habet hujus naturæ suæ existentiam. Finita verò vel essentia vel existentia, necessariò habet aliquam sui originem. Non potest autem originem suam ex materia habere, quia materiata non est. Ergo nullâ præexistente materiâ orta, h. e. de integro tota producta, verbo creata est, & ex nihilo producta. Ergo is idem DEVS omnipotens, qui absolutâ suâ potentiâ eam, cùm nihil fuisset, esse quid voluit; posset etiam procul dubio, si vellet, ipsam in nihilum redigere, h. e. ut existeret, non amplius velle.

VII. *Estne*

VII. *Estne verò credibile, DEVM velle aliquando ut anima hominis non amplius existat, præsertim verò ut occasione morientis corporis simul existere desinat?*

Non est hoc, inquam, credibile, si consideremus hanc hominis animam esse creaturam corporeis & materialibus omnibus tantum non infinites nobiliorem, DEI creatoris imaginem, Ejus cognoscendi, colendi, glorificandi, capacem, & tunc maximè, quando per corporis mortem, ab iis impedimentis liberatur, quæ ipsam à cogitationibus de DEO ejusque immensis & inenarrabilibus in se beneficiis, dies noctesque habendis, humilique & gratâ mente agnoscendis, subinde divertunt. Quis, inquam, credat, Deum adeò Benignum, adeò suarum creaturarum amantem, hanc omnium, quas naturaliter novimus, nobilissimam, donis & perfectionibus ineffabilibus (ut superius ostensum est) instructam, & cum hominis corpore mirabiliter unitam, solâ hujus morientis occasione, & nullâ suâ malitiosâ culpâ, sed invitissimâ ipsâ plerumque morientis, non rarò etiam eodem die, quo ipsi hæc unita fuerat, aut paulò post, morientis &c. insimul totam cum corpore naturaliter destructo, supernaturaliter in nihilum redacturum esse? cum aliàs quamdiu corpus in sui unionem, & cum ea commercio, perdurat in seram usque sæpe ætatem, eam quoque benignissimè conservet? Imò corpora quoque sensu & ratione destituta, ut saxa

petrosa, annosas quercûs, eousque durare patiatur, quoad cujusque natura & conditio permittit: adeò ut quædam mundi totalia corpora in secula durent. Quidni igitur nobilem hanc animæ humanæ substantiam superesse de mortuo suo corpori patiatur quoque, quamdiu ejus natura & conditio naturaliter immortalis permiserit; maximè, si pia, Deique timens amansq; fuerit?

VIII. *Quid si verò impia fuisset, Deus & beneficiorum ejus contemtrix?*

Tunc equidem in nihilum redigi, omnemque ejus memoriam penitus deleri mille modis meruisset. Utrum verò hac vindictâ non contenta Divina justitia, eam gravioribus pœnis præservare velit, (prout vel ex eo conicere datur, quòd pessimas hujusmodi mentes corporibus suis unitas diutissimè sæpe manere summâ longanimitate patitur) id revelationis lumen docere nos oportet; quando lumen rationis de hac DEI voluntate certi nihil nobis manifestat.

IX. *Ergo, cum intuitu virium Naturæ Anima humana sit absolutè incorruptibilis & immortalis; intuitu voluntatis Divinæ autem credibiliter secunda annihilationis; post corporis interitum, erit adhuc, & deinceps æternum superstes?*

Ita certè sana ratio nos inferre jubet: Quod Natura non potest, DEVS autem, qui posset, non

non vult destruere; ejus existentia perpetuò durabit. Quod si enim intereunte corpore animam ideò unà interire non vult Creator Optimus, maximus, uti verosimillimè Quæst. VII. evicimus; multò minus deinceps ulla apparebit ratio mutandæ illius voluntatis; valentibus quippe quovis alio tempore iisdem adhuc causis omnibus, quas in casu separationis ejus à corporis commercio valere judicavimus. Quid verò ita separata deinceps actura sit, si curiosius inquiras; dicam, ratione ita suadente, Eam DEVM & ejus admiranda attributa, quantum ex Rationis lumine cognosci possunt, magis magisque cognituram: his plenius perspectis, plus amoris & fiduciæ, plus item timoris ac reverentiæ erga ipsum concepturam: ipso ejusque inexhausta Bonitate, tanquam summo suo Bono, fruituram, æternumque lætaturam; & quæ sunt alia ex lumine revelationis aliquatenus supplenda.

X. Quandoquidem verò animam seu mentem humanam independentem à materia fieri, h. e. ex nihilo produci, adeoque solius DEI infinitæ potentiæ necessario prodire, quæst. VI. conclusimus; frustra illam vel naturali generatione aut per trudem propagari, vel à parentum animabus emanare dicitur?

Res est in propatulo. Numquid enim substantiam immaterialem & immateriatam à Natura (quæ, quicquid operatur, materiâ medi-

Qq 3

ante

ante operatur) produci concipiemus , cuius vim valdè finitam , substantia de integra tota , ita ut ejus nihil omnino præexistat , producenda infinito intervallo excedit. Certè , cùm apertum sit , seriò attendenti , ne corpus quidem hominis nisi præsupposito seminali rudimento ejusque organicâ structurâ (quam non nisi providentia divina formare potuit , adeò mirabilis est artificii) à Natura gigni posse ; quî possibile erit animam naturâ suâ spiritualem à natura corporea produci ?

XI. Quid interim de peccato originali fiet ?
*an DEVM animam peccato contaminatam
 producere dicemus ?*

Ab sit hoc vel cogitare præsumamus ! Ipsa certè sana ratio non minus evidenter docet , DEVM sanctissimum cum peccato quomodo-
 cunque causando nihil habere commercii posse , quàm docet , animam hominis ab omni materia per se planè independentem , adeoque ex nihilo necessariò producendam , ab alia quàm Creatoris omnipotenti virtute produci non posse. Id quod adeò verum est , ut confessus mihi sit ingenuè ante hos annos circiter tredecim Insignis & Cordatissimus Theologus Dn. Wölffing , tum Præpositus Studgardienſis , nunc pridem Beatus , Neminem facilè Theologorum nostratium futurum esse , qui non ambabus ulnis amplexurus esset doctrinam de creatione mentis humanæ , dummodo illa cum doctrina de peccato originali in Sacris revelata conciliari posset.

XII. Quod-

XII. *Quodnam igitur aliud consilium erit in hac Scriptura cum Ratione collisione, quàm creationem animæ ex rationis principiis deductam negare, ut Revelationi sua constet Autoritas?*

Ignoscent mihi, spero, prudentiores saltem & moderatiores Theologi, si captum hoc ab illis consilium non usquequaq; approbem: 1.) ideò, quòd sana ratio ejusq; lumen non minus sit Benignissimi Numinis donum, quam lumen revelationis; adeoq;, si illa, animæ humanæ creationem (quam vel in articulo creationis ipse Lutheri nostri Catechismus apertè profitetur) evidenter demonstraret, hæc autem Articulum de peccato originis æquè clarè & apertè docuisset; utrumque potius verum esse agnoscendum, quàm alterutrum negandum: si maximè duo illa asserta secum invicem conciliari nondum satis possent. Multò minus autem 2.) alterum, quod sana ratio ex principiis primis apertè deduxit, negari debet, si alterum de peccato originis ita clarum non sit; ut, non dicam omnes Theologi, sed omnes saltem nostrates Theologi, de ipso consentiant: peccatum aliquod originis agnoscendum esse unanimiter quidem confessi; in quo verò illud consistat, neque nunc consentientes, nec imposterum unquam forte consensuri.

XIII. *Annon eorum, quæ conciliari non possunt, alterutrum saltem negandum est?*

Habemus exempla in Mathematicis, ubi hæc illatio vix procedet. E. g. in conchoïde linea,

& asymptotis hyperbolarum, occurrunt duæ lineæ, altera curva, altera recta, ita positæ, ut, si utræque prolongari concipiantur in infinitum, curva ad rectam semper propius propiusque accedere infallibiter demonstretur; & tamen eadem infallibilitate ostendatur, illas lineas propius ad invicem perpetuò accedentes in æternum tamen non concursuras; quæ duo asserta tamen absolute verissima, quomodo ratio satis possit conciliare, vix reperiet. Quidni ergo, si ratio evidenter evincat animam rationalem divinitus creari debere, revelatio autem clare doceat, eandem animam labe quadam originali affectam esse; agnosci possit, utrumque esse verum, tametsi conciliatio secundum unorum conceptum illius labis originalis nulla dum reperiatur, quam alii tamen secundum suum conceptum facile inveniri posse persuasi sunt.

XIV. *Quænam est horum posteriorum conciliatio?*

Illam in hoc consistit: Quod cum labe illa originalis nihil aliud sit, quàm privatio donorum supernaturalium Protoplastis ultra essentiam divinitus concessorum, quæ eorum posteri quoque habere debebant, (prout generaliter ἡ ἀμαρτία ἐν τῇ ἀνομίᾳ, h. e. peccatum in defectu legalitatis consistat) Deum utiq; post Adami lapsum animas posterum creantem cum omnibus suis essentialibus, non obligatum fuisse iisdem dona gratiæ supernaturalia concreare, neque adeò hæc ipsis denegando, ullam contraxisse culpam &c. Quam
rem

rem fusius deductam videre licet in Dissert. de Orig. An. Rationalis Melch. Zeidleri Theol. D. & Prof. Regiomont. Jenæ edita anno 1671.

XV. *At enim verò, hunc labis Originalis conceptum alii nostratium Theologorum damnant ac rejiciunt?*

Equidem Cathedræ nostræ neutiquam est, Theologorum diffidiis ut intercedamus, aut alterutri pugnantium hypothesium nos associe-
mus. Id verò interim iniquum putamus, ut conclusionem de animæ creatione ex primis & manifestissimis sanæ rationis principiis demonstratam deseramus, propter hypotheses theologicas sub lite adhuc positas; & loco illius certissimæ conclusionis, alias nunquam sic demonstratas, ac præterea insuperabilibus difficultatibus pressas hypotheses, admittamus.

XVI. *Quenam sunt illæ insuperabiles difficultates?*

Assumatur primo Traducianorum hypothe-
sis, quam ipsa nominis litigiosa ambiguitas satis suspectam reddit, quam *Decisivam* aliqui, *educti-
vam* alii, tertii *sui promotivam*, statuunt; imò B. Thomasius in Disp. de Orig. An. humanæ §. 165. præter Creationem ejus, quam nos demonstra-
tivè deduximus, huic oppositas decem alias dissen-
tientes inter se sententias Traducianorum recen-
set: id quod desperatæ hypotheseos evidentis-
simum argumentum est. Nos de tribus potis-
simis

finis traducis afferendæ modis tantum videbimus.

XVII. *Quid igitur Traducem decisivam vocant? quid eductivam? quid denique sui promotivam?*

Tradux decisiva dicitur, cum ex parentum semine, sive invisibili illo & ipsius animæ, (uti Tertulianus olim, cui anima corpus est suo semine pollens, & hodie Timotheus Brigt, opinati sunt) sive ex semine corporis, portio quædam deciditur & in animam efformatur: qui tamen traducis modus ipsis Traducianis cæteris improbatur; quia cum animæ spiritualitate stare non potest. *Traducem eductivam* decisivæ substituisset Lutherum, Formulam concordiæ, & apertius Havenreuterum, docet Thomasius §. 125. & seqq. Verum, cum tota materiæ potentia in divisibilitate, figurabilitate, mobilitate &c. consistat; positâ omni hac potentiâ in actu, non apparet, quomodo substantia spiritualis, h. e. ab omni materia independens, prodire valeat? Vidisse hanc difficultatem Philosophum pariter ac Theologum Wittebergensem insignem, Jac. Martini, testatur laudatus Thomasius, §. 128. ideoque, ne spiritualitas animæ periclitaretur, statuisse, animam quidem propagari ex traduce, non vero naturali pure generatione, sed concurrente singulari DEI operatione, quâ solâ in & ex semine animâ foetus excitetur, quamque creationem secundi modi appellant.

XVIII. *An.*

XVIII. *Anne verò hæc Viri Celeberrimi
cautio cæteris Traducianis probata
fuit?*

Minimè verò gentium ! quandoquidem illa ad hypothefin de animæ creatione nimis appropinquat, imò, si dicere quod res est velimus, pendentis inter utramq; sententiã animi manifestum facere indicium videtur. Et fanè, si Creationi animæ ex nihilo Peccati originalis conceptus sub lite adhuc positus obſtare creditur; non video, cur idem non æquè obſtare credendus ſit illi Creationi ſecundi modi, (quam B. Luthero quoque placuiſſe cit. I, aſſeritur) ex ſemine nempe patris. Etenim, ſi ſolâ operatione Divinâ ſingulari in & ex ſemine anima foëtûs excitatur; vel pura excitatur, vel impura &c. Et generatim, ſi in quocunq; traducis modo Deum utique concurrere debere nemo, credo, negabit; id quod hunc DEI concursum in producenda anima rationali liberabit à culpa impuritatis, quam urgent, originalis, quidni poſſit eundem ſolum eandem ex nihilo creantem, ab eadem culpa liberare?

XIX. *Quid igitur tandem de Traduce ſui
promotiva ſentiendum erit?*

Hæc eſt illa, quam ſæpe-laudatus Dn. Thomafius ex decem illis ſuprà-memoratis ſententiis ultimam elegit, præeunte quidem, uti credit, Gregorio Nyſſeno §. 47. & conſentiente, ut ait, meliore noſtratium Theologorum parte. Ego verò, ſi
dicere

dicere quod res est velim, nihil hic audio, nisi novum vocabulum *Traducis sui promotiva*; quod quid rei significet, cum nemo dicere vel explicare valeat, inter nomina similia, *occultarum qualitatum, Antipathia, Sympathia, antiperistasis* &c. quæ ignorantiaæ asyla vel emplastra vocare solent saniores Philosophi ponendum erit. Auditis enim hisce vocabulis, semper superest quæstio de re & rei modo distinctè imaginabili. Quomodo sc. anima parentum (& utrius quidem, Patris? an matris? an amborum simul? novâ & nunquam satis extricabili difficultate) sui ipsius promotiva est & sic in sobolem multiplicativa?

XX. *Annon simile de productione ignis ex lapide & ferro collisis vel lucernæ de lucerna accensa, modum declarant hujus promotionis aut multiplicationis?*

Nihil minus. Nam non solum elicitus, è filice per collisionem chalybis, ignis, corpus est ex alio corpore manifestè eductum ac decisum; & flammæ novæ ex admotione prioris ad materiam inflammabilem prolicitæ origo evidenter hujus portionem decisam ostendit, ipso etiam motu locali distinguibilem in eo casu, quo in extinctam-recens candelam, ex parvo intervallo infra ardentem adhuc collocatam, illius portio manifestè descendit. Quod B. Augustinus eo ipso loco, quem Thomasius §. 48. ex Epist. ad Optat. pro Traducianorum hypothese illustranda allegat, apprehendit, cum inquit: Quisquis animam, sicuti est, non esse corpus, sed spiri-

spiritum confitetur, & tamen in filios ex parentibus duci -- cùm considerari & pertractari cœperit, quid dicatur; (NB.) mirum, si ullus sensus comprehendit humanus, quonam modo tanquam lucerna de lucerna accendatur, & (NB.) sine detrimento alterius alter ignis existat, sic anima de anima parentis fiat in prole, vel traducatur in prolem.

XXI. *Quod si ergo filii anima ex anima parentis traducitur in prolem, sine tamen ulla illius portione decisa; novâ, eaq; ingenti difficultate, premetur hæc traducianorum hypothesis; nimirum, hoc modo parentum animabus vim creandi quippiam, vel ex nihilo producendi, attribui?*

Nam quod producitur nullo subjecto præ-existente, quod producti essentiam postea constituat, illud ex nihilo producitur & consequenter creatur. Anima igitur parentis, animam filii ex nihilo produciens, prædita sit creatrice potentiâ necesse est. Neque quicquam valet vulgaris exceptio, quæ sita quippe ad absurditatem evitandam: quòd nimirum anima filii ab anima parentis producat ex nihilo quidem materiæ, sed non ex nihilo sui. Ridendum profecto effugium! & præterea pudendo vocum lusu & ambiguitate involutum cum palpabili insuper petitione principii. Etenim cùm dicitur, animam filii non produci ex nihilo sui, terminus, *ex*, non sumitur subjectivè sibi pro subjecto ex quo, sed

sed effectivè pro principio à quo, quasi sc. anima parentum produceretur, ut illa sui quiddam hujus ingredi essentiam pateretur, (id quod vocula ex aliquo produci propriè importaret) Sed quod ab anima parentum illa filii sic emanet, ut ista sui nihil huic communicet; id quod reverà nihil aliud esset, quàm prolis animam ab anima patris vel matris, ex nihilo tum sui, tum omnis alius subjecti, produci, h. e. creari: id quod & per se absurdum, & id ipsum est, quod in quæstionem venit.

XXII. *Annon autem DEVS efficere posset, ut ex anima seu spiritu uno emanet Spiritus alius ejusdem naturæ?*

Id non esse impossibile, credidit Cornel. Martini (allegante Thomasio Sect. IV. §. 36) p. 199. Comp. Theol. ubi, *quæro*, inquit, *si DEVS vellet, ut ex Substantia alicujus angeli emanaret angelus ejusdem naturæ, an id DEO esset impossibile? Ego non puto, cum terminos contradictorios non videam, tum quòd levius videtur efficere, ut ex angelo emanet angelus alius, quàm eundem ex nihilo creare.* Ego ad quæstionem hanc ita responderem: 1.) Novum hoc *Emanationis* vocabulum antiquæ *Traducis* voci substitutum, novam mihi suspicionem vacillantis hypotheseos præbere: 2.) Hanc emanationem animæ prolis ex anima parentis, vel hujus virtute factam supponi, ac citra id, ut hujus aliquid in illius essentiam transeat, & tunc omninò necessum esset Animam parentis ex nihilo creare animam prolis; quod, ut fieret, DEVM velle manifestè implicaret, (ut taceam aliud

aliud adhuc inde proveniens absurdum:) Vel solius DEI virtute, animâ parentis merè-passivè se habente; & tunc id nihil aliud foret, quàm animam prolis divinitus ex-nihilo creari; id quod, quomodo difficilius credi possit, quàm efficere, ut anima ex anima, vel angelus ex angelo emanet, non capio.

XXIII. *Quodnam verò est aliud illud absurdum, quod proveniret ex hypothese animæ animam producentis, cujus in parenthesi præc. questionis fit mentio?*

Illud *primum*, quòd anima hoc tam nobile opus ignara produceret, quæ aliàs, quicquid operatur, eo ipso dum operatur, novit se operari. Tali quid autem, ubi? & quando? & quomodo efficiat, omnino est ignorantissima. Deinde, si virtutem haberet anima producendi aliam animam, haberet utique vim etiam productam à se animam iterum destruendi: id quod falsum tamen esse, tum generaliter ipsi animæ constat, talis quippe potentia sibi minimè conscia; tum speciatim in eo casu manifestum est, quo pii parentes filii perditæ & impœnitentis æternum interitum probabilissimè metuentes, mallent utique animam ejus penitus destructam, quàm æternum cruciandam: id quod tamen se præstare non posse probè nòrunt.

XXIV. *Quid igitur in lite hac intricatissima tandem statuenda est?*

Paucis, quod semel dixi denuo dico: Animam

mam humanam ex Lumine rationis evidenter demonstravimus, Divinitus, nullo præexistente subiecto, creari. Quomodo hæc creatio cum peccato originis concilianda sit, tum dicemus, cum Theologi de hujus natura consenserint.

ARTICVLI PRIMI

De

HOMINE

MEMBRVM SECVNDVM

De

Unione animæ Rationalis cum humano corpore.

I. Uude novimus animam istam, cujus naturam hætenus investigavimus, cum nostro cujusq; corpore unitam esse?

NOVit ea ipsa (1) experienciâ propria, se non solum eas omnes cogitationes, quarum varietatem in superioribus enarravimus, de die vigilantem, de nocte verò somniantem quoque, in cerebro expedire: (2) Impressiones sensibiles luminis & colorum, per oculos, sonorum per aures, odorum per nares, saporum per linguam & palatum, cæterarumque qualitatum tactilium per universum corporis habitum, ad animam cujusq; & ejus notitiam pervenire; quam adeò in cerebro residere hoc etiam indicio indubium est, quòd memoratorum sensuum organa pleraque intra

intra caput non solum locata reperiantur, sed nervis suis & fibrillis nerveis, per quas omnis sensatio ad animam deferri communi consensu creditur, versus cerebri meditullium manifestè terminentur: (3) Motûs corporis voluntarii ab animæ rationalis voluntate indubiè pendentes, per nervos motorios è cerebro ad organa manifestè exporrectos, expediri: ut animæ hanc cum corpore unionem, immediatè cum cerebro ejusque partibus factam necessariò judicandum sit.

II. *In quonam consistit illa animæ & corporis unio sive conjunctio?*

Conjungitur (1) corpus unum cum alio corpore, vel immediato contactu, vel mediante tertio, tanquam vinculo aut glutine; qui uterque modus ad præsentem casum minimè quadrat, cum anima sit demonstrata incorporea. Conjungitur (2) Spiritus cum Spiritu, anima cum anima, vel cum ipso DEO, mutuâ cognitione & voluntatum consensu; qui modus hoc loco pariter exulat, cum corpus humanum & cognitione & voluntate destituatur. Conjungitur (3) Substantia cum accidente, idque ex parte hujus, necessitate quadam essentiali. Verùm cum & corpus & anima sint substantiæ, neque corpus cum anima necessariò jungatur, (quod bestiarum exempla evincunt) nec anima cum corpore, quod ejus separabilitas ab illo superiùs demonstrata comprobatur; ideò neque hic casus ad præsens facit. Quare non alius (4) modus unionis superest, præter eum, quem in quæst. I. satis jam
Rr
innui-

innuimus ; mutæ nempe corporis in animam animæque vicissim in corpus impressiones & actiones, & consequenter unius vicissim ab altero passionibus. Quod quidem mutuum animæ cum corpore actionum & passionum commercium jam olim verbis pluribus inculcavit Aristoteles in principio libelli *Φυσιογνωμονικὰ* inscripti.

III. *Anne ergo corpus in animam, & anima vicissim in corpus agit? & quomodo hoc fieri potest?*

Quod prius attinet, animam in corpus agere, adeoque hoc ab illa pati & mutari, experientiâ notum est, quando ad ejus arbitrium huc isthuc movetur, mutatione adeò manifestâ in ipso factâ: Vicissim autem corpus in animam agere (quod aliqui difficilius admittunt) tunc manifestum erit, si rectè, quid agere & pati sit, comprehendamus. Nimirum, si status alicui rei mutatur, illa status mutatio, respectu causæ mutantis vocatur actio, respectu subjecti mutati dicitur passio. Quoniam igitur sentiendo, dolendo, videndo, audiendo &c. non solum corpus patitur ab externorum sensibilibus corporeo contactu, hos ipsos organorum corporeos contactus, mutare statum mentis nostræ (qui non alius est, quàm cogitare) novas ei cogitationes inferendo, experientia constat, quam quisque intra seipsum habet: ut corpus in animam quoque agere dicendum sit; tametsi diversâ multum ratione ab ea, quâ anima in corpus agit.

IV. *In quonam consistit hæc actionum corporis & animæ diversitas?*

Animæ actio verè proprieque talis, est velle, & liberè quidem, ita ut ad hanc actionem suam non ab alia causa, quàm à seipsa determinetur: qua in re iterum Dei imaginem exhibet. Nam & DEI actio non nisi velle est, sed cum hoc ingenti, inter Velle DEI & Velle hominis, discrimine, quod velle DEI cum effectu extra DEVM respondente, semper conjunctum est, nunquam frustrabile; nostrum autem velle effectu suo extra mentem sæpissimè defraudari, frequentissimè dolemus. Sed corporum omnium, & sic nostri quoque, actiones, improprie tales sunt, aliunde semper determinatæ, ita ut corporum agere, sit patiendo agere, motum movere &c. prout agere organorum omnium tale vel tale est, quia ab alio sic vel sic aguntur & impelluntur.

V. *Sed questionis tertiæ posterior portio adhuc superest: quomodo sc. materiale in immateriale, & hoc vicissim in illud, Mens in corpus, & corpus in mentem agere possit?*

Cùm actio mentis sit velle & cogitare, corpus autem nec alias ejus cogitationes, nec illius speciatim volitiones intelligere aut cognoscere valeat; actio corporis localiter movere & impellere, ipsum prius aliunde motum, mens autem localiter moveri & impelli non possit; evidens est, actûs mentis & corporis nullâ cognatione naturali in homine connecti & cum tamen illo-

rum unio & reciprocum commercium ex antecedentibus evidenter pateat, supernaturali virtute DEI, (qui toto genere diversas has substantias in unum compositum conjungi voluit) illud institutum fuisse necessum est. Quod institutum cum penitus à liberrimo DEI arbitrio dependeat, ejus rationem & modum à nobis deprecari iniquum foret.

VI. Ita vero ad arbitrium Divinum immediate recurrere in questionibus naturalibus, magnum Physicæ scientiæ compendium nobis daturum esset : Quæsitum sc. quemvis effectum ideo talem esse, quia DEVS talem esse voluerit ?

Est equidem hoc assertum sine dubio verissimum : Quicquid in natura fit, ideo fieri, quod DEVS id sic fieri voluerit : cum enim ex nihilo factum universum mundum rationis ductu notissimum sit ; apparet evidentissimè, sicut universam naturam, ita omnes inde consequentes effectus ab illo DEI arbitrio, quo loco nihili materiam aliquam existere, & existentem hoc aut illo modo moveri, voluit, plenissimè dependere ; nec aliud responsum ad quæstionem, unde sit prima hujus mundi materia ? & unde generalis illius, ad destinatas innumerabilium corporum formas deinceps oriundas providentissimè directæ ? dari potest, quam utrumq; à solo liberrimo conditoris Beneplacito dependere ; imò horum ipsorum in hoc mundo sensibilem præsentiam nos immediatè ad agnoscendum Creatorem deducere.

ducere. Verùm, cum his generalissimis principiis semel positis, & in actum deductis, innumerabiles deinceps corporum formas exortas esse recta ratio facilè percipiat; ideò in ipsas illas formas primùm, dein ex illis consequentes, tanquam è suis causis, effectûs, sedulo inquirere tenetur, in eum primariò finem, ut elucentem ubique summam sapientiam, providentiam & potentiam, & consequenter ipsum creatorem sapientissimum, providentissimum & potentissimum concludat: non ampliùs circa propositum aliquem effectum naturæ specialem [e. g. cur lapides aliaque, quæ vocamus, gravia deorsum ad terræ centrum tendant & connitantur? &c.] non ampliùs, inquam, responsura, Quia DEVS voluit; sed in media, quibus DEVS in hoc effectu uti voluerit, sedulò inquisitura.

VII. Ergo, ut audio, in quibusdam saltem effectibus ad DEI voluntatem unicè recurrere licet?

Id certè è superioribus patuit: Et est sanè dolendum, multos in effectibus omnibus aliquam semper causam secundam vel mediam ubique extorquere, nec unquam in prima acquiescere velle: quemadmodum contrà ineptum esset, ceu dictum, causam primam nulla convincente ratione ubique allegare, & medias aut secundas (quæ ad primam urgentiùs ducunt) penitus negligere. Habuimus certè in superioribus, cum de igne ageremus, plura exempla, in quibus ad causam aliquam secundam, sive mediam recurrere

rere non licebat tantum, sed physicam aliquam rationem effectuum observatorum reddituri, necessum habebamus; nempe, materiam aliquam subtilissimam & rapidissimè agitatam: ab hac verò ad aliam adhuc agitationem, & inde porrò ad aliam, infinito processu, provocare, vanum videbatur, & in primi motoris arbitrio tandem acquiescere necessarium: Et nonnunquam quidem longior causarum secundarum series ordine deduci potest; aliàs verò, cum de primis præsertim principiis sermo est, citius ad primam recurrendum; prout in Materia prima, aut Mundi origine investiganda, alibi factum est.

VIII. Cum anima humana vi hujus unionis, corpori semper esse præsens debet; an ergo cum corpore localiter variè moto, simul illa quoq; localiter movetur?

Ita certè vulgus hominum absque hæsitazione judicat. Philosophus autem, qui superius demonstrata novit (1) Animam seu mentem hominis incorpoream esse & immaterialem; ideoq; (2) neque locum neque motum Physicum seu localem admittere. Interim (3) omnino dicendum est, vi unionis divinitus factæ, animam ibi esse, ubi est corpus, quod regit & à cujus motibus afficitur; tametsi modum, quo cum corpore localiter translato simul per accidens transfertur, docere nec possumus, nec tenemur, cum tota hæc mirabilis unio spiritus cum corpore, & quicquid eam necessariò consequitur, à solo liberrimo Conditoris Beneplacito dependet; cujus adeo ratio à nobis postulari non potest.

CAP. II.

De

Animæ humanæ cum corpore humano unitæ mixtis quasi & communibus utrique actibus.

I. Cùm in superiori I. Membro, actûs & operationes mentis separatæ fusiùs consideravimus, nunc de actibus unitæ quoque generatim agendam erit?

Non incongruè, opinor, hoc fiet, ut, quemadmodum actiones mentis à corpore adhuc solutæ spectavimus; ita nunc eas quoque lustremus, quæ ab ipsa jam unita, sed insimul à corpore, cui unita est, dependent; quas ideò vel *Mixtas* dicere possumus, vel *Communes*, vel uno verbo *Hominis* actiones. Quæ, cùm innumerabiles sint, ad tria tamen genera commodè revocari possunt; quorum I. mum dicatur, *Sensus cum judicio mentis conjunctus*: II. dum, *Motus corporis voluntarius*: III. *Appetitus sensitivo-rationalis*.

II. Quid intelligis per sensum cum judicio mentis conjunctum?

Corpus hominis est simul animale corpus, organis sensoriiis, oculis, auribus, aut nervis præcipuè & eorum fibrillis per illa tum *visionis* tum *auditus*, similiter per narium interna *olfactui*,

R r 4

linguæ

linguæ & palati *gustui*, habitum totius corporis carnosum *tactui* destinata Organa, passim mirabiliter distributis instructum. Hæc omnia cum cæteris animalibus, saltem perfectioribus, quæ *Bruta* vocamus, communia sint, quorum usum in illis generatim *Sensum*, in specie *visum*, *auditum*, *olfactum*, *gustum*, & *tactum* appellamus, mediante *animâ*, quam vocamus *sensitivâ* obtinendum, & mox specialius exponendum; in homine solo cum hoc sensu vario, Brutisque etiam communi, conjunctum ordinariè ubique esse mentis quoque nostræ judicium aliquod, cuique internâ propriæque experienciâ notissimum.

III. Quantum judicare datur, hæc satis intelligi nunquam poterunt, nisi prius, quo pacto omnes illæ sensationes in brutis fieri concipiendæ sint, anticipando declaremus?

Ita profectò est, ut dicis. Verùm, ut hæc sensationes, & modus quo singulæ fiant, plenè intelligerentur, necesse esset 1.) ut omnia illa organa sensuum inprimis anatomicè essent nota & perspecta; 2.) Animæ etiam sensitivæ ratio & natura esset cognita. Quod primum attinet, illud tum commodè fiet & plenius, cum de Brutorum sensibus ex professo agemus, interim sequentia hoc loco supponentes: In omni sensatione, quatenus illa brutis cum homine communis est, requiri *primò* objectum sentiendum, quod in organorum fibrillas, eas movendo, agat; rectissimè enim Aristoteles dixit, *sentire esse*

esse pati quoddam : secundò Motio illa sive impressio debet per fibrillas sensorias ad cerebrum, ibique stabulantem animam sensitivam, transmitti, & hæc tertio ita exceptam impressionem ex cerebro aliorum ad organa motoria ablegare, quorum ope mediantibus sensationibus intus in cerebro factis, externi deinde corporis aut partium motus, incessus e. g. natatus, volatus, alique innumerabiles, consequantur. Quibus interim aliquo modo concipiendis, alterum ex duobus superioribus, nempe quæ sit Animæ sensitivæ natura? paucis, at imaginabiliter declarabimus.

IV. Quid est igitur, quoad rem ipsam, *Anima sensitiva?*

Rectè quæris, quid ea sit quoad rem ipsam: Scholarum enim sive definitiones sive descriptiones sunt merè-nominales expositiones. Dico igitur, per animam sensitivam me nihil aliud intelligere, quàm tenuissimum & invisibilem halitum, ex calidiore sanguine in arteriis per cerebri substantiam circulante exhalantem, quem aliàs Physici Medicique *Spiritum animale* vocant. Præter hunc Spiritum animale enim à plerisque omnibus agnitum, aliam animam sensitivam non requiri, sed hujus ope omnia effecta, quæ animæ sensitivæ adscribuntur, produci possunt. Hic igitur Spiritus animalis, sive hæc anima sentiens, è sanguine arterioso cerebri præcipue sublimatus & per ejus porosam substantiam quasi eolatus, non solum om-

nes cerebri poros, ventriculos & cavitates, sed etiam omnes nervorum ex cerebri basi oriundorum, & in organa sensoria filatim quasi distributorum, invisibiles meatûs undiquaque replet, eaque suâ præsentia per universum corpus, id aptum reddit ad passiones & impressiones sensibiles rite recipiendas.

V. Fiat nunc dictorum ad sensationes primum applicatio.

Sensilia sunt Lumen, Sonus, Odor, Sapor & Qualitates tactiles, quæ omnia, ut in parte generali ostensum est, materiæ cujusdam plus minùs subtilis motum aliquem in organa sensoria, adeoque in animam istam sensitivam inibi, cum primis in fibrillis nerveis, largiter diffusam, factum dicunt. Hi motûs in hac anima vel in istis spiritibus animalibus anterioribus, respectuque cæterorum in Cerebro quodammodo exterioribus recepti, in oculo autem tanquam in camera obscura, cum visibilium picturis, imaginibus, & speciebus conjuncti, interventu fibrillarum nervearum & his inclusorum Spirituum, ad Spiritûs cerebri internos transferuntur; quæ internæ in spiritûs cerebri continuatæ motiones ac impressiones, id totum sunt, quod sensationes, quatenus eæ in brutis terminari supponuntur, seu passiones sensitivas absolvit. Verùm in homine, fiunt ultra hæc, propter unionem Animæ rationalis, cum anima illa sensitiva immediatiùs factam, perceptiones etiam

iam mentales (quarum, à Conditoris Divini quippe arbitrio pendentium, modum nec posci possumus nec dare) varia insuper iudicia, à quibus vix ac ne vix quidem abstinere possumus, nisi mente aliorum quasi vi quadam abstractâ. Et hoc est, quod dico: Homini competere *Sensum* uti brutis, *sed cum iudicio mentis conjunctum*, & quod Aristoteles verissimè dixit in Problematibus: *ὁ ὕψος ὁρᾷ, Mens videt*, non oculus aut cerebrum; in homine solo scilicet.

VI. *Lubetne hanc rem exemplo quodam illustrare?*

Lubet utique, & lubentissimè quidem, & exemplo non ficto sed realiter exhibito. Contigit ante biennium & quod excurrit, ut Rotenburgum ad Tubarim profectus, inde postmodum, antequam domum redirem, Gaildorsium deviarem, cognatos & affines, de facie mihi maximam partem ignotos invisurus. Erat inter hos facilè Amicissimus, Pastor quidam cœtûs alicujus Evangelici, quatuor circiter milliaribus inde adhuc remotior. Hunc delassatus equitando, per tabellionem rogo, ut ad me venire ne gravetur, ipsius præcipuè videndi causa eò delatum. Is audito nuntio de mea tam vicina præsentia altero die ocyùs advolare, eques quidem & equite alio comitatus. Cùm is expectantem me in horto quodam suburbano viæ proximo offenderet, vix ejus imago in oculo meo excepta & ad cerebrum transmissa erat, cùm hæc statim subit mentem cogitatio: Hui!
quam

quam similis est hæc facies vultui conjugis meæ, frater sc. germanus forori ! Cùm inter has aliasque plurimas cogitationes, ejus comes quoque me salutaret, familiariter mihi arrideret, eodem momento ego mecum : Non ignotus planè hic vultus mihi, neque tamen distinctè cognitus ; quis ergo sit quærens, cùm audio, Filium meum me videre, Scholæ Tubingensis Præceptorem, quem ex annis pluribus non videram, & capillitio insueto tectum, dignoscere statim non poteram ; cogitate ipsimet, quàm multæ, quàm variæ, eodem quo ipsum ex improvviso intuebar momento, animum meum subierint cogitationes : Unde hîc mihi tam inopinatus hoc loco hospes ? Quomodo isti comes datus ? & tantum non sexcentæ aliæ.

VII. *Quis sibi porrò vult motus in homine voluntarius ?*

Scilicet motus à sensibilibus externis per organa sensoria eorumque nervos in cerebrum & hospitantes ibi spiritus transmissus, hos ipsos per diuturnam ab ineunte ætate consuetudinem, pro varietate receptarum & earundem tamen multoties iteratarum, impressionum assuefactos, nunc ad hunc nunc ad alium musculum vel organum motorium subito excurrere facit, qui vesiculares illorum structuras inflando, brachia ad prensandum, aut pedes ad fugiendum &c. inscio ac nihil cogitante animali, disponunt, velut infrà plenius docebimus : quibus motibus externis prævias intra cerebrum suum

suum factas sensationes nobis produnt, alioqui nobis æquè ac ipsis incognitas futuras, quemadmodum nec hæ, nec isti motûs, ipsis volentibus (voluntatem enim habere negantur) sed ex necessitate omnes contingunt.

VIII. *Illam Spirituum assuefactionem optârim mihi, antequam ulterius pergam, aliquantum adhuc illustrari.*

Quod fiant ejusmodi spirituum assuefactiones in brutis æquè ac hominibus experientiâ notorium est: quo modo fiant difficile dictu est. In brutis violentia, verbera hominum, sensuum & appetitionum impetûs multum præstant, sæpius iterata; in hominibus præter hæc etiam monita, increpationes &c. aliquid conferunt. Ubi verò semel habitus per assuefactionem introductus fuerit, tunc in hominibus etiam is agere, mente quoque non conscia potest, velut experientia docet in Musicis exercitatis, quorum digiti suis motibus seinvicem sequuntur, prout assuefacti fuerunt, mentis voluntate tunc non interveniente, sed aliorsum sæpe penitus conversa.

IX. *Sic igitur ne in hominibus quidem omnes motûs sunt voluntarii?*

Non omnes, velut exemplum docet, sed nonnulli vi assuefactionis & ex necessitate, ut in brutis omnes, sequuntur. Plerique tamen & ordinariè, propter arctissimam mentis & corporis unionem, quâ non facile sentimus quicquam, quod

quod non mente quoque percipiamus, & motus consecuturos, voluntatis nutu quoque modere-
mur. Unde fit ut ejusmodi *Motus* sensationem
consequentes, *Voluntarii* & *Actus imperati* dicantur,
bonitatis & malitiæ capaces, ob concursum
mentis, legum sibi divinitus inscriptarum probè
consciæ: cum ex adverso brutorum sensationes,
& has consequentes motûs, sint merè-necessarii,
laudis ac vituperii ideò, pœnarumque & præ-
miorum propriè dictorum, incapaces, quod in-
super cum plenariâ legum ignorantia conjuncti
sint.

**X. Quid deniq; per *Appetitum Sensitivo-*
*Rationalem intelligendum venit?***

In brutis nempe post passionem sensûs in
spiritibus cerebri receptam, horum gemina de-
terminatio consequi solet; una versus nervos
& musculos motorios in præcedentibus jam com-
memorata; altera per nervos ad cor & vasa san-
guifera &c. directâ, quâ sanguis aliique humores,
laxatis sc. aut constrictis magis minusve vasis,
vel pronius promptiusque fluunt, vel in fluxu suo
cohibentur & impediuntur, prout nimirum im-
pressæ sensationes vel gratæ acciderunt naturæ
animali, vel ingratae, & spiritûs animales à prima
nativitate, illarum occasione, sensim sensimque
pariter adsuefacti fuerunt. Hæ sanguinis & hu-
morum in animalibus subitò exortæ commotio-
nes, communiter *Affectus* appellari solent, & pro-
ut cum aliqua rei sensu perceptæ persecutione
vel fuga conjuncti sunt, *Appetitum sensitivum*
consti-

constituere dicuntur, hominibus quoque, utpote animalibus, hætenus communem.

XI. *In quo Verò differt Affectus & Appetitus hominis à brutorum Appetitu & affectu?*

In eo differt, quod Affectus & Appetitus brutorum ab impressionibus sensualibus merè passivis & necessariis unice dependet atq; adeò & ipse merè necessarius, consequenter & laudis ac vituperii, præmii & poenæ propriè dictæ incapax: Econtra verò in homine, uti sensatio rarissimè fit, quin Mentis perceptio propriè dicta, cogitatio & sensationum conscientia ipsi jungatur, ita cum hac perceptione impressionis factæ mentali jungitur etiam voluntatis complacentia quædam aut displicentia, ejus interventu commotiones illæ humorum, alioquin ordinariæ futuræ & ex necessitate secuturæ, vel vehementiores fieri possunt, aucto impetu ex voluntatis arbitrio, vel sedatiores ex opposito, imminuto eodem impetu, per idem voluntatis arbitrium: unde postmodum *affectus* illi & commotiones humorum voluntariæ fiunt, ac de ratione vel rectâ vel abusiva participant, indeque vel laudabiles vel culpabiles evadunt, nonnunquam etiam ipsis bestialibus affectibus pejores & varietate quoque magis multiplices.

XII. *Quo-*

XII. *Quomodo possunt affectûs humani brutalibus fieri vel moderatiores, vel immoderatiores & peiores?*

Ponamus brutum aliquod ab alio sensibilibiter lædi, mordendo v. g. vel alio modo dolorem inferendo; prout illatus dolor spiritibus in cerebro vel multo sensibilibior est, vel minus sensibilis, ita spiritûs magis aut minus irritati, copiosiores aut minus conferti ad cor & vasa sanguifera fluent, & in his concitatioem vel minus concitatum sanguinis fluxum, h. e. majorem vel minorem iracundiæ gradum excitabunt. Quod si homo ab homine similiter læsus ac dolore affectus fuerit, accesserit autem ad hujus perceptionem corpoream in spiritibus improprie dictam, verè propriæque dicta mentalis perceptio, & cum hac opinio mala de homine dolorem inferente, quòd id fecerit destinato consilio & in læsi contumeliam &c. tunc spirituum affectorum fluxus ad cor &c. ab irritata voluntate multò concitatioer fit & furiosior, ut brutalem, cum quo talis opinio conjungi non potest, multum excedat; sin opposita opinio, quòd læsio non sit facta datâ operâ sed fortuitò, aut animus læsi ad veniam facile dandam, aut contumelias etiam æquo animo ferendas, assuefactus; hæc voluntatis dispositio, multum de impetu brutali spirituum, ex necessitate aliâs secuturo, demet, ut affectus vel nullus, vel multò moderatioer, subsequatur.

XIII. *Qui*

XIII. Qui verò hominum affectus brutali- bus multiplices magis esse possunt?

Ideò, quod affectus brutales meram sensa-
tionem consequuntur, quidam humani à sensa-
tionibus & mentis judicio liberaque voluntate
junctim dependent, aliqui denique ab opinione
mentisque judicio, sive recto sive erroneo, prin-
cipaliter & quasi solitariè promanant. Postremi
hi brutis plane convenire non possunt, quia hæc
judicio, opinione, ratiocinio &c. penitus desti-
tuntur. Ejusmodi affectus sunt, e. g. *Admiratio*,
Invidia, *Zelotypia*, *Desperatio* &c. quam ultimam
vel solam in bruta non cadere, inde evidentissi-
mum est, quod inauditum est brutum unquam
sibimet ipsi mortem conscivisse; id quod capitalis
aliàs Desperationis effectus est, ortus ex falso
quodam & erroneo judicio vel ratiocinio; quale
in cæteris commemoratis ubiq; intervenit. Quo-
niam autem nec verè nec falsò opinari aut judi-
care bruta possunt, ideò hujusmodi affectûs, qui
judicium vel opinionem involvunt, in bruta non
cadunt.

CAP. III.

De

Cessatione omnimoda horum actu-
um, quam hominis, ut talis, Mortem
appellamus.

I. Quid intelligis per mortem hominis ut talis?

Cum homo constet duabus partibus essen-
tialibus, Corpore nempe organico seu ani-
S s mali,

mali, & mente seu anima rationali; evidens est, geminam ipsum vivere vitam, *rationalem*, quæ in iis actibus consistit, quos hætenus vel menti proprios, vel menti corporique communes diximus, in mutuo utriusque commercio consistentes; & *animalem*, quæ solius corporis est, & brutis animantibus communis: consequenter geminam ipsi quoque subeundam esse mortem, alteram, quâ dissolvitur unio mentis cum corpore, seu mutuum illud utriusque commercium hætenus explicatum, quod in brutis non reperitur; & hanc appellamus *Mortem hominis ut talis*, qualis in brutis locum non habet: Alteram verò dissolutionem corporis & animæ hujus corporeæ, cujusmodi bruta omnia pariter subeunt.

II. *Utra verò mors alteram antecedit?*

Tempore quidem ordinarie neutra alteram antecedit, sed simul utræque contingunt; naturâ verò mors animalis prior est, h. e. dissolutio seu separatio corporis organici & animarum corporearum, sensitivæ & vegetativæ, antecedit; in auras scilicet exhalantibus ac dissipatis ultimis portionibus, tum ignis sive caloris vitalis cum sanguine aliàs in arteriis & venis circumflui, tum spiritûs animalis in cerebro & nervoso genere aliàs stabulantis ac sese moventis; his, inquam, reliquiis utriusque animæ penitus factis evanidis, corpus animale moritur, omni deinceps sensu motuque destitutum, atque adeò ad mentis imperia exequenda, & mutuum
cum

cum hac commercium continuandum, omnino tunc ineptum. Quo ipso sublata est mentis cum corpore unio, h. e. mors hominis ut talis, infimul consecuta.

III. *Sed quæ causa est ita deficientis tandem tum ignis vitalis, tum spirituum animalium, ut non nisi pauca supersint utrorumque reliquiae, mox penitus evanida futura?*

Causæ sunt morbi, sensim & gradatim vigorem sanguinis, & vitalis in eo caloris, exhaurientes ac tandem ita, brevius aut longius, diminuentes, ut ille chymo in ventriculo decenter excoquendo, non amplius sufficiat, expressus adeò per venas lacteas chylus jam depravatus cum sanguine deinceps commixtus, depravatum etiam sanguinem generet, qui deinde in arterias coeliacas delatus, depravationem adhuc chymum, chylum & sanguinem, & hîc ulterius circulando, adhuc depravatiorem &c. tandemque calore vitali magis magisque exhaustum, & consequenter (cùm spiritus animalis vitalis caloris flos & subtilissima portio sit) spirituosorum in cerebro partium defectum, sensationum adeò & motûs, itemque caloris, in extremis præsertim manuum pedumque partibus, cessationem, & ultimò tandem, gradatim in intimioribus circa cor horum omnium, atque adeò Vitæ, plenariam extinctionem consequi necessum est. Quâ consecutâ, & spiritu animali, tanquam vinculo mentis & corporis sublato, mens iterum soluta com-

mer-

mercium cum illo hæcenus suavissimum licet invita deferere cogitur; ut eo ipso cum morte corporis, mors hominis quoque indivulso nexu eodem momento conjuncta sit.

IV. *Sic igitur Mors corporis unica causa est consequentis aut concomitantis potius ex necessitate mortis hominis, moralis puta, phycas enim superius indicavimus: Quanam verò causa est communissima mortis corporis?*

Quod primum attinet, illud experientiâ evidentissimâ constat, quòd nunquam mentis à corpore, salvo adhuc & vegeto, separata exemplum uspiam habuimus; ut, quod in Sacris dicitur, Hiobi XIV, v. 5. *Breves esse hominis dies, numerum mensium ejus apud DEVM esse; constituisse hunc ejus terminos, qui prateriri non possint*, non alio quàm eo sensu accipi debere videatur, quod DEVS prævideat omnes mortis causas, adeoque momentum quoque ejus ultimum, quod adeò intuitu hujus ejus præscientiæ, ulterius extrahi non valeat; cùm aliqui decurtare hominem sibi, vel alteri, vitam posse, quam DEI benignitas ipsi lubentissimè longiorem concessisset, nimis apertum sit, vel hoc ipso argumento, quod nunquam hominis mentem à suo corpore separet, nisi mors corporis priùs, vel alienâ, vel propriâ hominis culpâ, antecesserit.

V. *Hoc clariùs aliquantum explices velim.*

Nempe hoc alterum est, quod in quæst. præced.

ced. proposuimus, de causa mortis corporis humani communissima; quam triplicem generatim agnoscimus: (1) *Violentam manum*, gladio, laqueo, similibusque mediis, alius vitam, vel autoritate publicâ, vel propriâ malitiâ aut improvidentiâ abrumpentem; quod in casu præsertim medio *propriissimè dictum homicidium est*. (2) *Morbum*, ab ipsa hominum vel destinata intemperantia, vel neglectu sui corporis inconsiderato, à lucri cupiditate, ambitione, similibusque vitiis, plerumque oriundo; ut sano sensu plerique omnes *ἀνθρώποις* dici mereamur, quòd vitæ terminum (quem DEI benignitas plerisque omnibus, quantum ab ipso stat; ultra seculum exporrigi lubentissimè concessurus esset,) nostrâ ipsorummet culpâ, alii latissimâ, alii latâ & qualicunque, abrumpamus: (3) *Semina morborum hæreditaria*, quæ non ipsi nobis propriâ culpâ vel vitio accersivimus; sed à parentibus & proavis hæreditate quasi quadam accepimus: quæ infausta hæreditas, si ipsorum culpâ & vitio nobis obtingat, illis Infanticidii crimen aliquo modo impingeret.

VI. Sic igitur Mors hominis, ut talis, DEO quodammodo invito eveniret?

Saltem eam directè non volente; ex quo porrò concludo, aut superiùs jam illatum confirmo: DEVM, qui mentem seu rationalem animam existere lubentissimè patitur, quamdiu corpus durat ac vivit, atque adeò in ipsius gratiam, multò magis ipsius, tanquam nobilissimæ

substantiæ, causâ, & propter dotes ejus superiùs enarratas, sano sensu Divinas dicendas, eam, etiam post corporis interitum, passurum perpetim existere; quandoquidem aliàs nulla vis in universa natura reperitur, quæ eam valeret destruere.

SECTIONIS POSTERIORIS

De

Corporibus Animatis

ARTICVLVS SECVNDVS

CAPVT I.

De

Brutis animalibus in genere.

I. *Quid vocas animal brutum, & quodnam est præcipuum inter hoc, & hominem, discrimen?*

Brutum animal voco, quod mente & ratione destituitur, h. e. omnibus illis actibus, quos Artic. anteced. Membro I. cap. II. & seqq. prolixè enarravimus &c. Verbo: Mens five Anima rationalis hominem à bruto distinguit.

II. *Unde verò certi sumus animalia bruta dicta mente & ratione destitui? adeoq; verè bruta esse?*

Prudenter equidem & cordatè in Epist. Parte I.

te l. p. 180. *Cartesius* ait , tametsi pro demonstrato habeat , probari non posse , aliquam esse in brutis cogitationem ; non ideò puto posse demonstrari (à priori intellige) nullam esse ; quia mens humana illorum corda non pervadit. Sed examinando, quidnam sit hac de re maximè probabile , nullam , pergit , se videre rationem pro brutorum ratione vel cogitatione militare, præter hanc unam, quòd, cùm habeant oculos, aures, linguam, & reliqua sensuum organa sicut nos, verisimile sit, illa sentire quoque sicut nos ; (sc. cum iudicio & cogitatione) Quæ ratio cùm sit maximè obvia, eam hominum omnium mentes , ait , à prima ætate occupasse : sed esse tamen alias rationes multò plures & fortiores, sed non omnes ita obvias, quæ contrarium planè persuadeant ; inter quas suum quidem locum obiter obtineat, quòd non sit credibile omnes vermes, culices, erucas &c. cum reliquis animalibus immortalis anima esse prædita.

III. *Expone mihi quæso, præter modo dictam, similesq; alias (quas deinceps per occasionem urgebimus) rationes, unam ex pregnantissimis, quæ bruta cogitationibus destitui à posteriori probet?*

Est ea procul dubio hæc præcipua, quòd bruta etiam perfectissimi generis loqui, atque ita cogitationes suas (si quas haberent) vel brutis aliis, vel hominibus non aperire sponte suâ

studeant; tametsi omnibus organis ad loquendum necessariis, æquè ac homines, instructa sint, ac præterea illorum plurima (veluti domestica) inter homines loquentes continuè versentur: ut solum defectum cogitationum, atq; adeò defectum voluntatis pandendi illas, si quas haberent, in causa esse oporteat universalis illius defectûs loquelæ.

IV. *Edunt tamen certas voces ac certos sonos, quibus indicant passiones suas, dolores, famem, sitim &c. tanquam loquelâ quâdam?*

Non est hæc vera loquela, quæ in signis quibusdam arbitrariis & pro lubitu excogitatis, aut imitatione saltem ab aliis excogitatorum arbitrariâ consistit; [Unde est, quòd in singulis terræ habitatæ angulis varient linguæ, tanquam aptissima signa cogitationum inter homines communicandarum] non in signis naturalibus & ex necessitate certas passiones consequentibus; prout e. g. baculus fractus crepitum quendam, aut rota plaustrî onusti tinnitum edit, passionum istarum indices; vel etiam ipse homo mente licet & arbitrio præditus, nonnunquam in summis doloribus etiam repugnante arbitrio & voluntate, vociferari necessitatus, à vociferatione abstinere non potest, ingenti etiam lucro ad illam abstinentiam sollicitatus. Talia signa merè naturalia, non arbitraria esse, vel ex eo patet, quòd e. g. lupo præ dolore extremæ famis

famis &c. in America & India orientali, non aliter ac hîc in Germania ululat &c.

V. An ergo de hominibus omnibus, etiam stupidioribus, hoc universaliter certum est, quod ejusmodi signa arbitraria excogitent, ad cogitationes suas cum aliis communicandas?

Nihil magis cohærens & consecutivum est, quàm cogitatio, & propositum, ea quæ cogitamus, nisi peculiaris quædam ratio nos interdum jubeat cogitata nostra vel invitos premere, cum aliis communicandi; adeò quidem, ut vel ipsi surdi & muti signa particularia excogitent, quibus cogitationes suas exprimant. Quo quidem argumento meritò videbatur Viro celeberrimo validissimè probari, non fieri ex organorum defectu, quod bruta non loquantur, sicut nos, sed ex defectu cogitationis: maximè in canibus, felibusque & aliis animalibus domesticis, quæ inter loquentes nocte dieque versantia, ne verbum quidem unicum imitari, vel intra semiseculum sua sponte quidem advescunt.

VI. At enim verò difficile est credere, si stupidissimi etiam homines rationem habent, animalia bruta non ratione tantum, sed cogitatione quoque carere; cum quædam illorum multos homines effectum non uno superent?

Hoc ipsum autem satis probat, ea quæ melius,

liùs, quàm nos agunt, non agere mentis alicujus aut rationis ope, (alioqui plus etiam rationis ipsis concedendum esset quam homini ratione pollentissimo: id quod stolidissimum esset & indigno mente vel ratione homine;) Sed naturali solùm instinctu aut organorum apparatu tantùm isthæc omnia agere, haut secus ac horologium, quod horas longè meliùs indicat, quàm homo sapientissimus, vel horum centum aut mille, cum omni suâ in unum cùmulum congestâratione. Quod si verò homo artifex, subsidio rationis suæ automaton fabricare novit, quod postea suorum organorum apparatu plus præstare præcisiùsque valeat eum effectum, quem centum homines omni suâ ratione, sine ullo organorum apparatu, unquam præstabunt; quidni DEVS, & summæ tum sapientiæ, tum potentiæ Artifex, potuerit machinas ejusmodi animales condere, quæ eos edant effectûs, vi solius organicæ suæ structuræ, & assuefactionis præcedanæ, quales nos ordinariè virtute similis organicæ structuræ & assuefactionis, sed insimul volente, quæ in nobis est, mente, solemus: maximè cùm in certis casibus (ubi mens aliis cogitationibus occupata est) effectûs similes consequantur, mente nec volente nec cogitante.

VII. *Expone quæso hujus postremi asserti exempla quædam & specimina.*

Talia sunt e. g. (1) subitanea corporis totius cohorrescentia ac tergiversatio, vel ad fugam dispo-

dispositio, cum interdeambulandum meditantēs aliquid, aut legentes, ad obortum inopinatò strepitum ante cohorrescimus, vel ad fugiendum componimur, quam de fuga cogitare, aut, quid obortus strepitus, vel unde sit, assequi mente potuimus: (2) cū lapsuri brachia antrorsum protendimus, mentis cautelam aut consilium vel cogitationem manifestò anticipantes: (3) cū digitum aliquo nostris oculis è vicinia subito intentante, ipsi oculi se quasi sponte, aut verius inviti, nolente etiam mente, claudunt: (4) cū fidibus canere qui didicerunt, non solum cantilenas notas & familiares promptè canere norunt, animo interim omnia alia cogitante, vel eo qui canit, cum tertio de rebus planè alienis colloquente &c. Sic enim inenarratis casibus argumentamur: si in homine ipso, cujus perceptionibus sensitivis seu impressionibus ordinariè mentis cogitationes & iudicia semper conjuncta sunt, in quibusdam tamen casibus, in quibus mens aliorum occupata est, spiritus animales intervētu suarum assuefactionum eosdem effectūs expediunt, quos aliàs mente præsente cum consilio & proposito expedire solent [ut e. g. digiti eas fides & claves organi pneumatici ordine tangant, quas alioqui præmeditata mente tangere consueverunt:] quidni in brutis absque mentis concursu effectūs omnes, humanis istis multò ignobiliores, eorundem spirituum animalium assuefactione expediri possint?

VIII. *Quando suprà unius aſtomati mirandi effectus facta eſt mentio, optarim aliquot aliorum adhuc injicere mentionem, ad illustrandam præſentem materiam.*

Non commemorabo nunc Archytæ Tarentini columbam ligneam, in aëre volantem, nec Regiomontani aquilam ex urbe Norica ingreſſuro hanc Imperatori obviam emiſſam, quarum fidem ævorum vetuſtas ex animis quorundam expungere fere conatur; ſed recentiora quædam ſolùm dabo: (1) Nymphas ſive icunculas Drebellianas, quæ ex antro montis artefacti ad lavandum in aquis vicinis egrediebantur allucente ſole; hoc vero intra nubes ſeſe abſcondente, intra priſtinum antrum ſe recipiebant; cui artificio ſimile, fortè ſecundum cauſam quoque, fuit ſimulachrum Ferdinandi tertii Becherianum, quod intra nubes artefactas occultum tamdiu, dum Sol à veris nubibus occultabatur; ſtatim autem ac Sol ex nubibus liberè proſplendebat, ipſum quoque è ſuis nubibus in conſpectum prodibat. (2) Duas machinas mirandas, ante hos annos ferè 50 è Polonia Norimbergam allatas; quarum *prima* ſalutationem, quam vocant, Mariæ angelicam repræſentabat, utrumque ſimulachrum juſta hominis ſtaturâ exhibens, & Mariam quidem quaſi legentem in libro quodam ſupra pulpitem collocato, Gabrielem angelum autem in aëtu introgreſſionis conſtitutum: ad cujus conſpectum quaſi, Maria derepentè, tanquam attonita, in pedes ſe erigebat, Angelo interim inter concen-

tūs

tūs musicos, quasi desuper impendentium angelorum comitum, gestibus loquentis salutationem expediente: Altera Viraginem justā staturā Gallico amictu eleganter ornatam exhibebat, quæ supra theatrum ultrò citroque commens, ubi ad finem theatri pervenisset, converso toto corpore, in partem oppositam, unde venerat, remeabat, inter procedendum citharā vel testudine ludens, & unā ex utraque theatri parte stantes spectatores alternis quasi intuens; ut de Hautschianis pluribus non minus admirandis machinis Norimbergæ elaboratis, nunc fileam.

IX. *Quid igitur tandem ex hæcenus inculcatis inferes?*

Hoc infero: Non esse necesse, brutis animantibus, etiam callidissimis, uti videntur, vel astutissimis, quicquam aut rationis aut veræ cognitionis tribuere; quandoquidem omnes ipsorum effectūs & operationes utcunque mirabiles & stupendæ, ex *naturali* quodam *instinctu*, quem vocamus, h. e. ex interna corporum suorum structura sive organizatione, & his interfusis sanguinis, lymphæ, aëris, ignis vitalis, spirituumq; fluoribus, provenire posse, vel ex eo credibilissimum est, quòd hæc machinationes, ipsum summum Numen artificem & inventorem habeant, quibus adeo mediantibus multò magis stupenda expedire valeant, quam esse possunt ea omnia, quæ ab automatis humano ingenio excogitatis, & humanā manu elaboratis, hæcenus præstari potuerunt. Qui naturalis brutorum
instin-

instinctus, h. e. mere-machinalis operandi modus insuper ex eo luculentissimè elucet, quòd hi operandi modi in ipsis per singulas animalium species ita varient, ut quævis earum secundum connatum sibi operandi modum ubique terrarum constanter operentur, nec imitari unquam una species alterius operandi modum studeat; quod inter homines tamen, etiam simplicissimos fieri assolet.

X. *Velim hoc postremum exemplis quibusdam specialioribus declares!*

Exemplum *primum* hæc observatio suppedi-
tare poterit, quod quælibet animalium species
propriam sibi & nativam vocem ubique terrarum
servet, ut oves in India Orientali æquè ac in oc-
cidentalibus balent, canes latrent, boves mugiant,
equi hinniant &c. & volucrum quæque species
cantus sui nativam formam constantissimè ser-
vet, si maximè in medio aliarum, melius suavius-
que cantantium, plurimos annos detineantur;
nunquam alia aliam imitari sponte conaturâ.
Secundum in constructionibus latebrarum aut ni-
dorum constans pariter in qualibet animalium
specie observata identitas idem confirmabit; cum
sc. hirundines ex limo forment suos nidos ad
ædium parietes, undique clausos, nisi quòd unico
foramine ipsarum corpora recepturo pertusi sint;
quibus similes corvi & picæ in sylvis super edi-
tiores arbores, sed è sarmentis & fruticum ramu-
lis, construere solent: dum interim ciconiæ non-
nisi in urbibus, supra caminos ædium, è spinis
&

& fruticum undique conquisitis recisionibus in aperto & sub dio excitant, aëris injurias, cum ovis pullisque suis, patienter sufferentes; non ideò quia minus rationis, quàm corvi, hirundines &c. habent, sed, quia, ut isti, nullam omnino habent, ideoque nec propositum vel studium alia imitandi: quale quid in hominibus, etiam stupidissimis, passim sese exerit.

XI. *Ergo stabit, ob dicta, sententia, Brutis omnem veram cognitionem, omne judicium, propositum, voluntatem, cogitationem, omnemque adeò rationem esse denegandam? eaq; ad instar machinarum habenda esse?*

Ita non solum (ut hæcenus dicta in epitomen contraham) suadet (1) Hominis ad imaginem DEI conditi dignitas, ut nonnisi animali corpore cum brutis aliquam convenientiam habeat, iis omnibus autem, quæ ad mentem & rationem quomodocunque pertinere internâ nostræ mentis experientiâ cognovimus, (ut sunt vera cognitio, judicium, propositum, velle, cogitare &c. quis enim hæc sine mente unquam præstitit?) ipsis denegemus, sed & (2) à posteriori id postulat defectus loquelæ in brutis omnimodus sive signorum arbitrariorum, quibus cogitationes suas, si quas haberent, sibi mutuò hominibusque communicatura essent procul omni dubio; prout omnibus, etiam simplicissimis hominibus (mutis & surdis inprimis, qui loquentes alios audire & imi-

imitari non valent) facere solenne & naturale est : (3) Defectus omnis propositi imitandi alia in parandis nidis , aut modulandis vocibus &c. quod indubium argumentum præbet, omnes eorum actiones ex mero instinctu naturali , h. e. vi structuræ cuique generi propriæ potiùs, quàm ex proposito aliquo vel consilio fieri : maximè cum (4) etiam per artificiales machinas effecta stupenda producantur ; quibus hæc artificia, divina quasi manu immediatè elaborata, immensis modis præcellunt. Ex quo (5) esse potest, quòd quædam à brutis perfectiùs, quàm ab hominibus, efficiuntur, quia in hominibus imperfectiones illæ corporum, mentis subsidio suppleri possunt. Quibus si (6) vellemus adjungere illa absurda, quæ Autor ingeniosus libelli Gallici, inscripti, *La beste transformée en Machine*, h. e. *Bestia in machinam transformata*, è communi opinionione, quod bestię præditæ sint anima quadam utcunque cognoscente, habeantque passiones, dolores &c. cum vera aliqua perceptione & conscientia quadam conjuncta elicuit ; deberemus cum ipso concludere : Deum à necessitate sui cognoscendi, legibusque saltem naturæ parendi, creaturas quasdam ratione præditas exemisse, ipsisque concessisse, ut à creaturis totæ pendeant, edant, bibant &c. cæterorum securæ &c. id quod ipsius naturæ repugnet : Easdem porrò in summa hac innocentia sua miserrimis conditionibus injustè subjecisse, si dolores, tristitiam, aliasque passiones, verè perciperent : Homines insuper maximè injuriosos in eas fore, dum innocentes, legi

legi nulli obnoxias , ad labores maximos adigant , verberibus indignis modis tractent , maximè omnium verò vitam ipsis à DEO datam innocentissimis , & scientibus tamen , eripiant , &c. Quæ tamen nostra hîc facere nolumus.

C A P. II.

De

Vita Brutorum animantium.

I. *Vivere ergo saltem dicenda sunt bruta ,
si non cognoscant aut sciant
se vivere ?*

SI vivere dicantur ea omnia , quæ 1.) nutriuntur , & 2.) nutriendo sensim augeſcunt à prima ſui generatione , tandemque 3.) ſui ſimilia , mediantibus novis ſeminibus producunt , ex qualibus ipſa enutrita fuerant. Quæ omnia citra animam aliquam cogitantem & cognoscentem expediri debere , non ex eo ſolùm conſequitur , quòd animam cognoscentem brutis ſemel pro ſemper præcidimus , ſed quod in homine ipſo mens ſive cognoscentis anima ſibi probè conſcia eſt , nutritionis functionem à ſe non expediri.

II. *Unde verò bujus impotentia ſua ſibi
conſcia eſt mens humana ?*

Ex eo primùm , quòd non ſolùm plerorumque omnium illorum organorum , quæ ad nu-

tritionem aliquid conferunt, ignara est, nisi quantum in paucissimis subjectis aliquam ejus rei cognitionem ex Anatomia sibi acquirit. *Secundò* ex eo, quòd si maximè aliqualem ventriculi, intestinorum, venarum etiam hodie lactearum, ductùs chyliferi Pecquetiani &c. organorum chylicantium, sanguificantium &c. notitiam, è sexcentis vix una acquisiverit, magis tamen adhuc ignaræ sunt pleræque omnes ipsius operandi modi, in peragenda nutritione & augmentatione. *Tertiò* denique, si læduntur hæ actiones nutriendi corpus, anima hominis sibi relicta etiam ignorat modum & consilium ejusmodi errores & læsiones facultatis, quam vocamus, nutritivæ corrigendi.

III. *Itaq; non tam anima rationalis sive mens hominis, vices obit animæ vegetantis in ipso quoq; homine, sed calor sive ignis vitalis in sanguine muneri isti præfectus est?*

Id vel ex eo est concludere, quod animam vegetantem in animalibus etiam brutis esse necessum est; cùm tamen ibi mentem esse vel animam rationalem, semel negaverimus. Itaque nihil aliud in animalibus reperire possum, quàm calorem in sanguine vitalem, qui vegetantis animæ vices obire possit.

IV. *Quî verò res adeò similis & uniusmodi, tam multiplices effectûs præstare potest?*

Jam suprà, ni fallor, alicubi diximus, calorem,

lorem, five blandum cum sanguine circumfluum ignem, non absolutè & in se animam esse, sed cum respectu ad organa diversa, in quibus diversis, diversimodè quoque operari potest; concurrente præsertim & cooperante plurimum, animâ sentiente & locomovente. Nimirum opus nutritionis fit principaliter inventu succi nutritii, qui sanguis est, ejusque nominatim portionum chylosarum, per universum corpus distribuendarum. Hanc verò distributionem antecedere debet multiplex illius succi præparatio: (1) *Collatio* quædam culinaria, in plerisque cibis, elixando, affando &c. pro homine quidem præparandis, quâ pro brutis, alimenta plerumque cruda assumentibus, non opus est: (2) *Masticatio* seu comminutio aut confractio in ore, ope dentium aut rostrorum; vel in ventriculo, interventu filiculorum à Gallinis aliisque volucribus deglutitorum, aut denticulorum quasi analogorum in cancris aliisque: (3) *Deglutitio* five demissio masticatorum aut masticatione non indigentium, per gulam in ventriculum, ubi partim saliva masticatis intermixta, partim submissus ex glandulis intimæ tunicæ liquor gastricus, quem vocant, quandam lentæ fermentationis speciem causando, *Digestionem* (4) ulteriorem massæ masticando concisæ, promovet. Quam sequitur (5) Digestorum per mirabilem fibrarum stomachicorum contractionem *Expulsio* in intestinorum artificiosissimam fabricam, ibique, post novam, à bile & succo pancreatico factam ulteriorem

elaborationem, succi laudabilis ac nutritii quasi lactei (6) per venas lacteas *Expressio* & in receptaculo lumbari collectio, indeque per ductum chyli ferum Pecquetianum, ad venam axillarem sublatio &c. in quibus operationibus omnibus totidem miracula numerabit piæ curiositatis Lector, quot organa vix enarrabilia, imò quot capillares fibrillas.

V. *Hiccinne sic præparatus succus lacteus num satis aptus est ad nutritionem corporis feliciter expediendam?*

Nondum equidem satis aptus; quin post hunc *Chylificationis*, quem vocamus, actum, novus etiam actus *Sanguificationis* priori succedere debet, ope plurimum adhuc & artificiosiorum quoque fabricarum peragendus. Hic nempe rudior (1) novi Chyli, & veteris ex priori nutritione effecti exhaustique sanguinis, in Venis Jugularibus & Cordis dextro Ventriculo *Confusio* quasi superficialia; quam (2) rudiùs confusæ hujus mixturæ nova per capillares *Venæ arterialis* sive *Arteriæ pulmonaria* angustias ulterior elaboratio & intimior commixtio particularum subtilior quasi contritio, consequitur. Hanc porrò (3) excipit recepti per *Venam pulmonariam* sive *Arteriam venosam* sanguinis jam floridioris in sinistro cordis ventriculo, ulterior inde (4) muscularis expulsio per *Arteriam Magnam* dictam ejusque duos ramos, superiorem versus Caput, inferiorem ad extremas imi corporis partes.

partes, & per horum minores ac minores, tandemque capillares ramulos, in venulas primùm capillares, & ex his in gradatim laxiores, ultimo denique in amplissimam *Venam cavam* ac dextrum cordis ventriculum reditio, quam *Sanguinis Circulationem Harvæanam* appellant. In qua Circulatione, sæpius uno die iterata, fit (5) Sanguinis ita circulantis varia *percolatio* & expurgatio, in renibus ab urina, in liene ab atra, quod creditur, in hepate à flavâ bile, in cerebro à pituita &c. Quibus omnibus admirandis expurgationibus, stupendo prorsus organorum diversorum apparatu, (quem hoc loco docere non possumus, anatomicâ sc. autopsiâ unicè discendum) successivè factis, perfectus tandem sanguis obtinetur, ad actualem tandem Nutritionem aptus.

VI. Et quo tandem pacto peragitur illa *Nutritio?*

Sanguis in arteriis à sinistro cordis ventriculo versus extrema corporis, virtute cordis musculari ingenti vi propulsus, ibique in capillares venulas transire & per gradatim ampliores ad venam cavam & ventriculum cordis dextrum redire coactus, in extremis arteriis capillaribus, per harum tenuissimas membranulas, caloris ope portiones chylosas subtilissimas emit- tit & in poros carnum, ossium, cartilaginum, &c. evacuatos expellit, in quibus receptæ cui- vis poro accommodæ, assimilationem illam sub- eunt, quam olim *assimilatrici* cuidam facultati

adscribent, cujus operandi modus tamen erat inexplicabilis. Et hæc evacuatorum, labore, transpiratione insensibili continuâ &c. nova repletio, id esse creditur, quod præcisè *Nutritionem* appellamus.

VII. *In quo tandem differt corporum augmentatio ab eorum nutritione?*

Non differunt opinione meâ nisi secundum magis & minus. Idem enim calor sanguinis, qui virtute cordis muscolari adjutus, per tenellarum membranularum capillarium porulos, exhalationes subtilissimas extrudit & in evacuatos poros, carniū, ossium &c. intrudit, ita *Nutricis* potentiæ munus obiens; idem, inquam, & *Austricis* vices exequitur, dum plus talium habituum in poros ab initio, non carniū solum sed ossium etiam mollium, facilè dilatabiles intrudit, quàm opus fuisset ad vacuitates iterum replendas; hoc ipso, dilatatis porulis singulis, ipsas partes etiam carniū ossiumque successivè dilatat & exporrigit: ita staturam animalium tamdiu crescere & extendi faciens, quamdiu aliqualis adhuc mollities ossium, extensibilitatem aliquam admittit. Ex quo palam est, cur incrementa corporum ab initio brevi tempore sint valdè sensibilia, deinceps gradatim tardiora; donec tandem, induratis jam plenè ossibus ab eodem calore, in longum & altum non amplius exporrigatur animalis quantitas, in latitudinem & spissitudinem solum ulteriorem aliquam extensionem admittens.

VIII. *Cum*

VIII. *Cum sine respiratione animalia (perfectiora saltem) non vivant; ergo respiratio quoque ad nutritionem aliquid confert?*

Confert utique, & quidem plurimum: Neque tamen (1) ad refrigerium sanguinis calore excedentis, velut Aristotelici quondam & Galenici crediderunt, hodieque Cartesiani adhuc credunt, sed absque ratione; quod hoc modo imprudentiæ cujusdam argueretur opifex animalis machinæ, tantum incendium in cordis dextro ventriculo excitans, quod in pulmonibus aëris refrigerio cum vitæ periculo indigeret, mox tamen in sinistro denuo & flagrantius quidem, excitandum: frigidioris naturæ animalia, senes & moribundi, omni fere calore destituti vehementius etiam respirent: in aëre balneorum & æstivo ferventissimo diu satis vivere sine periculo liceat &c. Vid. Disp. nostra de Respirat. p. 267. & seqq. Nec (2) fuliginum tantum expellendarum gratia, cum tam immoderatus sanguinis calor non sit, nec adeò impurus, ut summa hæc ejus ventilandi necessitas exurgeret, quam ventilationem interim non negamus &c. Neque (3) *Platonis*, aut *Willisii* recentioris, Accensio sanguinis contraria tantam respirationis necessitatem postularet; cum embryonum vita per menses plures, sine notabili saltem respiratione conservetur: imò extra uterum quoque, sed intra membranas suas adhuc conclusorum: Ranae quoque, hirundines &c. sub aquis diu sine respiratione vivant &c.

IX. *Quænam ergo vera & indubia est summæ illius necessitatis respirandi, ratio?*

Non sanguinis præcisè circulatio, quæ in embryonibus uterinis peragitur, deficiente licet respiratione; imperfectioribus etiam animalibus & plantis ipsis ea sit necessaria, in quibus tamen locum fortè non habet circulatio &c. sed illud cum primis summum periculum, quòd fœtus in lucem editus exponatur aëris ambientis ingenti compressioni (quam experimenta recentia comprobant incredibilem) ut corpus illius & vasa mollia sic conquassarentur, ut fluxus omnis humorum vitalium interciperetur, nisi tempori per inspiratum, & paulò post quaquaversum per totum corpus diffusum aërem ejusq; elaterium, externæ illi pressioni ab intus resisteretur.

X. *At quomodo tam subito sufficiens aër inspirari potest, ad validissimæ illi externæ pressioni renitendum?*

Hic iterum conspici licet, imò palpare summam Divini conditoris sapientissimam providentiam, quòd nutritionem embryonum in utero materno ordinaverit fieri ex sanguine materno aëre inspirato jam pleno, ut sic sanguis embryonis quoque, carnum fibræ & pori &c. aëre jam sufficienter instructi essent, ad resistendum illi pressioni externæ violentiæ, donec per inchoatam novam inspirationem, novus aër subinde submitteretur in locum perpetuo transpiraturi.

CAP. III.

De

Sensu Brutorum Animalium.

I. *Annon inter Philosophos recentiores reperiuntur, qui sensum omnem brutis denegent?*

NON possumus inficiari inter Cartesianos recentiores repertos esse, qui hoc expressis verbis fecerunt non solum, sed hanc suam negationem argumentis etiam propugnarunt. *Primò enim Claubergius in Theoria corporum viventium p. 337. Antonius le Grand Instit. Part. VIII. de Homine, Artic. X. sensum in communi sic describunt: Nihil aliud propriè loquendo sensus sunt, quàm Mentis perceptiones, quæ ex motibus corporeis, qui in cerebro fiunt, consequuntur &c.* Utrique etiam tres gradûs in sensu considerant, quorum *secundus* dictam mentis perceptionem, *tertius* omnia judicia continet, quæ occasione motuum organicorum, (qui primum gradum constitunt) efformamus. Unde etiam modo dictus *Le Grand*, peculiarem edidit Tractatum sub inscriptione, *de Brutis sensu carentibus*; cui adjungendus est Autor libelli Gallici inscripti *La beste transformée en machine*, h. e. *Bestia in machinam transformata*; in quo autor nomine, *J. Darmanfon*, pluribus argumentis demonstrare satagit; Bruta seu bestias non aliter agere, quæ agere vulgò dicuntur, quam ut automaton culinarium, aut horo-

logium, sine omni non solum cognitione, sed etiam sine omni sensu.

II. Num eadem fuit mens horum Magistro, ipsi sc. Cartesio?

Cum *Henricus Morus Anglicus* (qui tunc temporis Philosophiam Cartesianam, ipsumque Cartesium, ad coelos usque extulerat, uti videre est ex Epist. part. I. numero LXV. p. m. 174. & seqq. Inprimis autem ex Epist. quadam separata ad V. C. ejusd. Mori, ipsius Enchirid. Eth. Norimb. denuò edito, subjecta) in sequenti Epist. LXVI. allegatae Part. I. ad ipsum Cartesium cordatè, eodem tamen adhuc animo, perscripta, hæc verba exarasset p. 181. „ Cæterum à nulla tuarum opinio-
 „ num animus meus, pro ea quâ est mollitie ac
 „ teneritudine, æquè abhorret, ac ab illa inter-
 „ necina & jugulatrice sententia, quam in metho-
 „ dotulisti, brutis omnibus vitam sensumque eri-
 „ piens, dicam, an potius præripiens? neque
 „ enim vixisse unquam pateris &c. *Cartesius* Ep. sequ. LXVII. p. 189. posteaquam pluribus rationibus probabile fecisset, bestias omni cogitatione destitui; mox addit: *Velim tamen notari, me loqui de cogitatione, non de vita vel sensu: vitam enim nulli animali denego, utpote quam in solo cordis calore consistere statuo; nec denego etiam sensum, quatenus ab organo corporeo dependet* &c.

III. Quæ-

III. *Quenam ergo differentia est, inter hanc sententiam Cartesii, & illam superiorum Cartesianorum?*

Si dicere, quod res est, velimus; ea videtur esse inter utrasque sententias differentia, quod Cartesius, quoad rem ipsam, idem sentiat cum suis Cartesianis; rectius tamen & prudentius loquatur. Cum enim utrique in definitione sensus, prout ille in homine se habet, mentis perceptionem cogitationem & iudicium aliquod involvant, (hactenus adeo consentientes) Cartesiani citati mox, imprudentius opinor, inferebant: Bruta igitur omni sensu carere; cum Cartesius prudentius dicat, brutis sensum aliquem, visum nempe, auditum, olfactum, gustum & tactum, concedi debere, sed absque cogitatione & perceptione mentali.

IV. *In quonam igitur consistit illa utriusque sententiae prudentia vel imprudentia?*

Cum oculis nos videre, auribus audire, olfacere naribus, ac sensus ceteros ope reliquorum organorum sensoriorum exercere nos experiamur, insuperque ipsis sensibus nostris eadem sensoria in brutis non deprehendamus solum, sed eorum applicationem quoque ad usus simillimos certo certius cognoscamus; imprudentiae profecto haut exiguae est, negare contra omnem sensum & rationem, & repugnante usitato in toto mundo loquendi modo, negare velle, quod
bruta

bruta sentiant, h. e. oculis suis videant, linguæ & palati opera gustent &c. & ruricularum bubulcorum ac subulcorum fannis ac risui se exponere, ex ea sola causa, quod homines perfectiore quodam modo, quam bruta sentiant, nempe cum evidenti & ordinariè conjuncta mentis perceptione; manifestam adeò fallaciam à dicto secundum quid, ad dictum simpliciter, hanc commitentes: Bruta non sentiunt eodem modo, quo homines; Ergo planè non sentiunt. Dum ii, qui malunt cum hominum vulgo ex recepta unanimi consuetudine loqui, interimque cum Cartesio aliisq; sapientibus sentire, dicant: Bruta sentire quidem, sed ignara quod sentiant; absq; omni cogitatione & judicio: Hominem verò solum ordinariè quidem cum perceptione mentis & judicio sentire.

V. *Sed cur dicis, Hominem ordinariè sic sentire? ane extraordinariè etiam aliter sentit?*

Sic omnino res habet; ut sc. in quibusdam casibus nonnisi brutorum more sentiat, sine mentis conjuncta perceptione; ut cum auribus e. g. percipimus aliquem sonitum, strepitum aut fragorem in vicinia obortum (talem enim auditu illæso non possumus non corporeo saltem modo percipere) animus autem profundioribus meditationibus occupatus, eum aut planè non advertit aut paulò post demum animadvertit; ita humano modo non audiens actu, sed audivisse ex circumstantiis demum judicans.

VI. *Bruta*

VI. *Bruta igitur sentiunt quidem, sed non cognoscunt se sentire?*

Sic omnino statuo, & statuere cogor: nisi velim brutis etiam mentem concedere, atque ita, uti nos homines ad imaginem DEI conditos esse non ratione corporis, sed ratione solius mentis, gratâ mente agnoscimus, sic mulos etiam & asinos ad eandem Creatoris imaginem conditos fateri necesse habebimus, si mentem ipsis, cogitationem, & rationem adtribuamus: quod an homo sine magna, non dicam in seipsum, sed in Creatorem, nostri singulariter, imò incomprehensibiliter amantissimum, vel cogitare valeat, ego quidem valdè dubito.

VII. *At enim verò plurimi saltem brutorum motûs locales, indices esse videntur evidentes, præcedentium in ipsis cogitationum.*

Videntur, inquam, sed non sunt. Nam ejusmodi motûs locales consequi possunt impressiones sensibilibus externorum, per mechanismum aliquem merè corporeum, cum quo in homine ordinariè mentalis etiam perceptio, cogitatio, & judicium conjungitur. Vidimus fanè in ipsis machinis artificialibus, humano ingenio elaboratis, ejusmodi motûs & gestûs, qui facti videbantur ex consilio & proposito, quo tamen, nemine dubitante destituebantur; In machinis non solum illis, de quibus hoc ipso Articulo II. cap. I. Quæst. VIII. dictum fuit; sed etiam

etiam recentissimis magno numero, superiori mense Augusto currentis adhuc anni 1702, Norimbergæ ad insigne Campanæ cæruleæ nobis cum spectatoribus innumeris, iteratâ vice exhibitis, e. g. Fabri ferrarii in genua procumbentis soleasque ferreas equo, ictibus consuetis aptantis, sed (quod præ cæteris mirandum, nec aliàs visum erat, ne in machinis Hautschianis quidem) inter medios ictus derepentè cessantis & converso sursum vultu ad eum, qui pedem equi manibus more solito tenebat, quasi locuturi quippiam ipsi, hoc etiam quasi annuente; mox autem, tanquam abrupto colloquio, ad solem aptandam rursus conversi, vultuq; rursus eò demisso, ictus suos hætenus intermissos repentis &c. horum similia plurima hîc non enumeranda.

VIII. *Anne verò ex his humanos gestus imitantium icuncularum exemplis, statim concludi potest, brutorum animantium actiones similibus mechanis artificialibus expediti posse?*

Ineptus esset, qui sic ruditer concluderet: cum notum satis sit mechanis artium à mechanis Naturæ, seu conditoris summi potius, toto cœlo differre; interea verò non minus ineptè negaretur structuras & fabricas aliquas mechanicas, in animalium & plantarum corporibus reperiri, non tam rotis aut tympanis, trochleis & cochleis, quàm fistulis & canalibus in visceribus interioribus, vectibus autem osseis & vesiculis muscularibus in artuum externorum motionibus.

nibus. Ut hæc potius illatio nostra sit futura: Si humanum ingenium, hamis, uncis, filis ferreis, rotulis, ac trochleis mediantibus, & hydraulicis canalibus intervenientibus, potest non solum animalium internos, sanguinis, lymphæ, spirituum fluxus, in hydraulis & organis pneumaticis, sed etiam externos artuum motus, incedendo, volando, saltando &c. imò (quod maxime mirum ac nuper demum spectatum est) humanos etiam gestus imitari; quidni Divina & incomparabilis sapientia & potentia, ope machinarum quasi hydraulicarum, tum grandiuscularum, tum infinite subtilium, & vesicularum in fibris muscularibus, subtilitate suâ invisibilium &c. omnes brutorum, etsi stupendos, effectus in opus deducere potuerit, citra mentis alicujus in ipsis præsentiam, & consequenter sine omni cogitatione, veraque cognitione?

IX. *Si maxime concedamus, DEVM hæc præstare potuisse, (quis enim dubitet?) num statim sequitur, eum ista actu ipso sic præstitisse?*

Non sequitur, inquam, & ineptus is quoque foret, qui sic concluderet. Hoc verò sequitur procul dubio: Eum igitur (1) qui talia supponit, nihil impossibile supponere, eoque adeò supposito non opus habere, ut brutis mentem aliquam, & consequenter cogitationem, judicium, conscientiam, libertatem &c. aliquam concedat; quibus concessis, non apparet, quâ necem inferre ipsis sine summa injuriâ, & sine peccato, insontibus

bus liceat ? At verò (2) non hac solâ ratione tale quid supponimus ; sed prægnantissimis aliis persuademur , actu ipso ea mente destitui , quas pluribus in antecedentibus exposuimus. Imò (3) sic omni jure inferimus : Quia nos homines , mente semper præsentē licet , etsi non semper advertente , nonnunquam sentimus locoque movemur citra mentis concursum ; quidni hoc in brutis , mente penitus destitutis , semper fiet , ut sentiant , & loco . moveantur , nescia tamen se sentire & locomoveri ?

X. Da igitur exempla quædam ejusmodi casuum , in quibus vel totum nostrum corpus , vel aliqua ejus pars , sentiat aut locomoveatur , nesciâ aut non attendente mente ?

Talia exempla in promptu sunt plurima ; primò quidem in visceribus interioribus ; e. g. (1) *in Ventriculo* , cùm is , non solum in ordinaria ciborum & potulentorum assumptione , aliqualem molestiam ex ipsorum pondere sentiens , paulatim ultrò sese contrahens , assumpta digesta lento motu per pylorum in intestina protrudit ; sed etiam extra ordinem à medicamentis emeticis multò molestius vellicatus , hæc tandem cùm humoribus noxiis magno impetu sursum expuldit : similiter (2) *in Intestinis* , transmissionem digestorum ex ventriculo , unaque novam bilis & succi pancreatici admixtionem sentientibus , consequitur , ignarâ mente nostrâ , sed providentiæ Divinæ evidenti pariter consilio , motus intestino-

rum

rum peristalticus, ex massa chymi digesta, succum chylosum per venas lacteas, & recrementa residua per intestinum rectum exprimens; idque vi majore multò post assumpta medicamenta purgantia; (3) *in corde*, in quo per infusas alternatim guttas sanguineas in utrosque ejus ventriculos, leniter & insensibiliter quasi, (anima saltem nostrâ nihil percipiente) vellicatæ fibræ eorum musculares ad impetum sui contractivum excitantur incredibilem, pro expressione sc. sanguinearum istarum guttarum in extremas usque & capillares arteriolas ac venulas &c. (4) *In utero femineo* similes motûs in partu ordinario, in affectionibus hystericis, vel ex sensu odorum, sive bene, sive male-olentium, aut insignium dolorum, perpetiente; si non insciâ semper, saltem nihil eò conferente, Mente nostrâ.

XI. *Habuiamus exempla sensationum in intimioribus visceribus nostris, easq; consequentium motuum, in quibus menti nostræ nihil, aut parum, negotii intercedit: Num in sensoriis & motoris organis externis similia occurrunt?*

(1) Utique in his etiam habemus exempla evidentissima; v. g. in exercitiis musicis, quæ exercitatiores expediunt, mente aliorsum conversâ, & cum alio interim colloquendo, si memoriter canatur fidibus, aut testitudine, cantio; aut, si ex libro quopiam, solo oculorum sensu, quem ne assequi mentis cogitatio posset, assequuntur autem digitorum longâ exercitatione

U u

assue-

assuefactorum motiones, seinvicem ultrò, mente quidem eorum quæ fiunt, tunc penitus ignarâ, imò penitus iis non attendente: (2) in iis casibus, ubi oborto ex conspectu confusa rei cuiusdam, vel è percepto confuse strepitu aliquo, subitaneus quidam horror in corpore exoritur, mentis cogitationem præveniens, & corpus ad fugam disponens, antequam, quid rei contigisset, mens cognoscere, & num fugiendi causa quædam subsit judicare poterit.

CAP. IV.

De

Brutorum Facultate Locomotiva.

I. *Ergo Brutorum loco-motiones, citra mentis concursum, à solis sensibilibus impressionibus, dependent?*

ITa sanè concludimus ex præcedentibus duabus quæstionibus; id sc. quod in plurimis casibus in ipso homine fieri potest, etsi mens indubiè præsens sit perpetuò, non tamen perpetuò advertens: in brutis, mente omninò destitutis, semper eodem modo fieri posse; ut sc. impressiones sensibilibus per organa sensoria in cerebrum factas, consequantur spirituum animalium in organa motoria excursions, nullâ adeò cogitatione, nullo consilio præeunte, ipsis adeò brutis penitus ignorantibus.

II. *Quo-*

II. *Quomodo sensationes per impressiones sensibilium fiant, conceptu facile est: quomodo vero facta illa in cerebri spiritus impressiones, ad hunc aut illum musculum (non ad alium) quæ præcisè moveri debet, determinantur, in obscuro adhuc est?*

Respondetur: Tota res clara erit, si cogitemus, in ipso homine (cui mens tamen inhabitat) universum motionis externæ negotium, per habitus acquirendos demum, & spirituum animalium assuefactionem, sæpe diuturnam, gubernari; quantò magis igitur in brutis, idem eodem modo fieri necessum est, in quibus mens omnino exulat, & omnis vera cognitio? Discimus sanè per assuefactionem operosam incedere, fari, edere &c. multiplicibus interim intervenientibus aberrationibus. Imò, discimus etiam & adfuescimus videre, audire &c. Certâ enim experienciâ cognovimus, infantes, sub primos nativitatis dies neque videre, oculis apertis licet, nec audire, reclusissimis licet auribus: paucis autem diebus post, eosdem jam incipere & videre, & audire; quia nempe diuturnâ assuefactione opus non est, cùm ad videndum & ad audiendum in homine, non opus sit, nisi perceptione mentis, talium impressionum corporearum externarum in spiritus cerebri factarum, qualium percipiendarum occasionem illa in utero materno hætenus non habuerat; nec ad receptionem impressionum corporea-

Uu 2

porea-

porearum , peculiaris spirituum dispositio ac docilitas requiritur.

III. *Quæ verò ratio est, quòd in brutis externorum organorum motoriorum multò promtior, quàm in homine sit assuefactio?*

Hujus rei plures sunt causæ : (1) ossium, musculorum, tendinum &c. major jam firmitas in brutis quàm in hominibus, ut illa modo nata, mox in pedes erigi, stare, & mox loco moveri incipiant ; quòd nimirum ipsorum genitoribus desit ratio ; qua genitores humanorum foetuum, his succurrere eorumque defectus interim supplere possunt ; dum organa corporea diuturnitate temporis, extra uterum plenius ac perfectius elaborentur. Ad effecta enim saltem corporis, nedum mentis ; (2) ab hominibus præstanda, requirebantur, & spiritus animales elaboratiores, & fibrillarum motoriarum major tenuitas ac docilitas, quibus elaborandis plus temporis requirebatur, quam quod tenello in uteri angustia formando ac perficiendo corpusculo sufficere poterat.

IV. *Elucet ergo in hoc etiam casu Creatoris consilium & singularis providentia?*

Nullum est dubium : Et vel hinc palpabilis est rationis in brutis tum genitoribus, tum ipsis recens genitis, absentia ; cum hæc posteriora in assuescendis effectibus ordinariis, incessu puta, esu, sensu & motu, priorum illorum consilio non indigeant ; in assuefaciendis au-
tem

tem insolitis & extraordinariis, citra humanæ rationis subsidium nihil efficiatur.

V. Optârim hæc distinctius adhuc edoceri.

Cùm homo non solùm edere, incedere, fari &c. assuescendo discat, ut aliqua horum etiam bruta; inprimis ibi ad suefcendum & habitus acquirendos plurimùm confert primò parentum aliorumque, deinceps autem propria infantum ratio, ubi primùm illa ipso actu exere se se incipit. Non possumus autem evidentius hujus assuefactionis specimen observare, quàm in Musicis exercitiis addiscendis, si quis hominum docendus est canere fidibus, citharâ, clavichordio & similibus. Multo labore opus est sub initium, non solùm in præscribendis notis aliisque signis, menti familiaribus reddendis, sed vel inprimis, ipsis digitis ad suefaciendis ad hanc aut illam chordam ordine præscripto tangendam, pulsandam &c. opera multa adhibenda est, ut non solum monita, increpationes, minæ, in obtusioribus ingeniis etiam verbera, adhibenda sint, sed etiam ipsorum digitorum actualis manu ductio & applicatio ad has aut istas chordas, claves &c. tentanda, donec spiritibus animalibus in fibris motoriis stabulantibus, & his ipsis fibris, ea agilitas ac docilitas, longo & creberrimo exercitio, inducatur, ut tandem non solùm rationis usu parum opus ampliùs sit, sed ipsa sæpe impedimento, in expedite efficiendo officio.

VI. *Cogno-vimus modos assuefaciendi organa motoria, aut spiritus potius per ipsa operantes, in locomotionibus hominum; doceantur nunc iidem, prout in brutis se habent?*

Hic primò nihil ratio confert, nec brutorum propria, quam nullam esse tot argumentis jam evicimus, & nunc denuo vel hinc evincimus, quòd cum hominum nemo adeo stupidus reperiatur, quin aliquâ cantilenarum qualiumcunque dulcedine capiatur, & cupido quædam eas imitandi quodammodo saltem eosdem incessat; in brutis contra talis desiderii ne indicium quidem patefiat; ne in avium quidem, canere alias naturaliter doctarum, genere: siquidem experientia docet, in eadem sylva simul cantantium e. g. Merularum, carduelium, Lusciniarum &c. nullam alterius cantilenam, licet multò suaviorē, ullo modo affectare, sed veterem cantilenam, quam naturalis cujusque fabrica quamque necessitate quadam docuit, semper eandem, sæpe ad nauseam usque unamquamque iterare.

VII. *At enim, alienâ saltem ratione assuefiunt aliqua, ut Merula, avicula canaria &c. vocem mutare, & melodias humanas imitari?*

Verum hoc est; nec tamen id efficitur ullis rationis humanæ monitis, aut præscriptis legibus, vel eloquentissimis etiam persuasionibus, quippe quas non percipiunt, ne quidem verbulum uni-

unicum, si maximè omnem ætatem inter homines loquentes nocte dieque contriverint; id quod evidentissimum rationis aut perceptionis deficientis indicium.

VIII. *Annon verò vel boves, stupidissimum pecus, intelligunt aut percipiunt vociferationes ruricularum, quibus monent, ut boves vel recta progrediantur, vel dextrorsum aut sinistrorsum incedant?*

Propriè loquendo nec intelligunt, nec percipiunt (nisi corporeo modo) ista vociferantium ruricularum jussa, sed recepto intra aurem hoc aut isto sonitu, cum quo antehac plurimis vicibus conjunctæ fuerant graves fustigationes & verbera, adsuefacti jam creberrima horum iteratione, spiritus animales ad ea organa motoria divertunt, quæ corpora bovina, vel dextrorsum, vel sinistrorsum, vel directè antrorsum, determinare quasi didicerunt; adsuefacti, inquam, labore plurimo, non vociferandi tantum, sed actuali quoque pulsu totorum corporum in eam partem, in quam ire vociferando jussa fuerant. Simili modo oscines aut canoræ quædam aviculæ, certas melodias cantando æmulari docentur, longâ & diturnâ assuefactione, præeunte sc. quotidie fistulatione ante escam ipsis præbendam, deinde verò, ubi semel (coactis quodammodo escæ denegatione) præcentas melodias vel occoeperint imitari, eam promte & largius præbendo.

IX. *Magna igitur, in his quoq, vis est
consuetudinis?*

Magna, inquam, imò maxima : adeò quidem, ut vel in ipso homine mente & ratione prædito, plurimi, imò innumerabiles effectûs ex his spirituum animalium assuefactionibus consequantur, mente tamen nihil cooperante, imò invitâ sæpe. Non iterabimus exemplum quæst. V. fusius deductum ; sed alia bina solùm adhuc inculcabitur. Primum hoc est, quod unusquisq; in seipso sæpissimè, nihil tale cogitans, imò cum aliquo sui corporis, vel etiam ipsius mentis, fastidio experietur ; ut e. g. aquæ fluxu è gutturnio vel visu vel auditu percepto, mox spirituum animalium ad eos musculos fluxus similis, invita quoque mente, fiat, cujus ope ad mingendum subito determinemur ; vel ut unius oscitantia, sive visu sive auditu percepta, spiritûs animales ad similiter oscitandum, invitâ rursus mente statim disponantur.

X. *Fortassis in his motuum priorum & posteriorum similitudo in causa est similium effectuum?*

Effectus equidem similes dici jure possunt ; sed motûs eorum efficientes valdè differentes sunt. Motus enim aquæ è gutturnio dependet à sola aquæ gravitate, mictionis autem conatus è spirituum animalium affluxu ad vesicæ fibras sollicitandas profluit ; similiterq; cum videmus vel audimus alium oscitantem, hoc utique fit per im-
pres-

pressionem aliquam sensibilem in oculos & aures ; ipsi pariter oscitamus fluentibus è cerebro spiritibus ad eosdem musculos, quorum ope oscitatio in altero facta fuerat ; cuius adeò factæ vel sola imaginatione spiritûs animales in posteriore ex acquisito quodam habitu in casibus similibus, ad effectum similem ignari determinantur.

XI. Quodnam est alterum in presenti negotio attendendum exemplum ?

Illud in hac experientia fundatur, quod cum duo diversi actûs sæpius in eodem corpore, simul contingunt, illi duo deinceps, quadam quasi familiaritate, ita sibi jungi consueverunt, ut uno redeunte, alter etiam simul redeat, & priorem sequatur. Sic. e. g. dum canis escæ alicui prohibitæ imminet, eam, nisi prohibeatur, indubiè devoraturus, si coquus baculum intentans ei verbera minetur, aut reipsâ inferat, repercutitur unâ spirituum animalium fluxus versus escam, ut mutato cursu, canem ab esca potius avertant & removeant : Et hæ duæ fortes impressiones baculi minarumque suâ specie in oculum, & spirituum è cerebro in pedes ad fugiendum factæ (aliàs nullam inter se connexionem habentes) nunc semel fortiter conjunctæ, ita deinceps inter se connexæ sunt, ut, quoties prima recurrit, recurrat statim etiam altera ; imò, cum species etiam escæ ante oculos positæ, simul cum duabus cæteris in eodem canis cerebro impressa fuerit, iteratis crebrius istis, fit deinceps, ut, nec baculo nec minis ampliùs præsentibus, escâ

U u ;


tamen

tamen casu oblatâ, illorum toties iteratæ in cerebro unâ recurrentes, aversefactionem escæ & ab ea abstinentioniam, ut priùs, producent.

XII. *Quænam verò sunt illa organa, quorum ope fiunt tum accessus ad escam ante prohibitionem, tum recessus aut fuga, vel abstinentionia saltem ab eadem?*

Si spiritûs animales non habeamus pro organo, sed pro ipsa anima locomovente, (uti posthac audiemus) organa præcipua talium motionum brutalium, absque consilio & ratione, ex mera necessitate factarum, sunt (1) Nervus ex cerebro ad quemlibet musculum motorium, per cujus invisibiles, & ratione promptè comprehensibiles & necessariò supponendos poros & cavitates, animales spiritûs in musculorum carnosam substantiam, ex cerebro defluunt. (2) Ipsi muscoli, qui nihil aliud sunt quam partes carnosæ ex fibris innumeris visibilibus compositæ, quæ singulæ fibræ ex innumeris vesiculis invisibilibus constare supponuntur; unitæ verò ex utraque parte in angustiam quandam colligatæ observantur in figuram quandam quasi rhomboidalem (Vid. adjecta Figura IV. num. 2.)

Fig. 4 num. 2.



pars A, caput animalis & nervorum fontem respiciens, musculi quoque caput

appellatur, inferior autem B ad partem moventem

dam spectans, *musculi cauda*, pars media denique C ventrosior, *musculi venter*, dici consuevit: (3) *Musculi tendines* seu potius tendo unicus, à principio E per totum musculum usque ad D, fibris infinitis tendinosus constans, in E verò ac D collectior, & in D præcipuè valdè robustus, ubi alligatus est ossi mobili BD (v. g. cubito) cum ex parte capitis, ossi immobili (h. e. humero) fortiter alligetur.

XIII. In quo igitur consistit musculorum operandi modus?

Musculorum operationes infinitè variant, & in singulis illis operationibus elucet divinum & ineffabile, non tam Naturæ, quàm sapientissimi Conditoris artificium. Generalis interim in omnibus operandi modus in sequentibus consistit: (1) Actiones luminis, soni, cæterorumque sensibilibum, per oculos, aures, cæteraque organa sensoria, in spiritûs animales cerebri factæ, pro ratione incomprehensibilis suæ varietatis, & hanc consequentis multifariæ illorum assuefactionis, nunc per hos, nunc per illos nervos, ad hunc aut illum musculum fluunt, eorumque suppositas vesiculas (2) inflant omnes, & consequenter ventrem C inflando, sic auctâ musculi latitudine, ejus longitudo ED necessario abbreviatur; abbreviatâ verò musculi latitudine, cum hujus portio tendinosa AE fixa sit, & ossi humeri v. g. immobiliter alligata, altera portio BD, (3) cum osse mobili Cubiti, ex necessitate adducitur & inflectitur &c. Plura hac vice addere, nec licet, nec lubet.

SECTIONIS POSTERIORIS De

Corporibus Animatis

ARTICVLVS TERTIVS

CAPVT. I.

De

Plantis vel vegetabilibus in genere.

I. Sic igitur *Plantæ* quoque inter animata corpora numerantur?

OLim equidem plantis animæ nomen denegatum fuit, adeò ut in ipsa sacra scriptura inter animas viventes (quo nomine aliàs homo & bruta venire passim solent) nuspiam relatæ reperiantur. Galeni quoque temporibus, plantis *Φύσις*, i. e. *Natura*, solùm nomen (à quo *Φυτῶν*, *Nascentium* sc. appellationem habuerunt) appropriatum fuit; quemadmodum nomen *ψυχῆς*, sive *animæ*, Brutis animantibus, tanquam peculiare, attributum; Homini verò, præter hoc ipsi quodammodo cum brutis commune singularis *Νοῦς*, i. e. *Mentis*, appellatio reservata fuit; ipso etiam Epicuro hoc discrimen passim sollicitè quasi observante.

II. Quis igitur primus *Animæ* nomen tum homini, tum animalibus cæteris, tum ipsis etiam plantis promiscuè accommodavit?

Aristoteles præcipuè in tribus Libris *ᾧ*

ψυχῆς,

ψυχῆς, sive de *Anima* inscriptis; non sine quadam rerum adeò diversarum confusione, per ejusdem nominis communionem, apud incautos introducta: Ita ut propter commune *Animati* nomen inter res ipsas non nisi gradus alicujus discrimen ferè agnoscatur; cum tamen plantæ nec sensu præditæ sint, nec facultate loco motivâ, sed vitâ solâ, h. e. nutriendi, augescendi, siquæ simile generandi, aptitudine polleant, idque in singulis valdè analogicè, ac tantum non æquivocè; tum intuitu organorum, quorum interventu hæ functiones obeuntur; tum intuitu animarum, sub quarum præsidio obeuntur: de quibus singulis postea speciatim agetur.

III. *Dixisti nec sensu præditas esse plantas, nec locomotivâ facultate, sed sola vita gaudere, & quidem analogicè solum?*

Ita res omninò habet; Nec herba mimosa, quam vocant, verè sensitiva est, nec persicaria filiquosa, ideò *Noli me tangere* rectè dicitur, quasi tactus aliquo sensu esset prædita; sed quicquid in his mutationis accidit, in priore à sola structuræ vel partium aut fibrillarum subtilitate dependet, quâ corrugatio quædam & quasi fuga subsequitur, appropinquante vel lenissimo manus tacturæ calore: non aliter ac capilli notabiliore paulò ignis aut fornacis calore paulò propius admoti crispantur, ac subitò in seipsos convolvuntur, tanquam contactum ignis effugituri. In posteriore verò manifestus fabricæ tortilis mechanismus reperitur, quò siliquarum partes

partes violenter contortæ, in extimum apicem colligatæ violenter detinentur, mox elasticâ virtute ab invicem ultrò repentè discessuræ, apiculo dicto, tanquam nodulo colligationis, ex improvviso abrupto.

IV. Cur dicis plantas facultate loco motivâ carere, & vitâ sola gaudere, sed analogicè tantum?

Quoniam (1) Mobiles quidem sunt, in eodem licet loco stantes, à ventis aliisque moventibus externis; Mobiles item sunt crescendo, dum partes singulæ sensim in altum, & in latum emoveantur: sed in primo casu, non facultate quadam intrinsecâ mediante, sed extrinseco quodam impulsu agitantur; quod ne in animalibus quidem, violenter raptatis; pulsis & protrusis, vera locomotio, seu motio localis, æstimatur; sed tum demum talis habetur, cum ab externis quidem sensibilibus, sed mediantibus organis & intrinseco spirituum motu, locum, & tota quidem, quasi sponte sua mutant. (2) Vivere quidem & plantæ dicuntur, quia nutriuntur, & crescunt, & seminibus mediantibus sui similia producant. Ingens autem est differentia inter vivere perfectiorum animalium & inter vivere plantarum; ut hæc non nisi per analogiam quandam vivere dicendæ sint.

V. Explica queso clarius, in quonam hæc analogia consistat? Sed declara prius, cur dixeris, bruta quasi sponte mutare locum?

Cum unanimis omni ævo fuerit omnium
Philo-

Philosophorum sententia , bruta , quæcunque agunt , ex necessitate agere omnia , urgentibus nempe & necessitate quadam deposcentibus , externis sensibilibus ; non possunt in rigore dici , sponte vel ultrò agere , utpote , quod solis illis , quæ voluntariò agunt , sive ex proposito , soloque principio interno agunt , nempe hominibus mente & voluntate præditi competit. Quod verò priorem illam vitæ analogiam attinet , ea per totidem separata , de *Nutritione* , *Augmentatione* & *Generatione* , capita distinctiùs exponi poterit.

CAP. II.

De

Nutritione Plantarum.

I. *Quenam ergo tandem est analogia sive comparatio inter nutritionem plantarum & animalium?*

Nutritimentum (1) Plantarum originaliter est simplex succus pluvialis , in terræ gremio ex aëre receptus ibique tanquam in penuario receptus : In animalibus perfectioribus autem , & speciatim in genere hominum , multiplicitas nutrimenti reperitur , in duo potissimum summa genera , *Ciborum* & *Potulentorum* distributa. (2) Utraque , & Cibi & Potulenta , multum variant , præsertim in humano animalium genere. Sicut enim animantia bruta pro potulentis aquam simplicem , aliquando etiam non adeò limpidam & puram , sed limosam sæpe & e lacunis

cunis petitam, hauriunt; ita ciborum loco gramina & herbas, fructûs sponte aut naturæ solius ope, vel etiam olera, fruges, & fructûs, adjuvante humano cultu productos, arripiunt; rapacia verò nonnulla, aliorum etiam brutorum, imò & hominum carnes, aliquando petunt: ita homines in potulentis, non simplicem solum & limpidam, quoad fieri potest, aquam assumunt, sed cerevisiam quoque, vinum, hydromeli, spiritus arduentes varios &c. similiaque rationis, si non inventa, saltem præparata superaddunt; in cibis autem innumerabilia, brutis penitus ignota, connumerant.

II. Sic ingens utiq; alimentorum reperitur, in plantis ex una, & in animalibus perfectioribus ex altera parte differentia: Num ulterius aliquod discrimen in his alimentis considerandum venit?

Est aliquod ratione præparationis extrinsecæ in animalium alimentis, & variæ quidem illius; cùm econtrà in alimentis plantarum nulla, nisi prorsus accidentaria & fortuita, præcedat præparatio. Nec in brutorum alimentis multa, nisi quod hominum consilio quibusdam sua alimenta ordinaria vel exiccando in futurum asservantur, ut fœna, vel quodammodo coquendo, ruditerque saltem elixando, (durch Anbrûhen) aliquantum; pro cicuribus saltem ac domesticis, præparantur, dum feræ magis & sylvestres, omnia non nisi cruda devorant ac sine omni prævia præparatione externa, rapiunt ac deglutiunt;

Pro

Pro hominum verò alimentis præmutandis , co-
quendo , affando , elixando , frigendo , condi-
endo &c. tantùm non inenarrabilia capta sunt
ab ipsis consilia.

III. *Cùm nulla detur in plantarum alimentis
extrinseca mutatio ; forsan aliqua saltem intrin-
seca dabitur , in ipsis plantarum organis ,
præparatio ?*

Non potest dubitare , quicumque aliquem
organorum apparatus , non radicum solùm , cau-
lium , ramorum , foliorum , florum , &c. pridem
cognitorum , sed & recens-detectorum à *Mal-
pighio* & *Nehemia Grew* , consideraverit ; etsi re-
spectivè exigua illa sit , & in variis tantùm ,
gradatimque subtilioribus succi crudioris per-
colationibus , & quasi cribrationibus consistat :
dum econtrà in animalibus , præsertim perfecti-
oribus , intrinsecæ præparationes & mutationes
præcedant , antequam alimenta satis ad nutri-
endum apta & idonea evadant. Cujusmodi
quidem mutationes plurimæ Artic. II. Cap. II.
quæst. IV. & V. pluribus enarratæ fuerunt , hoc
loco paucis repetendæ.

IV. *Ita verò præparatus utcunq; succus ali-
mentaris , per evacuatos poros ubiq; distributus ,
nutritionem tandem absolvet ?*

Ita quidem opinor , & succum quidem , post
expositam qualemcunque præparationem , cir-
culatione quâdam ad ima reverti , ut infimæ

quoque radices, aliæque porrò partes inferiores, hoc præparatiore succo alantur, quæ à succo crudiore, per radices immediatè ex terra recepto, ali non poterant, partibus succi nutritii nondum fatis ad replendos evacuatos poros adaptatis.

V. De animalibus perfectioribus superius audivimus, in iis respirationem quoq; ad nutritionem summoperè requiri; tale quid utiq; in plantarum nutritione non postulabitur?

Equidem, uti pisces propriè dictis pulmonibus destituuntur, vesiculis interim aëre plenis, tanquam analogis quibusdam respirandi organis, etiam in alium finem gaudentibus, ranis interim veris pulmonibus manifestius vesiculosis instructis: ita Malpighius, in bombycibus aliisque erucarum speciebus foramina quædam in exteriorè corporis habitu patula, & in vasa quædam intus abscondita & microscopiis detecta observavit. Neque minus analogum quiddam in plantis notavit, fistulas nempe & subtiles canaliculos, nullo succo turgentes, sed aëre mero repletos, quos æquivocè quodammodo respirationi destinatos credit, ideoque, ut in bombycibus & erucis, hîc etiam *Tracheas* denominavit.

CAP. III.

De

Plantarum Incrementis & Augmentationibus.

I. Cur non nutriri solum plantas, sed augeri quoque oportuit?

Quia plantarum non solum, sed animalium quoque, adeoque viventium omnium, parva sunt ex rudimentis ferè insensibilibus, initia; hæc nutrita quidem sed non aucta, ob- eundis, quibus destinata sunt divinitus, fun- ctionibus, illâ primâ suâ exilitate inepta forent. Itaque augmentationis interventu staturam ju- stam & magnitudinem debitam acquirunt, quæ destinatae cujusque functioni proportionata fu- erit, summo ubique Creatoris consilio.

II. Quenam autem differentia est inter Nu- tritionem & Augmentationem?

Non videtur alia esse, quàm secundum ma- gis & minus. Nimirum, si viventi cuiquam tantundem restituitur, quantum transpiratio- ne perpetuâ deperditum est & absumptum; id vocaretur simpliciter *Nutriri*; Sin plus alimenti in poros evacuatos intruditur, quàm transpi- rando fuerat absumptum; id appellamus *Augeri*, poris nimirum singulis in omnes dimensiones insensibiliter ampliatis, sufficiente nutrimen- to repletis, & hoc pacto singulis etiam portio- nibus grandioribus insensibiliter & lentissimo progressu adauctis.

III. Duo tamen inprimis adhuc explicari mihi velim: Quæ causa poros nutriendorum primum ampliet? deinde sufficienti nutrimento inferciat?

In plantis res est declaratu facillima. Nam (1) illa, quam diximus, plantarum anima, Calor Solaris, partim intrinsecus, maximè verò forinsecus accedens & penetrans, aërem intra plantarum tracheas & poros singulos evacuatos contentum valdè dilatat, veluti Thermoscopia testantur, & hoc aëre dilatato mediante molliusculos porulorum parietes expandit & exporrigit. In extensa verò & semivacua illorum spatia (2) incumbentis succo nutritio ingens aëris pondus, illum attollit, nec sine violentia intrudit.

IV. Num eadem est augmentationis ratio in animalibus?

Imò multò plenior, sicut ipsa quòque Nutritio. Nam in his non solùm calor solaris operatur, qui hiemali tempore valdè debilis est, ut plantæ teneriores omnes emoriantur, nisi quòd circa radices intra terræ viscera absconditas, aliquæ vitalitatis suo tempore resuscitandæ reliquiæ conserventur: Sed insuper, ac inprimis calor vitalis in sanguine perfectiorum animalium, miro & prorsus divino artificio, ex ipsis alimentis, perpetuò & quotidie de novo accensus; ut silentio præteream, innumera nutrimenti, ad augmentationem æquè ac nutritionem

tionem ipsam destinati, præparandi instrumenta, sigillatim hoc loco non enumeranda, nedum plenius, quoad singulas cujusque functiones explicanda.

V. Num viventia, uti, quamdiu vivunt, perpetuò nutriuntur, ita perpetuò quoque crescunt & augmentantur?

Uti prius affirmatur, ita posterius negare ipsa experientia jubet. Hæc enim manifestè docet, non solum nutritione diu carere non posse, quicquid vitam habet, eamque conservare cupit; sed etiam augmenta singula quidem capiunt, sub initium subitanea, deinde gradatim tardiora, donec tandem augmentationis sensibilis effectus in altum penitus cesset; obtento sc. eo staturæ robore, quod ad cujusque functionem ordinariam expediendam requiritur. Atque, uti hæc tandem cessantis augmenti ratio à causa finali petita est; sic alia quoque ab efficiente causa petita in promptu est, sicut alia quoque perpetuæ necessitatis novi subinde nutrimenti.

VI. Expone mihi quæso utrasque has rationes?

Posterioris ratio est perpetua partium fluxarum & mollium exhalabilitas, quas adeò perpetuò restaurari nutritione necessum est. Prius ex eo palam fit, quòd partes ab initio mollissimæ deinceps gradatim magis indurantur, in-

primis ossa in animalibus, & caules sive stipites lignosi in plantis. Quamdiu igitur hæ partes induratiores, aliquem saltem mollitiei gradum habent, tamdiu augmenti alicujus & extensionis in altum capaces sunt; ubi mollities omnis, ob calorem continuatum, defierit; etiam augmentum in altitudinem omne cessat.

C A P. IV.

De

Plantarum Generatione.

I. *Num, uti nutritio & augmentatio plantarum, ita generatio quoq, à Calore Solarì tanquam anima peragitur?*

A Ad hanc quæstionem cum distinctione respondendum est. Si de seminum, quæ vulgò vocamus, in terram projectorum progerminatione in dias has auras facta, & postea continuatâ perpetuâ nutritione, succedentibus etiam continuis incrementis, sermo sit, donec ad eam magnitudinem adoleverint, quæ exequendæ destinatæ functioni sufficiat; tunc calor solaris utique sufficiens esse potest, ad totam hanc generationem absolvendam, quia rudis delineatio futuræ plantæ actu ipso in semine jam continetur, nec aliâ operatione quàm nutritione & lentâ augmentatione opus habet. Et sic in animalium etiam hominumque corporibus generandis, præter Solis calorem, nonnunquam valdè

valdè debilem, sanguinis etiam calor circa uterum collectus copiosior, sufficit ad enutriendum illud corpusculi generandi rudimentum, quod in ovulis foemellarum pariter actu jam delitescit, quoad potiora & essentialia sua lineamenta.

II. *Quid si verò de ipsa illa prima rudimentorum delineatione, quæ vel in plantarum, vel in animalium ovulis, jam aucta quodammodo, & aliquousq; enutrita, vel cernitur, vel supponitur, sermo sit; num & ibi generatio & initialis efformatio calori sive solis sive sanguinis attribui potest?*

Minimè verò gentium. Cùm enim prima illa & initialis delineatio staminum essentialium, in rudimentis primis, sive plantarum sive animalium, organica sit; nullius autem organi vel abjectissimi designatio aut efformatio absque consilio fit; consilium autem nuspiam nisi in mentibus sive substantiis cogitantibus reperitur: in aperto est, istas organizationes primordiales frustra calori solis & sanguinis adtribui; frustra item cuicunque alii agenti materiali, & consequenter animabus etiam brutorum aut plantarum, quæcunque fingantur aut supponantur, aliis; frustra item ipsis mentibus humanis, quæ talium rudimentorum omnium, ubi, quando, & quomodo genita sint, aut adhuc gignantur? ignorantissimæ sunt: ut adeo evidentissimum sit, præsertim, si innumerabilem illorum

rudimentorum primorum & multitudinem & varietatem pensitemus, ea ipsa omnia Deum ipsum unicè causam efficientem agnoscere.

III. *Sed quæri potest, quando, & quo tempore DEVS hæc rudimenta seminalia, vel adhuc creet, vel olim creaverit?*

Non est verosimile, DEVM hoc, quod Natura corporea, quippe consilio destituta, præstare nunquam potest, tum demum, cum novæ plantæ, aut nova animalia, procreanda veniunt, illorum prima stamina & rudimenta primordialia præparare; sed credibile est, in prima statim mundi creatione, eum, uti puncta seu corpuscula, vel particulas, hæc, quibus fruimur, elementa componentes, nec organicas, nec animari aptas, sic alias organicas quoque & animari aptas, utrasque innumerabiles, sed sibi invicem permixtas condidisse, vel omnipotente suo nutu fieri jussisse; ex quibus in locum commodum delatis, & succum suis fibris proportionatum nactis, ovula primum formaverit natura, motu quidem materiæ decentis interveniente, nullo tamen ipsius consilio.

IV. *Quid intelligis per hæc ovula, & quomodo ea ab ipsis punctis seu rudimentis primordialibus divinitus preparatis distinguuntur?*

Per rudimenta primordialia sive seminalia, intelligo nuda illa punctula, pro varietate futuro-

turorum viventium innumerabilium, variè organizata; nuda illa quidem & nondum animata, sed ipsis elementorum particulis inorganicis passim & promiscuè intermixta: Per ovula verò intelligo eadem rudimenta in plantarum animaliumque primævorum, aliorumque deinceps succedentium fibris, viis & canalibus unà cum humore nutritio crudo recepta, per easdem vias ad loculamenta, quæ ovulis formandis destinantur, delata, ibidemque, recepto jam & admisso in porulos suos insensibiles puriore, subtiliore, & inter ascensum defæcatoriore porulisque dictis jam appropriato succo, nutriri augerique cœpta, ad eam usque maturitatem, ut apta sint vel terræ mandari, vel in foemellarum uteros, masculino semine foecundata priùs, transmitti. Qui succus in ovulis plantarum sive feminibus membranis quibusdam circumdatus, (sicut ille quoque in ovis animalium) sensim deinde in pulpam aliquam quasi farinaceam concretus, postmodum ab humore terræ iterum subigitur & colliquatur, ad primum radiculae nutrimentum porrò suppeditandum, donec in terræ quasi utero radicata, succum ex illa ulteriorem (sicut ovuli animalis radícula in substantia uteri, tanquam terra, radicata ex ipso matris corpore) recipere apta nata fuerit.

V. Quenam verò vel cura, vel providentia, selectum rudimentorum instituit, ut ea solum cuiq; plantarum generi obtingant, quæ suæ speciei ovula sive semina constituent?

Non opus est tali selectu, sed cum unà cum succo pluviali crudo, omnis generis rudimenta sive puncta seminalia promiscuè in quavis planta recipiantur, non tamen nisi ea locum commodum & succum suæ organizationi (quam Dei sapientia ab omnibus aliis distinxit) proportionatum inibi reperiunt, & in ovula convertuntur, quæ sunt cum planta matre ejusdem speciei sive essentialis texturæ; reliqua verò cum reliquiis succi nutritii in auras abeunt, aliarum plantarum generationibus inservitura: quod idem de animalium rudimentis cogitandum est.

VI. Num eodem modo plantarum propagatio fit per surculum, sive per insitionem?

Eodem, inquam, modo; nec aliud responsum interroganti nuper de hac quæstione per literas Viro Doctissimo, Amico meo, aut potui dare aut debui. Nec enim aliud discrimen reperio inter ejusmodi surculum stipiti jam in terra radicato insitum, & inter plantam recen-ter è semine in eadem terra radicato pronascentem, quàm quod hæc succum pluvialem crudum immediate ex terra recipiat, ille verò succum jam quodammodo in poris stipitis percolatum, sed in poris & fibris surculi aliter contextis aliter

ter percolandum & mutandum : cætera verò eadem utrobique manent.

VII. *Sub finem informari velim, quomodo secundum hanc hypothesin plantæ nonnullæ monstrosæ generari possint ?*

Non credo in ulla alia rectius & facilius rationem talium monstrositatum (quales observare non paucas in plantis pariter & animalibus mihi contigit) dari posse. Nempe, non est credibile, DEVM ipsum ejusmodi rudimenta monstrosa sub initium creationis condidisse; sed potius, quicquid horum contigerit, errore quodam vel inscitiâ potius Naturæ contingere; cum nimirum casu quodam fit, ut ovulum unum, ordinariè circa singula rudimenta formari solitum, fortè fortunâ illorum bina, unâ cum succo elaboratissimo, qui primordiis nutritionis unius sufficere possit, complectatur; quæ mille modis irregulariter disponi conjungique queant, haut facile verò utraque, ab eodem deficiente succo sufficienter enutrirî. Quo ipso necessariò fit, ut vel distorto modo fiat duorum illorum rudimentorum conjunctio & connexio, vel quædam alterutrius portiones deficient & exarescant, reliquæ verò cum reliquis monstrosè coalescant, & utcunque enutriantur: prout exempla irregularitatum illarum mille modis variant.

SOLI DEO GLORIA!

Nota: pag. 624. post lin. 9. addendum CAP.I.



